

नमो नमो निम्मल दंसणरुस

आगमसुत्ताणि



६

नायाधम्मकहाओ

छट्ठं अंगसुत्तं

संसोहय-संपायग

निपुण निर्यामड पू. मुनिराज श्री सुधर्म सागररु म. ना शिष्य

मुनि दीपरत्नसागर

બાલ બલચારી શ્રી જોમિજાયાચ નમઃ

નમો નમો નિમ્મલ દંતણસ્ત

શ્રી આનંદ-ક્ષમા-લલિત-સુશીલ-સુધર્મ(સાગરગુરુત્થો) નમઃ

૪૫-આગમસુત્તાણિ

—: સં સો હ ય—સં પા ય ગ :—

પૂજ્ય પુનિરાજ શ્રી સુધર્મસાગરજી મદારાજ સહાયના વચ્ચે

મુનિ દીપરત્નસાગર

તા. ૨૨/૭/૯૬

સોમવાર ૨૦૫૨

અષાઢ સુદ : ૬

૪૫ આગમન્ય સેટની કિંમત - રૂ. ૧૫૦૦/-
(ભાવે આગમ-કાર્ય ખાતે)

આગમ શ્રુત પ્રકાશન

મુદ્રક

નવપ્રભાત પ્રિન્ટીંગ પ્રેસ ધીકાંટારોડ, અમદાવાદ.

કચ્છોજ

શ્રી ગ્રાફિક્સ ૨૧, સુભાષનગર, ગિરધરનગર,
શાહીબાગ, અમદાવાદ.

[2]

આર્થિક અનુદાન ઠાતા

૪૫ આગમમાં મુખ્ય દ્રવ્ય સહાયક

નિષ્ઠાભાષી કમ્પ્લીવચા શ્રી સૌમ્યગુણાશ્રીજીની પ્રેરણાથી

૯ મ્ય ૯ શુ ક ગુ રા ની જ મ લો ષ ણિ ઠા

શ્રીમતી નયનાબેન રમેશચંદ્ર શાહ - સપ્તિવાર [વડોદરા]

૯૭૭૬૦

● અલગ-અલગ આગમના મુખ્ય દ્રવ્ય સહાયકો ●

- ૧ સાધ્વીશ્રી રત્નત્રયાશ્રીજી મ. ના પરમવિનેયા સાધ્વીશ્રી સૌમ્યગુણાશ્રીજીની પ્રેરણાથી - શ્રી શાંતિલાલ કેશવલાલના બંગલે, ૨૦૫૧ ના ચાતુર્માસમાં થયેલી જ્ઞાનની ઉપજમાંથી - વડોદરા
- ૨ રત્નત્રયાશ્રીજી સાધ્વીશ્રી સૌમ્યગુણાશ્રીજીની પ્રેરણાથી શ્રી હરિનગર જૈન સંઘ વડોદરામાં શ્રી પર્યુષણ પર્વમાં થયેલી સૂત્રોની બોલીની ઉપજમાંથી - સં. ૨૦૫૧
- ૩ સ્વનામધન્યા સાધ્વીશ્રી સૌમ્યગુણાશ્રીજીની પ્રેરણાથી-શ્રી શાંતિલાલ કેશવલાલના બંગલે, વડોદરા, ૨૦૫૧ના ચોમાસાની આરાધના નિમિત્તે
- ૪ પ્રધાંતમૂર્તિ સા.સૌમ્યગુણાશ્રીજીના શિષ્યા તપસ્વી સા.સમજ્ઞાશ્રીજીના ૪૫ આગમના ૪૫ ઉપવાસ નિમિત્તે શા.કે.બંગલે થયેલ જ્ઞાનપૂજન તથા ગુરુભક્તો તરફથી. બરોડા
- ૫ સા. શ્રી રત્નત્રયાશ્રીજીના પ્રશિષ્યા સા. સમજ્ઞાશ્રીજીના સિદ્ધિતપ નિમિત્તે સ્વ. રતિલાલ કાલીદાસ વોરાના સ્મરણાર્થે લીલીબેન રતીલાલ તરફથી, સુરેન્દ્રનગર.
- ૬ પૂ. રત્નત્રયાશ્રીજી મ.ની દ્વિતીયપુન્યતિથિ નિમિત્તે સા. મોક્ષરત્નાશ્રીજીની પ્રેરણાથી શાહ ખીમચંદ છગનલાલ પરિવાર, હ. મંજુલા બેન. ખેરવાવાળા [હાલ-મુંબઈ]
- ૭ સાધ્વી શ્રી સૌમ્યગુણાશ્રીજીના ઉપદેશથી શ્રી ગુજરાતી ચે. મૂ. જૈન સંઘ, મદ્રાસ હસ્તે શ્રી ઈન્દ્રવદન રતીલાલ દામાણી - વિંછીયાવાળા-હાલ-મદ્રાસ
- ૮ સા. શ્રી સૌમ્યગુણાશ્રીજીની પ્રેરણાથી, સ્વ. ચતુરાબેન પિતાબરદાસ પી. દામાણીના સ્મરણાર્થે તેમનો પરિવાર, હ. ઈન્દ્રવદન રતીલાલ દામાણી-વિંછીયાવાળા (મદ્રાસ)
- ૯ પૂ. ગુરુમાતા રત્નત્રયાશ્રીજીના અંતેવાસી સાધ્વી શ્રી સૌમ્યગુણાશ્રીજી ની પ્રેરણાથી પૂજ્યશ્રીની પુન્યતિથિ નિમિત્તે, શ્રી સાંકળીબાઈ જૈન શ્રાવિકા ઉપાશ્રય-રાણપુર તથા શ્રી જોરાવરનગર જૈન શ્રાવિકાસંઘની જ્ઞાનની ઉપજમાંથી
- ૧૦ શ્રીમતી દીપ્તીબેન સુનીલભાઈ પટેલ હ. નયનાબેન, લોસએન્જલેસ, અમેરિકા
- ૧૧ શ્રીમતી અનુપમા બહેન ભરતભાઈ ગુપ્તા. હ. નયનાબેન, વડોદરા
- ૧૨ શ્રીમતી પ્રિયંકાબેન પરાગભાઈ જવેરી, હ. નયનાબેન, મુંબઈ
- ૧૩ શ્રી અલકાપુરી-ચે. મૂર્તિ જૈનસંઘ-વડોદરા-હ. નયનાબેન
- ૧૪ શ્રી વાસુપૂજ્ય ચૈત્ય-મેહુલ સોસાયટી, સુભાનપુરા-જ્ઞાનખાતુ-વડોદરા હ. લાલુબેન
- ૧૫ શ્રીમતી સુમિત્રાબહેન હસમુખભાઈ સંઘવી, ખાનપુર (ઈન્દોડા) અમદાવાદ

[3]

- ૧૬ સ્વ. મનસુખલાલ જગજીવનદાસ શાહ તથા સ્વ. મંગળાબેન જગજીવનદાસના સ્મરણાર્થે શાહ મેડિકલ સ્ટોર, ધોરાજી વાળા, હ. અનુભાઈ તથા જગદીશભાઈ
- ૧૭ શ્રી કોઠીપોળ, શ્રે. મૂર્તિ. જૈન સંઘ, શ્રી શાંતિનાથ જિનાલય - જ્ઞાનખાતુ, વડોદરા
- ૧૮ શ્રી કારેલી બાગ શ્રે. મૂર્તિ. જૈનસંઘ, વડોદરા-હ. શાંતિભાઈ
- ૧૯ શ્રી કૃષ્ણનગર શ્રે. મૂર્તિ, જૈનસંઘ-અમદાવાદ.
- ૨૦ શ્રી કૃષ્ણનગર શ્રે. મૂર્તિ. જૈનસંઘ, અમદાવાદ
- ૨૧ સિદ્ધાન્તનિષ્ઠ પૂ. ગચ્છા. આ. શ્રી વિજયરામચંદ્રસૂરીશ્વરજી મ. સા. ના દિવ્યઆશીષથી - પટેલ આશાભાઈ સોમાભાઈ, હ. લલીતાબેન, સુભાનપુરા, વડોદરા
- ૨૨ સ્વ. વિરચંદભાઈ મણીલાલ લીંબડીવાળા, તથા સ્વ. જાસુદેવેન વિરચંદભાઈની શ્રુતજ્ઞાનારાવાનાની સ્મૃત્યર્થે તેમના સુપુત્રો તરફથી, અમદાવાદ
- ૨૩ વૈયાવચ્ચપરાયણા શ્રમણીવર્યા શ્રી અનંતગુણાશ્રીજીની પ્રેરણાથી સમ્યગ્દર્શન આરાધના ભવનટ્રસ્ટ, અમદાવાદ તરફથી [શ્રી મહાનિસીહ સૂત્ર માટે]

● ૪૫ - આગમ સેટ-યોજના ગ્રાહક - ઠાંતા ●

પ. પૂ. સા. સૌમ્યગુણાશ્રી મ. ના ઉપદેશ તથા તેમના સંસારીભાઈ શ્રી ઈન્દ્રવદન રતીલાલ દામાફી (વિંછીયાવાળા) - મદ્રાસના પ્રેરક સૌજ્યથી

૧. શ્રીમતી ગુણીબેન જ્યાનંદભાઈ સી. કોઠારી, પાલનપુર, હાલ-મદ્રાસ
૨. શ્રીમતી દેવ્યાનીબેન ચંદ્રકાન્તભાઈ એમ. ટોલીયા, વાંકાનેર, હાલ-મદ્રાસ
૩. શ્રીમતી સુશીલાબેન શાંતિભાઈ એન. વોરા, જામનગર, હાલ-મદ્રાસ
૪. શ્રીમતી પુષ્પાબેન અમૃતલાલ ટી. શાહ, ચુડા, હાલ-મદ્રાસ
૫. શ્રીમતી નિર્મલાબેન જયંતિભાઈ એસ. પહેતા, ધાન, હાલ-મદ્રાસ
૬. શ્રીમતી મધુકાન્તાબેન રતિલાલ જે. શાહ, વીંછીયા, હાલ-મદ્રાસ
૭. શ્રીમતી ગુણીબેન દિનેશભાઈ સી. શાહ, પાલનપુર, હાલ-મદ્રાસ
૮. શ્રીમતી મૃદુલાબેન પ્રિયકાન્તભાઈ સી. શાહ, મૂળી, હાલ-મદ્રાસ
૯. શ્રીમતી નયનાબેન નરેન્દ્રભાઈ આર. શાહ, મૂળી, હાલ-મદ્રાસ
૧૦. શ્રીમતી મંજુલાબેન ગુણવંતભાઈ સી. દોશી, મદ્રાસ
૧૧. શ્રીમતી કુંદનબેન રતીલાલ જે. શાહ કાપડીયા પરિવાર તરફથી લખતર, હાલ-મદ્રાસ
૧૨. શ્રી વાડીલાલ કાળીદાસભાઈ દોશી, મોરબી, હાલ-મદ્રાસ
૧૩. શ્રે. પી. બી. શાહ એન્ડ કું. હ. અરવિંદભાઈ મોરબી, હાલ-મદ્રાસ
૧૪. સ્વ. માતૃશ્રી ચંપાબેનના સ્મરણાર્થે શ્રી નગીનદાસ અમૃતલાલ શાહ, મદ્રાસ
૧૫. અમરીભાઈ-૫ સ્મરણાર્થે હ. બાબુલાલ - મહાવીરચંદ બોહરા, મદ્રાસ

[4]

સા. મોક્ષરત્નાશ્રીજી તથા સા. શ્રી સમજાશ્રીજીની પ્રેરણાથી - હાલ ધુલિયાવાળા

- | | |
|----------------------------|--------------------------------|
| ૧ કાંતિલાલ હજરીલાલ યોવટીયા | ૨ સંપત્રી સનલાલ ભગવાનદાસ રાઠોડ |
| ૩ મધુમતી રાજેશ રેદાસની | ૪ સરલાબેન રમેશચંદ્ર વોરા |

૫ સુમનબાઈ બાલચંદજી ચોરડીયા

- ૬ અ.સૌ. હંસાબેન ઉત્તમલાલ સુખડીયાના વર્ષિતપ નિમિત્તે ઉત્તમલાલ રતીલાલ રાણપુરાવાળા તરફથી
૭ સ્વ. પૂ. પિતાશ્રી રતિલાલ તારાચંદ તથા કાન્તાબેન રતીલાલના આત્મશ્રેયાર્થે તેમના સુપુત્રો તરફથી

- ૧ સુખડીયા હસમુખલાલ વનેચંદ (જમવંઘલી) નંદુરબાર
૨ ગં. સ્વ. સુરજબેન પદમશી શાહ. હ. જ્યોતિબેન નંદુરબાર
૩ સા. સમજાશ્રીજીની પ્રેરણાથી શ્રી અજિતનાથ - મંદિર ચે. મૂર્તિ સંપના શ્રાવિકાબહેનો નંદુરબાર
૪ સા. સમજાશ્રીજીની પ્રેરણાથી - શાહ યુનિલાલજી શિવલાલજી, સોનગીર
૫ સુખડીયા ચત્રલુજ જગમોહનદાસ હ. વીરાભાઈ - ધોરાજી
૬ શાહ મફતલાલ ફકીરચંદ, વિધિકારક (ડભોઈ) હાલ-અમદાવાદ
૭ સા. શ્રી સૌમ્યગુણશ્રીજીની પ્રેરણાથી રમેશચંદ્ર મનસુખલાલ શાહ, અમદાવાદ
૮ સા. શ્રી સૌમ્યગુણશ્રીજીની પ્રેરણાથી શ્રીમતી જસુદબેન લક્ષ્મીચંદ મેતા, હ. ઈન્દુભાઈ દામાસી, સુરત
૯ સા. શ્રી મોક્ષરત્નાશ્રીજીની પ્રેરણાથી સ્વ. સોમચંદ બોધાભાઈ પરિવાર હ. બાલુબેન, રામપુરા
૧૦ પૂ. આગમોદ્ધારકશ્રીના સમુદાયના દીર્ઘસંઘમી વિદુષી સા. શ્રી સુતારાશ્રીજી જમનગરવાળાના ઉપદેશથી તથા તેમના પક્ષિષ્યાની પુનિત પ્રેરણાથી
૧૧ ભોગીલાલ ત્રીભોવનદાસ શાહ, હ. નયનાબેન, વડોદરા

૧૨ સંગીતા અજમેરીયા - મોરબી

● ૪૫ આમગસેઠ યોજના-જામદાતા ●

૧ પરમાર દીપ્તી રાજેશકુમાર-વડોદરા

૨. સા. શ્રી સૌમ્યગુણશ્રીજીની પ્રેરણાથી કિરણબેન અજિતકુમાર કાપડીયા, વડોદરા
૩. સા. શ્રી સમજાશ્રીજીની પ્રેરણાથી - શ્રી નિઝામપુરા જૈન સંઘ, વડોદરા
૪. સા. શ્રી સમજાશ્રીજીની પ્રેરણાથી - ચંદિકાબેન મહેશભાઈ શાહ, વડોદરા
૫. સા. શ્રી મોક્ષરત્નાશ્રીજીની પ્રેરણાથી ગં. સ્વ. વસંતબેન ત્રંબકલાલ દોશી, નંદુરબાર
૬. ખાણેકબેન શાહ- વડોદરા
૭. શોભનાબેન શાહ - વડોદરા


[5]

:- अ-भा-रा- प्र-क-श-नी :-

- [१] अभिनव हेम लघुप्रक्रिया -१- समाङ्ग विवरणम्
 [२] अभिनव हेम लघुप्रक्रिया -२- समाङ्ग विवरणम्
 [३] अभिनव हेम लघुप्रक्रिया -३- समाङ्ग विवरणम्
 [४] अभिनव हेम लघुप्रक्रिया -४- समाङ्ग विवरणम्
 [५] कृदन्तमाला
 [६] चैत्यवन्दन पर्वमाला
 [७] चैत्यवन्दन सङ्ग्रह - तीर्थजिनविशेष
 [८] चैत्यवन्दन चोविशी
 [९] शत्रुञ्जय भक्ति [आवृत्ति-दो]
 [१०] अभिनव जैन पञ्चाङ्ग - २०४६
 [११] अम्बिनव उपदेश प्रासाद -१- श्रावक कर्तव्य - १ थी ११
 [१२] अम्बिनव उपदेश प्रासाद -२- श्रावक कर्तव्य - १२ थी १५
 [१३] अम्बिनव उपदेश प्रासाद -३- श्रावक कर्तव्य - १६ थी ३६
 [१४] नवपद-श्रीपाल- [शाश्वती ओणीना व्याख्यान रूपे]
 [१५] समाधिभरत [विधि-सूत्र-पद्य-आराधना- भरतभेद-संग्रह]
 [१६] चैत्यवन्दनभाषा [७७७ चैत्यवन्दनो नो संग्रह]
 [१७] तत्त्वार्थ सूत्र प्रबोधटीका [अध्याय-१]
 [१८] तत्त्वार्थ सूत्रना आगम आधार स्थानो
 [१९] सिद्धायलनो साथी [आवृत्ति-भे]
 [२०] चैत्यपरिपाटी
 [२१] अमदावाह जिनमंदिर उपाश्रय आदि डिरेक्टरी
 [२२] शत्रुञ्जय लक्ष्मी [आवृत्ति-भे]
 [२३] श्री नवकारमंत्र नवलाभ जाप नोंधपोधी
 [२४] श्री चारित्र पद्य अंक करोड जाप नोंधपोधी
 [२५] श्री भारप्रत पुस्तिका तथा अन्य नियमो [आवृत्ति-चार]
 [२६] अम्बिनव जैन पंथांग- २०४२; [सर्व प्रथम, १३ विल्हागोमां]
 [२७] श्री ज्ञानपद्य पूजा
 [२८] अंतिम आराधना तथा साधु साध्वी काणधर्म विधि
 [२९] श्रावक अंतिम आराधना [आवृत्ति-त्रय]
 [३०] वीतराग स्तुति संग्रह [११५१-व्याववाही स्तुतिओ]
 [३१] (पूज्य आगमोद्धारकश्रीना समुदायना) कायमी संपर्क स्थली
 [३२] तत्त्वार्थाधिगमसूत्र अम्बिनवटीका- अध्याय-१
 [३३] तत्त्वार्थाधिगमसूत्र अम्बिनवटीका - अध्याय-२
 [३४] तत्त्वार्थाधिगमसूत्र अम्बिनवटीका- अध्याय-३

[6]

- [३५] तत्त्वार्थाधिगम सूत्र अभिनवटीका- अध्याय-४
 [३६] तत्त्वार्थाधिगम सूत्र अभिनवटीका- अध्याय-५
 [३७] तत्त्वार्थाधिगम सूत्र अभिनवटीका- अध्याय-६
 [३८] तत्त्वार्थाधिगम सूत्र अभिनवटीका- अध्याय-७
 [३९] तत्त्वार्थाधिगम सूत्र अभिनवटीका- अध्याय-८
 [४०] तत्त्वार्थाधिगम सूत्र अभिनवटीका- अध्याय-९
 [४१] तत्त्वार्थाधिगमसूत्र अभिनवटीका- अध्याय-१०



| | | |
|------------------------|-------------------|---------------------|
| [४२] आयारो | [आगमसुत्ताणि-१] | पढमं अंगसुत्तं |
| [४३] सूयगडो | [आगमसुत्ताणि-२] | बीअं अंगसुत्तं |
| [४४] ठाणं | [आगमसुत्ताणि-३] | तइयं अंगसुत्तं |
| [४५] समवाओ | [आगमसुत्ताणि-४] | चउत्थं अंगसुत्तं |
| [४६] विवाहपत्रत्ति | [आगमसुत्ताणि-५] | पंचमं अंगसुत्तं |
| [४७] नायाधम्मकहाओ | [आगमसुत्ताणि-६] | छट्ठं अंगसुत्तं |
| [४८] उवासगदसाओ | [आगमसुत्ताणि-७] | सत्तमं अंगसुत्तं |
| [४९] अंतगडदसाओ | [आगमसुत्ताणि-८] | अट्ठमं अंगसुत्तं |
| [५०] अनुत्तरोयवाईयदसाओ | [आगमसुत्ताणि-९] | नवमं अंगसुत्तं |
| [५१] पणहावागरणं | [आगमसुत्ताणि-१०] | दसमं अंगसुत्तं |
| [५२] विवागसूयं | [आगमसुत्ताणि-११] | एक्करसमं अंगसुत्तं |
| [५३] उववाइअं | [आगमसुत्ताणि-१२] | पढमं उवंगसुत्तं |
| [५४] रायपस्तेणियं | [आगमसुत्ताणि-१३] | बीअं उवंगसुत्तं |
| [५५] जीवाजीवाभिगम | [आगमसुत्ताणि-१४] | तइयं उवंगसुत्तं |
| [५६] पत्रवणा-सुत्त | [आगमसुत्ताणि-१५] | चउत्थं उवंगसुत्तं |
| [५७] सूरपत्रत्ति | [आगमसुत्ताणि-१६] | पंचमं उवंगसुत्तं |
| [५८] चंदपत्रत्ति | [आगमसुत्ताणि-१७] | छट्ठं उवंगसुत्तं |
| [५९] जंबूहीवपत्रत्ति | [आगमसुत्ताणि-१८] | सत्तमं उवंगसुत्तं |
| [६०] निरयावलियाणं | [आगमसुत्ताणि-१९] | अट्ठमं उवंगसुत्तं |
| [६१] कप्पवडिसयाणं | [आगमसुत्ताणि-२०] | नवमं उवंगसुत्तं |
| [६२] पुक्कियाणं | [आगमसुत्ताणि-२१] | दसमं उवंगसुत्तं |
| [६३] पुप्फचूलियाणं | [आगमसुत्ताणि-२२] | एक्करसमं उवंगसुत्तं |
| [६४] वण्हिदसाणं | [आगमसुत्ताणि-२३] | वारसमं उवंगसुत्तं |
| [६५] चउसरण | [आगमसुत्ताणि-२४] | पढमं पईण्णगं |
| [६६] आउरपच्चम्खाण | [आगमसुत्ताणि-२५] | बीअं पईण्णगं |
| [६७] महापच्चक्खाण | [आगमसुत्ताणि-२६] | तइअं पईण्णगं |
| [६८] भत्त परिण्णा | [आगमसुत्ताणि-२७] | चउत्थं पईण्णगं |

[7]

| | | |
|---------------------|---------------------|------------------|
| [૬૯] તંદુલવેયાલિયં | [આગમસુત્તાણિ-૨૮] | પંચમં પર્વણગં |
| [૭૦] સંથારગં | [આગમસુત્તાણિ-૨૯] | છટ્ઠં પર્વણગં |
| [૭૧] ગઢ્યાધાર | [આગમસુત્તાણિ-૩૦-૧] | સત્તમં પર્વણગં-૧ |
| [૭૨] ચંદાવિજય | [આગમસુત્તાણિ-૩૦-૨] | સત્તમં પર્વણગં-૨ |
| [૭૩] ગણિવિજ્ઞા | [આગમસુત્તાણિ-૩૧] | અટ્ઠમં પર્વણગં |
| [૭૪] દેવિંદત્યઝો | [આગમસુત્તાણિ-૩૨] | નવમં પર્વણગં |
| [૭૫] મરણસમાહિ | [આગમસુત્તાણિ-૩૩/૧] | દસમં પર્વણગં-૧ |
| [૭૬] વીરત્યવ | [આગમસુત્તાણિ-૩૩/૨] | દસમં પર્વણગં-૨ |
| [૭૭] નિસીહ | [આગમસુત્તાણિ-૩૪] | પદમં છેયસુત્તં |
| [૭૮] વુહત્ કપ્થો | [આગમસુત્તાણિ-૩૫] | વીઅં છેયસુત્તં |
| [૭૯] વવહાર | [આગમસુત્તાણિ-૩૬] | તદ્અં છેયસુત્તં |
| [૮૦] દસાસુવસ્કંધં | [આગમસુત્તાણિ-૩૭] | ચઠત્યં છેયસુત્તં |
| [૮૧] જીયકપ્થો | [આગમસુત્તાણિ-૩૮/૧] | પંચમ છેયસુત્તં-૧ |
| [૮૨] પંચકપ્થમાસ | [આગમસુત્તાણિ-૩૮/૨] | પંચમ છેયસુત્તં-૨ |
| [૮૩] મહાનિસીહ | [આગમસુત્તાણિ-૩૯] | છટ્ઠં છેયસુત્તં |
| [૮૪] આવસ્સવં | [આગમસુત્તાણિ-૪૦] | પદમં મૂલસુત્તં |
| [૮૫] ઓહનિચ્ચુત્તિ | [આગમસુત્તાણિ-૪૧/૧] | વીઅં મૂલસુત્તં-૧ |
| [૮૬] પિંડનિચ્ચુત્તિ | [આગમસુત્તાણિ-૪૧/૨] | વીઅં મૂલસુત્તં-૨ |
| [૮૭] દસવેયાલિઅં | [આગમસુત્તાણિ-૪૨] | તદ્અં મૂલસુત્તં |
| [૮૮] ઉત્તરજ્ઞયણં | [આગમસુત્તાણિ-૪૩] | ચઠત્યં મૂલસુત્તં |
| [૮૯] નંદીપૂયં | [આગમસુત્તાણિ-૪૪] | પદમા ચૂલિયા |
| [૯૦] અણુઓગદારાઈ | [આગમસુત્તાણિ-૪૫] | વિતિયા ચૂલિયા |

નોંધ : પ્રકાશન ૧તી ૪૧ અભિનવ શ્રુત પ્રકાશને પ્રગટ કરેલ છે.

પ્રકાશન ૪૨-૮૦ આગમ શ્રુત પ્રકાશને પ્રગટ કરેલ છે.

● ૪૫ આગમ-સેટ ના પ્રાપ્તિસ્થાનો ●

| | |
|---|---|
| શ્રી ડી. કે. ઠક્કર ૧૬, અલકાનગર, ડ્રિયલક્ષ્મી મિલ્સ પાસે એલેમ્બિક રોડ, વડોદરા | શ્રી જગદીશભાઈ એમ. શાહ ૧-અલકાનંદા સોસાયટી, આઝાદ સ્વીટ્સ સામે, આશ્રમ રોડ, વાડજ, અમદાવાદ |
| શ્રીમતી નયનાબેન રમેશચંદ્ર શાહ ૨૦, ગૌતમનગર સોસાયટી રેસકોર્સ સર્કલ પાસે, વડોદરા | ડૉ. પિનાકીન એન. શાહ ૨૧, સુભાષનગર, ગિરધરનગર, શાહીબાગ, અમદાવાદ |

નોંધ:- આગમના ૧-સેટ માટે “આગમ શ્રુત પ્રકાશન” વડોદરા નો રૂ. ૧૫૦૦/-
ની કિંમતનો ડ્રાફ્ટ આપીને જ સેટ મેળવી શકશો.

[8]

-: પરિસિદ્ધ-નિદંસણ :-

- ૧ પદ્મં પરિસિદ્ધં - “વિસયાણુક્રમો”
આ પરિશિષ્ટમાં ૪૫-[૪૯] આગમનાં વિષયોની બૃહદ્ અનુક્રમણિકા છે. જે માટે અમારું ભાવિ પ્રકાશન “૪૫-આગમ ચુહત્ વિસય કોસ” જેવું.
- ૨- વીયં પરિસિદ્ધં “વિસિદ્ધ સદ્ગણુક્રમો”
આ પરિશિષ્ટમાં ૪૫-[૪૯] આગમનાં વિશિષ્ટ શબ્દો કક્કાવારી મુજબ ગોઠવાયેલા છે. તથા જે-તે શબ્દ જે-જે આગમમાં આવેલો છે તેનો સ્થળ નિર્દેશ કરેલો છે. તેને આગમ શબ્દ સંદર્ભ-કોસ પણ કહી શકાય તે માટે અમારું ભાવિ પ્રકાશન “૪૫-આગમ વિસિદ્ધ સદ્કોસ” જેવું.
- ૩- તદ્યં પરિસિદ્ધં- “વિસેસ નામણુક્રમો”
૪૫-[૪૯] આગમમાં આવતા ખાસ નામો જેવા કે ગૌયમ, સોમિલ, ...વગેરે કક્કાવારી ક્રમમાં ગોઠવી, તેનો આગમ-સંદર્ભ આ પરિશિષ્ટમાં રજૂ કરાયો છે. જે માટે અમારું ભાવિ પ્રકાશન “૪૫-આગમ વિસેસ નામ કોસ” જેવું.
- ૪- ચતુત્યં પરિસિદ્ધં - “ગાહાણુક્રમો”
૪૫-[૪૯] આગમમાં આવતી ગાથાને અ કારાદિ ક્રમમાં રજૂ કરેલ છે. સાથે સાથે તે-તે ગાથાનો સ્થળ નિર્દેશ કરેલો છે. જે માટે અમારું ભાવિ પ્રકાશન “૪૫-આગમ ગાહાણુક્રમો” જેવું.
- ૫- પંચમં પરિસિદ્ધં “સુત્તાણુક્રમો”
૪૫-[૪૯] આગમમાં આવતા સૂત્રોને અ કારાદિ ક્રમમાં સ્થળ નિર્દેશ પૂર્વક રજૂ કરવા વિચારણા છે. ભાવિ ઉપયોગિતા વિશેના તજજ્ઞ-અભિપ્રાયધારે હવે ધણી તૈયાર કરવા ભાવના છે.



નોંધ :- સમગ્ર ૪૫ આગમમાં પ્રત્યેક સૂત્ર કે ગાથાને અંતે અંગ્રેજી ક્રમાંકન થકી વૃત્તિનો અંક નિર્દેશ છે. તે વૃત્તિમાં છ છેદ સૂત્રો અને ચંદપન્નત્તિ સિવાયના આગમો માટે અમે પૂ. આગમોદ્ધારક શ્રી સંશોધિત સંપાદિત અને (૧) આગમોદય સમિતિ, (૨) દેવચંદ લાલભાઈ ફંડ (૩) ઋષભદેવ કેસરીમલ પેટ્ટી એ ત્રણ સંસ્થાના પ્રકાશનો જ લીધા છે. - ચંદ પન્નત્તિ માટે હસ્ત વિખિત પ્રત લીધેલી છે, - ચુહત્ક્રમો - પૂ. પુન્યવિજયજી મ.સંપાદિત, નિસીહ-પૂ.કનૈયાલાલજી સંપાદિત, વવહાર, પૂ.મુનિ માણેક સંપાદિત, જીયક્રમો. પૂ.જીનવિજયજી સંપાદિત છે મહાનિસીહ ની વૃત્તિનથી. દસાસુયક્રંધ ની ચૂર્ણિજ મળી છે. માટે તેનું ક્રમાંકન થઈ શકેલ નથી.

:- गंधा पुक्कम :-

| कर्मको | अन्वयणं | सुतं | गाथा | अणुक्कम | पिट्ठको |
|--------|---------|------|------|---------|---------|
|--------|---------|------|------|---------|---------|

:- सु-य-कृष्ण-धो-१ :-

| | | | | | |
|----|------------|---------|-------|---------|---------|
| १ | अकृष्णताणए | १-३६ | १-३ | १-४१ | ३-३३ |
| २ | संघाड | ३७-४९ | - | ४२-५४ | ३३-४१ |
| ३ | अंडे | ५०-५६ | - | ५५-६१ | ४१-४५ |
| ४ | कुम्भे | ५७- | - | ६२- | ४५-४७ |
| ५ | सेलगे | ५८-६७ | - | ६३-७३ | ४७-६० |
| ६ | तुंबे | ६८- | - | ७४- | ६०-६१ |
| ७ | रोहिणी | ६९- | - | ७५- | ६१-६५ |
| ८ | मल्ली | ७०-८४ | ४-१५ | ७६-१०९ | ६५-८८ |
| ९ | पायंदी | ८५-९५ | १६-३१ | ११०-१४० | ८८-९६ |
| १० | चंदिमा | ९६- | - | १४१- | ९६- |
| ११ | दायद्वे | ९७- | - | १४२- | ९७-९८ |
| १२ | उदगणाए | ९८-९९ | - | १४३-१४४ | ९८-१०२ |
| १३ | मंडुक्के | १००-१०१ | ३२- | १४५-१४७ | १०२-१०६ |
| १४ | तेयली | १०२-११० | - | १४८-१५६ | १०६-११४ |
| १५ | नंदीफले | १११- | - | १५७- | ११४-११७ |
| १६ | अवरकंका | ११२-१३७ | - | १५८-१८३ | ११७-१४७ |
| १७ | आइणो | १३८-१४१ | ३३-५२ | १८४-२०७ | १४७-१५२ |
| १८ | सुसुभा | १४२-१४६ | - | २०८-२१२ | १५२-१५८ |
| १९ | पुंडरीए | १४७-१५३ | - | २१३-२१९ | १५८-१६२ |

-: सु-य-क्खं-घो-२ :-

| क्रमां | अन्वयणं | सुतं | वाह | अणुककम | पिटंको |
|--------|---------|---------|-------|---------|---------|
| १ | २ | १५४-१५५ | | २२०-२२४ | १६२-१६८ |
| २ | ५ | १५६- | | २२५- | १६८ |
| ३ | ७४ | १५७- | | २२६ | १६८-१६९ |
| ४ | ५४ | १५८- | | २२७- | १६९- |
| ५ | ३२ | १५९ | ५३-५६ | २२८-२३३ | १६९-१७० |
| ६ | ३२ | १६०- | | २३४- | १७०- |
| ७ | ४ | १६१ | | २३५- | १७०- |
| ८ | ४ | १६२- | | २३६- | १७० |
| ९ | ३७ | १६३ | | २३७- | १७०-१७१ |
| १० | ८ | १६४-१६५ | ५७- | २३८-२४१ | १७१ |

परिसिट्ट-निदंसणं

| क्रम | परिसिट्टं | पिटंको |
|------|-------------------|--------|
| १ | विसेयःणुककमो | ४ |
| २ | विसेयःणुककमो | ४ |
| ३ | विसेयः नामाणुककमो | ४ |
| ४ | गहाणुककमो | ४ |
| ५ | मुत्ताणुककमो | ४ |

नमो नमो निम्नत दंसणस्स
पंचम गणपरश्री सुधर्मात्त्वामिने नमः

६ नायाधम्मकहाओ

छट्ठं अंग सुतं

ऊ प ट मो सु य क्खं धो ऊ

पढमं अज्जवणं - उक्खित्तणाए

(१) उँ नमः सर्वज्ञाय, तेणं कालेणं तेणं समएणं चंपा नामं नवरी होत्या-वण्णओ 1१-1

(२) तीसे णं चंपाए, नवरीए वहिवा उत्तरपुरत्थिमे दिसीभाए पुत्रभदे नामं चेइए होत्या-वण्णओ 1२-2

(३) तत्थ णं चंपाए नवरीए कंणिणए नामं राया होत्या-वण्णओ 1३-3

(४) तेणं कालेणं तेणं समएणं समणस्स भगवओ महावीरस्स अंतेवासी अज्जसुहम्मसे नामं धेरे जातिगंधने क्लरांपत्रे वल-रूव-विणय-नाण-दंसण-चरित्त-लाघव-संपत्रे ओवंसी तेवंसी वच्चंसी जसंसी जियक्केहे जियमाणं जियभाए जियलोहे जिईदिए जियनिहे जियपरीसहे जीवियास-मरणभवविष्णुमुक्के तवप्पहाणं गुणप्पहाणे एवं-करण-चरण-निग्गह-निक्खय-अज्जव-मद्दव-लाघव-खति-गुत्ति-पुत्ति-विज्जा-मंत-बंध-वेच-नय-निचम-सच्च-सोय-नाण-दंसण-चरित्तप्प-हाणे ओंगले घोरे धोरव्व्या धोरतवस्सी धोरवंमचेरवासी उच्चूढसरीरे संखित्तविउल-तेयलेसी चोद्दसपुव्वी चउनाणोवगाए पंचाहिं अणगारसएहिं सद्धिं संपरिवुडे पुव्व्याणुपुव्वि चरनाणे गाभाणु-गामं द्दुइज्जमाणे मुहंमुहेणं विहरमाणे जेणेव चंपा नवरी जेणेव पुत्रभदे चेइए तेणामेव उवागच्छइ उवागच्छिता अहापडिक्खं ओणहं ओगिण्हित्ता संजमेणं तवसा अप्पाणं भावेमाणे विहरति 1४-4

(५) तर णं चंपाए नवरीए परिसा निग्गया धम्मो कहिओ परिसा जामेव दिसिं पाउक्कूया तामेव दिसिं पडिगया तेणं कालेणं तेणं समएणं अज्जसुहम्मस्स अणगारस्स जेद्वे अंतेवासी अज्जजंबू नामं अणगारे कासव गोतोणं सत्तुस्सेहे ।समचउरंस-संठाण-संठिए चइररिसह नारव-संपयणे कणम-पुलग-निघस-पण्ण-गोरे उगतवे दित्ततवे तत्तातवे महातवे उराले घोरे धोरगुणे धोरतवसरी धोरवंमचेरवासी उच्चूढसरीरे संखित्त-विउल-तेयलेसी) अज्जसुहम्मस्स धेरस्स अदूरसामंते उइडं-जाणु अहेतिसिरे ज्ञाणकोद्धो वगाए संजमेणं तवसा अप्पाणं भावेमाणे विहरइ ताए णं से अज्जजंबूनामे अणगारे त्तवसइहे जायसंमए जाचकोउहइहे संजायसइहे संजायसंसए संजायकोउहइहे उप्पत्र-सइहे उप्पत्रसंसए उप्पत्रकोउहइहे समुप्पत्रसइहे समुप्पत्रसंसए समुप्पत्रकोउहइहे उट्टाए उट्टेइ उट्टेता जेणामेव अज्जसुहम्मसे धेरे तेणामेव उवागच्छइ उवागच्छिता अज्जसुहम्मसे धेरे तिक्खुत्तो आयाहिण-पच्चाहणं करेइ करेता वंदइ नमंसइ वंदित्ता नमंसित्ता अज्जसुहम्मस्स धेरस्स नद्धामण्णे नात्तिदूरे मुम्मूसमाणे नमंसमाणे अभिमुहे पंजलिउडे विणएणं पज्जवासमाणे एवं वयासी-जइ णं मंते समणं भगवया महावीरेणं आइगरेणं तित्थगरेणं सहसकुद्धेणं लोगनाहेणं लोगपइवेणं लोगपज्जीवमंणेणं अभयदाणं सरणदाणं चक्कुदएणं मग्गदाणं धम्मदाणं धम्मदेसएणं धम्मनाय-

गेणं धम्मवरचाउरंतचक्कवट्टिणा अप्पडिहयवरनाणदंसणधरेणं जिणेणं जाणएणं बुद्धेणं बोहएणं पुत्तेणं भोवणेणं तिण्णेणं तारएणं सिवमयलमरुयमणंतमक्खयमच्चाबाहमपुणरावत्तयं सासयं ठाणमुवगएणं संपत्तेणं पंचमस्स अंगस्स अयमट्ठे पत्रत्ते छट्ठस्स णं भंते अंगस्स नायाधम्मकहाणं के अट्ठे पत्रत्ते जंबु ति अज्जसुहम्मे येरे अज्जजंबुनामं अणगारं एवं वयासी-एवं खलु जंबू समणेणं भगवया महावीरेणं जाव संपत्तेणं छट्ठस्स अंगस्स दो सुयक्खंधा पत्रत्ता तं जहा-नायाणि य धम्मकहाओ य जइ णं भंते समणेणं भगवया महावीरेणं जाव संपत्तेणं छट्ठस्स अंगस्स दो सुयक्खंधा पत्रत्ता तं जहा-नायाणि य धम्मकहाओ य पढमस्स णं भंते सुयक्खंधस्स समणेणं भगवया महा-वीरेणं जाव संपत्तेणं नायाणं कइ अज्झयणा पत्रत्ता एवं खलु जंबू समणेणं भगवया महावीरेणं जाव संपत्तेणं नायाणं एगुणवीसं अज्झयणा पत्रत्ता [तं जहा]- 1५-१1-5-1

- (६) उक्खित्तणाए संघाडे अंडे कुम्मे य सेलगे
तुंढे य रोहिणी मल्ली मायंदी चंदिमा इ य 11१॥-1
- (७) दावद्दे उदगणाए मंडुकके तेयली वि य
नंदीफले अवरकंका आइण्णे सुंणुमा इ य 11२॥-2
- (८) अवरे य पुंडरीए नाए एगुणवीसमे 1५1-5

(९) जइ णं भंते समणेणं भगवया महावीरेणं जाव संपत्तेणं नायाणं एगुणवीसं अज्झयणा पत्रत्ता तं जहा-उक्खित्तणाए जाव पुंडरीए ति य पढमस्स णं भंते अज्झयणस्स के अट्ठे पत्रत्ते एवं खलु जंबू तेणं कालेणं तेणं समएणं इहेव जंबुदीवे दीवे भारहे वासे दाहिणइद्धभरहे रावगिहे नामं नयरे होत्या-वण्णओ गुणसिलए चेइए-वन्नओ तत्थ णं रायगिहे नयरे सेणिए नामं राया होत्या-महताहिमवंत-महंत-मलय-मंदर-महिंदसारे वण्णओ 1६1-6

(१०) तस्स णं सेणियस्स रण्णो नंदा नामं देवी होत्या-सूमालपाणिपाया वण्णओ तस्स णं सेणियस्स पुत्ते नंदाए देवीए अत्तए अभए नामं कुमारे होत्या-अहीण [पडिपुत्र-पंचिंदियसरीरे लक्खण-वंजण-गुणोबवेए माणुम्माण-प्पमाण-पडिपुत्र-सुजाय-सव्वंगसुंदरंणे सिसिसोभाकारे कंते पियदंसणे] सुरूवे सामदंडभेव-उवप्पयाणनीति-सुप्पउत्त-नय-विहण्णु ईहा-वूह-मगण-गवेसण-अत्थसत्थ-मइविसारए उप्पत्तियाए वेणइयाए कम्मयाए पारिणामियाए-चउच्चिहाए बुद्धीए उववेए सेणियस्स रण्णो बहूणु कज्जेसु य कुडुवेसु य मंतेसु य गुज्जेसु य रहस्सेसु य निच्छएसु य आपुच्छ-गिन्ने पडिपुच्छगिन्ने मैढी पमाणं आहारे आलंबणं चक्खू मैढीमूह पमाणमूए आहारभूए आलंबण-भूए चक्खुभूए सव्वकज्जेसु सव्वभूमियासु लद्धपच्चए विइण्णवियारे रज्जपुरचित्तए यावि होत्या सेणियस्स रण्णो रज्जं च रद्धं च कोसं च कोट्टगारं च बलं च वाहणं च पुरं च अंतेउरं च सयमेव समुपेक्खमाणे-समुपेक्खमाणे विहरइ 1७1-7

(११) तस्स णं सेणियस्स रण्णो धारिणी नामं देवी होत्या-[सुकुमाल-पाणिपाया जाव सुरूवा करयल-परिभित-तिवलिय वलियमज्जा कोमुइ-रथणियर-विमल- पडिपुत्र-सोमवयणा कुंडलुत्ति-हिय-गंडलेहा सिंगारगार-चारुवेसा संगय-गय-हसिय-भणिय-विहिय-विलास-सललिय- संलाव-निउण-जुत्तोवचारकुसला पासादीया दरिसणिज्जा अभिरूवा पडूरूवा सेणियस्स रण्णो इट्ठा कंता पिया मणुण्णा नामधेज्जा वेसासिया सम्भया बहुमया अनुपया भंडकरंडगसमाणा तेज्जेला इव सुसंगोविया चेलपेडा इव सुसंपरिगिहीया रथणकरंडगो विव सुसाराक्खिया मा णं सीयं मा णं उण्हं

मा णं दंसा मा णं मरसा मा णं वाला मा णं चोरा मा णं वाड्य-पित्तिय-सिंभिय-सन्निवाड्य विविहा
रोगायंका फुसंतु ति कट्टु सेणिएण रण्णा सद्धि भोगभोगाई पच्चणुभवमाणी। विहरइ 1८1-8

(१२) तए णं सा धारिणी देवी अण्णदा कदाइ तंसि तारिसगंसि-छक्कडुग-लड्डमडु-
संठिय-खंपुगय-पवरवर-सालभजिय-उज्जलमणिकणगरयणधूमिय-विडंकजालद्ध-चंदनिजुहंत
कगयलिचंदसालियाविभक्तिकलए सरसच्छधाऊवल-वण्णरइए वाहिरओ दूमिय-घट्ट-मट्टे अंभिय-
तरओ पसत्त सुविलिहिय-चित्तकम्मे नाणाविह-पंचवण्ण-मणिरयण-कोट्टिमतले पउम- लया-
फुल्लवड्ढि-वरपुफ्फजाइउल्लोय - वित्तिय - तले वंदण-वरकणगकलससुणिसिंभिय-पडिपूजिय- सरस-
पउम-सोहंतदारभाए पवरग-लंबंत-मणिमुत्तदाम-सुविरइयदारसोहं सुगंध-वरकुसुम-मउच- पण्ड-
लसणयणोववार-मणहिययनिव्वुइयरे कपूर-लवंग-मलय-चंदण-कालगरु- पवरकुंदुरुक्क तुरु-
क्क-धूव-डज्झकि-सुरभि-मधमधेत-गंधुज्जुयाभीरामे सुगंधवर गंध गंधिए गंधवड्ढिभभूए मणि-
किरण पणासियंधयारे किंवहुणा जुइयुणेहिं सुरवरविभाण-विडंबियवरधरए तंसि तारिसगंसि
सवणिजंसि-सालिंगणवट्टिए उभओ विव्वोचणे दुहओ उण्णए मज्जे णय गंधीरे गंगापुल्लिण-
वालुप - उदालसालिसए ओयविय - खोम - दुगुल्लपट्ट- पडिच्छयणे अत्थरय-मलय-नवतव-कुसत्त-
लिव-सोहकसरपट्टुयिए सुविरइयरत्ताणे रत्तंसुयसंवुए सुरम्मे आइणग - रुय - वूर - नवणीय-
तुल्लफासे पुव्वरत्तावरत्तकालसमयंसि सुत्तजागरा ओहीरमाणी-ओहीरमाणी एणं महं सत्तुस्सेहं
रय्यकूड सत्रिहं नहयलीसि सोमं सोमागारं लीलायंतं जंभायमाणं मुहमत्तियं गवं पासिता णं
पडिबुद्धा तए णं सा धारिणी देवी अयमेचारुवं उरालं कल्लाणं सिवं धण्णं मगंलं सस्सिरीयं
महासुणमिणं पासिता णं पडिबुद्धा सभाणो हट्टटुइ चित्तामाणंदिय पीडमणा परमसोमणस्सिया
हरिसवस-विसण्णमाणहियया धाराहय कलंवपुफ्फगं पिव समूसरिय-रोमकूवा तं सुमिणं ओगिण्हइ
ओगिण्हिता सयणिज्जाओ उट्टेइ उट्टेता पायपीडाओ पच्चोरुहइ पच्चोरुहिता अतुरियमचवल-
मसंभताए अविलंबियाए रावहंससरिरीए गईए जेणामेव से सेणिए राया तेणामेव उवागच्छइ
उवागच्छिता सेणियं रायं ताहिं इट्टाहिं कंताहिं पियाहिं मणुज्जाहिं मणामाहिं उरालाहिं कल्लाणाहि
सिवाहिं धण्णाहिं मंगल्लाहिं सरस्सिरीयाहिं हिययणमणिज्जाहिं हिययपत्थायणिज्जाहिं मिय- महुर-
रिभिय-गंधीर-सस्सिरीयाहिं गिराहिं संलवमाणी-संलवमाणी पडिबोहेइ पडिबोहेता सेणिएणं रण्णा
अव्वणुण्णाया समाणी नाणा-मणिकणगरयणभत्तिचित्तंसि पद्दासणंसि निसीयइ निसिइत्ता आ-
सत्था वीसत्था सुहासणवरगवा करयलपरिग्गहियं सिरसावतं मत्थए अंजलिं कट्टु सेणियं रायं एवं
वयासी-एवं खल्लु अहं देवाणुप्पिया अज्ज तंसि तारिसगंसि सयणिजंसि सालिंगणवट्टिए जाव
नियगवयणमइवयंतं गवं सुमिणे पासिता णं पडिबुद्धा-तं एयस्स णं देवाणुप्पिया उरालस्स
कल्लाणस्स जाव सस्सिरीयस्स सुमिणस्स के मण्णे कल्लाणे फलवित्तिविसेसे भविस्सइ। १९1-9

(१३) तए णं से सेणिए राया धारिणीए देवीए अंतिए एवमट्टं सोद्धा निसम्म हट्टतट्ट- जाव
हियए धाराहयनीवसुरभिकुसुम-चुंचुमालइयतणू ऊसवियरोमकूवे तं सुमिणं ओगिण्हइ ओगि-
ण्हिता इहं पविसइ पविसिता अप्पणो सामाविएणं मइपुव्वएणं बुद्धिविन्नाणेणं तस्स सुमिणस्स
अत्थोगमहं करेइ करेता धारिणिं देवि ताहिं जाव हिययपत्थायणिज्जाहिं मिय-महुर-रिभिय-
गंधीर-सस्सिरीयाहिं वण्णूहिं अनुवूहमाणे-अनुवूहमाणे एवं वयासी-उराले णं तुमे देवाणुप्पियए

सुमिणे दिट्टे कल्लाणे णं तुमे देवाणुप्पिए सुमिणे दिट्टे सिवे धण्णे मंगल्ले सस्सिरीए णं तुमे देवाणुप्पिए सुमिणे दिट्टे आरोग्ग-तुट्ठि-दीहाउय-कल्लाण-मंगल्लकारए णं तुमे देवि सुमिणे दिट्टे अत्थलामो ते देवाणुप्पिए पुत्तलामो ते देवाणुप्पिए रज्जलामो ते देवाणुप्पिए भोग-सोवखल्लामो ते देवाणुप्पिए एवं खलु तुमं देवाणुप्पिए नवण्हं मासाणं बहुपडिपुत्राणं अद्धट्टमाणं राईदियाणं वीइक्कंताणं अहं कुलक्रेउं कुलदीवं कुलपव्वयं कुलवडिंसवं कुलतिलकं कुलकित्तिकरं कुल-वित्तिकरं कुलनंदिकरं कुलजसकरं कुलाधारं कुलपायवं कुलविवद्धणकरं सुकुमालपाणिपायं जाव सुरूवं दारयं पयाहिसि से वि य णं दारए उम्मुक्कवालभावे विण्णय-परिणयमेत्ते जोव्वणगमणपत्ते सूरे वीरे विक्कं-तेविट्ठिण्ण विपुल-वलवाहणे रज्जवई राया भविस्सइ तं उराले णं तुमे देवाणुप्पिए सुमिणे दिट्टे [कल्लाणे णं तुमे देवाणुप्पिए सुमिणे दिट्टे जाव सिवे णं तुमे देवाणुप्पिए सुमिणे दिट्टे] आरोग्ग-तुट्ठि-दीहाउय-कल्लाण-मंगल्लकारए णं तुमे देवि सुमिणे दिट्टे ति कट्टु भुज्जो-भुज्जो अनुवूहेइ 1१०-10

(१४) तए णं सा धारिणी देवी सेणिएणं रण्णा एवं वुत्ता समाणी हट्टतुट्ट-चित्तमाणांदिया जाव हरिसवस-विसम्पमाणाहियया करयल-परिणहियं [सिरसावतं मत्थए] अंजलिं कट्टु एवं वयासी-एयमेवं देवाणुप्पिया तहमेवं देवाणुप्पिया अवित्तहमेवं देवाणुप्पिया अरांदिद्धमेवं देवाणु-प्पिया इच्छियमेवं देवाणुप्पिया पडिच्छिमेवं देवाणुप्पिया इच्छियपडिच्छियमेवं देवाणुप्पिया सच्चे णं एसमट्टे जं तुढे वचह ति कट्टु तं सुमिणं सम्मं पडिच्छइ पडिच्छिता सेणिएणं रण्णा अत्थण्णयाया रामाणी नाणामणिकणगरयण-भत्तिवित्ताओ भद्दासणाओ अत्थुट्टेइ अत्थुट्टेत्ता जेणेव सए सयणित्ते तेणेव उवागच्छइ उवागच्छिता सयंसि सयणित्तेसि निसीयइ निसीइत्ता एवं वयासी-मा मे सं उत्तमे पहाणे मंगल्ले सुमिणे अण्णेहिं पावसुमिणेहिं पडिहम्मिहिंति कट्टु देवय-गुरुजणसंक्खाहिं पसत्थाहिं धम्मिवाहिं कर्हाहिं सुमिणजागरियं पडिजागरमाणी-पडिजागरमाणी विहरइ 1११-11

(१५) तए णं से सेणिए राया पच्चसकालसमयंसि कोडुंविचपुरिसे सदावेइ सदावेत्ता एवं वयासी-खिप्पामेव भो देवाणुप्पिया बाहिरियं उवट्टाणसालं अज्ज सविसेसं परमरम्मं गंधोदग-सित्त-सुइय - सम्पज्जिओवलित्तं पंचवण्ण-सरससुरभि-मुक्क-पुप्फपुंजोवयारकलियं कालागरु-पवरकुं-दुरुक्क-तुरुक्क-धूय-डञ्जंत-सुरभि-मधमधेत-गंधुद्धयाभिरामं सुगंधवर गंध गंधियं गंधवट्ठि-भूयं कोरह कारवेह य एवमाणात्तियं पच्चप्पिणह तए णं ते कोडुंविचपुरिसा सेणिएणं रण्णा एवं वुत्ता समाणा हट्टतुट्ट-जाव पच्चप्पिणति तए णं से सेणिए राया कललं पाउप्पभायाए रयणीए फुल्लुपला-कमल-कोमलुम्मिलियम्मि अहपंडुरे पभाए रत्तासोगप्पगास-किंसुय-सुयमुह-गुज्ज-बंधुजीवग-पारावचलणनयण-परहुयसुरत्तलोयण-जासुमणकुसुम-जलियजलण-तवमिज्जकलस-हिंगुलयनि गर-रूवाइरेगरहंत-सस्सिरीए दिवायरे अहकमेण उदिए तस्स दिणकर-करपरंपरोयारपारद्धमि अंधयारे वालातव-कुंकुमेणं खचितेव्व जीवलोए लोयण-विसयाणुयासविगसंत-विसददंसियम्मि लोए कमलागर-संडवोएह उट्टियम्मि सूरे सहस्सरस्सिम्मि दिणयरे तेयसा जलंते सयणित्ताओ उट्टेइ उट्टेत्ता जेणेव अट्टणसाला तेणेव उवागच्छइ उवागच्छिता अट्टणसालं अनुपविसइ अनेग-वायाम-जोग-वण्ण-वामहण-मज्जजुद्धकरणेहिं संते परिस्संते सयपागसहस्सपागेहिं सुगंधवर-तेल्लमा-दिएहिं पीणणित्तेहिं दीवणित्तेहिं दप्पणित्तेहिं मयणित्तेहिं विहणित्तेहिं सत्त्विययावपल्हाय-णित्तेहिं अत्थमंगेहिं अत्थमंगेण समाणे तेल्लचम्मंसि पडिपुत्र-पाणिपाय-सुकुमालकोमलतलेहिं पुरि-संहिं छेएहिं दक्खेहिं पडेहिं कुलसेहिं मेहावीहिं निउणेहिं निउणसिप्पोवगएहिं जिचपरिस्समेहिं

सुपक्वधो-१, अन्नयण-१

७

अत्यंगण परिमहणुव्वलण करणगुणनिम्माएहिं अड्डिसुहाए मंससुहाए तथासुहाए रोमसुहाए-
 चउव्विहाए संवाहणाए संवाहिए समाणे अवगयपरिस्समे नरिदे अट्टणसालाओ पडिनिक्खमइ
 पडिणिक्खमिता जेणेव मज्जणधरं तेणेव उवागच्छइ उवागच्छिता मज्जणधरं अनुपविसइ अनुप-
 विसिता समराजालाभिरामे विचित्त-मणि-रयण-कोट्टिमतले रमणेज्जे ण्हाणमंडवंसि नाणामणि-
 रयण-भत्तिचित्तंसि ण्हाणपीढंसि सुहनिमण्णे सुहोदएहिं गंधोदएहिं पुक्कोदएहिं सुज्जोदएहिं व पुणो
 पुणो कल्लाणग-पवर-मज्जणविहीए मज्जिए तत्थ कोउयसएहिं बहुविहेहिं कल्लाणग-पवर- मज्जाणा-
 वमाणे पक्कल-सुकुमाल-गंधकासाइल्लुहियंगे अहय-सुमहध-दूसरयण-सुसंतुए सरस-सुरभि-
 गोरीस-चंदणाणुलित्तगते सुइमाला-वज्जगविलेवणे आविच्छ-मणिसुवण्णे कप्पिय- हारुद्धहार-
 तिसरय-पालंब-पलंबमाणकडिसुत्त-सुकयसोहे पिणद्धगेवज्ज-अंगुलेज्जग-स्तलिवंगय- ललियकया-
 भरणे नामामणि-कडग-तुडिय-थोभियभुए अहियरूवरिसरीए कुंडलुज्जोइयाणणे मउउ-दित्तिसराए
 हारोत्थय-सुकय-इयवच्छे मुहिया-पिंगलंगुलीए पालंब-पलंबमाण-सुकय-पडउत्तरिज्जे नाणामणि-
 कणगरयण-विमलमहरिह-निउणोविय-भिसिमिसित्त-विरइय- सुसिलिड्ड- विसिड्ड- लट्ट- संटिय-
 पसत्थ अविद्ध-वीरवलए किं बहुणा कप्परुक्खए चेव सुअलकिय-विभूसिए नरिदे सकोरिं-
 मल्लदामेणं छतेणं धरिज्जमाणेणं चउचामरवालवीइयंगे मंगल-जय-सद्द-कपालोए अणेगगणना-
 यग-दंडनायग-राईसर-तलवर-माडविय-कोडुंविद्य-मंति-महामंति-गणग-देवारिय अमच्च-चेड-पी
 ढमद्द-नगर-निगम-सेट्टि-सेणावड-सत्थवाह-दूय-संधिवालसद्धिं संपरिवुडे धवलमहामेहनियाए
 विव गहगण-दिषंतारिक्खत्तरामाणण मज्जे ससिं व्व पियदंसणे नरवई मज्जणधराओ पडिनिक्ख-
 मइ पडिनिक्खमिता जेणेव बाहिरिया उवट्टाणसाला तेणेव उवागच्छइ उवागच्छिता सीहासणव-
 रगाए पुरत्थाभिमूहे सण्णिसण्णे

तए णं ते सेणिए राधा अयणो अदूरसामंते उत्तरपुरत्थिमे दिसीभाए अट्ट भद्दा- सगाइं-
 सेयवत्थ-पच्चुत्थुयाइं सिद्धत्थय-मंगलोवधार-कय संतिकम्माइं-रयावेइ रयावेत्ता नाणामणिरत्तण-
 मंडिय अहियपेच्छगिज्जरूवं महधयरपट्टणुगयं सण्ह-बहुभत्तिसव-चित्तठाणं ईहा- मिव- उसभ-
 तुरव-नर-मगा-विहग-वालग-किन्नर-रुरू-सरभ-चमर-कुंजर-वणलय-पउमलय-भत्तिचित्तं सुख-
 चियवरकणगपवरपेरंतदेसभागं अट्ठितरियं जवणियं अंछावेइ अंछावेत्ता अत्यगरग- मउअ-
 मसूरग-उत्थइयं धवलवत्थ-पच्चुत्थुयं विशिड्डअंगसुहफासयं सुमउयं धारिणीए देवीए भद्दासणे
 रयावेइ रयावेत्ता कोडुंविद्यपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया अट्टंग-
 मन्नानिमित्तसुत्तत्थपाढए विचिहसत्थकुसले सुमिणपाए सद्दावेह सद्दावेत्ता एयमाणतियं खिप्पामेव
 पच्चप्पिणह तए णं ते कोडुंविद्यपुरिसा सेणिएणं रण्णा एवं वुत्ता समाणा हट्टुड्ड-चित्तमाणंदिया जाव
 हरिसवस-विसप्पमाणहियया करयल-परिग्गहियं दसनहं सिरसावत्तं मत्थए अंजलिं कट्टु एवं देवो
 तए ति आणाए विणएणं वयणं पडिसुणोते सेणियस्स रण्णो अंतियाओ पडिनिक्खमंति रावगि-
 हस्स नगरस्स मज्झमज्जेणं जेणेव सुमिणपाढगगिहाणि तेणेव उवागच्छंते उवागच्छिता सुमिण-
 पाढए सद्दावंते तए णं ते सुमिणपाढगा सेणियस्स रण्णो कोडुंविद्यपुरिसेहिं सद्दाविवा समाणा
 हट्टुड्ड-चित्तमाणंदिया जाव हरिसवस - विसप्पमाणहियया ण्हाया कयवलिकम्मा [कय - कोउय-
 मंगल]-पायच्छिता अप्पमङ्गधाभरणांलकियसरीरा हरियालिय- सिद्धित्थय-कयमुद्धाणा सएहिं-
 सएहिं गेहेहिंतो पडिनिक्खमंति पडिनिक्खमिता रावगिहस्स नगरस्स मज्झमज्जेणं जेणेव सेणि-

यस्स भवणवडेंसगदुवारे तेणेव उवागच्छंति उवागच्छिता एगयओ मिलंति मिलिता सेणियस्स रण्णो भवणवडेंसगदुवारेणं अनुप्पविसंति अनुप्पविसिता जेणेव बाहिरिया उवट्ठाणसाला जेणेव येणिए राया तेणेव उवागच्छंति उवागच्छिता सेणियं जएणं विजएणं वड्ढावेत्ति सेणिएणंरण्णा अच्चिय-वंदिय-पूइय-भाणिय-सक्कारिय-सम्भाणिया समाणा पत्तेयं-पत्तेयं पुव्वत्रत्थेसु भद्दासणेसु निसीयंति तए णं से सेणिए राया जवणिवंतरीयं धारिणिं देविं ठवेइ ठवेत्ता पुप्फफलपडिपुन्नहत्ये परेणं विणएणं ते सुमिणपाढए एवं वयासी-एवं खलु देवाणुप्पिया धारिणी देवी अज्ज तंसि तारिसगसि सयणिज्जंसि जाव महासुमिणं पासित्ता णं पडिबुद्धा तं एयस्स णं देवाणुप्पिया उरालस्स जाव सस्सिरीयस्स महासुमिणस्स के मण्णे कल्लणे फलवित्तिविसेसे भविससइ तए णं ते सुमिण-पाढगा सेणियस्स रण्णो अंतिए एयमट्ठं सोच्चा निसम्मं हट्टुट्ठ-चित्तमाणंदिया जाव हरिसवस-विसम्भमाण-हियया तं सुमिणं सम्मं ओगिण्हंति ओगिण्हित्ता ईहं अनुप्पविसंति अनुप्पविसिता अण्णमण्णे सद्धिं संचालंति संचालेत्ता तस्स सुमिणस्स लद्धइ पुच्छिवट्ठा गहियट्ठा विणिच्छयट्ठा अभिगयट्ठा सेणियस्स रण्णो पुरओ सुमिणसत्थाइ उच्चारेमाणा-उच्चारेमाणा एवं वयासी-एवं खलु अहं सामी सुमिणत्थांसि वायालीसं सुमिणा तीसं महासुमिणा-भावत्तरीं सव्वसुमिणा दिट्ठा तत्थ णं सामी अरहंतमायरो वा चक्कवट्ठिमायरो वा अरहंतंसि वा चक्कवट्ठिसि वा गढं वक्कममाणंसि एएसिं तीसाए महासुमिणाणं इमे चोइस महासुमिणे पासित्ता णं पडिबुद्धंति तं जहा-१२-१-१२-१

(१६) गव वसह सीह अभिसेय दाम ससि दिणयरं झयं कुंभं

पउमसर सागर विमाणभवण रचणुहण सिंहि च

॥३॥-१

(१७) वासुदेवमायरो वा वासुदेवंसि गढं वक्कममाणंसि एएसिं चोइसणं महासु-मिणाणं अण्णवरे सत्त महासुमिणे पासित्ता णं पडिबुद्धंति बलदेवमायरो वा बलदेवंसि गढं वक्कममाणंसि एएसिं चोइसणं महासुमिणाणं अत्रयरे चत्तारि माहासुमिणे पासित्ता णं पडि-बुद्धंति मंडलियमायरो वा मंडलियंसि गढं वक्कममाणंसि एएसिं चोइसणं महासुमिणाणं अण्णयरं महासुमिणं पासित्ता णं पडिबुद्धंति इमे य सामी धारिणीए देवीए एगे महासुमिणे दिट्ठे तं उराले णं सामी धारिणीए देवीए सुमिणे दिट्ठे जाव आरोग-तुट्ठि-दीहाउय-कल्लण-मंगलकारेण णं सामी धारिणीए देवीए सुमिणे दिट्ठे जाव आरोग-तुट्ठि-दीहाउय-कल्लण-मंगलकारेण णं सामी धारिणीए देवीए सुमिणे दिट्ठे अत्थलाभो सामी पुत्तलाभो सामी रज्जलाभो सामी भोगलाभो सामी सोक्खलाभो सामी एवं खलु सामी धारिणी देवी नवणं मामाणं बहुपडिपुन्नणं जाव दारणं पयाहिइ से वि व णं दारए उम्मुक्कवालभावे विण्णय-परिणयमिते जोव्णयममणुप्पत्ते सूरं वीरे विककंते वित्थिण्ण-विपुल-वलवाहणे रज्जवई राया भविससइ अण्णारे वा भावियम्पा तं उराले णं सामो धारिणीए देवीए सुमिणे दिट्ठे जाव आरोग-तुट्ठि-जाव दिट्ठे त्ति कट्टु भुज्जो-भुज्जो अनुवूहेति तए णं से सेणिए राया तेंसिं सुमिणपाढगाणं अंतिए एयमट्ठं सोच्चा निसम्मं हट्टुट्ठ-चित्तमाणंदिए जाव हरिसवस- विसम्भमाण- हियए करयल जाव एवं वयासी-एवमेयं देवाणुप्पिया जाव जं णं तुब्भे वयह ति कट्टु तं सुमिणं सम्मं पडिच्छइ ते सुमिणपाढए विपुलेणं असण- पाण-खाइम-साइमेणं वत्थ-गंध-मल्लालंकारेणं य सक्कारेइ सम्माणेइ सक्कारेत्ता सम्भाणेत्ता विपुलं जीवियारिहं पीति-दाणं दलयति दलइत्ता पडि विसज्जेइ तए णं से सेणिए राया सीहासणाओ अट्टुट्ठेइ अट्टुट्ठेत्ता जेणेव धारिणी देवी तेणेव उवागच्छइ उवागच्छिता धारिणिं देविं एवं वयासी-एवं खलु देवाणुप्पिए

सुमिणसत्थंसि बायालीसं सुमिणा [जाव तं उराले णं तुमे देवाणुप्पिए सुमिणे दिट्ठे जाव आरोग-
तुट्ठिदीहाउय-कल्लाण-मंगल-कारए णं तुमे देवि सुमिणे दिट्ठे त्ति कट्ठु] भुजो-भुजो अनुवूहेइ तए णं
सा धारिणी देवी सेणियस्स रण्णो अंतिए एयमट्ठं सोच्चा निसम्म हट्ठतुट्ठ-चित्तमाणंदिया जाव
हरिसवस-विसप्पमाणहियया तं सुमिणं सम्मं पडिच्छति जेणेव सए वासधरे तेणेव उवागच्छइ
उवागच्छिता ण्हाया कयबलिकम्मा [कय-कोउय-मंगल-पायच्छित्ता विपुलाइ भोगभोगाई भुज-
माणी] विहरइ ।१२। - 12

(१८) तए णं तीसे धारिणीए देवीए दोसु मासेसु वीड्ढकंतसु तइए मासे वट्ठमाणे तस्स
गब्भस्स दोहलकालसमयंसि अयमेयारूवे अकालमेहेसु दोहले पाउव्ववित्ता- धण्णाओ णं ताओ
अम्पयाओ संपुण्णाओ णं ताओ अम्पयाओ कयत्याओ णं ताओ अम्पयाओ कयपुत्ताओ णं ताओ
अम्पयाओ कयलक्खणाओ णं ताओ अम्पयाओ कयविहवाओ णं ताओ अम्पयाओ सुलद्धे णं
तसिं माणुरसाए जम्मजीवियफले जाओ णं मेहेसु अब्भुगाएसु अब्भुज्जाएसु अब्भुण्णाएसु अत्थुट्ठि-
एसु सगज्जिएसु सविज्जुएसु सफुसिएसु सयणिएसु धंतधोव-रूपपट्ट-अंक-संख-चंद-कुंद-सालि-
पिट्ठरासिमप्यभेसु चिकुर-हरियाल-भेव-चंपग-सण-कोरेंट-सरिसव-पउमरयसमप्यभेसु लक्खारस-
सरस-रत्तकिंसुय-जासुमण-रत्तबंधुजीवग-जातिहिंगुलच-सरस-कुंकुम-उरव्भससरुहरि- इंदगोव-
गसमप्यभेसु वरहिण-नील-गुलिय-सुगचासपिच्छ-भिगपत्त-सासागनीलुपलनियर- नव-सिरीसकु-
सुम नवसद्वलसमप्यभेसु जच्चंजण-भिगभेयरिड्ढग-भमरावल्लिगवल्लुगुलिय कज्जलसमप्यभेसु फुरंत-
विच्चुव-सगज्जिएसु वाववस- विपुल्लगण- चवलपरिसक्किरेसु निम्मल- वरवारिधारा- पवलिय-
पयडमारुयसमाहय-समोत्थरंत-उवरिउवरितुरियवासं पयालसिएसु धारा-पहकर-निवा- यनिच्चा-
विच मेइणितले हरियगणकुंचए पल्लविय पायव गणेसु वल्लिवियाणेसु पसरिएसु उन्नएसु सोभग-
मुगएसु वेभारगिरिष्यवाय-तड-कडविमुक्केसु उज्जरेसु तुरियपहाविच-पल्लोड्ढेणगाउलं सकलुसं
जलं वरंतीसु गिरिनदीसु सज्जुण-नीवकुडय-कंदल-सिलिध-कल्लिएसु उववणेसु

मेहरसिच- हट्ठ- तुडुविट्ठिय- हरिसवसपमुक्ककंठकेकारयं मुयंतेसु वरहिणेसु उववस
मयजणिय-तरुणसहय- रिपण- छिएसु नवसुरभि- सिलिय- कुडय- कंदल- कलंव- गंधद्वणिं
मुयंतेसु उववणेसु परहुय रुच- रिभिय संकुलेसु उद्दाइंत-रत्तइंदगोवय-धोवय-कारुणविलविएसु
ओणयतणमंडिएसु ददुरपयंपि- एसु संपिडिय- दरिय- भमर- महुरिपहकर- परिणित्त- मत्त-
छप्पय-कुसुमासवल्लोल- महुर- गुंजंतदेसभाएसु उववणेसु परिसामिय चंद-सूर- गहगण- पण्ह-
नक्खत्ततारगपहे इंदाउह- वल्ल- चिधपट्ठमि अंवरतले उडीणयलागपंति- सोमंतमेहवंदे कारंड-
गचक्कवाय-कलहंस-उस्सुयकरे संपत्ते पाउसम्मि काले ण्हायाओ कयबलिकम्माओ कय -
कोउय- मंगल- पायच्छित्ताओ किं ते वर- पायपत्तनेउर- मणिमेहल-हार- रयइ- ओविय -
कडग-खुडुय-विचित्तवरवल्लयथंभियभुयाओ कुंडल- उज्जोवियाणणाओ रयणमूसियंगीओ नासा-
नीसासवाय-वोज्जं चक्खुहरं वण्णफरिससंजुत्तं हयलालापेलवाइरेयं धवलकणय- छचिपंतकम्मं
आगासफलिह- सरिसप्पं अंसुयं पवर परिहियाओ दुगूलसुकुमालउत्तरिज्जाओ सव्वोउय- सुर-
भिकुसुम-पवरमल्लसोभियसिराओ कालागरुधूवधूवियाओ सिरी-समाणवेसाओ सेयणय- गंध-
स्थिरयणं दुरूढाओ समाणीओ सकोरंटमल्लदामेणं छत्तेणं धरिज्जमाणेणं चंदप्पभवइरवेरुलिय-
विमलदंड- संखकुंद- दगरयअमयहियफेणपुंजसन्निगास- चउद्यामरवालवीजियं गीओ सेणिएणं

रणा सद्धि हत्थिखंधवरगणं पिहुओ-पिहुओ समणुगच्छाणीओ चाउरंगिणीए सेणाए-महया हयाणीएणं गयाणीएणं रहाणीएणं पावताणीएणं- सव्विड्डीए सव्वज्जुईए [सव्वबलेणं सव्व-समुदएणं सव्वादरेणं सव्वविभूईए सव्वविभूसाए सव्वसंभमेणं सव्वपुष्पगंधमल्लालंकारेणं सव्व-तुडिय-सद-सण्णि नाएणं महया इड्डीए महया जुईए जाव मुइंग-दुंदुहि]-निग्घोसनाइयरवेणं रायगिहं नयरं सिंघाडगतिग-चउक्क-चच्चरचउम्मुह-महापहेसु आसित्तसित- सुइय- सम्मज्जि-ओवलित्तं मुनंधवरगंध-गंधियं गंधवट्ठिभूयं अवलोएमाणीओ नागरजणेणं अभिनंदिज्जमाणीओ गुट्ठ-नया-रुक्ख-गुम्प-वाड्ढि-गुच्छोच्छाइयं सुरम्मं वेभारगिरिकडग- पाय- मूलं सव्वओ समंता आहिंडमाणीओ-आहिंडमाणीओ दोहलं विणित्ति तं जइ णं अहमवि मेहेसु अट्ठुगएसु जाव दोहलं विणिज्जा 1921-13

(१९) तए णं सा धारिणी देवी तंसि दोहलंसि अविणिज्जमाणांसि असंपत्तदोहला असुपुण्ण-दोहला असम्माणिचदोहला सुक्का भुक्खा निम्मसा ओलुग्गा ओलुग्गसरीरा पमइलदुध्वला किलंता ओमंथियववयण-नवणकमला पंडुइयमुही करयलमलिय व्य चंपगमाला नित्तेया दीणवि-वण्णवयणा जहोचिय-पुष्प-गंध-मल्लालंकार-हारं अणभित्तसमाणी किङ्कारसणाकरियं परिहावे-माणी दीणा दुम्पणा निराणंदा भूमिगयदिड्डीया ओहयमणसंकम्पा जाव झियाइ तए णं तीसे धारिणीए देवीए अंगपडिचारियाओ अत्थितरियाओ दासचेडियाओ धारिणिं देविं ओलुग्गं झियाचसि तए णं सा धारिणी देवी ताहिं अंगपडिचारियाहिं अत्थितरियाहिं दासचेडियाहिं य एवं वुत्ता समाणी ताओ दासचेडियाओ नो आढाइ नो परियाणइ अणाढायमाणी अपरियाणमाणी तुसिणीया संचिद्वइ तए णं ताओ अंगपडिचारियाओ अत्थितरियाओ दासचेडियाओ धारिणिं देविं दोहं पि तद्यं पि एवं वयासी-किण्णं तुमे देवाणुप्पिए ओलुग्गा ओलुग्गसरीरा जाव झियाचसि तए णं सा धारिणी देवी ताहिं अंगपडिचारियाहिं अत्थितरियाहिं दासचेडियाहिं दोहं पि तद्यं पि एवं वुत्ता समाणी नो आढाइ नो परियाणइ अणाढायमाणी अपरियाणमाणी तुसिणीया संचिद्वइ तए णं ताओ अंगपडिचारियाओ अत्थितरियाओ दासचेडियाओ धारिणीए देवीए अणाढाइज्जमाणीओ अपरिजाणिज्जमाणीओ तहेव संभंताओ समाणीओ धारिणीए देवीए अंतियाओ पडिनिक्खमंति पडिनिक्खमिता जेणेव सेणिए राया तेणेव उवागच्छंति उवागच्छित्ता करयलपरिग्गहिं जाव कट्टु जएणं विजएणं बद्धवेति बद्धवेता एवं वयासी-एयं खलु सामो किंपि अज्ज धारिणी देवा ओलुग्गा ओलुग्गसरीरा जाव अट्टुज्जाणोवगया झियाचइ 1981-14

(२०) तए णं सेणिए राया तासिं अंगपडिचारियाणं अंतिए एवमद्वं सोद्या निसम्भ तहेव संभंते समाणे सिग्घं तुरियं चवलं वेइयं जेणेव धारिणी देवी तेणेव उवागच्छइ उवागच्छित्ता धारिणिं देविं ओलुग्गं ओलुग्गसरीरं जाव अट्टुज्जाणोवगयं झियाचसि तए णं सा धारिणी देवी सेणिएणं रणा एवं वुत्ता समाणी नो आढाइ नो परियाणइ जाव तुसिणीया संचिद्वइ तए णं से सेणिए राया धारिणिं देविं दोहं पि तद्यं पि एवं वयासी-किण्णं तुमं देवाणुप्पिए ओलुग्गा ओलुग्गसरीरा जाव अट्टुज्जाणोव- गया झियाचसि तए णं सा धारिणी देवी सेणिएणं रणा एवं वुत्ता समाणी नो आढाइ नो परियाणइ जाव तुसिणीया संचिद्वइ तए णं से सेणिए राया धारिणिं देविं दोहं पि तद्यं पि एवं वयासी-किण्णं तुमं देवाणुप्पिए ओलुग्गा ओलुग्गसरीरा जाव अट्टुज्जाणोवगया झियाचसि तए णं सा धारिणी देवी सेणिएणं रणा दाहं पि तद्यं पि एवं वुत्ता समाणी नो आढाइ नो परियाणइ तुसिणीया संचिद्वइ तए णं से सेणिए राया

धारिणि देवि सवह-साविचं करेइ करेत्ता एवं वयासी-किण्णं देवाणुप्पिए अहमेवस्स अट्ठस्स अगारिहे सवणयाए तो णं तुमं ममं अयमेयारूवं मणोमाणसियं दुक्खं रहस्सीकरेसि तए णं सा धारिणी सेणिएणं रण्णा सवह-साविवा सभाणी सेणिचं रायं एवं वयासी-एवं खलु सामी मम तस्स उरालस्स जाव महासुमिण्णस्स तिण्हं मासाणं बहुपडिपुत्राणं अयमेयारूवे अकालमेहेसु दोहले पाउट्ठमूए-धण्णओ णं ताओ अम्मयाओ कयत्थाओ णं ताओ अम्मयाओ जाव वेभारगिरि कडग-पायमूलं सव्वओ समंता आहिंडमाणीओ-आहिंडमाणीओ दोहलं विणिति तं जइ णं अहमवि मेहेसु अट्ठमुग्गएसु जाव दोहलं विणेज्जामि तए णं अहं सामी अयमेयारूवंसि अकालदोहलंसि अविणिज्जमाणांसि ओलुग्गा जाव अट्ठज्जाणोवगया झियामि तए णं से सेणिए राया धारिणीए देवीए अंतिए एयमट्ठं सोद्या निसम्म धारिणि देवि एवं वयासी-मा णं तुमं देवाणुप्पिए ओलुग्गा जाव अट्ठज्जाणोवगया झियाहि अहं णं तह करिस्सामि जहा णं तुक्खं अयमेयारूवस्स अकालदोहलस्स मणोरहसंपती भविस्सइ ति कट्ठु धारिणि देवि इट्ठाहिं कंताहिं पियाहिं नणुत्ताहिं मणामाहिं वग्गूहिं समासासेइ समासासेत्ता जेणेव बाहिरिया उवट्ठाणसाला तेणेव उवागच्छइ उवागच्छित्ता सीहासणवरगए पुरस्थाभिमुहे सण्णिसण्णे धारिणीए देवीए एयं अकाल-दोहलं वहूहिं आएहिं च उवाएहिं च उप्पत्तिचाहिं च वेणइचाहिं च कम्मियाहिं च पारिणाभियाहिं च-उवट्ठियाहिं बुद्धीहिं अनुचितेमाणे-अनुचितेमाणे तस्स दोहलस्स आयं वा उवायं वा टिइ वा उप्पत्ति वा अविदमाणे ओहयमणसंक्रुप्पे जाव झियायइ तयाणंतरं च णं अभए कुमारे ण्हाए कयदलिक्रुप्पे जाव सव्वालंकारवि- भूसिए पायवंदए पहरेत्य गमणाए तए णं से अभए कुमारे जेणेव सेणिए राया तेणेव उवागच्छइ उवागच्छित्ता सेणिवं रायं ओहयमणसंक्रुप्पं जाव झियावमाणं पासइ पासित्ता अयमेयारूवे अज्जत्थिए चित्तिए पत्थिए मणोगए संक्रुप्पे सनुप्प-जित्था-अण्णया ममं सेणिए राया एज्जमाणं पासइ पासित्ता आढाइ परिणाइ सकूकारेइ सम्माणेइ आलावइ संलवइ अद्धासणेणं उवनिमंतेइ मत्थयंसि अग्धाइ इयाणि ममं सेणिए राया नो आढाइ नो परियाणइ नो सकूकारेइ नो सम्माणेइ आलावइ संलवइ नो अद्धासणेणं उवनिमंतेइ नो मत्थयंसि अग्धाइ किं पि ओहयमणसंक्रुप्पे जाव झियायइ तं भवियव्वं णं एत्थ कारणेणं तं श्रेयं खलु ममं सेणिवं राचं एयमट्ठं पुच्छित्ताए-एवं संपेहेइ संपेहेत्ता जेणामेव सेणिए राया तेणामेव उवागच्छइ उवागच्छित्ता करव्वलपरिण्हियं सिरसावत्तं मत्थए अंजलिं कट्ठु जएणं विजएणं वट्ठावेइ बद्धवेत्तका एवं वयासी तुब्बे णं ताओ अण्णया ममं एज्जमाणं पासित्ता आढाइ परिवाणह जाव मत्थयंसि अग्धायह इयाणि ताओ तुब्बे ममं नो आढाइ जाव नो मत्थयंसि अग्धावह किं पि ओहयमणसंक्रुप्पा जाव झियायह तं भवियव्वं णं ताओ एत्थ कारणेणं तओ तुब्बे मम ताओ एयं कारणं अगूहमाणो असंक्रुप्पाणो अनिण्हवमाणो अपच्छाएमाणो जहाभूतमवित्तहमसंदिद्धं एयमट्ठं आइक्खए तए णंहं तस्स कारणस्स अंतगमणं गमिस्सामि तए णं से सेणिए राया अभएणं कुमारेणं एयं वुत्ते समाणे अभयं कुमारे एवं वयासी-एवं खलु पुत्ता तव चुत्तामाउयाए धारिणीदेवीए तस्स गट्ठमस्स दोसु मासेसु अइक्कंतेसु तइयमासे वट्ठमाणे दोहलकालसमयंसि अयमेयारूवे दोहले पाउट्ठविस्था-धण्णओ णं ताओ अम्मयाओ तहेव निरवसेसं भाणियव्वं जाव वेभारगिरिक-डग-पायमूलं सव्वओ समंता आहिंडमाणीओ-आहिंडमाणीओ दोहलं विणिति तं जइ णं अहमवि मेहेसु अट्ठमुग्गएसु जाव दोहले विणिज्जामि तए णं अहं पुत्ता धारिणीए देवीए तस्स अकाल-

दोहलस्स बहूहिं आएहि य उवाएहि य जाव उप्पत्तिं अविदमाणे ओहवमणसंकम्पे जाव झियामि तुमं आगयं पि न याणामि तं एतेणं कारणेणं अहं पुत्ता ओहयमणसंकम्पे जाव झियामि तए णं से अभए कुमारे सेणियस्स रण्णो अतिए एवमट्ठं सोच्चा निसम्प हट्टतुट्ट-चित्तमाणंदिए जाव हरिसवस-विसम्पमाणहियाए सेणियं रायं एवं वयासी-मा णं तुब्बे ताओ ओहयमणसंकम्पा जाव झिया-यह अहं णं तथा करिस्सामि जहा णं मम चुल्लमाउयाए धारिणीए देवीए अयमेयारूवस्स अकाल-दोहलस्स मणोरहसंपत्ती भविस्सइ ति कट्ट सेणियं रायं ताहिं इड्ढाहिं जाव समासासेइ तए णं से सेणिए राया अभएणं कुमारेणं एवं वुत्ते समाणे हट्ट-तुट्ट-चित्तमाणंदिए जाव हरिसवस- विसम्प-माणहियाए अभयं कुमारे सकूकारेइ समाणेइ पडिविसज्जेइ ।१५।१५

(२१) तए णं से अभए कुमारे सकूकारिए सम्माणिए पडिविसज्जिए समाणे सेणियस्स रण्णो अंतियाओ पडिनिक्खमइ पडिनिक्खमिंता जेणामेव सए भवणे तेणामेव उवागच्छइ उवागच्छिता सीहासणे निसण्णे तए णं तस्स अभयस्स कुमारस्स अयमेयारूवे अज्झत्थिए जाव समुप्पज्जित्था-नो खलु सक्का माणुस्सएणं उवाएणं मम चुल्लमाउयाए धारिणीए देवीए अकालदोहलमणोरहसंपत्तिं करित्तए नन्नत्थ दिव्वेणं उवाएणं अत्थि णं मज्झ सोहम्म- कम्पवासी पुव्वसंगइए देवे महिड्ढीए [महजुइए महापरकम्पे महाजसे महब्वले महाणुभावे] महासोक्खे तं सेयं खलु मम पोसहसालाए पोसहियस्स बंधचारिस्स उम्मुक्कमाणिसु-वण्णास्स ववगयमालावण्णगविलेवणस्स निक्खित्तसत्थ-मुलस्स एगस्स अवीवस्स दट्ठमसंधारो- वगयस्स अट्टमभत्तं पगिण्हित्ता पुव्वसंगइयं देवं मणसीकरे-माणस्स विहरित्तए तए णं पुव्वसंगइए देवे मम चुल्लमाउयाए धारिणीए देवीए अयमेयारूवं अकाल मेहेसु दोहलं विणेहिति-एवं संपेहेइ संपेहेत्ता जेणेव पोसहसाला तेणामेव उवागच्छइ उवागच्छिता पोसहसालं पमज्जइ पमज्जिता उच्चारपासवणभूमिं पडिलेहेइ पडिलेहेत्ता दट्ठमसंधारणं दुरुहइ दुरिहत्ता अट्टमभत्तं पगिण्हइ पगिण्हित्ता पोसहसालाए पोसहिए बंधचारो जाव पुव्वसंगइयं देवं मणसीकरेमाणे-मणसीकरेमाणे विट्ठइ तए णं तस्स अभयकुमारस्स अट्टमभत्ते परिणममाणे पुव्वसंगइयस्स देवस्स आसणं चलइ तए णं से पुव्वसंगइए सोहम्मकम्पवासी देवे आसणं चलियं पासइ पासित्ता ओहिं पउंजइ तए णं तस्स पुव्वसंगइयस्स देवरस्स अयमेयारूवे अज्झत्थिए जाव समुप्पज्जित्था-एवं खलु मम पुव्वसंगइए जंबुद्वीवे दीवे भारहे वासे दाहिणइट्ठभरहे रायगिहे नयरे पोसहसालाए पोसहिए अभए नामं कुमारे अट्टमभत्तं पगिण्हित्ता णं ममं मणसीकरे- माणे- मण-सीकरेमाणे विट्ठइ तं सेयं खलु मम अभयस्स कुमारस्स अतिए पाउट्ठमवित्तए-एवं संपेहेइ संपेहेत्ता उत्तरपुरत्थिंमं दिसीमाणं अवक्कमइ अवक्कमिंता वेउच्चियसमुधाएणं समोहण्णाइ समोहणित्ता संखेज्जाइ जोयणाइ दंडं निसिरइ तं जहा-रयणाइ वइराणं वेरुलियाणं लोहियक्खाणं मसारगल्लापं हंसगत्थाणं पुलगाणं सोगंधियाणं जोईरसाणं अंकाणं अंजणाणं रययाणं जायरूवाणं अंजणपुला-गाणं फल्लिहाणं रिट्ठाणं अहावाचरे पोग्गले परिसाडेइ परिसाडेत्ता अहासुहुमे पोग्गले परिगिण्हइ परिगिण्हित्ता अभयकुमारमणुकंपमाणे देवे पुव्वभवजणिय-नेह-मीड-बहुमाणजायसोगे तओ विमाणवर- पुंडरीयाओ रयणुत्तमाओ धरणिपल-गमण-तुरिय-संजणिय-गमणपयारो वाघु-ण्णिय-विपल-कणग-पयराग-वडिसगमउडुकूकडाडोवदंसणिज्जो अणेगमणि-कणगरयणपहकर-पिमंडिय-भत्तिचित्त-विणि-उत्तग-मणुगुणजणियहरिसो पिंखोलमाणवरललिययकुंडलुज्जलिय-वयणगुणजणियसोम्मरूवो उदिओ विद कोमुदीनिसाए सणिच्छरंगारकुज्जलियमज्झाभागत्थो

नयणाणंदो सरयचंदो दिव्वोसहिपञ्जलुञ्जलियदंसणाभिरामो उदुलच्छिसमत्तजायसोहो पइड्डगंधुद्ध-
याभिरामो मेरु विव नगवरो विगुव्वियविचितवेसो दीवसमुद्धानं असंखपरिमाणानामधेज्जानं मण्ड-
कारेण वोइवयमाणो उज्जोयंतो पभाए विमलाए जीवलोयं रायगिहं पुरवरं च अभयस्स पासं
ओवयइ दिव्वरूवधारी 19६1-14-R

(२२) तए णं से देवे अंतलिकखपडिबण्णे दसद्धवण्णाइं सखिखिणियाईं पवर वत्थाइं
परिहिए अमयं कुमारं एवं वयासी-अहं णं देवाणुप्पिया पुव्वसंगइए सोहम्मकप्पवासी देवे
महिइदीए जं णं तुमं पोसहरालाए अड्डममत्तं पणिण्हिता णं ममं मणसीकरेमाणे-मणसीकरेमाणे
चिट्टसि तं एस णं देवाणुप्पिया अहं इहं हव्वमागए सिंदिसाहि णं देवाणुप्पिया किं करेमि किं
दलयामि किं पयच्छामि किं वा ते हियइच्छियं तए णं से अभए कुमारे तं पुव्वसंगइयं देवं
अंतलिकखपडिबण्णं पासित्ता हट्टतुट्ठे पोसहं पारेइ पारेत्ता कायल जाव अंजलिं कट्टु एवं
वयासी-एवं खलु देवाणुप्पिया मम चुल्लमाउयाए धारिणीए देवीए अयमेयारूवे अकालदोहले
पाउब्भूए-घत्राओ णं ताओ अम्मयाओ तहेव पुव्वगमेणं जाव वेभारगिरिक- उग-पायमूलं सव्वओ
समंता आहिंइमाणी ओ-आहिंइनाणीओ दोहलं विगिति तं जइ णं अहमवि मेहेसु अट्ठुग्गएमु जाव
दोहलं विणेज्जाभित्तं णं तुमं देवाणुप्पिया मम चुल्लमाउयाए धारिणीए देवीए अयमेयारूवे
अकालदोहलं विणेहि तए णं से देवे अभएणं कुमारेणं एवं वुत्ते समाणे हट्टतुट्ठे अभयं कुमारं एवं
वयासी- तुमं णं देवाणुप्पिया गुनिच्चुय वीसत्थे अच्छाहि अहं णं तव चुल्लमाउयाए धारिणीए देवीए
अयमेयारूवं अकालदोहलं विणेमि ति कट्टु अभयस्स कुमारस्स अंतिवाओ पडिनिकखमइ पडि-
निकखमित्ता उत्तरपुरत्थिने णं वेभारपच्चए वेउच्चियसमुधाएणं समोहण्णइ समोहणित्ता संखेज्जाइं
जोयणाइं दंइं निस्सिइ जाव दोच्चपि वेउच्चियसमुधाएणं समोहण्णइ समोहणित्ता खिप्पामेव
सगज्जिवयं सविच्चुयं सफुरसिधं पंचवण्णमेहनिणाओवसोहियं दिव्वं पाउससिरीं विउच्चइ
विउच्चित्ता जेणामेव अभए कुमारे तेणामेव उवागच्छइ उवागच्छित्ता अभयं कुमारं एवं वयासी-
एवं खलु देवाणुप्पिया मए तव पियड्डुवाए सगज्जिया सफुसिया सविच्चुया दिव्वा पाउससिरी
विउच्चिया तं विणेऊ णं देवाणुप्पिया तव चुल्लमाउया धारिणी देवी अयमेयारूवं अकालदोहलं तए
णं से अभए कुमारे तस्स पुव्वसंगइवस्स साहम्मकप्पवासिस्स देवस्स अंतिए एवमट्ठं सोच्चा निसम्भं
हट्टतुट्ठे सयाओ भवणाओ पडिनिकखमइ पडिनिकखमित्ता जेणामेव सेणिए राधा तेणामेव उवा-
गच्छइ उवागच्छित्ता करयल [परिगाहियं सिरसावत्तं मत्थए] अंजलिं कट्टु एवं वयासी-एवं खलु
ताओ मम पुव्वसंगइएणं सोहम्मकप्पवासिणा देवेणं खिप्पामेव सगज्जिया सविच्चुया सफुसिया
पंचवण्णमेहनिणाओवसोभिया दिव्वा पाउससिरी विउच्चिया तं विणेऊ णं मम चुल्लमाउया
धारिणी देवी अकालदोहलं तए णं से सेणिए राधा अभयस्स कुमारस्स अंतिए एवमट्ठं सोच्चा
निसम्भं हट्टतुट्ठे कोडुंबियपुरिसे सदावेइ सदावेत्ता एवं वयासी-खिप्पामेव भो देवाणुप्पिया रायगिहं
नगरं सिंघाडग-तिग-चउकक-चच्चर-चउम्मुह-महापहपहेसु आसित्तसित्त- सुइय-संभज्जिओवलित्तं
जाव सुगंधवर गंध गंधियं गंधवट्टिमूयं करेह व कारवेह य एयमाणत्तियं पच्चप्पिणह

तए णं ते कोडुंबियरुरिसा जाव पच्चप्पिणंति तए णं से सेणिए राधा दोच्चपि कोडुंबियपुरिसे
सदावेइ सदावेत्ता एवं वयासी-खिप्पामेव भो देवाणुप्पिया हय-गय-रह-पवरजोह-कलियं चाउ-
रंगिणिं सेणं सत्ताहेह सेयणयं च गंधहत्थि परिकप्पेह तेवि तहेव करींते जाव पच्चप्पिणंति तए णं से

गंणिए राया जेणेव धारिणी देवी तेणेव उवागच्छइ उवागच्छिता धारिणी देवि एवं वयासी-एवं खलु देवाणुप्पिए सगज्जिया जाव पाउससिरी पाउठ्ठमूया तं णं तुमं देवाणुप्पिए एयं अकालदोहलं विणेहि तए णं सा धारिणी देवी सेणिएणं रण्णा एवं वुत्ता समाणी हट्टतुट्ट जेणामेव मज्झणघरे तेणेव उवागच्छइ उवागच्छिता मज्झणधरं अनुप्पविसइ अनुप्पविसिता अंतो अंतेउरंसि ष्हाया कयवलि-कम्पा कय - कोउय - मंगल-पावच्छिता किं ते वरपायपत्तनेउर - मणिमेहल हार - रइय - ओविय-कडग-सुइय-विचित्त वरवलअथंभियमुया जाव आगास-फालिय-समप्पभं अंसुयं नियत्या सेयणयं गंधहत्थि दुरूढा समाणी अमय-महिय-फेणपुंज-सत्रिगासाहिं सेययामरवालवीयणीहिं वीइज्ज-माणी-वीइज्जमाणी संपत्थिया तए णं से सेणिए राया ष्हाए कयवलिकम्मे जाव हत्थखंधवरगए सक्करेंटमत्तदामेणं छतेणं धरिज्जमाणेणं चउयमराहिं वीइज्जमाणे धारिणिं देविं पिड्डओ अनुगच्छइ तए णं सा धारिणी देवी सेणिएणं रण्णा हत्थिखंधवरगएणं पिड्डओ-पिड्डओ समणुगम्पमाण-मग्गा हय - गय - रह - पवरजोहकलियाए चारउरिणीए सेनाए संधिं संपणिवुडा महया भइ - चडगर - वंदररिक्खित्ता सव्विइढीए सव्वजुइए जाव दुंदुभिनिग्घोसनाइयरवेणं रायगिहे नयरे सिंघाडग-त्तिग-चउक्क-चछर-[चउम्मुह] - महापहपहेसु नागरजणेणं अभिनदिज्जमाणी - अभिनदिज्जमाणी जेणामेव वेभारगिरि-पव्वए तेणामेव उवागच्छइ उवागच्छिता वेभारगिरि-कडग-तडपायमूले आ-रामेसुय उज्जाणेसुय क्राणणेसुय वणेसुय वणसंडेसुय रूक्खेसुय गुच्छेसुय गुम्मेसुय लवामुय वल्लीसुय कंदरासुय दरीसुय चुंढीसुय जूहेसुय कच्छेसुय नदीसुय संगमेसुय विवरएसुय अच्छ-माणीय पेच्छमाणीय मज्जमाणीय पत्ताणिय पुप्फाणिय फलाणिय पल्लवाणिय गिण्हमाणीय माणेमाणीय आधावमाणीय परिभुंजेमाणीय परिभाएमाणीय वेभारगिरिपायमूले दोहलं विणे- गाणी सव्वओ समंता आहिंइइ तए णं सा धारिणी देवी सम्माणियदोहला विणीयदोहला संपुण्ण- दोहला संपत्तदोहला जाया यावि होत्या तए णं सा धारिणी देवी सेयणवगंधहत्थि दुरूढा समाणी सेणिएणं हत्थखंधवरगएणं पिड्डओ-पिड्डओ समणुगम्पमाण- मग्गा-हय-गय-जाव रवेणं जेणेव रायगिहे नयरे तेणेव उवागच्छइ उवागच्छिता रायगिहे नयरे मज्झमज्जेणं जेणामेव सए भवणे तेणामेव उवागच्छइ उवागच्छिता विउलाइं माणुस्सगाइं भोगभोगाइं पच्चणुभवमाणी विहरइ। १७।-१५-R

(२३) तए णं से अभए कुमारे जेणामेव पोसहसाला उवागच्छइ उवागच्छिता पुव्वसंगइयं देवं सक्कारेइ सम्माणेइ सक्कारेत्ता सम्माणेत्ता पडिविसज्जेइ तए णं से देवे सगज्जियं राविज्जुयं सफुरियं पंचवण्णमेहोचसोहियं दिव्वं पाउसिरिं पडिसाहरइ पडिसाहरित्ता जामेव दिसिं पाउठ्ठमूए तामेव दिसिं पडिगए। १८।-१६-R

(२४) तए णं सा धारिणी देवी तंसि अकालदोहलंसि विणीवंसि सम्माणियदोहला तस्स गथस्स अनुकंपणइए जयं चिइइ जयं आसयइ जयं सुवइ आहारं पिय णं आहारेमाणी-नाइतित्तं नाइकडुयं नाइकसायं नाइअंबिलं नाइमहुरं जं तस्स गथस्स हियं मियं पत्थयं देसे य काले य आहारं आहारेमाणी नाइचित्तं नाइसायं नाइमोहं नाइभयं नाइपरित्तासं ववगयचित्ता- सोच-पोह-भय-परित्तासा उट्टु-भज्जमाण-सुहेहिं भोयण-च्छायण-गंध-मज्जालंकारेहिं तं गव्वं सुहंसुहेण परिवहइ। १९।-१७

(२५) तए णं सा धारिणी देवी नवण्हं मासाणं बहुपडिपुत्राणं अट्टइमाण य राइंदियाणं वीइक्कंताणं अट्टरत्तकालसमयंसि सुकुमालपाणियापाचं जाव सव्वंगसुंदरं दारगं पवाया तए णं

ताओ अंगपडियारियाओ धारिणि देवि नवण्हं मासाणं बहुपडिपुत्राणं जाव सव्वंगसुदरं दारणं पयायं पासंति पासित्ता सिग्धं तुरियं चवलं वेइयं जेणेव सेणिए राया तेणेव उवाएवउत्ति उवाएच्छित्ता सेणियं रायं जएणं विजएणं वद्धावेति वद्धावेत्ता करयलपरिणहियं मिरसावत्तं मत्थए अंजलिं कट्टु एवं वयासी-एवं खलु देवाणुप्पिया धारिणी देवी नवण्हं मासाणं बहुपडिपुत्राणं जाव सव्वंगसुदरं दारणं पयाया तं णं अन्हे देवाणुप्पियाणं पियं निवेएमां पियं भे भवउ तए णं से सेणिए राया तासिं अंगपडियारियाणं अंतिए एयमद्धं सोच्च निस्सम्मं हट्टुद्धे ताओ अंगपडियारियाओ गहुरेहिं वयणेहिं विउलेण च पुष्प-वत्थ-गंध-मज्जालंकारेणं सकृकारेइ सम्माणेइ मत्थय-धोयाओ करेइ पुत्ताणुपुत्तिं विंति कप्पेइ कप्पेत्ता पडिविसज्जेइ तए णं से सेणिए राया [पद्मसकलममंविंस] कोडुवियपुरिसे सदावेइ सदावेत्ता एवं वयासी-निखिप्पामेव भो देवाणुप्पिया रायागं नगरं आसय-[सम्पन्नोववतिंतिं सिंघाडग-जाव प्हेसु आभित्त-सित्त-सुइ-सम्मइ-रत्थंतरावण-वीहिंयं मंचाइमंचकलियं नानाविहराग-अभियच्चद्वय-पट्टगाइपट्टग-गोडिंयं लाउ-श्लोइय-महिंयं गोरीस-सरस-रत्त-चंदण-दद्व-दिण्णपंचंगुलित्तलं उवचियचंदणकलत्तं चंदणघड-मुक्क-तोरण-पडिदुवारदेसभायं आसत्तोसत्तविउल-वट्ट-वधारिय-मज्जान-कलत्तं पंचवण्णं-सरस-सुरभिमुक्कपुष्पुंजावयार-कलियं कालागुरु-जाव गंधवट्टिभूयं नड-नटग-जड-मज्ज-मुट्टिय-वलंग-कहकहग-पवग-लासग-आइकजग-लंख-मंख-तूणइल-तुंदवोणिय-अणेगताला-यार] परिणीयं करेह कारवेह य चारगपरिसोहणं करेह करेत्ता माणुम्माणवट्टणं करेह करेत्ता एयमाणत्तिंयं पच्चप्पिणह पच्चविजंति तए णं से सेणिए राया अट्टारसत्तेणि प्पमेणीओ सदावेइ सदावेत्ता एवं वयासी-गच्छह णं तुद्धे देवाणुप्पिया रायागरे नगरे अत्थिततराहिरिए उस्सुंक्कं उक्कं अमडप्पवेसं अंइडिम-कुदंइमं अर्धारिमे अर्धारिणजं अनुद्वयमुदं अंभिलायमज्जदामं गणियकरन-इडज्जकलियं अणेगतालावरापुचरियं पमुइयपक्कीत्तियाभिरामं जहारिहं टिइवडिंयं दसदेसियं करेह कारवेह य एवनागतियं पच्चप्पिणह तेवि तहेव करंति कत्तंय पच्चप्पिणंति तए णं से सेणिए राया वाहिरियाए उवट्टाणसालाए सीहासभावरमए पुरत्थाभिमुहे सण्णिसण्णे सत्तियुहि य साहसिण्णहि य सयलाहसिण्णहि य दापुहिं दत्तयमाणे दत्तयमाणे पडिच्छमाणे पडिच्छमाणे एवं च णं विहरइ

तए ण तस्स अम्मापियरो पढमे दिवरो टातेपडिंयं करंति थितिए दिवसे जागरियं करंति ततिए दिवसे चंदसूरदंसणियं करंति एवामेव निवत्ते असुइजावकम्मकरणे संपत्ते वारसाहे विपुलं असण-पाण-खाइम-साइमं उवक्कडावेति उवक्कडावेत्ता मित्त-नाइ-नियग-त्तयण-संवंधि-परियाणं वलं च बहवे गणनायग-दंडनायग-राईसर-तलवर-माडंविद्य-कोडुविय-पंति-महा-मंति-गणग-दोवरिय-अमच्च-वेड-पीढमह-नगर-निगम-सेट्टि सेणायव-सत्थवाह-दूय-संधिवाले। आमंतेत्तिं तओ पच्छा ण्हाया कववत्तक-१ कयकोउय-[मंगलपायच्छित्ता] सव्वालं कारवि-भूसिया महइमहालयंसि भोयणमंडवंसि तं विपुलं असणं पाणं खाइमं साइमं मित्तनाइ गणनायग जाव सद्धि आसाएमाणा विलाएमाणा परिभाएमाणा परिभुजेमाणा एवं च णं विहरंति जिमिव-भुनुतरगयावि य णं समाणा आयंता चोक्खा परमसुइभूया तं मित्तनाइ-नियगसयण-संवंधि-परियाणं वलं च बहवे गणनायग जाव संधिवाले विपुलेणं पुष्प-गंध-मज्जालंकारेणं सकृकारंति सम्माणंति सकृकारेत्ता सम्माणेत्ता एवं वयासी-जन्हा णं अन्हे इमस्स दारगस्स गधत्थस्स चेव

समाणस्स अकालमेहेसु दोहले पाउब्भूए तं होऊ णं अहं दारे मेहे नामेणं तस्स दारगस्स अम्मापियरो अयमेयारूवं गोणं गुणनिष्कणं नामधेज्जं करेति मेहे इ तए णं से मेहे कुमारे पंचधाई-परिग्गहिए तं जहा-खीरधाईए मज्जणधाईए कीलावणधाईए मंडणधाईए अंकधाईए अण्णाहि य बहूहिं-खुज्जाहिं चिलाईहिं वामणीहिं वडमीहिं दब्बरीहिं बउसीहिं जोमि- याहिं पल्लवियाहिं ईसिणि-याहिं यारुगिणियाहिं लासियाहिं लउसियाहिं दामिलीहिं सिंहलीहिं आरबीहिं पुलिंदीहिं पक्कणीहिं बहलीहिं मुहुंडीहिं सवरीहिं पारसीहिं - नानादेसीहिं विदेसपरिमंडियाहिं इंगिय-चितिय-पत्थिय-वियाणियाहिं सदेस-नेवत्थ-गहिय-वेसाहिं निउणकुसलाहिं विणी- याहिं चेडिया-चक्कवाल-वरिसधरकंचुइज्जमहयरग-वंद-परिक्खित्ते हत्थओ हत्थं साहरिज्जमाणे अंकाओ अंक परिभुज्जमाणे परिगिज्जमाणे उवलालिज्जमाणे रम्मंसि मणिकोद्धिमतलंसि परंगिज्जमाणे निव्वाय-निव्वाधायसि गिरिकंदरमल्लीणे व चंपगपाचवे सुहंसुहेणं वड्ढइ तए णं से तस्स मेहस्स कुमारस्स अम्मापियरो अनुपुब्बेणं नामकरणं च पजेमणं च पचंकमणं च चोलोवणं च महया-महया इड्डी-सक्कार-समुदएणं करंसु तए णं तं मेहं कुमारं अम्मापियरो साइरेगड्ड- वासजायगं चैव भोहणंसि तिहिं करण-मुहुत्तांसि कलायरियस्स उवणेति तए णं से कलायरिए मेहं कुमारं लेहाइयाओ गणियप्पहाणाओ सउणरुयपज्जवसाणाओ वावत्तरिं कलाओ भुतओ य अत्थओ य करणओ य सेहावेइ सिक्खावेइ तं जहा- लेहं गणियं रूवं नट्टं गीयं वाइयं सरगयं पोक्खरगयं समतालं जूयं जणवायं पासयं अट्ठावयं पोरैकव्वं दगमट्टियं अण्णविहिं पाणविहिं वत्थविहिं विलेवणयिहं सयणविहिं अज्जं पहेलियं मागहियं गाहं गीइयं सिलोयं हिरण्णजुत्ति सुवण्णजुत्ति चुण्णजुत्ति आभरणविहिं तरुणीपडिकम्मं इत्थिलक्खणं पुरिसलक्खणं हयलक्खणं गवलक्खणं गणलक्खणं कुक्कुडलक्खणं छत्तलक्खणं दंडलक्खणं असिलक्खणं मणिलक्खणं कागणि-लक्खणं वत्थुविज्जं खंधारमाणं नगरमाणं वूहं पडिवूहं चारं पडिचारं चक्कवूहं गरुलवूहं सगडवूहं जुद्धं निजुद्धं जुद्धाइजुद्धं अट्टिजुद्धं पुट्टिजुद्धं बाहुजुद्धं लवाजुद्धं ईसत्थं छरुप्पायं धणुवेयं हिरण्णपागं सुवण्णपागं बट्ठेइ सुत्तखेइ नालियाखेइ पत्तच्छेज्जं कडच्छेज्जं सज्जीवं निज्जीवं सउणरुत्तं ति ।२०।-१७-R

(२६) तए णं से कलायरिए मेहं कुमारं लोगाइयाओ गणियप्पहाणाओ सउणरुयपज्जव-साणाओ वावत्तरिं कलाओ सुत्तओ य अत्थओ य करणओ य सेहावेइ सिक्खावेइ सेहावेत्ता सिक्खावेत्ता अम्मापिऊणं उवणेइ तए णं मेहस्स कुमारस्स अम्मापियरो तं कलावरियं महुरेहिं वयणेहिं विउलेणं य वत्थ-गंध-मल्लालंकारेणं सक्कारेति सम्माणेति सक्कारेत्ता सम्माणेत्ता विउलं जीवियारिहं पीइदाणं दलयंति दलइत्तं पडिविसज्जेति ।२१।-१८

(२७) तए णं से मेहे कुमारे वावत्तरि-कलापंडिए नवंगसुत्तपडिबोहिए अट्ठारस विहिष्प-गारदेसीभासाविसारए गीयरई गंधव्वनइकुसले हयजोही गयजोही रहजोही बाहुजोही वाहुप्पमदी अलंभोगसमत्थे साहसिए विद्यालचारी जाए यावि होत्था तए णं तस्स मेहस्स कुमारस्स अम्मापियरो मेहं कुमारं वावत्तरि-कलापंडियं जाव विद्यालचारिं जायं पासति पासिता अट्ट पासायवंडिसए कारंते-अट्ठुगावमूसिय परसिए विव मणि-कणग-रयण-भत्तिचित्ते वाउद्धय-विजय- वेजयंति-पडाग-छत्ताच्छत्तकलिए तुंगे गगणतलमभिलंघमाणसिहरे जालंतररयणं पंरुम्मिलिए व्व मणि-कणगधूमियाए विचसिय-सयवत्त-पुंडरीए तिलयरयणद्धचंदद्विए नामामणिमयदामालंकिए अंतो

बहिं च सण्हे तवणिञ्ज-रूइल-वालुया-पत्यरे सुहफासे सस्तिरीयरूवे पासाईए [दरिसणिञ्जे अभिरूवे] पडिरूवे एगं च णं महं भवणं कारीति-अणेगखंभसयसत्रविट्ठं लीलड्वियसालभजियागं अठ्ठपुण्य-सुकयवइरवेइयातोरण-वरइयसालभंजिय-सुसिलिड्ड-विसिड्ड-लट्ट-संठिय-पसत्य-वेरुलियखंभ-नाणामणिकणगरयण-खचियउज्जलं बहुसम-सुयिमत-निचियरमणिञ्जभूमिभागं ईहा-मिय-जाव भत्तिचित्तं खंभुण्यवयर वेइयापरिगयाभिरामं विञ्जाहर जमल जुयल जंतजुतं पिव अच्चिसहस्समालणीयं रूवगसहस्सकलियं भिसमाणं भिबअभिसमाणं चक्खुड्योयणलेसं सुहफासं सस्तिरीयरूवं कंचणमणिरयणधूमिभागं नाणाविह-पंचवण्ण-घंटापडाग-परिमंडि-यग्गसिहरं घवल-मिरिचिकवयं विणिम्भुतं लाउल्लोइयमहियं जाव गंधवट्टिमूयं पासाईयं दरिसणिञ्जं अभिरूवं पडिरूवं । २२।-१९

(२८) तए णं तस्स मेहस्स कुमारस्स अम्मापियरो मेहं कुमारे सोहणंसि तिहि-करण-नक्खत्त-मुहुत्तंसि सरिरियाणं सरिव्वयाणं सरित्तवाणं सरिसलावण्ण-रूव-जोव्वण-गुणोदवेयाणं सरिसएहिंतो रायकुलेहिंतो आणिल्लियाणं पसाहणड्ढंग-अविहववहु-ओवयण-मंगलमुजंपिएहिं अट्टहिं रायवरत्ताहिं सद्धिं एगदिवसेणं पाणिं गिण्हाविसुं तए णं तस्स मेहस्स अम्मापियरो इमं एयारूवं पीइदाणं दलयंति-अट्ट हिरण्णकोडीओ अट्ट सुवण्णकोडीओ गाहाणुसारेण भाणियव्वं जाव पेसणकारियाओ अण्णं च विपुलं धण-कणग-रयण-मणि-मोत्तिय-संख-सिल-प्पवाल-त्तरयण-संत-सार-सावएत्तं अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं तए णं से मेहे कुमारे एगमेगाए भारियाए एगमेगं हिरण्णकोडिं दलयइ जाव एगमेगं पेसणकारिं दलयइ अण्णं च विउलं धण-कणग-जाव परिभाएउं दलयइ तए णं से मेहे कुमारे उप्पिं पासायवरगाए फुट्टमाणेहिं मुइंगमत्थएहिं वरतरुणिसंपउत्तेहि वत्तीसइवड्डएहिं नाडएहिं उवगिज्जिमाणे-उवगिज्जमाणे उवलालिज्ज-माणे-उवलालिज्जमाणे इडे सइ-फरिस-रस-रूव-गंधे विउले माणुस्सए कामभोगे पच्चणुभवमाणे विहरइ । २३।-२०

(२९) तेणं कालेणं तेणं समाएणं समणे भगवं महावीरे पुव्वानुपुच्चिं चरमाणे गमाणुगामं दूइज्जमाणे सुहंसुहेणं विहरमाणे जेणामेव रायगिहे नयरे गुणसिलए वेइए [तेणामेव उवागच्छइ उवागच्छिता अहापडिरूवं ओगगहं ओगिण्हिता संजमेणं तवसा अप्पाणं भावेमाणे] विहरइ । २४।-२१

(३०) तए णं रायगिहे नयरे सिंघाडग-जाव महया जणसहे इ वा जाव वहवे उग्गा भोगा रायगिहस्स नगरस्स मज्झंमज्झेणं एगदिसि एगभिमुहा निगच्छंति इमं च णं मेहे कुमारे उप्पिं पासायवरगाए फुट्टमाणेहिं मुइंगमत्थएहिं जाव माणुस्सए कामभोगे भुंजमाणे रायमग्गं च ओलोएमाणे-ओलोएमाणे एवं च णं विहरइ तए णं से मेहे कुमारे ते वहवे उग्गे भोगे जाव एगदिसाभिमुहे निगच्छमाणे पासइ पासिता कंचुइज्जपुरिसं सदावेइ सदावेत्ता एवं वयासी-किण्णं भो देवामणुप्पिया अज्ज रायगिहे नगरे इंदमहे इ वा खंदमहे इ वा एवं-रूइ-सिव-वेसमण-नाग-जक्ख-भूय-नई-तलाव-रुक्ख-वेइय-पव्वयमहे इ वा उज्जाण-गिरिज-त्ता इ वा जओ णं वहवे उग्गा भोगा जाव एगदिसिं एगभिमुहा निगच्छंति तए णं से कंचुइज्जपुरिसे समणस्स भगवओ महावीरस्स गहियागमणपवितीए मेहं कुमारे एवं वयासी-नो खलु देवाणुप्पिया अज्ज रायगिहे नयरे इंदमहे इ वा जाव गिरिजत्ता इ वा जं णं एए उग्गा भोगा जाव एगदिसिं एगभिमुहा निगच्छंति एवं खलु देवाणुप्पिया समणे भगवं महावीरे आइगरे तित्थगरे इहभाए इह संपत्ते समोसदे इह वैव

रायगिहे नगरे गुणसिलए चेइए अहापडिरूवं जाव विहरइ तए णं से मेहे कुमारे कंचुइअपुरिस्स अंतिए एयमट्ठं सोद्या निसम्म हइतुडे कोडुंबियपुरिसे सदावेइ सदावेत्ता एवं वयासी-खिप्पामेव भो देवाणुप्पिया चाउधंटे आसरहं जुत्तामेव उवइवेह तहत्ता उवणेति

तए णं से मेहे ण्हाए जाव सब्बालं- कारविभूसिए चाउधंटे आसरहं दुरूढे समाणे सकोरंटमल्लदामेमं छत्तेणं धरिअमाणेणं महया भड-चडगर-वंद-परिचाल-संपरिवुडे रायगिहस्स नयरस्स मज्झमज्जेणं निग्गच्छइ निग्गच्छित्ता जेणामेव गुणसिलए चेइए तेणामेव उवागच्छइ उवागच्छित्ता समणस्स भगवओ महावीरस्स छत्ताइच्छत्तं पडागाइपडागं विअहर-चारणे जंभए य देवे ओवयमाणे उप्पयमाणे पासइ पासित्ता चाउधंटाओ आसरहाओ पद्योरुहइ पद्योरुहित्ता समणं भगवं महावीरं पंचविहेणं अभिगमेणं अभिगच्छइ तं जह्हा-सचित्ताणं दब्बाणं विउसरणयाए अचित्ताणं दब्बाणं अविउसरणयाए एगसाडिय- उत्तरासंगकरणेणं चक्खुफासे अंजलिपगहेणं मणसो एगतीकरणेणं जेणामेव समणे भगवं महावीरे तेणामेव उवागच्छइ जाव तिक्खुत्तो आवाहिण-पयाहिणं करेइ करेत्ता वंदइ नमंसइ वंदित्ता नमंसित्ता समणस्स भगवओ महावीरस्स नद्यासत्रे नाइदूरे सुस्सूमाणे पंजलिउडे अभिमुहे विणएणं पजुवासइ तए णं समणे भगवं महावीरे मेहस्स कुमारस्स तीसे य महइमहालियाए परिसाए मज्जागए विचित्तं धम्ममाइक्खइ-जह जीवा वुज्जंति मुच्चंति जहा य संकिलिस्संति धम्मकहा भाणियव्वा जाव परिसा पडिगया ।२५।-२२

(३१) तए णं से मेहे कुमारे समणस्स भगवओ महावीरस्स अंतिए धम्मं सोद्या निसम्म हइतुडे समणं भगवं महावीरं तिक्खुत्तो आवाहिण-पयाहिणं करेइ करेत्ता वंदइ नमंसइ वंदित्ता एवं वयासी- सद्दहामि णं भंते निग्गंधं पावयणं एवं पत्तियामि णं रोएमि णं अट्ठुडेमि णं भंते निग्गंधं पावयणं एयमेयं भंते तहमेयं भंते अवितहमेयं भंते इच्छियमेयं भंते पडिच्छियमेयं भंते इच्छिय-पडिच्छियमेयं भंते से जहेयं तुब्भे वयह नवरि देवणुप्पिया अम्मापियरो आपुच्छामि तओ पच्छा मुंडे भवित्ता णं अगाराओ अणगारियं पव्वइस्सामि अहासुहं देवाणुप्पिया मा पडिवंधं करेहि तए णं से मेहे कुमारे समणं भगव महावीरं वंदइ नमंसइ वंदित्ता नमंसित्ता जेणामेव चाउधंटे आसरहे तेणामेव उवागच्छइ उवागच्छित्ता चाउधंटे आसरहं दुरूढे महया भड-चडगर-पहकरोणं रायगिहस्स नगरस्स मज्झमज्जेणं जेणामेव सए भवणे तेणामेव उवागच्छइ उवागच्छित्ता चाउधं-टाओ आसरहाओ पद्योरुहइ पद्योरुहित्ता जेणामेव अम्मापियरो तेणामेव उवागच्छइ उवागच्छित्ता अम्मापिअणं पायवडणं करेइ करेत्ता एवं वयासी-एवं खलु अम्मयाओ मए समणस्स भगवओ महावीरस्स अंतिए धम्मं निसंते से वि य मे धम्मं इच्छिए पडिच्छिए अभिरुइए तए णं तस्स मेहस्स अम्मापियरो एवं वयासी-धज्जेसि तुमं जाया संपुण्णे सि तुमं जाया कयत्थो सि तुमं जाया कयलक्खणो सि तुमं जाया जअं तुमै समणस्स भगवओ महावीरस्स अंतिए धम्मं निसंते से वि य ते धम्मं इच्छिए पडिच्छिए अभिरुइए तए णं से मेहे कुमारे अम्मापियरो दोद्यंपि एवं वयासी-एवं खलु अम्मयाओ मए समणस्स भगवओ महावीरस्स अंतिए धम्मं निसंते से वि य मे धम्मं इच्छिए पडिच्छिए अभिरुइए तं इच्छामि णं अम्मयाओ तुब्भेहिं अट्ठमणुणाए समाणे समणस्स भगवओ महावीरस्स अंतिए मुंडे भवित्ता णं अगाराओ अणगारियं पव्वइत्तए तए णं सा धारिणी देवी तं अणिअं अकतं अप्पियं अमणुणं अमणामं असुय पुच्चं फरुसं गिरं सोद्या निसम्म इमेणं एवारूवेणं मओमाणसिएणं महया पुत्तदुक्खेणं अभिभूया समाणि सेयागयरोमकूवपगलंत-चिलिणगाया

सोयमर-पवेवियंगी नितेया दीण-विमण-वयणा करयलमलिय व्व कमलमाला तक्खणओलुग-
दुब्बलसरीर-त्तावण्णसुत्र-निच्छाय-गयसिरीया पसिठिल- भूसण - पडंतखुम्भि- यस्सचुण्णियधवल-
वल्लय-पय्मइउत्तरिज्जा सूमाल-विकिण्ण-कंसहत्था मुच्छा- वसनद्वचेय-गरुई परसुनियत्त व्व चंप-
गलपानिच्चत्तमहे व्व इंदलद्वी विमुक्क-संधिबंधणा कोट्टि- मतलंसि सव्वंगेहिं धसत्ति पडिया तए
णं सा धारिणी देवी ससंभमोवत्तिथाए तुरियं कंचण- भिंगारमुहविभिग्गय-सीयलजलविमलधाराए
परिसिंचमाण-निव्वावियगयलद्वी उक्खेवय-ताव- विंटवीयण-जणियवाएणं सफुसिएणं अंतेउर-
परिजणेणं आसासिया समाणी मुत्तावलि सन्नि- गास पवडंत-अंसुधारहिं सिंचमाणी पओहरे
कलुण-विमण-दीणा रोयमाणी कंदमाणी तिप्पमाणी सोचमाणी विलवमाणी मेहं कुमारं एवं
वयासी-१२६-२३

(३२) तुमं सि णं जाया अहं एगे पुत्ते इट्ठे कंते पिए मणुण्णे मण्णमे धेजे वेसासिए सम्मए
वहुमए अनुमए भंडकरंडगसमाणे रयणे रयणभूए जीविय-उस्तासिए हियय-नंदि-जणणे उंवर-
पुष्पं व दुल्लहे सवणयाए किमंगपुण पासणयाए नो खलु जाया अहं इच्छामो खणमवि विप्पओगं
सहितए तं भुंजाहि ताव जाया विपुले माणुस्सए कामभोगे जाव ताव वयं जीवामो तओ पच्छा
अहंहेहिं कालगएहिं परिणयवए वडिद्वेय-कुलवंसंततु-कज्जमि निरावयक्खे समणस्स भगवओ
महावीरस्स अंतिए मुंडे भवित्ता अगाराओ अणगारियं पव्वइस्ससि तए णं से मेहे कुमारं अम्मापि-
ऊहिं एवं वुत्ते समाणे अम्मापियरो एवं वयासी-तहेव णं तं अम्मो जहेव णं तुब्भे ममं एवं वयह-तुमं
सि णं जाया अहं एगे पुत्ते तं चेव जाव निरावयक्खे समणस्स जाव पव्वइस्सासि एवं खलु
अम्मयाओ माणुस्सए भवे अधुवे अणितिए असासए वसणसओवहवाभिभूते विज्जुलयाचंचले
अणित्ठे जलवुत्थयसमाणे कुसग्गजलविंदुसन्निभे संझठभरागसरिसे सुविणदंसणोवमे सडण-पडण-
विद्धंसण-धम्मे पच्छा पुरं च णं अवस्सविप्पजहणिजे से के णं जाणइ अम्मयाओ के पुक्खि गमणाए
के पच्छा गमणाए तं इच्छामि णं अम्मयाओ तुब्भेहिं अड्ढणुण्णाए समाणे समणस्स [भगवओ
महावीरस्स अंतिए मुंडे भवित्ता णं अगाराओ अणगारियं] पव्वइत्तए तए णं तं मेहं कुमारं
अम्मापियरो एवं वयासी-इमाओ ते जाया सरिसियाओ सरित्तयाओ सरिव्वयाओ सरिसला-
वण्ण-रूव-जोव्वण-गुणोववेयाओ सरिसेहिंतो रायकुलेहिंतो अणिल्लियाओ भारियाओ तं भुंजाहिं
णं जाया एयाहिं सद्धि विउले माणुस्सए कामभोगे पच्छा भुत्तभोगे समणस्स जाव पव्वस्ससि

तए णं से मेहेकुमारं अम्मापियरं एवं वयासी-तहेव णं तं अम्मयाओ जं णं तुब्भे ममं एवं
वयह-इमाओ ते जाया सरिसियाओ [सरित्तयाओ सरिव्वयाओ सरिसलावण्ण-रूव-जोव्वण- गुणो-
ववेयाओ सरिसेहिंतो रायकुलेहिंतो माणुस्सए कामभोगे पच्छा भुत्तभोगे समणस्स भगवओ
महावीरस्स अंतिए मुंडे भवित्ता अगाराओ अणगारियं] पव्वइस्ससि एवं खलु अम्मयाओ माणु-
स्सगा कामभोगे असुई वंतासवा पित्तासवा खेलासवा सुक्कासवा सोणियासवा दुरुय- उस्तास-
नीसास दुरुय-मुत्त-पुरीस-पूय-बहुपडिपुत्ता उट्ठार- पासवण- खेल- सिंधाणग- वंत- पित्तसुक्क-
सोणियसंभया अधुवा अणित्तया अरासया सडण-पडण-विद्धंसणधम्मा पच्छा पुरं च णं
अवस्सविप्पजहणिज्जा से के णं जाणइ अम्मयाओ [के पुक्खि गमणाए के पच्छा गमणाए एवं चेव
जाव] इपव्वइत्तइ तए णं तं मेहं कुमारं अम्मापियरो एवं वयासी-इमे य ते जाया अञ्जय- पञ्चय-
पिउपञ्जयागए सुवहू हिरण्णे य सुवण्णे य कंसं च दूसे य पणि- मोत्तिय- संख- सिल- प्पवाल-

रत्तरयण-संतसार-सावएजे य अलाहि जाव आसतमाओ कुलवंसाओ पगामं दाउं पगामं भोचु पगामं परिभाएउं तं अनुहोही ताव जाया विपुलं माणुस्सगं इड्डिसककारसमुदयं तओ पच्छा अनुभूयकळणे समणस्स भगवओ महावीरस्स [अंतिए मुंडे भवित्ता अगाराओ अणगारियं] पव्वइस्ससि तए णं से मेहे कुमारे अम्मापियरं एवं वयासी-तहैव णं तं अम्पयाओ जं णं तुढे ममं एवं वयह-इमे ते जाया अज्जग-पज्जग-जाव तिओ पच्छा अनुभूयकळणे समणस्स भगवओ महावीरस्स अंतिए मुंडे भवित्ता अगाराओ अणगारियं पव्वइस्ससि एवं खलु अम्पयाओ हिरण्णे य जाव सावएजे य अग्गिसाइहिए चोरसाहिए रायसाहिए दाइयसाहिए मच्चुसाहिए अग्गिसामण्णे [चोरसामण्णे रायसामण्णे दाइयसामण्णे] मच्चुसामण्णे सडण-पडण-विद्धंसणधम्मं पच्छा पुरं य अवस्सविप्पजहणिजे से के णं जाणइ अम्मायाओ के [पुत्थिं गमणाए के पच्छा] गमणाए तं इच्छामि णं [अम्पयाओ तुढ्मेहिं अब्भणुण्णाए समाणे समणस्स भगवओ महावीरस्स अंतिए मुंडे भवित्ता णं अगाराओ अणगारियं] पव्वइत्तए ।२७-२३-R

(३३) तए णं तस्स मेहस्स कुमारस्स अम्मापियरो जाहे नो संचाएंति मेहं कुमारं वहूहिं विसयाणुलोमाहिं आघवणाहिं य पन्नवणाहिं य सण्णवणाहिं य विण्णवणाहिं य आघवित्तए वा पन्नवित्तए वा सण्णवित्तए वा विण्णवित्तए वा ताहे विसयपडिकूलहिं संजमभउव्वेयकारियाहिं पन्नवणाहिं पन्नवेमाणा एवं वयासी-एस णं जाया निग्गंथे पावयणे सच्चे अनुत्तरे केवलिए पडिपुत्ते नेवाउए संमुद्धे सल्लगतणे सिद्धिमग्गे मुत्तिमग्गे निज्जाणमग्गे निव्वाणमग्गे सव्वदुक्खप्पहीणमग्गे अहीव एगंतदिट्ठीए खुरो इव एगंतधाराए लोहमया इय जवा चावेयव्वा वालुयाकवले इव निरस्साए गंगा इव महानई पडिसोयगमणाए महासमुद्धे इय भुयाहिं दुत्तरे तिक्खं कमियव्वं गरुअं लंथेयव्वं असिधारव्वयं चरियव्वं नो खलु कप्पइ जाया समणाणं निग्गंथाणं आहाकम्मिए वा उट्टेसिए वा क्रीयगडे वा ठविए वा रइए वा दुब्भिक्खभत्ते वा कंतारभत्ते वा वट्टलियाभत्ते वा गिलाणभत्ते वा मूलभोयणे वा कंदभोयणे वा फलभोयणे वा वीथभोयणे वा हरियभोयणे वा भोत्तए वा पाचए वा तुमं य णं जाया सुहसमुच्चिए नो चेव णं दुहसमुच्चिए नालं सीयं नालं उण्हं नालं खुहं नालं पिवासं नालं वाइय-पित्तिय-सिंभिय-सन्निवाइए विविहे रोगायंके उच्चावए गामकंटए वावीसं परीसहोवसग्गे उदिण्णे सम्मं अहियासित्तए भुंजाहिं ताव जाया माणुस्सए कामभोगे तओ पच्छा भुत्तमोगी समणस्स [भगवओ महावीरस्स अंतिए मुंडे भवित्ता अगाराओ अणगारियं] पव्वइस्ससि तए णं से मेहे कुमारे अम्मापिऊहिं एवं वुत्ते समाणे अम्मापियरं एवं वयासी-तहैव णं तं अम्पयाओ जं णं तुढ्मे ममं एवं वयह-एस णं जाया निग्गंथे पावयणे सच्चे अनुत्तरे पुणरत्थिं तं चेव जाव तओ पच्छा भुत्तमोगी समणस्स भगवओ महावीरस्स अंतिए मुंडे भवित्ता अगाराओ अणगारियं पव्वइस्ससि एवं खलु अम्पयाओ निग्गंथे पावयणे कावाणं कायराणं कापुरिसाणं इहलोगपडि-वद्धाणं परलोगनिष्पिवा- साणं दुरणुचरे पाययजणस्स नो चेव णं धीरस्स निच्छिववसियस्स एत्थ किं दुक्करं कारणयाए तं इच्छामि णं अम्पयाओ तुढ्मेहिं अब्भणुण्णाए समाणे समणस्स [भगवओ महावीरस्स अंतिए मुंडे भवित्ता णं अगाराओ अणगारियं] पव्वइत्तए तए णं तं मेहं कुमारं अम्मापियरो जाहे नो संचाएंति बहूहिं विसयाणुलोमाहिं य विसयपडिकूलहिं य आघवणाहिं य पन्नवणाहिं य सण्णवणाहिं य विण्णवणाहिं य आघवित्तए वा पन्नवित्तए वा सण्णवित्तए वा विण्णवित्तए वा ताहे अकामकाइं चेव मेहं कुमारं एवं वयासी-इच्छामो ताव जाया एगदियसमवि ते

रायसिरिं पासित्तए तए णं से मेहे कुमारे अम्मापियरमणुवत्तमाणे तुसिणीए संचिड्डइ तए णं से सेणिए राया कोडुंवियपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया मेहस्स कुमारस्स महत्थं महत्थं महरिहं विउलं रायाभिसेयं उवड्ढवेह

तए णं ते कोडुंवियपुरिसा [मेहस्स कुमारस्स महत्थं महत्थं महरिहं विउलं रायभिसेयं] उवड्ढेवंति तए णं से सेणिए राया बहूहिं गणनायगेहि य जाव संधिवालेहि य सद्धिं संपरिवुडे मेहं कुमारं अद्दसएणं सोवण्णिचाणं कलसाणं एवं-रुप्पमयाणं कलसाणं मणिमयाणं कलसाणं सुवण्ण-रुप्पमयाणं कलसाणं सुवण्णमणिमयाणं कलसाणं रुप्पमणिमयाणं कलसाणं सुवण्णरुप्पमणिमयाणं कलसाणं भोमेत्ताणं कलसाणं सब्बोदएहिं सब्बभट्टियाहिं सब्बपुप्फेहिं सब्बगंधेहिं सब्बमल्लेहिं सब्बोसहीहिं सिद्धत्थाएहि य सब्बड्ढिए सब्बजुईए सब्बवलेणं जाव दुंदुभिनिधोस-नाइयरवेणं महया-महया रायाभिसेएणं अभिसिचइ अभिसिचिता करयल- [परिण- हियं दसनहं सिरसावत्तं मत्थाए अंजलिं] कट्टु एवं वयासी-जय-जय नंदा जय-जय भद्दा जय-जय नंदा भदं ते अजियं जिणाहिं जिंयं पालयाहिं जिंयमज्जे वसाहिं अजियं जिणाहिं सत्तुपक्खं जिंयं च पालेहिं मित्तपक्खं [इंदो इव देवाणं चमरो इव असुराणं धरणो इव नागाणं चंदो इव ताराणं] भरहो इव मणुयाणं रायविहस्स नगरस्स अत्रेसिं च वहूणं गामागर-नगर- [खेड-कब्बड-दोणमुह-भडं व-पट्टण- आसम-निगम-संवाह-सण्णिवेसाणं आहेवच्चं पोरेवच्चं सामितं भट्टितं महत्तरगतं आणा-ईसर-सेणावच्चं कारेमाणे पालेमाणे महयाहय-नट्ट-गीय-वाइय-तंती-त्तल-ताल- तुडिंय-घण-मुडंग- पट्टुप्पाइयर-वेणं विउलाइं भोगभोगाइं भुंजमाणे] विहराहिं ति कट्टु जय-जय-सदं पउंजंति तए णं से मेहे राया जाए-महयाहिमवंत-महंत-मलय-मंदर-महिंदसारे जाव रज्जं पसासे- माणे विहरइ तए णं तस्स मेहस्स एण्णो तं मेहं रायं अम्मापियरो एवं वयासी-भण जाया किं दल्लयानो किं पयच्छामो किं वा ते हियइच्छिए सामत्थे तए णं से मेहे राया अम्मापियरो एवं वयासी-इच्छामि णं अम्मयाओ कुत्तियावणाओ रयहरणं पडिग्गहं च आणियं कासवयं च सद्दावियं तए णं से सेणिए राया कोडुंवियपुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया सिरिघराओ तिण्णि सयरसहस्साइं गहाव दोहिं सयसहस्सेहिं कुत्तियावणाओ रयहरणं पडिग्गहं च उवणेह सयसहस्सेणं कासवयं सद्दावह तए णं ते कोडुंवियपुरिसा सेणिएणं रण्णा एवं युत्ता समाणा हट्टतुट्टा सिरिघराओ तिण्णि सयसहस्साइं गहाव कुत्तियावणाओ दोहिं सयसहस्सेहिं रयहरणं पडिग्गहं च उवणेति सयसहस्सेहेणं कासवयं सद्दावेति तए णं से कासवए तेहिं कोडुंवियपुरिसेहिं सद्दाविए समाणे हट्टतुट्ट-चित्तमाणंदिए जाव हरिसवसविसप्पमाणहियए प्हाए कयबलिकम्भे कय- कोउय- मंगल-पायच्छित्ते सुद्धप्पावेसाइं वत्थाइं पवर परिहिए अप्पमहग्धाभरणालंक्रियसरिरे जेणेव सेणिए राया तेणेव उवागच्छइ उवागच्छिता सेणियं रायं करयलपरिणहियं सिरसावत्तं मत्थाए अंजलिं कट्टु एवं वयासी-संदिसह णं देवाणुप्पिया जं मए करणिज्जं तए णं से सेणिए राया कासवयं एवं वयासी-गच्छहिं णं तुब्भे देवाणुप्पिया सुरभिणा गंधोदएणं निक्के हत्थपाए पक्खालेहिं सेचाए चउप्फलाए पोत्तीए मुहं वंधित्ता मेहस्स कुमारस्स चउरंगुलवज्जे निक्खमण- पाउग्गे अग्गकेसे कप्पेहि तए णं से कासवए सेणिएणं रण्णा एवं युत्ते समाणे हट्टतुट्ट-चित्तमाणंदिए जाव हरिसवस-विसप्पमाणहिएय [करयलपरिणहियं सिरसावत्तं मत्थाए अंजलिं कट्टु एवं सामी ति आणाए विणएणं वयणं] पडि-सुणेइ पडिसुणेत्ता सुरभिणा गंधोदएणं निक्के हत्थपाए पक्खालेइ पक्खालेत्ता सुद्धवत्थेणं मुहं

बंधइ बंधिता परेणं जतेणं मेहस्स कुमारस्स चउरंगुलवज्जे निक्खमणपाउणे अगकेसे कप्पेति तए णं तस्स मेहस्स कुमारस्स माया महरिहेणं हंसलक्खणेणं पडसाडएणं अगकेसे पडिच्छइ पडिच्छिता सुरभिणा गंधोदएणं पक्खालेइ पक्खालेत्ता सरसेणं गोसीसचंदणेणं चच्चाओ दलयइ दल-इत्ता सेयाए पोत्तीए बंधइ बंधिता रयणसमुग्गयंसि पक्खिवइ मंजूसाए पक्खिवइ हार- वारिधार-सिंदुवार-छिन्नमुत्तावलि-प्पगासाइ अंसुइ विणिम्म्यमाणी- विणिम्म्यमाणी रोयमाणी-रोयमाणी कंदमाणी-कंदमाणी विलवमाणी-विलवमाणी एवं वयासी- एस णं अम्हं मेहस्स कुमारस्स अब्भुदएलसु य उस्सवेसु य पसवेसु य तिहीसु य छणेसु य जन्नेसु य पव्वणीसु य-अपच्छिमे दरिसणे भविस्सइ ति कट्टु उस्सीसामूले ठवेइ

तए णं तस्स मेहस्स कुमारस्स अम्पापियरो उत्तरावक्कमणं सीहासणं रयावेति मेहं कुमारे दोच्चं पि तच्चं पि सेयापीएहिं कलसेहिं ण्हावेति ण्हादेत्ता पम्हलसूमालाए गंधकासाइयाए गायाइं लूहेति लूहेत्ता सरसेणं गोसीसचंदणेणं गायाइं अनुलिंपति अनुलिंपिता नासा-नीसासवाय-वोज्जं [वरणगरपट्टणुग्गयं कुसलणरपसंतितं अस्सलालापेलवं छेयायरियकणगखचियंतकम्मं] हंस-लक्खणं पडसाडगं नियंसेति हारं पिणद्धेति अद्धहारं पिणद्धेति एवं-एगावलिं मुत्तावलिं कणगावलिं रयणावलिं पालंबं पायपलंबं कडगाइं तुडिगाइं केऊराइं अंगायाइं दसमुद्धियाणंतयं कडिसुत्तयं कुंडलाइं चूडामणिं रयणुककडं मउडं-पिणद्धेति पिणद्धेत्ता गंधिम-वेट्ठिम-पूरिम-संधाइमेणं- चउ-व्विहेणं मल्लेणं कप्परुक्खगं पिव अलंकिय-विभूसियं करेति तए णं से सेणिए राया कोडुंबियपुरिसे सद्दावेइ सद्दावेत्ता एवं दयासी-खिप्पामेव भो देवाणुष्पिया अणेगखंभसय-सण्णिविद्धं लीलद्धिय-सालभंजियामं ईहामियउसभ-तुरय-नर-भगर-विहग-वालंग-किन्नर-रुरु-सरभ-चमर-कुंजर- वण-लय-पउमलय-भतित्तं घंटावलि-महुर-मणहरसरं सुभ-कंत-दरिसणिज्जं निउणोविय-मिसिमिसेंत-मणिरयणंधंडियाजालपरिक्खित्तं अब्भुग्गय-वइरवेइया-परिगयाभिरामं विज्जाहरजमल-जंतजुतं पिव अच्चीसहस्समालणीयं रूवगसहस्सकलियं भिसमाणं भिब्भिसमाणं चक्खुल्लोयणसेल्लं सुह-फासं सस्सिरीयरूवं सिग्घं तुरियं चवलं वेइयं पुरिससहस्सवाहिणीयं सीयं उवट्टवेह तए णं ते कोडुंबियपुरिसा हट्टतुड्ढा अणेगखंभसय-सण्णिविद्धं जाव सीयं उवट्टवेति तए णं से मेहे कुमारे सीयं दुरुहइ दुरुहिता सीहासणवरगए पुरत्थाभिमुहे सण्णिसण्णे तए णं तस्स मेहस्स कुमारस्स माया ण्हाया कय- बलिकम्मा जाव अप्पमहग्धाभरणालंकियसरीरा सीयं दुरुहइ दुरुहिता मेहस्स कुमारस्स दाहि- णपासे भदासणंसि निसीयइ तए णं तस्स मेहस्स कुमारस्स अंबधाइ रयहरणं च पडिगहं च गहाय सीयं दुरुहइ दुरुहिता मेहस्स कुमारस्स वामपासे भदासणंसि निसीयइ

तए णं तस्स मेहस्स कुमारस्स पिड्डओ एगा वरतरुणी सिंगारागरचारुवेसा [संगय- गय-हसिय- भणिय- चेड्डिय-विलास-संलाबुल्लावनिउणजुत्तोवयारं] कुसला आमेलगजमल- जुयलव-द्विय- अब्भुण्णय - पीण - रइय - संठिय-पओहरा हिम-रइय-कुदेउपगासं सकोरेटमल्लदमं धवलं आयवतं गहाय सलीलं ओहारेमाणी-ओहारेमाणी चिड्डइ तए णं तस्स मेहस्स कुमारस्स दुवे वरतरुणीओ सिंगारारागरचारुवेसाओ [संगय-गय-हसिय-भणिय-चेड्डिए विलास-संलाबुल्लाव-निउणजुत्तोवयारं] कुसलाओ सीयं दुरुहंति दुरुहिता मेहस्स कुमारस्स उभओ पासं नाणामणि-कणग-रयण-महरिहतवणिज्जल-विचित्तदंडाओ चिल्लियाओ सुकुमधरदीहवालाओ संखकुंद-दगरय-अमयमहियफेणुंज-सण्णिगासाओ चामराओ गहाय सलीलं ओहारेमाणीओ- ओहारेमा-

णीओ चिद्धंति तए णं तस्स मेहस्स कुमारस्स एगा वरतरुणी सिंगारा-जाव कुसला सीयं दुरिहइ दुरिहिता मेहस्स कुमारस्स पुरओ पुरत्थिमे णं चंदप्पभवइर-वेरुलिय-विमलदंडं तालियंटं गहाय चिद्धइ तए णं तस्स मेहस्स कुमारस्स एगा वरतरुणी जाव कुसला सीयं दुरुहइ दुरिहिता मेहस्स कुमारस्स पुब्बदक्खिणे णं सेयं रययामयं विमलसल्लि पुत्रं मत्तगयमहामुहाकितिसमाणं भिंगारं गहाय चिद्धइ तए णं तस्स मेहस्स कुमारस्स पिया कोडुंबिपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया सरिसयाणं सरित्तयाणं सरिव्वयाणं एगाभरण-गहिय-निज्जोयाणं कोडुंबियवरत-रुणाणं सहस्सं सद्दावेह जाव सद्दावेति तए णं ते कोडुंबियवरतरुणपुरिसा सेणियस्स रण्णो कोडुंबियपुरिसेहिं सद्दाविया समाणा हट्ठा गहाया जाव सब्बालंकारविभूसिया एगाभरण-गहियणिज्जोया जेणामेव सेणिए रावा तेणामेव उवागच्छंति उवागच्छता सेणियं रायं एवं वयासी-संदिसह णं देवाणुप्पिया जं णं अक्केहिं करणिज्जं तए णं से सेणिए राया तं कोडुंबिय-वरतरुणसहस्सं एवं वयासी-गच्छह णं तुब्भे देवाणुप्पिया मेहस्स कुमारस्स पुरिससहस्सवाहिणीयं सीयं परिवहेह तए णं तं कोडुंबियवरतरुणसहस्सं सेणिएण रण्णा एवं युतं संतं हट्ठं मेहस्स कुमारस्स पुरिससहस्सवाहिणीयं सीयं परिवहइ तए णं तस्स मेहस्स कुमारस्स पुरिससहस्स-वाहिणीयं सीयं दुरुद्धस्स समाणस्स इमे अट्ठमंगलया तप्पढमयाए पुरओ अहाणुपुब्बीए संपत्थि-या तं जहा- सोवत्थिय-सिरिवच्छ-नंदियावत्त-वद्धमाणग-भद्दासण-कलस-मच्छ-दप्पणवा जाव बहये अत्यत्थिया [कामत्थिया भोगत्थिया लाभत्थिया किब्बिसिया कारोडिया कारवाहिचा संखिया चक्किया नंगलिया मुहुमंगलिया वद्धमाणा पूसमाणया खंडियगणा तहिं इट्ठाहिं कंताहिं पियाहिं] मणुण्णाहिं मणामाहिं मणाभिरामाहिं हिययगमणिज्जाहिं वग्गुहिं जयविजयमंगलसएहिं अणवरयं अभिनंदंता य अभिधुणंता य एवं वयासी-जय-जय-नंदा जय-जय भद्दा जय-जय नंदा भद्दं ते अजियं जिणाहि इंदियाइं जियं च पालेहि समणधम्मं जियविग्घो वि य वसाहि तं देव सिद्धिमज्जे निहणाहि रागदोसमज्जे तवेण धिइ-धणिय-बद्धकच्छे मद्दाहि य अट्ठकम्मसत्तू ज्ञाणेणं उत्तमेणं सुक्क्रेणं अप्पमत्तो पावय वितिमिरमणुत्तरं केवलं नाणं गच्छ य मोक्खं परमं पयं सासयं च अयलं हंता परीसहचमूणं अभीओ परीसहोवसग्गाणं धम्मे ते अविग्घं भवउ त्ति कट्टु पुणो-पुणो मंगल-जयसहं पउंजंति तए णं से मेहे कुमारे रायगिहस्स नगरस्स मज्झमज्झेणं निग्गच्छइ निग्गच्छिता जेणेव गुणसिलए चेइए तेणामेव उवागच्छइ उवागच्छिता पुरिससहस्सवाहिणीओ सीयाओ पच्चोरुहइ ।२८।-२४

(२४) तए णं तस्स मेहस्स कुमारस्स अम्मापियरो मेहं कुमारं पुरओ कट्टु जेणामेव समये भगवं महावीरे तेणामेव उवागच्छंति उवागच्छिता समणं भगवं महावीरं तिक्खुत्तो आया-हिण-पयाहिणं करंति करेत्ता वंदंति नमंसंति वंदिता नमंसित्ता एवं वयासी-एस णं देवाणुप्पिया मेहे कुमारे अहं एगे पुत्ते इट्ठे कंते [पिए मणुण्णे मणामे धेज्जे वेसासिए सम्मए बहुमए अनुमए भंडकंडग-समाणे रवणे रयणभूए] जीवियऊसासए हिययनंदिजणए उंवरपुष्पं पिव दुल्लहे सवणयाए किमंग पुण दरिसणयाए से जहानामए उप्पले ति वा पउमे ति वा कुमुदे ति वा पंके जाए जले संवड्ढिए नोवलिप्पइ पंकरएणं नोवलिप्पइ जलरएणं एवामेव मेहे कुमारे कामेसु जाए भोगेसु संवड्ढिए नोवलिप्पइ कामरएणं नोवलिप्पइ भोगरएणं एस णं देवाणुप्पिया संसारभउब्बिये भीए जम्मण-जर-भरणणं इच्छइ देवाणुप्पियाणं अंतिए मुंटे भविता अगाराओ अणगारियं पव्वइत्तए

अम्हे णं देवाणुप्पियाणं सिस्सभिक्खं दलयाभो पडिच्छंतु णं देवाणुप्पिया सिस्सभिक्खं तए णं समणे भगवं महावीरे मेहस्स कुमारस्स अम्मापिऊहिं एवं बुते समाणे एयमट्ठं सम्मं पडिसुणेइ तए णं से मेहे कुमारे समणस्स भगवओ महावीरस्स अंतियाओ उत्तरपुरत्थिमं दिसीभागं अवक्कमइ सयमेव आभरण-मल्लालंकारं ओमुयइ तए णं तस्स मेहस्स कुमारस्स पाया हंसलक्खणेणं पडसाइएणं आभरण-मल्लालंकारं पडिच्छइ पडिच्छिता हार-वारिधार-सिंदुवार-छिन्नमुत्तावलिप्पागासाइं अंसूणि विणिम्बुवमाणी-विणिम्बुवमाणी रोयमाणी-रोयमाणी कंदमाणी-कंदमाणी विलवभाणी- विलव माणी एवं वयासी-जइयव्वं जाया धडियव्वं जाया परक्कमियव्वं जाया अस्सि च णं अट्टे नो पमाएयव्वं अम्हंपि णं एसेव मग्गे भवउ त्ति कट्टु मेहस्स कुमारस्स अम्मापियरो समणं भगवं महावीरं वंदंति नमंसंति वंदिता नमंसित्ता जामेव दिसं पाउठ्ठपूया तामेव दिसं पडिगया ।२९१-२५

(३५) तए णं से मेहे कुमारे सयमेव पंचनुट्ठियं लोयं करेइ करेत्ता जेणामेव समणे भगवं महावीरे तेणामेव उवागच्छइ उवागच्छिता समणं भगवं महावीरं तिकखुत्तो आयाहिण-पयाहिणं करेइ करेत्ता वंदइ नमंसइ वंदिता नमंसित्ता एवं वयासी-आलित्ते णं भंते लोए पलित्ते णं भंते लोए आलित्ता-पलित्ते णं भंते लोए जराए मरणेण य से जहानामए केइ गाहावई अगारंसि झियायमाणंसि जे तत्थ भंडे भवइ अप्यभारे मोल्लगरुए तं गहाय आयाए एगंतं अवक्कमइ-एस मे नित्थरिए समाणे पच्छा पुरा य लोए हियाए सुहाए खमाए निस्सेसाए आनुगामियत्ताए भविस्सइ एवामेव मम वि एणे आयाभंडे इट्ठे कंते पिए मणुण्णे मणामे एस मे नित्थारिए समाणे संसारोच्छेयकरे भविस्सइ तं इच्छामि णं देवाणुप्पिएहिं सयमेव पव्वावियं सयमेव मुंडावियं सयमेव सेहावियं सयमेव सिक्खा-वियं सयमेव आघार-गोयर-विणय-वेणइय-चरण-करण-जायामायावत्तियं धम्मपाइक्खियं तए णं समणे भगवं महावीरं मेहं कुमारे सयमेव पव्वावेइ सयमेव [मुंडावेइ सयमेव सेहावेइ सयमेव सिक्खावेइ सयमेव आघार-गोयर-विणय-वेणइय-चरण-करण-जायामायावत्तियं] धम्मपा-इक्खइ एवं देवाणुप्पिया गंतव्वं एवं चिट्ठियव्वं एवं निसीयव्वं एवं तुयट्ठियव्वं एवं भुजियव्वं एवं भासियव्वं एवं उट्ठाए उट्ठाय पाणेहिं भूएहिं जीवेहिं सत्तेहिं संजमेणं संजमियव्वं अस्सि च णं अट्टे नो पमाएयव्वं तए णं से मेहे कुमारे समणस्स भगवओ महावीरस्स अंतिए इमं एयारूवं धम्मियं उवएसं सम्मं पडिवज्जइ-त्तमाणाए तए गच्छइ तए चिट्ठइ तए निसीवइ तए तुयट्ठइ तए भुंजइ तए भासइ तए उट्ठाए उट्ठाय पाणेहिं भूएहिं जीवेहिं सत्तेहिं संजमेणं संजमइ ।३०१-२६

(३६) जहिवसं च णं मेहे कुमारे मुंडे भवित्ता अगाराओ अणगारियं पव्वइए तरस्स णं दिवस्स पद्यावरण्हकालसमंयसि समणाणं निग्गंधाणं अहाराइणियाए सेज्जा-संधारएसु विभज्ज-माणेसु मेहकुमारस्स दारमूले सेज्जा-संधारए जाए यावि होत्था तए णं समणा निग्गंधा पुव्वर-त्तावरत्तेकालसमंयसि वायणाए पुच्छणाए परियट्ठणाए धम्माणुजोगधित्ताए य उच्चारस्स वा पास-वणस्स वा अइगच्छमाणा य निग्गच्छमाणा य अप्पेगइया मेहं कुमारे इत्थेहिं संघट्ठेति ।अप्पेगइया पाएहिं संघट्ठेति अप्पेगइया सीसे संघट्ठेति अप्पेगइया पोट्टे संघट्ठेति अप्पेगइया कायंसि संघट्ठेति ।अप्पेगइया ओलंडेति अप्पेगइया पोलंडेति अप्पेगइया पाय-रय-रेणु-गुंडियं करेति एमहालियं च रयणिं मेहे कुमारे नो संचाएइ खणमवि अचिं निमीलित्ताए तए णं तस्स मेहस्स कुमारस्स अयमेयारूवे अज्झत्थिए [चित्तिए पत्थिए मणोगए संकण्णे] समुप्पज्जित्था-एवं खलु अहं सेणियस्स रण्णो पुत्तो धारिणीए देवीए अत्ताए मेहे ।इट्ठे कंते पिए मणुण्णे मणामे येजे वेसासिए सम्मए वट्ठुमाए

अनुमए भंडकरंडासमाणे रयणे रयणभूए जीविय-उस्सासए ह्रियय-नंदि-जणणे उंवर-पुष्फं व दुल्लहे! सवणयाए तं जया णं अहं अगारमञ्जवसामि तया णं मम समणा निग्गंथा आढायंति परियाणांति सक्कारेति सम्माणेति अद्दाइं हेऊइं पसिणाइं कारणाइं वागरणाइं आइक्खंति इद्दाहिं कंताहिं वग्गूहिं आलवेति संलवेति जप्पभिइं च णं अहं मुंडे भविता अगाराओ अणगारियं पव्वइए तप्पभिइं च णं ममं समणा निग्गंथा नो आढायंति [नो परियाणांति जाव नो अद्दाहिं वग्गूहिं आलवेति] संलवंति अदुत्तरं च णं ममं समणा निग्गंथा राओ पुव्वरत्तावरत्तकालसमयंसि बायणाए पुच्छणाए [परियट्टणाए धम्माणुजोगचिंता ए य उच्चारस्स वा पासवणस्सए वा अइगच्छमाणा य निग्गच्छमाणा य अप्पेगइया इत्थेहिं संघट्टेति अप्पेगइया पाएहिं संघट्टेति अप्पेगइया सीसे संघट्टेति अप्पेगइया पोटे संघट्टेति अप्पेगइया कायंसि संघट्टेति अप्पेगइया ओलंडेति अप्पेगइया पोलंडेति अप्पेगइया पाय-रय-रेणु-गुंडियं करेति] एमहालियं चणंरति अहिं नो संचाएमि अच्छि निमिद्धा-वेत्तए निर्मलित्तए तं सेयं खलु मज्झं कल्लं पाउप्पभायाए रयणीए जाव उट्टिमि सूरु सहस्सरस्सिमि दिणयरे तेयसा जलंते समणं भगवं महावीरे आपुच्छिता पुणरवि अगारमञ्जावसित्तए ति कट्टु एवं संपेहेइ संपेहेता अट्ट-वसट्ट-माणसगए निरयपडिक्खियं च णं तं रयणि खवेइ खवेत्ता कल्लं पाउप्पभायाए सुविमलाए रयणीए जाव उट्टिमि सूरु सहस्सरस्सिमि दिणयरे तेयसा जलंते जेणेव समणे भगवं महावीरे तेणेव उवागच्छइ उवागच्छिता समणं भगवं महावीरं तिक्खुत्तो आया-हिण-पयाहिणं करेइ करेत्ता वंदइ नमंसइ जाव पज्जयासइ 1३१1-26-R

(३७) तए णं मेहा इ समणे भगवं महावीरे मेहं कुमारं एवं वयासी-से नूणं तुमं मेहा राओ पुव्वरत्तावरत्तकालसमयंसि समणेहिं निग्गंथेहिं बायणाए पुच्छणाए [परियट्टणाए धम्माणुजोग-चिंताए य उच्चारस्स वा पासवणस्स वा अइगच्छमाणेहि य निग्गच्छमाणेहि य अप्पेगइएहिं हत्थेहिं संघट्टेए अप्पेगइएहिं पाएहिं संघट्टेए अप्पेगइएहिं सीसे संघट्टेए अप्पेगइएहिं पोटे संघट्टेए अप्पेगइएहिंकायंसि संघट्टेए अप्पेगइएहिं ओलंडेए अप्पेगइएहिं पोलंडेए अप्पेगइएहिं पाय-रय-रेणु-गुंडिए कए] एमहालियं च णं राइं तुमं नो संचाएसि मुहत्तमवि अच्छि निमिद्धावेत्तए तए णं तुज्झ मेहा इमेवारुवे अज्जात्थिए [चितिए पत्थिए मणोगए संकप्पे] समुप्पज्जित्था-जया णं अहं अगारमञ्जावसामि तया णं ममं समणा निग्गंथा आढायंति [परियाणांति सक्कारेति सम्माणेति अद्दाइं हेऊइं पसिणाइं कारणाइं वागरणाइं आइक्खंति इद्दाहिं कंताहिं वग्गूहिं आलवेति संलवेति] जप्पभिइं च णं मुंडे भविता अगाराओ अणगारियं पव्ववामि तप्पभिइं च णं ममं समणा निग्गंथा नो आढायंति जाव संलवेति अदुत्तरं च णं ममं समणा निग्गंथा राओ पुव्वरत्तावरत्त-कालसमयंसि अप्पेगइया जाव पाय-रय-रेणु-गुंडियं करेति तं सेयं खलु मम कल्लं पाउप्पभायाए रयणीए जाव उट्टिमि सूरु सहस्सरस्सिमि दिणयरे तेयसा जलंते समणं भगवं महावीरं आपु-च्छिता पुणरवि अगारमञ्जे आवसित्तए ति कट्टु एवं संपेहेसि संपेहेता अट्ट-दुहट्ट-वसट्ट-माणसगए [निरयपडिक्खियं च णं तं रयणि खवेसि खवेत्ता जेणापेव अहं तेणापेव हव्वमागए से नूणं मेहा एस अत्थे समत्थे हंता अत्थे समत्थे

एवं खलु मेहा तुमं इओ तद्ये अईए भवग्गहणे वेयइद्धगिरिपायमूले वणयरेहिं निव्वत्तिव-नानभेडे सेए संख-उज्जल-विमल-निम्मल-दहिषण-गोखीर-फेण-रयणिचरप्पयासे सतुस्सेहे नवा-यए दसपरिणाहे सत्तांगपइद्धिए सोम-सम्मिए सुरूवे पुरओ उदग्गे समूसिचसिरे सुहासणे पिड्डओ

वराहे अइयाकुच्छी अच्छिदकुच्छी अलंबकुच्छी पलंबलंबोदराहरकरे धणुपट्टागिति-विसिद्धपुडे अलीण-पमाणजुत्त-वट्टिय-पीवर-गतावरे अलीण-पमाणजुत्तपुच्छे पडिपुन्न- सुचारुकुमचलणे पंडुर-सुविसुद्ध-निद्ध-निरुवहय-विंसतिनहे छंदते सुमेरुपभे नाम हत्थिराया होत्या तत्थ णं तुमं मेहा बहूहिं हत्थीहि य हत्थिणियाहि य लोड्डएहि य लोड्डियाहि य कलभएहि य कलभियाहि य सद्धिं संपरिवुडे हत्थिसहस्सनायाए देसए पागट्टी पट्टवए जूहवई वंदपरिवड्डए अण्णेसिं च बहूणं एकल्लणं हत्थिकलभाणं आहेवच्चं [पोरेवच्चं सामित्तं भटित्तं महत्तरगतं आणा-ईसर-सेणावच्चं कारेमाणे पालेमाणे] विहरसि तए णं तुमं मेहा निच्चप्पमत्ते सइ पललिए कंदप्परई मोहणसीले अवितण्हे कामभोगतिसिए बहूहिं हत्थीहि य [हत्थिणियाहि य लोड्डएहि य लोड्डियाहि य कलभएहि य कलभियाहि य सद्धिं] संपरिवुडे वेयड्डगिरिपाथमूले गिरिसु य दरीसु य कुहरेसु य कंदरासु य उज्जरोसु य निज्जरोसु य वियरएसु य गट्टासु य पल्लेसु य चिल्लेसु य कडगेसु य कडयपल्लेसु य तडीसु य वियडीसु य टंकेसु य कूडेसु य सिहरेसु य पट्टमारेसु य मंचेसु य मालेसु य काणणेसु य वणेसु य वणसंडेसु य सिहरेसु य पट्टमारेसु य मंचेसु य मालेसु य य काणणेसु य वणेसु य यणसंडेसु य वणाराईसु य नदीसु य नदीकच्छेसु य जहेसु य संगमेसु य वावीसु य पोक्खरणीसु य दीहियासु य गुंजालियासु य सरेसु य सरपतियासु य सरपतियासु य वणयरेहिं दित्रवियारे बहूहिं हत्थीहि य जाव सद्धिं य संपरिवुडे बहुविहतरुपल्लव-पउरपाणियतणे निब्भए निरुच्चिगे सुहंसुहेणं विहरसि तए णं तुमं मेहा-अण्णया कयाइ पाउस-वरिसारत्त-सरद-हेमंत-वसंतेसु कमेण पंचसु उऊसु सपइक्कं-तेसु गिह्कालसमयंसि जेट्टामूले मासे पायवधंससमुट्टिएणं सुक्कतण-पत्त-कयवर मारुय-संजोगदी- विएणं महाभयंकरेणं हुयवहेणं वणदव-जाल-संपलित्तैसु वणंतेसु धूमाउलासु दिसासु महावाय- वेणेणं संघट्टिएसु छिण्णजालेसु आवयमाणेसु पोल्लरुक्खेसु अंतो-अंतो श्रियायमाणेसु मय- कुहिय- विणट्ट-किमिय-कहम-नईवियरगज्जीणपाणीयंतेसु वणंतेसु भिगारक दीणकंदिय-रवेसु खरफरुस- अणिट्ट-रिट्ट-वाहित्त-विट्टमगेसु दुमेसु तण्हावसमुक्कपक्क- पायडियजिब्भता- लुय-असंपुडियतुंडपक्खिसंधेसु ससंतेसु गिह्क उण्हावाय- खरफरुसचंडमारुय- सुक्कतणपत्त- कयवरवाउलि- भमंतदित्तसंभंतसायवाउल-भिगतण्हाबद्धिचंधपट्टेसु गिरिवरेसु संवट्टिएसु तत्थ- मिय-ससय- सरीसिवेसु अवदालियवयणविवर-निज्जालियगज्जीहे महंततुंबइय-पुत्रकण्णे संकुचिय थोर- पीव- रकरे-ऊसिय-नंगूले पीणाइय-विरसरडिय-सदेणं फोडयंतव अंबरतलं पायदहरएणं कपयंतव मेइणितलं विणिम्म्यमाणे य सीयरं सव्वओ समंता वल्लिवियाणाइं छिंदमाणे रुक्खसहस्साइं तत्थ सुबहूणि नोद्धयंते विणट्टरट्टेव्व नरवरिंदे बायाइडेव्व पोए मंडलवाएव्व परिट्टमंते अभिक्खणं- अभिक्खणं लिंडनियरं पमुंचमाणे-पमुंचमाणे बहूहिं हत्थीहिं य जाव सद्धिं दिसोदिसिं विप्पलाइत्या

तत्थ णं तुमं मेहा जुण्णे जरा-जज्जरिय-देहे आउरे झंझिए पिवासिए दुव्वले किलंतं नट्टसुइए मूढदिसाए सयाओ जूहाओ विप्पहूणे वणदवजालापरद्धे उण्हेण य तण्हाए य धुहाए य परब्भाहए समाणे भीए तत्थे तसिए उच्चिगे संजायभए सव्वओ समंता आघावमाणे परिधावमाणे एणं च णं महं सरं अप्पोदगं पंकबहुलं अतित्येणं पाणियपाए ओइण्णे तत्थ णं तुमं मेहा तीरमइगए पाणियं असंपत्तअंतरा चेव सेवंसि विसण्णे तत्थ णं तुमं मेहा पाणियं पाइस्सामि ति कट्टु हत्थं पसारैसि से वि य ते हत्थे उदगं न पावइ तए णं तुमं मेहा पुणरवि कायं पच्चुद्धरिस्सामि ति कट्टु बलियतरायं

पंकंसि खुते तए णं तुमं मेहा अण्णया कयाइ एगे चिरनिज्जुदए गयवरजुवाणए सगाओ जूहाओ कर चरण-दंत-मुसलप्पहारिहिं विप्परद्धे समाणे तं चेव महद्धं पाणीयपाए समोचरइ तए णं से कलभए तुमं पासइ पासित्ता तं पुच्चवेरं सुमरइ सुमरित्ता आसुरते रुद्धे कुविए चंडिकिकए भिसिभिसेमाणे जेणेव तुमं तेणेव उवागच्छइ उवागच्छित्ता तुमं तिक्खेहिं दंतमुसलेहिं तिक्खुत्तो पिद्धओ उद्धुभइ उद्धुभित्ता पुच्चं वेरं निज्जाएइ निज्जाएत्ता हद्धुत्ते पाणीयं पिबइ पिवित्ता जामेव दिसि पाउब्भए तामेव दिसि पडिगए तए णं तव मेहा सरीरगंसि वेयणा पाउब्भवित्था-उज्जला विउत्ता कक्खडा [पगाढा चंडा दुक्खा] दुरहियासा पित्तज्जरपरिगयसरीरे दाहवक्कंती यावि विहरित्था तए णं तुमं मेहा तं उज्जलं [विउलं कक्खडं पगाढं चंडं दुक्खं] दुरहियासं सत्तराईदियं वेयणं वेदेसि सवीर वाससयं परमाउचं पालइत्ता अद्ध-दुहद्ध-वसद्धे कालमासे कालं किच्चा इहेव जंबुद्दीवे दीवे भारहे वासे दाहिणइद्धमरहे गंगाए महानईए दाहिणे कूले विंझगिरिपायमूले एगेणं पत्तवरगंधहत्थिणा एगाए मयवरकरेणूए कुच्छिसि गयकलभए जगिए तए णं सा गयकलभिया नवण्हं मासाणं वसंतमासंसि तुमं पयाया तए णं तुमं मेहा गब्भवासाओ विप्पमुक्के समाणे गयकलभए यावि होत्था-रत्तुप्पल-परतसूमालए जासुमणारत्तपालियत्तय-लक्खारस- सरसकुं- कुम-संज्जभ्रागवण्णे इहे नियगस्स जूहवइणो गणियार-कणेरु-कोत्थ-हत्थी अणेगहत्थिसय- संपरिवुडे रम्भेसु गिरिका- ननेसु सुहंसुहेणं विहरसि तए णं तुमं मेहा उम्मुक्कबालभावे जोव्वणमणुप्पत्ते जूहवइणा कालधम्मणा संजुत्तेणं तं जूहं सयमेव पडिवज्जसि तए णं तुमं मेहा वणचरेहिं निव्वत्तिवनामधेज्जे [रात्तुस्सेहे नवाचए दसपरिणाहे सत्तंगपइद्धिए तोम-सम्मिए सुरुवे पुरओ उदग्गे समूसियसिरे सुहाराणे पिद्धओ वराहे अइयाकुच्छी अच्छिइकुच्छी अलंवकुच्छी पलंवलंवोदाराहरको धनुपडा- गिति-विसिद्धपुट्टे अलीण-पमाणजुत्त-वट्टिय-पीवर-गत्तावरे अलीण पमाणजुत्तपुच्छे पडिपुत्र- मुचारु-कुम्भचलणे पंडुर-सुविसुद्ध-निद्ध-निरुवहयविसतिनहे] चउदंते मेरुप्पभे हत्थिरयणे होत्था तत्थ णं तुमं मेहा सत्तसइयस्स जूहस्स आहेवच्चं जाव अभिरमेत्था तए णं तुमं मेहा अण्णया कयाइ गिन्हकालसमयंसि जेत्तामूले वणदव-जाला-पलित्तेसु वणंतेसु धूपाउत्तासु दिसासु जाव मंडलवा- एच्च परिद्धमंते भीए तत्थे [तसिए उव्विग्गे] संजायभए वहुहिं हत्थीहिं य [हत्थिणियाहिं य लोइएहिं य लोइियाहिं य कलभएहिं य] कलभियाहिं य सद्धिं संपरिवुडे सब्बओ समंता दिसोदिसिं विप्पलाइत्था तए णं तव मेहा तं वणदवं पासित्ता अयेमावेरुवे अज्झत्थिए [चित्तिए पत्थिए मणोगए संकप्पे] समुप्पजित्था-कहिं णं मत्ते मए अयमेचारुवे अग्गिसंभमे अनूभूयपुच्चे

तए णं तव मेहा लेस्साहिं विसुज्जमाणीहिं अज्झवसाणेणं सोहणेणं सुभेणं परिणामेणं तथावरणिज्जाणं कम्माणं खओवसमेणं ईहा-पूह-मग्गण-गवेसणं करेमाणस्स सत्त्रिपुच्चे जाईसरणे समुप्पजित्था तए णं तुमं मेहा एयमद्धं सम्मं अभिसभेसि-एवं खलु मवा अईए दोच्चे भवागहणे इहेव जंबुद्दीवे दीवे भारहे वासे वेयइद्धगिरिपायमूले जाव सुमेरुप्पभे नाम हत्थिराया होत्था तत्थ णं मया अयमेचारुवे अग्गिसंभमे समणुभूए तए णं तुमं मेहा तस्सेव दिवसस्स पद्दावरण्हकालसमयंसि नियएणं जूहेणं सद्धिं समण्णागए यावि होत्था तए णं तुमं मेहा सत्तुस्सेहे जाव सत्त्रिजाईसरणे वउदंते मेरुप्पभे नामं हत्थि होत्था तए णं तुज्झं मेहा अयमेचारुवे अज्झत्थिए जाव समुप्प- जित्था-सेयं खलु मम इयाणिं गंगाए महानईए दाहिणिल्लंसि कूलंसि विंझगिरिपायमूले दवग्गि- संताणकारणद्धा सएणं जूहेणं महइमहालयं मंडलं धाइत्ताए ति कद्ध एवंपेहेत्ता सुहंसेहेणं विहरसि

तए णं तुमं मेहा अनया कयाइ पढमपाउसंसि महाबुद्धिकायंसि सन्निययंसि गंगाए महानइए अदूरसामंते बहूहिं हत्थीहि य जाव कलभियाहि य सत्तहि य हत्थिसएहिं संपरिवुडे एगं महं जोयणपरिमंडलं महइमहालयं मंडलं घाएसि-जं तत्थ तणं वा पत्तं वा कट्ठं वा कंटए वा लया वा वल्ली वा खाणुं वा रुक्खे वा खुवे वा तं सब्बं तिकखुतो आहुणिय-आहुणिय पाएणं उडुवेसि हत्तेणं गिण्हसि एणंते एडेसि तए णं तुमं मेहा तस्सेव मंडलस्स अदूरसामंते गंगा महानइए दाहिणित्थे कूले विंझगि- रिपायमूले गिरीसु य जाव सुहंसुहेणं विहरसि तए णं तुमं मेहा अण्णया कयाइ मज्झिमए- चरिसारत्तंसि महाबुद्धिकायंसि सन्निययंसि जेणेव से मंडले तेणेव उवागच्छसि उवागच्छिता दोहं पि मंडलघाचं कोसि एवं-चरिमवरिसारत्तंसि महाबुद्धिकायंसि सन्निययमाणंसि जेणेव से मंडले तेणेव उवागच्छसि उवागच्छिता तच्चं पि मंडलघायं कोसि जाव सुहंसुहेणं विहरसि तए णं तुमं मेहा अण्णया कयाइ कमेणं पंचसु उऊसु समयइककंतेसु गिहकालसमयंसि जेहामूले मासे पायव-घंससमुद्धिणं जाव संवडुइएसु मियपसुपंखिसरीसिवेसु दिसोदिसिं विप्पलायमाणेसु तेहिं बहूहिं इत्थीहि य सद्धि जेणेव से मंडले तेणेव पहारेत्थ गमणाए तत्थ णं अण्णे बहवे सीहा य वग्धा य विगा य दीविया य अच्छा य तरच्छा य परासरा य सियाला य विराला य सुणहा य कोला य ससा य कोकंतिया य चिच्चा य चिल्ला य पुत्तपविट्ठा अग्गिभयविट्ठया एगयओ विलधम्मेणं चिट्ठति

तए णं तुमं मेहा जेणेव से मंडले तेणेव उवागच्छसि उवागच्छिता तेहिं बहूहिं सीहेहि य जाव चिल्लेहेहि य एगयओ विलधम्मेणं चिट्ठसि तए णं तुमं मेहा पाएणं गहत्तं कंडूइस्सामी ति कट्ट पाए उक्खित्ते तांसि व णं अंतरंसि अण्णेहिं बलवंतेहिं सत्तेहिं पणोलिज्जमाणे-पणोलिज्जमाणे ससए अनुप्पविट्ठे तए णं तुमं मेहा गायं कंडूइत्ता पुणरवि पायं पडिनिक्खेविस्सामि सि कट्ट तं ससयं अनुपविट्ठं पाससि पासित्ता पाणाणुकंपयाए भूयाणुकंपयाए जीवाणुकंपयाए सत्ताणुकंपयाए से पाए अंतरा चैव संधारिए नो चैव णं निक्खित्ते तए णं तुमं मेहा ताए पाणाणुकंपयाए [भूयाणु- कंपयाए जीवाणुकंपयाए] सत्ताणुकंपयाए संसारे परितीकए माणुस्साउए निवड्ढे तए णं से वणदवे अड्ढाइज्जाइ राइंदियाइ तं वणं ज्ञामेइ ज्ञामेत्ता निड्डिएउवरए उवसंते विज्झाए यावि होत्था तए णं ते बहवे सीहा य जाव चिल्ला य तं वणदवं निड्डियं [उवरयं उवसंतं] विज्झाचं पासंति पासित्ता अग्गिभयविप्पमुक्का तण्हाए य छुहाए य परत्भाहया समाणा तओ मंडलाओ पडिनिक्खमंति पडिनिक्खमित्ता सब्बओ समंता विप्पसरित्था तए णं ते बहवे हत्थी [य हत्थिणीओ य लोड्डया य लोड्डिया य कलभा य कलभिया य तं वणदवं निड्डियं उवरयं उवसंतं विज्झायं पासंति पासित्ता अग्गिभयविप्पमुक्का तण्हाए य] छुहाए य परत्भाहया समाणा तओ मंडलाओ पडिनिक्खमंति पडिनिक्खमित्ता दिसोदिसिं विप्पसरित्था तए णं तुमं मेहा जुण्णे जरा-जज्जरिय-देहे सिद्धिल- वलितय-पिण्डिदगत्ते दुब्बले किलंते जंजिए पिवासिए अत्थामे अबले अपरकूकमे ठाणुकडे वेगेणं विप्पसरिस्सामि ति कट्ट पाए पसारेमाणे विज्जुहए विव रयणगिरि-पत्थारे धरणिगतत्तंसि सब्बंगेहिं सण्णिवइए तए णं तव मेहा सरीरगंसि वेयणा पा- उब्भूया-उज्जला [विउला कक्खडा पणाढा चंडा दुक्खा दुरहिंयासा पित्तज्जएपरिगयसरीरे] दाहव- कूकंतीए यावि विहरसि तए णं तुमं मेहा तं उज्जलं जाव दुरहिंयासं तिण्णि राइंदियाइ वेयणं वेएमाणे विहरित्ता एणं वाससवं परमाउं पालइत्ता इहेव जंबुद्वीवे दीवे भारे वासे रायगिहे नयरे सेणियस्स रण्णे धारिणीए देवीए कुच्छंसि कुमारत्ताए पद्यायाए ।३२।-२७

(३८) तए णं तुमं मेहा आणुपुव्वेणं गढभवासाओ निक्खंते समाणे उम्मुक्कवालभावे जोव्वणगमणुप्पत्ते मम अंतिए मुंडे भवित्ता अगाराओ अणगारियं पव्वइए तं जइ ताव तुमे मेहा तिरिकखजोणियभावमुवगाएणं अपडिलद्ध-सम्पत्तरयणलंभेणं से पाए पाणाणुकंपयाए [भूयाणु-कंप-याए जीवाणुकंपयाए] सत्ताणुकंपयाए अंतरा चेव संघारिए नो चेव णं निक्खित्ते किमंग पुण तुमं मेहा इयाणि विपुलकुलसमुब्भवे णं निरुवहयसरीर-दंतलद्धपंचिदिए णं एवं उट्ठाण- वल-वीरिय- पुरिसगार-पारक्कमसंजुत्ते णं मम अंतिए मुंडे भवित्ता अगाराओ अणगारियं पव्वइए समाणे समणाणं निगंथाणं राओ पुव्वरतावरत्तकालसमयंसि वायणाए [पुच्छणाए परियट्ठणाए] धम्मणुओ- गचिताए य उट्ठारस्स वा पासवणस्स वा अइगच्छामाणाण व निगच्छमाणाण व हत्थसंघट्टणाणि य पायसंघट्टणाणि य [सीससंघट्टणाणि य पोट्टसंघट्टणाणि य कायसंघट्टणाणि य ओलंडणाणि य पोलंडणाणि य पाय]-रय-रेणु-गुंडणाणि य नो सम्मं सहसि खपसि तित्तिक्खसि अहियासेसि तए णं तस्स मेहस्स अणगारस्स समणस्स भगवओ महावीरस्स अंतिए एयमड्डं सोट्ठा निसम्म सुभेहिं परिणामेहिं पसत्थेहिं अज्झवसाणेहिं लेसाहिं विसुज्झमाणीहिं तयावरणिज्जाणं कम्माणं खओव- समेणं ईहापूह-मग्गण-गवेसणं करेमाणस्स सग्गिपुव्वे जाईसरणे समुप्पत्ते एय-मड्डं सम्मं अभिसमेइ तए णं से मेहे कुमारे समणेणं भगवया महावीरेणं संभारियपुव्वभवे दुगुणाणी-यसंवेगे आणंदअंसुपुत्रमुहे हरिसवस- [विसप्पमाण हिवए] धाराहयकलंबकं पिव समूससियरोम-कूवे समणं भगवं महावीरं वंदइ नमंसइ वंदित्ता नमंसित्ता एवं वयासी-अज्जप्पभित्ती णं भंते मम दो अच्छीणि मोत्तूणं अवसेसे काए समणाणं निगंथाणं निसड्डे त्ति कट्ठ पुणारवि समणं भगवं महावीरं वंदइ नमंसइ वंदित्ता नमंसित्ता एवं वयासी-इच्छाणि णं भंते इवाणि दोच्चंपि सयमेव पव्वावियं [सयमेव मुंडावियं सयमेव सेहावियं सयमेव सिक्खावियं] सयमेव आयार-गोयरं जायामाय-वत्तियं धम्ममाइक्खियं तए णं समणे भगवं महावीरे मेहं कुमारं सयमेव पव्वावेइं जाव करण-जायामावावत्तियं धम्ममाइक्खइ- एवं देवाणुप्पिया गंतव्वं एवं चिद्धियेव्वं एवं निसीयव्वं एवं तुयट्ठियेव्वं एवं भुंजियेव्वं एवं भासियेव्वं एवं उट्ठाए उट्ठाव पाणाणं भूयाणं जीवाणं सत्ताणं संजमेणं संजमियेव्वं

तए णं से मेहे समणस्स भगवओ महावीरस्स अयमेयारूवं धम्मियं उवएसं सम्मं पडिच्छइ पडिच्छित्ता तह गच्छइ तह विट्ठइ [तह निसीयइ तह तुयड्डइ तह भुंजइ तह मासइ तह उट्ठाए उट्ठाव पाणेहिं भूएहिं जीवेहिं सत्तेहिं] संजमेणं संजमइ तए णं से मेहे अणगारे जाए-इरियासमिए [भासासमिए एसणासमिए आयाण-भंड-मत्त-निक्खेवणासमिए उट्ठार- पासवण- खेल- सिघाण-जद्ध-परिट्ठावणिआसमिए मणसमिए वइसमिए कायसमिए मणगुत्ते वइगुत्ते कायगुत्ते गुत्ते गुत्तिदिए गुत्तवंभयारी वाई लज्जू धन्ने खंतिखमे जिइदिए सोहिए अणियाणे अणुसुए अवहिल्लेसे सुसामण्णारए दंते इणमेव निगंथं पावयणं पुरओकाउं विहरंति] तए णं से मेहे अणगारे समणस्स भगवओ महावीरस्स तहारूवाणं घेराणं अंतिए सापाइयमाइयाइं एककारस अंगाइं अहिज्जइ अहिज्जित्ता बहूहिं छट्ठमदसम- दुवालसेहिं मासद्धमासखमणेहिं अप्पाणं भावेमाणे विहरइ तए णं समणे भगवं महावीरे रायगिहाओ नयराओ गुणसिलाओ चेइयाओ पडिणिक्खमइ पडिणिक्ख-मिता बहिया जण- ववविहारं विहरइ । ३३।-२४

(३९) तए णं से मेहे अणगारे अणण्या कयाइ समण भगवं महावीरं वंदइ नमंसइ वंदित्ता

नमंसित्ता एवं वयासी-इच्छामि णं भंते तुब्भेहिं अब्भणुण्णाए समाणे मासियं भिक्खुपडिमं उवसंपज्जिता णं विहरित्ताए अहासुहं देवाणुप्पिया मा पडिबंधं करेहि तए णं से मेहे अणगारे समणेणं भगवया महावीरेणं अब्भणुण्णाए समाणे मासियं भिक्खुपडिमं उवसंपज्जित्ताणं विहरइ मासियं भिक्खुपडिमं अहासुतं अहाकप्पं अहामग्गं सम्मं काएणं फासेइ पालेइ सोभेइ तीरेइ किट्टेइ सम्मं काएणं फासेत्ता पालेत्ता सोभेत्ता तीरेत्ता किट्टेत्ता पुणरवि समणं भगवं महावीरं वंदइ नमंसइ वंदित्ता नमंसित्ता एवं वयासी-इच्छामि णं भंते तुब्भेहिं अब्भणुण्णाए समाणे दोमासियं भिक्खुपडिमं उवसंपज्जिता णं विहरित्ताए अहासुहं देवाणुप्पिया मा पडिबंधं करेहि जहा पढमाए अभिलावो तथा दोच्चाए तद्याए घउत्त्याए पंचमाए छम्मासियाए सत्तमासियाए पढमसत्ताराइंदियाए दोच्चसत्तराइंदियाए तच्च सत्तराइंदियाए अहोराइयाए एगराइयाए वि तए णं से मेहे अणगारे बारस भिक्खुपडिमाओ सम्मं काएणं फासेत्ता पालेत्ता सोभेत्ता तीरेत्ता किट्टेत्ता पुणरवि वंदइ नमंसइ वंदित्ता नमंसित्ता एवं वयासी-इच्छामि णं भंते तुब्भेहिं अब्भणुण्णाए समाणे गुणरयणसंबच्छरं तवोकम्मं उवसंपज्जिता णं विहरित्ताए अहासुहं देवाणुप्पिया मा पडिबंधं करेहि

तए णं से मेहे अणगारे पढमं मासं चउत्थं-चउत्थेणं अणिक्खित्तेणं तवोकम्मेणं दिया ठाणुककुडुए सूराम्भिमुहे आयावणभूमीए आयावेमाणे रत्तिं वीरासणेणं अवाउडएणं दोच्चं मासं छट्ठं-छट्ठेणं अणिक्खित्तेणं तवोकम्मेणं दिया ठाणुककुडुए सूराम्भिमुहे आयावणभूमीए आयावेमाणे रत्तिं वीरासणेणं अवाउडएणं तच्चं मासं अट्ठमं-अट्ठमेणं अणिक्खित्तेणं तवोकम्मेणं दिया ठाणुककुडुए सूराम्भिमुहे आयावणभूमीए आयावेमाणे रत्तिं वीरासणेणं अवाउडएणं चउत्थ मासं दसमं-दसमेणं अणिक्खित्तेणं तवोकम्मेणं दिया ठाणुककुडुए सूराम्भिमुहे आयावणभूमीए आयावेमाणे रत्तिं वीरासणेणं अवाउडएणं पंचमं मासं दुवालसमं-दुवालसमेणं अणिक्खित्तेणं तवोकम्मेणं दिया ठाणुककुडुए सूराम्भिमुहे आयावणभूमीए आयावेमाणे रत्तिं वीरासणेणं अवाउडएणं एवं एएणं अभिलावेणं छट्ठे चोद्दसमं-चोद्दसमेणं सत्तमे सोलसमं-सोलसमेणं अट्ठमे अट्ठारसमं-अट्ठारसमेणं नवमे वीसइमं-वीसइमेणं दसमे बावीसइमं-बावीसइमेणं एककारसमे चउत्थीसइमं-चउत्थीसइमेणं वारसमे छव्वीसइमं-छव्वीसइमेणं तेरसमे अट्ठावीसइमं-अट्ठावीसइमेणं चोद्दसमे तीसइमं-तीसइमेणं पंचदसमे वत्तीसइमं-वत्तीसइमेणं सोलमे चउत्तीसइमं-चउत्तीसइमेणं-अणिक्खित्तेणं तवोकम्मेणं दिया ठाणुककुडुए सूराम्भिमुहे आयावणभूमीए आयावेमाणे वीरासणेणं अवाउडएणं य तए णं से मेहे अणगारे गुणरयणसंबच्छरं तवोकम्मं अहासुतं [अहाकप्पं अहामग्गं] सम्मं काएणं फासेइ पालेइ सोभेइ तीरेइ किट्टेइ अहासुतं अहाकप्पं जाव किट्टेत्ता समणं भगवं महावीरं वंदइ नमंसइ वंदित्ता नमंसित्ता बहूहिं छट्ठइमदसमदुवालसेहिं मासइमासखमणेहिं विचित्तेहिं तवोकम्मेहिं अप्पाणं पावेमाणे विहरइ ।३४।-२९

(४०) तए णं से मेहे अणगारे तेणं ओरालेणं विपुलेणं सस्सिरीएणं पयत्ते पग्गहिएणं कज्जाणेणं सियेणं धत्तेणं मंगल्लेणं उदग्गेणं उदारेणं उत्तमेणं महाणुभावेणं तवोकम्मेणं सुक्के लुक्खे निम्मंसे किडिकिडियाभूए अट्ठिच्चम्मावणद्धे किसे धमणिसंतए जाए यावि होत्था जीवंजीवेणं गच्छइ जीवंजीवेणं चिड्डइ भासं भासित्ता गिलाइ भासं भासमाणे गिलाइ भासं भासिस्सामि ति गिलाइ से जहानामए इंगालसगडिया इ वा कट्ठसगडिया इ वा पत्तसगडिया इ वा तिलंडासगडिया इ वा एरंडसगडिया इ वा उण्हे दिन्ना सुक्का समाणी ससइं गच्छइ ससइं चिड्डइ एवामेव मेहे

भासरसिपरिच्छत्रे तवेणं तेएणं तवतेयसिरीए अईव-अईव उवसोभेमाणे-उवसोभेमाणे चिद्धइ तेणं कालेणं तेणं समएणं समणे भगवं महावीरे आइगरे तित्थगरे जाव पुव्वाणुपुव्वि चरमाणे गामाणुगामं दूइज्जमाणे सुहंसुहेणं विहरमाणे जेणामेव रायगिहे नथरे जेणामवे गुणसिलए चेइए तेणामेव उवागच्छइ उवागच्छिता अहापडिरूवं ओग्गहं ओगिग्गिहता संजमेणं तवसा अप्पाणं भावेमाणे विहरइ तए णं तस्स मेहस्स अणगारस्स राओ पुव्वरत्तावरत्तकालसमयंसि धम्मजागरियं जागरमाणस्स अयमेयारूवे अज्झत्थिए [चिंतिए पत्थिए मणोगए संकप्पे] समुप्पज्जित्था-एवं खलु अहं इमेणं ओरालेणं [विपुलेणं सत्सिरीएणं पयत्तेणं पग्गहिएणं कल्लाणेणं सिदेणं धत्तेणं मंगल्लेणं उदग्गेणं उदारेणं उत्तमेणं महाणुभावेणं तवोकम्पेणं सुक्कं लुक्खे निम्मंसे किडिकिडियाभूए अट्ठिवम्भावणद्धे किसे धमणिसंतए जाए यावि होत्था-जीवंजीवेणं गच्छमि जीवंजीवेणं चिद्धामि भासं भासित्ता गिलामि भासं मासमाणे गिलामि भासं भासिस्सामि ति गित्ताणि तं अत्थि ता मे उट्ठाणे कम्भे बले वीरिए पुरिसकार-परक्कमे सद्धा-धिइ-संवेगे जाव य मे धम्मायरिए धम्मोवएसए समणे भगवं महावीरे जिणे सुहत्थि विहरइ ताव ता मे सेवं कल्लं पाउप्पभायाए रयणीए जाव उट्ठियम्मि सूरे सहस्सरसिम्मि दिणयरे तेयसा जलंते समणं भगवं महावीरं वंदित्ता नमंसित्ता समणेणं भगवया महावीरेणं अब्भणुण्णावस्स समाणस्स सयमेव पंच महव्वयाइं आरुहिता गोयमादीए समणे निग्गंथे निग्गंथीओ य खामेत्ता तहारूवेहिं कडादीहिं धेरेहिं सद्धि विउलं पव्वयं सणियं-सणियं दुरुहिता सयमेव मेहघणसण्णिगासं पुढविसिलापट्टयं पडिलेहिता संलेहणा-सूसणा-सूसियास्स भत्तपाण-पडियाइक्खियस्स पाओवगयस्स कालं अणवकंखमाणस्स विहरित्तए

एवं संपेहेइ संपेहेत्ता कल्लं पाउप्पभायाए रयणीए जाव उट्ठियम्मि सूरे सहस्सरसिम्मि दिणयरे तेयसा जलंते जेणेव समणे भगवं महावीरे तेणेव उवागच्छइ उवागच्छिता समणं भगवं महावीरं तिक्खुत्तो आयाहिण-पायाहिणं करेइ करेत्ता वंदइ नमंसइ वंदित्ता नमंसित्ता नद्यासण्णे नाइदूरे सुस्सुसमाणे नमंसमाणे अभिमुहे विणएणं पंजलिउडे पज्जुवासइ मेहा इ समणे भगवं महावीरे मेहं अणगारं एवं वयासी-से नूणं तव मेहा राओ पुव्वरत्तावरत्तकालसमयंसि धम्मजागरियं जागरमाणस्स अयमेयारूवे अज्झत्थिए जाव संकप्पे समुप्पज्जित्था-एवं खलु अहं इमेणं ओरालेणं तवोकम्पेणं सुक्कं जाव जेणेव इहं तेणेव हव्वमागए से नूणं मेहा अट्ठे समट्ठे हंता अत्थि अहासुहं देवाणुप्पिया मा पडिबंधं करेहि तए णं से मेहे अणगारे समणेणं भगवया महावीरेणं अब्भणुण्णाए समाणे हट्ठतुट्ठ-चित्तमाणंदिए जाव हरिसवस-विसम्पमाणंहियए उट्ठाए उट्ठेइ उट्ठेत्ता समणं भगवं महावीरं तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता सयमेव पंच महव्वयाइं आरुहेइ आरुहेत्ता गोयमादीए समणे निग्गंथे निग्गंथीओ य खामेइ खामेत्ता तहारूवेहिं कडादीहिं धेरेहिं सद्धि विपुलं पव्वयं सणियं-सणियं दुरुहइ दुरुहिता सयमेव मेहघणसण्णिगासं पुढविसिलापट्टयं पडिलेहेइ पडिलेहेत्ता उच्चारपासवणभूमि पडिलेहइ पडिलेहेत्ता दत्थसंधराणं संधरइ संघरित्ता दब्भसंधारणं दुरुहइ दुरुहिता पुरत्थाभिमुहे संपलियंकनिसण्णे करयलपरिग्गहियं सिरसायत्तं मत्थए अंजलि कट्ठ एवं वयासी-नमोत्थु णं अरहंताणं जाव सिद्धिगाइनामधेज्जं ठाणं संपत्ताणं नमोत्थु णं समणस्स जाव सिद्धिगाइनामधेज्जं ठाणं संपाविउकामस्स मम धम्मायरिषस्स वंदाभि णं भगवंतं तत्थगयं इहगए पासउ मे भगवं तत्थघए इहगयं ति कट्ठ वंदइ नमंसइ वंदित्ता नमंसित्ता एवं वयासी-पुव्विं पि य णं मए समणस्स भगवओ महावीरस्स अंतिए सब्बे पाणाइवाए

पच्चक्खाए मुसावए अदिनादाणे मेहुणे परिग्गहे कोहे माणे माया लोहे पेजे दोसे कलहे अब्भक्खाणे पेसुन्ने परपरिदाए अरइरइ मायामोसे भिच्छादंसणसल्लेपच्चक्खाए

इयाणि पि णं अहं तस्सेव अंतिए सव्वं पाणाइवायं पच्चक्खामि जाव मिच्छदंसणसल्लं पच्चक्खामि सव्वं असण-पाण-खाइम-साइमं चउव्विहंपि आहारं पच्चक्खामि जावज्जीवाए जंपि य इमं सरीरं इट्ठं कंतं पियं [मणुण्णं मणाभं थेअं वेस्सासियं सम्मयं बहुमयं अणुमयं भंडकरंडगसमाणं मा णं सीयं मा णं उण्हं मा णं खुहा मा णं पिवासा मा णं चोरा मा णं वाला मा णं दंसा मा णं मसया मा णं वाइय-पेत्तिथ-सेभिय-सण्णिवाइय] विविहा रोगायंका परीसहोवसग्गा फुसंतीति कट्टु एयं पि य णं चरमेहिं ऊसास-नीसासेहिं बोसिरामि ति कट्टु संलेहणा-झूसणा-झूसिए भत्तपाण- पडियाइ-क्खिए पाओवगए कालं अणवकंखमाणे विहरइ तए णं ते थेरा भगवंतो मेहस्स अणगारस्स अगिलाए वेयावडियं करेति तए णं स मेहे अणगारे समणस्स भगवओ महावीरस्स तहारूवाणं थेराणं अंतिए सामाइयमाइयाइं एक्कारसअंगाइं अहिज्जिता बहुपडिपुत्राइं दुवात्तसवरिसाइं सामण्णपरियागं पाउणित्ता मासियाए संलेहणाए अप्पाणं झोसेत्ता सट्ठिं भत्ताइं अमसणाए छेएत्ता आलोइय-पडिक्कंते उट्ठियसल्ले समाहिपत्ते अनुपुव्वेणं कालगए तए णं ते थेरा भगवंतो मेहं अणगारं अनुपुव्वेणं कालगयं पासंति पासित्ता परिनिव्वानवत्तियं काउस्सग्गं करेति करेत्ता मेहस्स आयारभंडगं गेण्हंति विउलाओ पव्वयाओ सणियं-सणियं पच्चोरुहंति पच्चोरुहिता जेणामेव गुणसिलाए वेइए जेणामेव समणे भगवं महावीरे तेणामेव उवागच्छंति उवागच्छित्ता समणं भगवं महावीरं वंदंति नमंसंति वंदित्ता नमंसित्ता एयं वयासी-एवं खलु देवाणुप्पियाणं अंतेवासी मेहे नामं अणगारे पगइभद्दए [पगइउवसंते जाव अलीणे] विणीए से णं देवाणुप्पिएहिं अब्भणुण्णाए समाणे गोयमाइए समणे निग्गंथे निग्गंथीओ य खामेत्ता अहेहिं सट्ठिं विपुलं पव्वयं सणियं-सणियं दुरुहइ सयमेवमेघघणसण्णिगासं पुढविसिलं पडिलेहेइ भत्तपाजपडियाइक्खिए अनुपुव्वेणं कालगए एस णं देवाणुप्पिया मेहस्स अणगारस्स आयारभंडए। ३५१-३०

(४१) भंते ति भगवं गोयमे समणं भगवं महावीरं वंदइ नमंसइ वंदित्ता नमंसित्ता एवं वयासी-एवं खलु देवाणुप्पियाणं अंतेवासी मेहे नामं अणगारे से णं भंते मेहे अणगारे कालमासे कालं किच्चा कहिं गए कहिं उववण्णे गोयमा इ समणे भगवं महावीरे गोयमं एवं वयासी-एवं खलु गोयमा मम अंतेवासी मेहे नामं अणगारे पगइभद्दए जाव विणीए से णं तहारूवाणं थेराणं अंतिए सामाइयमाइयाइं एक्कारस अंगाइं अहिज्जिता बारस भिक्खुपडिमाओ गुणरवण-संबच्छरं तवोकम्मं काएणं फासेत्ता जाव किट्ठेत्ता मए अब्भणुण्णाए समाणे गोयमाइ थेरे खामेत्ता तहारूवेहि जाव विपुलं पव्वयं सणियं-सणियं दुरुहिता दब्भंयारगं संघरित्ता दब्भसंयारोवगए सयमेव पंचमहव्वए उच्चारित्ता बारस वासाइं सामण्णपरियागं पाउणित्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेदेत्ता चंदिम-सूर- गहगण- नक्खत्त-तारारूवाणं बहूइं जोयणाइं बहूइं जोयणसयाइं बहूइं जोयणसहस्साइं बहूइं जोयणसयसहस्साइं बहूओ जोयणकोडीओ बहूओ जोयणकोडाकोडीओ उड्ढं दूरं उप्पइत्ता सोहम्मी- साण-सणकुमार - माहिं- दवंभलंतग- महा-सुकूक-सहस्सारणय-पाणयारणघ्णए तिण्णि य अट्टारसुत्ते मेवेअविमाणवाससए वीईवइत्ता विजए महाविमाणे देवत्ताए उववण्णे तत्थ णं अत्येगइयाणं देवाणं तेत्तीसं सागरोवमाइं ठिईं पत्रत्ता तत्थ णं मेहस्स वि देवस्स तेत्तीसं सागरोवमाइं ठिईं एस णं भंते मेहे देवे ताओ देवलोयाओ

आउक्खएणं ठिइक्खएणं भवक्खएणं अनंतरं चयं धइत्ता कहिं गच्छिहिइ कहिं उववज्जिहिइ गोयमा महाविदेहे वासे सिज्जिहिइ वुज्जिइ मुच्चिहिइ परिनिव्वाहिइ सव्यदुक्खाणमंतं काहिइ एवं खलु जंबू समणेणं भगवया महावीरेणं आइगरेणं तित्यगरेणं जाव सिद्धिगइनामधेज्जं ठाणं संपत्तेणं अप्पोलंभ-निमित्तं पढमस्स नायज्झयणस्स अयमट्ठे पन्नत्ते ति वेमि । ३६।-३१

● पढमे सुयवखंबे पढम अज्झयणं समत्तं ●

वीयं अज्झयणं-संघाडे

(४२) जइ णं भंते समणेणं भगवया महावीरेणं पढमस्स नायज्झयणस्स अयमट्ठे पन्नत्ते वित्थियस्स णं भंते नायज्झयणस्स के अट्ठे पन्नत्ते एवं खलु जंबू तेणं कालेणं तेणं समएणं रायगिहे नामं नयरे होत्था-वण्णओ तस्स णं रायगिहस्स नयरस्स वहिया उत्तरपुरत्थिमे दिसीभाए गुणसिलए नामं चेइए होत्था-वण्णओ तस्स णं गुणसिलयस्स चेइयस्स अदूरसामंते एत्थ णं महं एणं जिण्णु-ज्राणं यावि होत्था-विण्णद्वेवउल-परिसडियतोरणधरे नाणाविहगुच्छ-गुम्म-लया-वलि-वच्छ-इए अणेग-वालसय-संकणिजे यावि होत्था तस्स णं जिण्णुज्राणस्स बहुमज्झदेसभाए एत्थ णं महं एणे भग्गकूवे यावि होत्था तस्स णं भग्गकूवस्स अदूरसामंते एत्थ णं महं एणे मालुवाकच्छए यावि होत्था किण्णे किण्होभासे जाव रम्मे महामेहनिरंभभूए बहूहिं रुक्खेहिं य गुच्छेहिं य गुम्मेहिं य लयाहिं य वल्लीहिं य ताणेहिं य कुसेहिं य खण्णुएहिं य संछण्णे पलिच्छण्णे अंतो झुसिरे वार्हिं गंभीरे अणेग-वालसय-संकणिजे यावि होत्था । ३७।-३२

(४३) तत्थ णं रायगिहे नयरे धणे नामं सत्थवाहे-अइटे दित्ते [वित्थिण्णं-विउल-भवण-सयणासण-जाण-वाहणाइण्णे बहुदासी-दास-गो-महिस्स-गवेलगप्पभूए बहुधण-बहुजायरुवरयए आओगे-पओग-संपउत्ते विच्छट्ठिय]-विउल-भत्तपाणे तस्स णं धणास्स सत्थवाहस्स भदा नामं भारिया होत्था-सुकुमालपाणिपाया अहीणपडिपुत्र-पंचिंदियसरीरा लक्खण-वंजण-गुणोदवेया मा-गुम्माण-प्पमाण-पडिपुत्र-सुजाय-सव्वंगसुंदरंगी ससिसोमागार-कंत-पियदंसणा सुरूवा करयल-पारिमिय-तिवलिय-वलियमज्झा कुंडुलुक्खिहियगंडलेहा कोमुइ-रयणियर-पडिपुत्र-सोमवयणासिंगा-तामार-चारुवेसा [संगय-गच-जाव सल्लिय-संलाव-निउण-जुत्तोवयार-कुसला पासादीया दरि-सणिज्जा अभिरूवा] पडिरूवा वंझा अविघाउरी जाणुकोप्परमाया यावि होत्था । ३८।-३३

(४४) तस्स णं धणस्स सत्थवाहस्स पंधए नामं दासचेडे होत्था-सव्वंगसुंदरंगे मंसोवचिए बालकीलावणकुसले यावि होत्था तए णं से धणे सत्थवाहे रायगिहे नयरे बहूणं नगर-निगम-सेट्ठि-सत्थवाहाणं अट्टारसण्ह य सेणिप्पसेणीणं बहूसु कजेसु य मंतेसु य जाव चक्खुभूए यावि होत्था नियगस्स वि य णं कुंडुबस्स बहूसु कजेसु य जाव चक्खुभूए यावी होत्था । ३९।-३४

(४५) तत्थ णं रायगिहे नयरे विजए नामं ष्ठकूरे होत्था-पावचंडाल-रूवे भीमतररुइ-कम्मे आरुसिय-दित-रत्तनवणे खरफरुस-महल्ल-विगय-भीमच्छदाट्टिए असुण्डियउट्टे उद्धय-पइण्ण-लंवतमुद्धए भमर-राहुवण्णं निरणुक्कौसे निरणुतावे दारुणे पइभए संसइए निरणुक्के अलीव एगंतदिट्ठीए खुरेव एगंतधाराए गिद्धेव आमिसतल्लिच्छे अग्गिमिव सव्वभक्खी जलमिव सव्वग्गाही उक्कंघण-वंचण-माया-निचडि-कूड-क्वड-साइ-संपओग-बहुले चिरनगरविण्ण-दुट्ट-सीलायार-चरित्ते जूयप्पसंगी भोज्जप्पसंगी भोज्जप्पसंगी मंसप्पसंगी दारुणे हियनदारए साहसिए संधिच्छेयए उववहिंए विस्संभपाई आलीवग-तित्यभेय-लहुहत्तरं पउत्ते परस्स दव्वहरणम्मि निच्चं

अनुबद्धे तिव्वेरे रायगिहस्स नगरस्स बहूणि अहगमणाणि य निग्गमणाणि य वाराणि य अववाराणि य छिंडीओ य खंडीओ य नगरनिद्धमणाणि य संवट्टणाणि य निव्वट्टणाणि य जूयख-लयाणि य पाणागाराणि य वेसागाराणि य तक्करट्टाणाणि य तक्करधराणि य सिंधाडगाणि य तिगाणि य चउव्काणि य चच्चराणि य नागधराणि य भूयधराणि य जक्खदेउलाणि य सभाणि य पवाणि य पणियसालाणि य सुत्तधराणि य आमोएमाणे मग्गमाणे गवेसमाणे बहुजणस्स छिंदेसु य विसमेसु य विहुरेसु य वसणेसु य अब्भुदएसु य उस्सवेसु य पसवेसु य दिहीसु य छणेसु य जण्णेसु य पव्वणीसु य मत्तपमतस्स य वक्खिरास्स य वाउलस्स य सुहियस्स य दुहियस्स य विदेसत्थस्स य विप्पवसियस्स य मग्गं च छिंदं व विरहं च अंतरं च मग्गमाणे गवेसमाणे एवं च णं विहरइ बहिया वि य णं रायगिहस्स नगरस्स आरामेसु य उज्जाणेसु य वावि-पोक्खणि-दीहिय- गुंजालिय- सर-सरपंतिय सरसरपंतियासु य जिण्णुज्जाणेसु य भग्गकूवेसु य मालुयाकच्छएसु य सुसाणेसु य गिरिकंदरेसु य लेणेसु य उवट्टणेसु य बहुजणस्स छिंदेसु य जाव अंतरं च मग्गमाणे गवेसमाणे एवं च णं विहरइ । ४०।-३५

(४६) तए णं तीसे भद्दाए भारियाए अण्णया कयाइ पुव्वरत्तावरत्तकालसमंयसि कुंडुंबजा-गारियं जागरमाणीए अयमेयारूवे अज्झत्थिए जाव समुप्पज्जित्था-अहं धणेणं सत्थवाहेणं सद्धिं बहूणि वासाणि सद्द-फरिस-रस-गंध-रूवाणि माणुस्सगाइं कामभोगाइं पद्यणुत्थवमाणी विहरामि नो चेव णं अहं दारगं वा दारियं वा पयामि तं धण्णाओ णं ताओ अम्मयाओ [संपुण्णाओ णं ताओ अम्मयाओ कयत्थाओ णं ताओ अम्मयाओ कयपुत्राओ णं ताओ अम्मय ओ कयलक्खणाओ णं ताओ अम्मयाओ कयविहवाओ णं ताओ अम्मयाओ] सुलद्धे णं माणुस्सए जम्मजीवियफले तासिं अम्मयाणं जासिं मण्णे नियगकुच्छिसंभूयाइं धणदुद्ध-लुद्धयाइं महुरसमुल्लावगाइं मम्मणपयंपि-याइं धणमूला कक्खदेसभागं अभिसरमाणाइं मुद्धयाइं धणयं पियंति तओ य कोमलकमलोवमेहिं हत्थेहिं गिण्हिऊणं उच्छंण-निवेसियाणि देति समुल्लावए पिए सुमहुरे पुणो-पुणो मंजुलपभणिए तं णं अहं अधण्णा अपुण्णा अकयलक्खणा एत्तो एगमवि न पत्ता तं सेयं मम कळं पाउप्पभाए रयणीए जाव उट्ठिय्मि सूरै सहस्सरस्सिम्मि दिणयरे तेयसा जलंते धणं सत्थवाहं आपुच्छिता धणेणं सत्थवाहेणं अब्भणुण्णाया समाणी सुबहुं विपुलं असणं पाणं खाइमं साइमं उवक्खडावेत्ता सुबहुं पुप्फ-वत्थ-गंध-मल्लालंकारं गहाय बहूहिं मित्त-नाइ-नियग- सयण-संबंधि-परियण-महिलाहिं सद्धिं संपरिवुडा जाइं इमाइं रायगिहस्स नगरस्स बहिया नागाणि य भूयाणि य जक्खाणि य इंदाणि य खंदाणि य रुद्दाणि य सिवाणि य वेसमणाणि य तत्थ णं बहूणं नागपडिमाण य जाव वेसमण-पडिमाणं य महरिहं पुप्फघणिचं करेत्ता जन्नुपायपडियाए एवं वडत्ताए-

जइ ण्हं देवाणुम्मिया दारगं वा दारियं वा पयामि तो णं अहं तुब्बं जायं च दायं च भायं च अक्खयनिहिं य अणुवइंढेमि ति कइ उयाइयं उवाइत्ताए-एवं संपेहेइ संपेहेत्ता कळं पाउप्पभाए रयणीए जाव उट्ठिय्मि सूरै सहस्सरस्सिम्मि दिणयरे तेयसा जलंते जेणामेव धणे सत्थवाहे तेणामेव उवागचअछइ उवागच्छिता एवं वयासी-एवं खलु अहं देवाणुम्मिया तुब्भेहिं सद्धिं बहूं वासाइं [सद्द-फरिस-रस-गंध-रूवाइंमाणुस्सगाइं कामभोगाइं पद्यणुत्थवमाणी विहरामि नो चेव णं अहं दारगं वा दारियं वा पयामि तं धन्नाओ णं ताओ अम्मयाओ जाव कोमलकमलोवमेहिं हत्थेहिं गिण्हिऊणं उच्छंण-निवेसियाणि देति समुल्लावए सुमहुरे पिए पुणो-पुणो मंजुलपभणिए तं णं अहं

अधष्णा अपुष्णा अकयव- लक्खणा एतो एगमवि न पत्ता तं इच्छामि णं देवाणुप्पिया तुब्बेहिं
 अठ्ठणुष्णाया समाणी विपुलं असणं [पाणं खाइमं साइमं उवक्खडावेत्ता जाव अक्खयनिहिं च]।
 अनुवड्ढेमि उवाइयं करित्तए तए णं धणे सत्थवाहे मद्दं दारियं एवं वयासी-ममं पि य णं
 देवाणुप्पिए एस चेव मनोरहे-कहं णं तुमं दारगं वा दारियं वा पयाएज्जासि-महाए सत्थवाहीए
 एयमद्दं अनुजाणइ तए णं सा भद्दा सत्थवाही धणेणं सत्थवाहेणं अठ्ठणुष्णाया समाणी
 हट्ठतुट्ठ-चित्तमाणंदिया जाव हरिसवस-विसप्पमाण-हियय विपुलं असण-पाण-खाइम-साइमं
 उवखडावेइ उवखडावेत्ता सुबहुं पुप्फ-वत्थ-गंधमल्लालंकार गेण्हइ गेण्हिता सयाओ गिहाओ
 निग्गच्छइ निग्गच्छित्ता रायगिहं नयरं मज्झमज्जेणं निग्गच्छइ निग्गच्छित्ता जेणेव पोक्खरिणी
 तेणेव उवागच्छइ उवागच्छित्ता पुक्खरिणीए तीरे सुबहुं पुप्फ-[वत्थ-गंध]-मल्लालंकारं ठवेइ ठयेत्ता
 पुक्खरिणिं ओगाहेइ ओगाहिता जलमज्जणं करेइ करेत्ता जलकीडं करेइ करेत्ता ण्हाया कयवलि-
 कम्मा उल्लपडसाडिगा जाइ तत्थ उप्पलाइं [पउमाइं कुमुयाइं नलिणाइं सुभगाइं सोगंधिपाइं
 पोंडरीयाइं महापोंडरीयाइं सयवत्ताइं] सहस्सपत्ताइं ताइं गिण्हइ गिण्हित्ता पुक्खरिणीओ
 पच्चोरुहइ पच्चोरुहिता तं पुप्फ-वत्थ-गंध-मल्लं मल्लालंकारं गेण्हइ गेण्हित्ता जेणामेव नागरधरए य
 जाव वेसमणधरए य तेणामेव उवागच्छइ उवागच्छित्ता तत्थ णं नागपडिमाण य जाव वेसमण-
 पडिमाण य आलोए पणामं करेइ ईसिं पच्चुण्णनइ पच्चुण्णमित्ता लोमहत्थगं परामुसइपरामुसित्ता
 नागपडिमाओ य जाव वेसमणपडिमाओ य लोमहत्थएणं पमज्जइ पमज्जित्ता उदगधाराए
 अठ्ठुक्खेइ अठ्ठुक्खेत्ता पक्कल-सूमालाए गंधकासाइए गायाइं लूहेइ लूहेत्ता महरिहं वत्थारुहणं च
 मल्लारुहणं च गंधारुहणं च करेइ करेत्ता धूवं डहइ डहिता जन्नुपायपडिया पंजलिउडा एवं
 वयासी-जइ णं अहं दारगं वा दारियं वा पयामि तो णं अहं जायं च [दायं च मायं च अक्खयनिहिं च
 अनुवड्ढेमि ति कट्ट उवाइयं करेइ करेत्ता जेणेव पोक्खरिणी तेणेव उवागच्छइ उवागच्छित्ता तं
 विपुलं असणपाणं खाइम साइमं आसाएमाणी विसाएमाणी परिभाएमाणी परिभुंजेमाणी एवं च
 णं] विहरइ जिमिय [भुत्तारागया वि य णं समाणा आयंता चोक्खा परम सुइभूया जेणेव सए गिहे
 तेणेव उवागया अदुत्तरं च णं भद्दा सत्थवाहचाउद्- सट्टमुद्धिपुत्रमासिणीसु विपुलं असण- पाण-
 खाइम-साइमं उवक्खडेइ उवक्खडेत्ता बहवे नागा य जाव वेसमणा य उवायमाणी नमंसमाणी
 जाव एवं च णं विहरइ। ४१।-३६

(४७) तए णं भद्दा सत्थवाही अष्णया कयाइ केणइ कालंतरेणं आवष्णसत्ता जावा यावि
 होत्था तए णं तीसे भद्दाए सत्थवाहीए तस्स गब्भस्स दोसु मासेसु वीइक्कंतेसु तइए मासे वट्टमाणे
 इमेयारूवे दोहले पाउठ्ठूए-धन्नाओ णं ताओ अम्मयाओ जाव कयलक्खणाओ णं ताओ अम्म-
 याओ जाओ णं विउलं असणं पाणं खाइमं साइमं सुबहुं पुप्फ-वत्थ-गंध-मल्लालंकारं गहाय मित्त-
 नाइ-नियग-सयण-संबंधि-परियण-महिलियहिं सद्धिं संपरिवुडाओ रायगिहं नयरं मज्झमज्जेणं
 निग्गच्छंति निग्गच्छित्ता जेणेव पुक्खरिणी तेणेव उवागच्छंति उवागच्छित्ता पोक्खरिणिं ओगहेत्ति
 ओगाहिता ण्हायाओ कयवलिक्कमाओ सव्वालंकार-विभूसियाओ विपुलं असणं पाणं खाइमं
 साइमं आसाएमाणीओ विसाएमाणीओ परिभाएमाणीओ परिभुंजेमाणीओ दोहलं विणेत्ति-एवं
 संपेहेइ संपेहेत्ता कल्लं पाउप्पभाए रयणीए जाव उट्टियम्मि सूरुं सहस्सरस्सिम्मि दिण्यरे तेयसा जलंते
 जेणेव धणे सत्थवाहे तेणेव उवागच्छइ उवागच्छित्ता धणं सत्थवाहं एवं वयासी-एवं खलु

देवाणुप्पिया मम तस्स गत्थमस्स [दोसु मासेसु वीइक्कंतेसु तइए मासे वट्टमाणे इमेयारूवे दोहले पाउब्भूए-धण्णाओ णं ताओ अम्मयाओ जाव दोहलं विणेति तं इच्छामि णं देवाणुप्पिया तुब्भेहिं अत्थमाण्णाया समाणी [विउत्तं असणं पाणं खाइमं साइमं सुबहुयं पुप्फ-वत्थ-गंध-मल्लालंकारं गहाय जाव दोहलं विणित्तए]

अहामुहं देवाणुप्पिया मा पडिबंधं करेहिं तए णं सा भद्दा धणेणं सत्थवाहेणं अत्थमाण्णाया समाणी हट्टतुट्ट-चित्तमाणदिया जाव हरिसवस-विसप्पमाणहियया विपुलं असणं पाणं खाइमं साइमं उवक्खडावेइ उवक्खडावेता जाव धूयं करेइ करेत्ता जेणेव पोक्खरिणी तेणेव उवागच्छइ तए णं ताओ मित्त-नाइ-[निवग-सयण-संबंधि-परियण]-नगरमहिलाओ भद्दं सत्थवाहिं सव्वालंकारविभूसियं करेति तए णं सा भद्दा सत्थवाही ताहिं मित्त-नाइ-निवग-सयण-संबंधि-परियण-नगरमहितियाहिं सद्धिं तं विपुलं असणं [पाणं खाइमं साइमं आसाएमाणी विसाएमाणी परिभाए-माणी] परिभुंजेमाणी दोहलं विणेइ विणेत्ता जामेव दिसं पाउब्भूया तामेव दिसं पडिगया तए णं सा भद्दा सत्थवाही संपुण्णदोहला जाव तं गत्थं सुहंसुहेणं परिवहइ तए णं सा भद्दा सत्थवाही नवणं मासाणं बहुपडिपुत्राणं अट्टइमाण य राइंदियाणं वीइक्कंताणं सुकुमालपाणिपायं जाव दारगं पयाया तए णं तस्स दारगस्स अम्मापियरो पढमे दिवसे जायकम्मं करेति तहेव जाव विपुलं असणं पाणं खाइमं साइमं उवक्खडावेति तहेव मित्त-नाइ-निवग-सयण-संबंधि-परियणं भोया-वेत्ता अयमेयारूवं गोण्णं गुणनिप्फण्णं नामधेज्जं करेति-जम्हा णं अम्हं इमे दारए बहूणं नाग-पडिमाण य जाव वेसमणपडिमाण य उवाइयलेदं तं होउ णं अम्हं इमे दारए देवदित्रे नामेणं तए णं तस्स दारगस्स अम्मापियरो नामधेज्जं करेति देवदित्रे ति तए णं तस्स दारगस्स अम्मापियरो जायं च दायं च भायं च अक्खयानेहिं य अनुवड्ढेति ।४२।-३७

(४८) तए णं से पंथए दासवेडए देवदित्रस्स दारगस्स बालग्गाही जाए देवदित्रं दारगं कडीए गेण्हइ गेण्हिता बहूहिं डिंभएहिं य डिंभियाहिं य दारएहिं य दारियाहिं य कुमारएहिं य कुमारियाहिं य सद्धिं संपरिवुडे अभिरमइ तए णं सा भद्दा सत्थवाही अण्णया कयाइ देवदित्रं दारयं ष्हायं कयबलिकम्मं कय-कोउय-मंगल-पायच्छित्तं सव्वालंकारविभूसियं करेइ करेत्ता पंथयस्स दासवेडगस्स हत्थयसि दलयइ तए णं से पंथए दासवेडए भद्दाए सत्तवाहीए हत्थाओ देवदित्रं दारगं कडीए गेण्हइ गेण्हिता सयाओ गिहाओ पडिनिक्खमइ बहूहिं डिंभएहिं य डिंभियाहिं य दारएहिं य दारियाहिं य कुमारएहिं य कुमारियाहिं य सद्धिं संपरिवुडे जेणेव रायमगे तेणेव उवागच्छइ उवागच्छिता देवदित्रं दारगं एगंते ठावेइ ठावेत्ता बहूहिं डिंभएहिं य जाव कुमारियाहिं य सद्धिं संपरिवुडे पमत्ते यावि विहरइ इमं य णं विजए तक्करे रायगिहस्स नगरस्स बहूणि अइगमणाणि य निग्गमणाणि य वाराणि य अववाराणि य तहेव जाव मुत्तघराणि य आभोएमाणे मग्गेमाणे गवेसमाणे जेणेव देवदित्रे दारए तेणेव उवागच्छइ उवागच्छिता देवदित्रं दारगं सव्वालंकारविभूसियं पासइ पासित्ता देवदित्रस्स दारगस्स आभरणालंकारेसु मुच्छिए गडिए गिद्धे अज्झोदवण्णे पंथयं दासवेडयं पमत्तं पासइ पासित्ता दिसालोयं करेइ करेत्ता देवदित्रं दारगं गेण्हइ गेण्हिताकक्खंसि अल्लियावेइ अल्लियावेत्ता उत्तरिज्जेणं पिहेइ पिहेत्ता सिग्धं तुरियं चवलं वेइयं रायगिहस्स नगरस्स अववारेणं निग्गच्छइ निग्गच्छिता जेणेव जिण्णुज्जाणे जेअणेव षग्गक्खए तेणंउ उवागच्छइ उवागच्छिता देवदित्रं दारगं जीवियाओ ववरोवेइ ववरोवेत्ता आभरणालंकारं

गेण्हइ गेण्हिता देवदित्रस्स दारगस्स सरिरं निष्पाणं निघेठुं जीवविप्पजढं भग्गकूवए पक्खि- वइ पक्खिवित्ता जेणेव मालुयाकच्छए तेणेव उवागच्छइ उवागच्छिता मालुयाकच्छयं अनुप्पविसइ अनुप्पविसिता निघले निष्पंदे तुसिणीए दिवसं खवेमाणे चिद्धइ ।४३।-३८

(४९) तए णं से पंथए दासवेडए तओ मुहुत्तंतरस्स जेणेव देवदित्रे दारए ठविए तेणेव उवागच्छइ उवागच्छिता देवदित्रं दारगं तंसि ठाणंसि अपासमाणे रोयमाणे कंदमाणे विलवमाणे देवदित्रस्स दारगस्स सब्बओ समंता मग्गण-गवेसणं करेइ देवदित्रस्स दारगस्स कथइ सुइं वा खुइं वा पउत्तिंवा अलभमाणे जेणेव सए गिहे जेणेव धणे सत्थवाहे तेणेव उवागच्छइ उवागच्छिता धणं सत्थवाहं एवं वयासी एवं खलु सामी भद्दा सत्थवाही देवदित्रं दारयं ण्हायं जाव सब्बालंकार-विभूसियं मम हत्थंसि दलयइ तए णं अहं देवदित्रं दारयं कडीए गिण्हामि ।गिण्हिता सयाओ गिहाओ पंडिनिक्खमामि वहूहिं डिंभएहिं य डिंभियाहिं य दारएहिं य दारियाहिं य कुमारएहिं य कुमारियाहिं य सद्धिं संपरिवुडे जेणेव रायमग्गे तेमेव उवागच्छामि उवागच्छिता देवदित्रं दारगं एणंदे ठावंपि ठावेत्ता वहूहिं डिंभएहिं य जाव कुमारियाहिं य सद्धिं संपरिवुडे पमत्ते यावि विहरामि तए णंअहं तओ मुहुत्तंतरस्स जेणेव देवदित्रे दारए ठविए तेणेव उवागच्छामि उवागच्छिता देवदित्रं दारगं तंसि ठाणंसि अपासमाणे रोयमाणे कंदमाणे विलवमाणे देवदित्रस्स दारगस्स सब्बओ समंता। मग्गण-गवेसणं करेमि तं न नज्जइ णं सामी देवदित्रे दारए केणइ नीते वा अवहिते वा अक्खित्ते वा-पायवडिए धणस्स सत्थवाहस्स एयमइं निवेदेइ

तए णं से धणे सत्थवाहे पंथस्स दासवेडगस्स एयमइं सोच्चा निसम्मं तेणं य मइया पुत्तरोएणागिभूए रामाणे परसु-निवत्ते व चंपगपायवे धसत्ति धरणीयलंसि सव्वंगेहिं सण्णिवइए तए णं से धणे सत्थवाहे तओ मुहुत्तंतरस्स आसत्थे पद्दागयपाणे देवदित्रस्स दारगस्स सब्बओ समंता मग्गण-गवेसणं करेइ देवदित्रस्स दारगस्स कथइ सुइं वा खुइं वा पउत्तिं वा अलभमाणे जेणेव सए गिहे तेणेव उवागच्छइ उवा- गच्छिता महत्थं पाहुडं गेण्हइ गेण्हिता जेणेव नगरगुत्तिया तेणेव उवागच्छइ उवागच्छिता तं महत्थं पाहुडं उवणेइ उवणेत्ता एवं वयासी-एवं खलु देवाणुप्पिया मम पुत्ते भद्दाए भारियाए अत्तए देवदित्रे नामं दारए इठ्ठे जाव उंवरपुप्फं पिव दुल्लहे सवणचाए किमंग पुण पासणयाए तए णं सा भद्दा देवदित्रं ण्हायं सब्बालंकारविभूसियं पंथगस्स हत्थे दत्ताइ जाव पायवडिए तं मम निवेदेइ तं इच्छामि णं देवाणुप्पिया देवदित्रस्स दारगस्स सब्बओ समंता मग्गण-गवेसणं कयं, तए णं ते नगरगोत्तिया धणेणं सत्थवाहेणं एवं वुत्ता समाणा सण्णद्ध- बद्ध-वम्मिय-कवया उर्पीलिय- सरासण-पट्टिया ।पिणद्ध-नेविज्जा आविद्ध-विमल-वरचिघ-पद्दा गहिया- उह-पहरणा धणेणं सत्थवा- हेणं सद्धिं रायगिहस्स नगरस्स बहसु अइगमणेसु य जाव पवासु य मग्गण-गवेसणं करेमाणा रायगिहाओ नगराओ पडिनिक्खमति पडिनिक्खमिता जेणेव जिण्णु-ज्जाणे जेणेव भग्गकूवए तेणेव उवागच्छंति उवागच्छिता देवदित्रस्स दारगस्स सरिरं निष्पाणं निघेठुं जीवविप्पजढं पासंति पासित्ता हा हा अहो अकज्जमिति कट्टु देवदित्रं दारगं भग्गकूवाओ उत्तारंति धणस्स सत्थवाहस्स हत्थे दलयंति ।४४।-३८-४

(५०) तए णं ते नगरगुत्तिया विजजस्स तक्करस्स पयमग्गमणुगच्छमाणा जेणेव मालुया-कच्छए तेणेव उवागच्छंति उवागच्छिता मालुयाकच्छगं अनुप्पविसंति अनुप्पविसिता विजजयं तक्करं ससकजं सहोढं सगेवेजं जीवग्गाहं गेण्हंति गेण्हिता अट्ठि-मुट्ठि-जाणुकोप्पर- पहार-

संभग-महिय-गतं करेति करेत्ता अवउडा बंधणं करेति करेत्ता देवदित्रस्स दारागस्स आमरणं
 गेण्हंति गेण्हित्ता विजयस्स तक्करस्स गीवाए बंधंति बंधित्ता मालुपाकच्छगाओ पडिणिक्खमंति
 पडिनिक्खमित्ता जेणेव रायगिहे नयरे तेणेव उवागच्छंति उवागच्छित्ता रायगिहं नयरं अनुप्य-
 विसंति अनुप्यविसित्ता रायगिहे नयरे सिंघाडग-तिग-चउक्क-चच्चर-चउम्मुह-महापहपहेसु कसप्प-
 हारे य छिवापहारे य लयापहारे य निवाएमाणा-निवाएभाणा छारं च धूलिं च कयवरं च उवरिं
 पकिरमाणा-पकिरमाणा महया-महया सद्देणं उणोसेमाणा एवं वयंति-एस णं देवाणुप्पिया विजए
 नामं तक्करे- [पावचंडालरूवे भीमतररुद्धकम्पे आरुसिय-दित्त-रत्तनयणे खरफरुस-महल्ल-विगय-
 बीभच्छदाटिए असंपुडियउट्टे उद्धुय-पडण्ण-लंबंतमुडए भमर-राहुवम्पे निरणुक्कोसे निरणुतावे
 दारुणे पइभए निसंसइए निरणुकम्पे अहीव एगंतदिट्ठीए खुरेव एगंतधाराए गिद्धेव आमि-
 सतल्लिच्छे अग्गिमिव] सब्वभक्खी वालयायए बालमारए तं नो खलु देवाणुप्पिया एयस्स केइ राया
 वा रायमच्चे वा अवरज्झइ नन्नत्थ अप्पणो सयाइं कम्माइं अवरज्झंति ति कट्टु जेणामेव चारगसाला
 तेणामेव उवागच्छंति उवागच्छित्ता हडिबंधणं करेति करेत्ता भत्तपाणनिरोहं करेति करेत्ता तिसंझं
 कसप्पहारे य छिवापहारे य लयापहारे य निवाएमाणा विहरंति तए णं से धणे सत्थवाहे मित-
 नाइ-नियग-सवण-संबंधि-यरियणेणं सद्धिं रोयमाणे [कंदमाणे] विलवमाणे देवदित्रस्स दारागस्स
 सरारस्स महया इद्धीसक्कार-समुद्दएणं नीहरणं करेति करेत्ता बहूइं लोइयाइं मयगकिच्चाइं करेति
 करेत्ता केणइ कालंतरेणं अवगयसोए जाए यावि होत्था ।४५।-३८

(५१) तए णं से धणे सत्थवाहे अण्णया कयाइं लहुसयंसि रायावराहंसि संपलिते जाए
 यावि होत्था तए णं से नगरपुत्तिया धणं सत्थवाहं गेण्हंति गेण्हित्ता जेणेव चारए तेणेव उवागच्छंति
 उवागच्छित्ता चारणं अनुप्यवेसंति अनुप्यवेसित्ता विजएणं तक्करेणं सद्धिं एयगओ हडिबंधणं
 करेति तए णं सा भद्दा भारिया कल्लं पाउप्पभाए रयणीए जाव उट्टियम्मि सूरु सहस्सरस्सिम्मि
 दिणयरे तेयसा जलंतं विपुलं असणं पाणं खाइमं साइमं उवक्खडेइ भोयणपिडयं करेइ करेत्ता
 भोयणाइं पक्खिवइ लंछिय-मुद्धियं करेइ करेत्ता एणं च सुरभिं वर वारिपडिपुत्रं दगवारयं करेइ
 करेत्ता पंधयं दासवेडयं सद्दावेइ सद्दावेत्ता एवं वयासी-गच्छहं णं तुमं देयाणुप्पिया इमं विपुलं
 असणं पाणं खाइमं साइमं गहाय चारगसालाए धणस्स सत्थवाहस्स उवणेहि तए णं से पंधए भद्दाए
 सत्थवाहीए एवं वुत्ते समाणे हट्टुट्टे तं भोचणपिडयं तं च सुरभिवरवारिपडिपुत्रं दगवारयं गेण्हइ
 गेण्हित्ता सयाओ गिहाओ पडिणिक्खमइ पडिणिक्खमित्ता रायगिहं नगरं मज्झमज्जेणं जेणेव
 चारगसाला जेणेव धणे सत्थवाहे तेणेव उवागच्छइ उवागच्छित्ता भोयणपिडयं ठवेइ ठवेत्ता उल्लंछेइ
 उल्लंछेत्ता भोयण गेण्हइ गेण्हित्ता भायणाइं ठावइ ठावित्ता हत्थसोयं दलयइ दलइत्ता धणं सत्थवाहं
 तेणं विपुलेणं असण-पाण-खाइम-साइमेणं परिवेसेइ तए णं से विजए तक्करे धणं सत्थवाहं एवं
 वयासी-तुक्के णं देयाणुप्पिया ममं एयाओ विपुलाओ असण-पाण-पाण- खाइम- साइमाओ
 संविभागं करेहि तए णं से धणे सत्थवाहे विजयं तक्करं एवं वयासी-अदियाइं अहं विजया एयं
 विपुलं असणं पाणं खाइमं साइमं कायाण वा सुणगाण वा दलएज्जा उक्कुरुडियाए वा णं छट्टेज्जा नो
 चेव णं तय पुत्तघायगस्स पुत्तमारगस्स अरिस्स वेरियस्स पडणीयस्स पट्टामित्तस्स एत्तो विपुलाओ
 असण-पाण-खाइम-साइमाओ संविभागं करेज्जामि तए णं से धणे सत्थवाहे तं विपुलं असणं पाणं
 खाइमं साइमं आहारेइ तं पंधयं पडिविसज्जेइ तए णं से पंधए दासवेडए तं भोयणपिडयं गिण्हइ

गिण्हिता जामेव दिसि पाउळ्मूए तामेव दिसि पडिगए

तए णं तस्स धणस्स सत्यवाहस्स तं विपुलं असणं पाणं खाइमं साइमं आहारियस्स समाणस्स उच्चार-पासवणे णं उच्चाहित्था तए णं से धणे सत्यवाहे विजयं तक्करं एवं वयासी-एहि ताव विजया एणंतमवक्कामो जेणं अहं उच्चार-पासवणं परिट्टवेमि तए णं से विजए तक्करे धणं सत्यवाहं एवं वयासी-तुज्झं देवाणुप्पिया विपुलं असणं पाणं खाइमं साइमं आहारियस्स अत्थि उच्चारे वा पासवणे वा ममं णं देवाणुप्पिया इमेहिं दहूहिं कसप्पहारेहि य छिवापहारेहि य लयापहारेहि य तण्हाए य छुहाए य परज्झमाणस्स नत्थि केइ उच्चारे वा पासवणे वा तं छंदेणं तुमं देवाणुप्पिया एणंते उवक्कमिन्ता उच्चार-पासवणं परिट्टवेहि तए णं से धणे सत्यवाहे विजएणं तक्करेणं एवं वुत्ते समाणे तुसिणीए संचिड्ढे तए णं से धणे सत्यवाहे मुहुत्तरसस बलियतराणं उच्चार-पासवणेणं उच्चाहिज्जमाणे विजयं तक्करं एवं वयासी-एहिं ताव विजया [एणंतमक्कमाणो जेणं अहं उच्चार-पासवणं परिट्टवेमि] तए णं से विजए तक्करे धणं सत्यवाहं एवं वयासी-जइ णं पुणं देवाणुप्पिया ताओ विपुलाओ असण-पाण- खाइमं- साइमाओ संविभागं करेहि तओहं तुमेहिं सद्धि एणंतं अवक्कमामि तए णं से धणे सत्यवाहे विजयं तक्करं एवं वयासी-अहं णं तुब्बं ताओ विपुलाओ असण-पाण-खाइम-साइमाओ संवि- भागं करिस्सामि तए णं से विजए तक्करे धणस्स सत्यवाहस्स एयमद्धं पडिसुणेइ

तए णं से धणे सत्यवाहे विजएणं तक्करेणं सद्धि एणंते अवक्कमइ उच्चारपासवणं परिट्टवेइ आयंते चोक्खे परमसुइभूए तमेव टाणं उवसंक्मिन्ता णं विहरइ तए णं सा भद्दा कळ्ळं पाउप्पभाए रयणीए जाव उट्ठियम्मि सूरे सहस्सरस्सिम्मि दिणयरे तेयसा जलंते विपुलं असणं [पाणं खाइमं साइमं उवक्खडेइ भोयणपिडयं करेइ करेता भोयणाइ पक्खिउवइ लंछिय-मुट्ठियं करेइ करेता एणं च सुरभि वर वारिपडिपुत्रं दगवारयं करेइ करेता पंथयं दासचेडयं सदावेइ सदावेत्ता एवं वयासी-गच्छह णं तुमं देवाणुप्पिया इमं विपुलं असणं पाणं खाइमं साइमं गहाय चारगसालाए धणस्स सत्यवाहस्स उवणेहि तए णं से पंथए भद्दाए सत्यवाहीए एवं वुत्ते समाणे हट्टुट्टे तं भोयणपिडयं तं च सुरभिवरवारिपडिपुत्रं दगवारयं गेण्हइ गेण्हिता सयाओ गिहाओ पडिणिक्ख- मइ पडिणिक्खमिन्ता रायगिहं नगरं मज्झमज्झेणं जेणेव चारगसाला जेणेव धणे सत्यवाहे तेणेव उवागच्छइ उवागच्छिता भोयणपिडयं ठवेइ ठवेत्ता उल्लेहेइ उल्लेच्छेता भोयणं गेण्हइ गेण्हिता भायणाइ ठावइ ठाविता हत्थसोयं दलयइ दलइत्ता धणं सत्यवाहं तेणं विपुलेणं असण-पाण- खाइम- साइमेणं परिवेसेइ तए णं से धणे सत्यवाहे विजयस्स तक्करस्स ताओ विपुलाओ असण-पाण-खाइम-साइमाओ संविभागं करेइ तए णं से धणे सत्यवाहे पंथयं दासचेडयं विसल्लेइ तए णं से पंथए भोयणपिडयं गहाय चारगाओ पडिणिक्खमइ पडिणिक्खमिन्ता रायगिहं नवरं मज्झमज्झेणं जेणेव सए गिहे जेणेव भद्दा सत्यवाही तेणेव उवागच्छइ उवागच्छिता भद्दं सत्यवाहिं एवं वयासी-एवं खलु देवाणुप्पिए धणे सत्यवाहे तव पुत्तघायगस्स पुत्तमारगस्स अरिस्स वेरियस्स पडणीयस्स पच्चामित्तस्स ताओ विपुलाओ असण-पाण-खाइम-साइमाओ संविभागं करेइ।४६।-४०

(५२) तए णं सा भद्दा सत्यवाही पंथगस्स दासचेडगस्स अंतिए एयमद्धं सोच्चा आसुरुत्ता रुद्धा [कुविया चंडिकिक्कया] मिसिमिसेमाणी धणस्स सत्यवाहस्स पओसमावज्जइ तए णं से धणे सत्यवाहे अण्णया कयाइं पित्त-नाइ-नियग-सयण-संवधि-परियणेणं सएण य अत्थसारेणं राय-

कज्जाओ अप्पाणं मोयावेइ मेयावेता चारगसालाओ पडिणिक्खमइ पडिणिक्खामेत्ता जेणैव अलंका-रियसभा तेणेव उवागच्छइ उवागच्छित्ता अलंकारियकम्मं कारवेइ जेणेव पोक्खरिणि तेणेव उवागच्छइ उवागच्छित्ता अहधोचमट्टियं गेण्हइ गेण्हित्ता पोक्खरिणी ओगाहइ ओगाहित्ता जलमज्जणं करेइ करेत्ता ण्हाए कयवलिकम्मे [कय-कोउय-मंगल-पायच्छित्ते सव्वालंकारविभूसिएणं] रायगिहं नगरं अनुप्पविसइ अनुप्पविसित्ता रायगिहस्स नगरस्स पज्झंमज्जेणं जेणेव सए गिहे तेणेव पहरेत्य गमणाए तए णं तं धणं सत्थवाहं एज्जमाणं पासित्ता रायगिहे नयरे बहवे नगर-निगम-सेट्ठि-सत्थवाह-पभिइओ आढंति परिजाणंति सक्कारेति सम्माणंति अब्भुट्ठेति सरीर-कुसलं पुच्छंति तए णं से धणे सत्थवाहे जेणेव सए गिहे तेणेव उवागच्छइ जावे य से तत्थ वाहिरिया परिसा भवइ तंजहा-दासा इ वा पेस्सा इ वा भयगा इ वा भाइल्ला इ वा सा वि य णं धणं सत्थवाहं एज्जमाणं पासइ पायवडिया खेमकुलसं पुच्छइ जावि य से तत्थ अब्भंतरिया परिसा भवइ तंजहा-माया इ वा पिया इ वा भाया इ वा भइणी इ वा सावि य णं धणं सत्थवाहं एज्जमाणं पासइ आसणाओ अब्भुट्ठेइ कंठाकंठियं अववासिय वाह-प्पभोक्खणं करेइ तए णं सा भद्दा धणं सत्थवाहं एज्जमाणं पासइ पासित्ता नो आढाइ नो परिजायइ अणाढायमाणी अपरिजाणमाणी तुसिणीया परम्भुही संट्ठइ तए णं से धणे सत्थवाहे भट्टं भारियं एवं वयासी किण्णं तुज्झं देवाणु-प्पिए न तुट्ठी वा न हरिसो वा नाणंदो वा जं मए सएणं अत्थसारेणं रायकज्जाओ अप्पा विमोइए

तए णं सा भद्दा धणं सत्थवाहं एवं वयासी-कहं णं देवाणुप्पिया मम तुट्ठी वा [हरिसो वा] आणंदो वा भविस्सइ जेणं तुमं मम पुत्ताधायगस्स | पुत्तामारगस्स अरिस्स वेरियस्स पडणीयस्स | पद्यामित्तास्स ताओ विपुलाओ असण-पाण-खाइम-साइमाओ संविलभागं करेसि तए णं से धणे सत्थवाहे भट्टं भारियं एवं वयासी नो खलु देवाणुप्पिए धम्मो ति वा तवोति वा कय-पडिकया इ वा लोमज्जा इ वा नायए इ वा घाडियए इ वा सहाए इ वा सुहि ति वा विजयस्स तक्करस्स ताओ विपुलाओ असण-पाण-खाइम-साइमाओ संविभागे कए नण्णत्थ सरीरचित्तए, तए णं सा भद्दा धणेणं सत्थवाहेणं एवं वुत्ता समाणी हइतुट्ठ-चित्तमाणंदिया जाव हरिसवस-विसप्पमाणहियया आसणाओ अब्भुट्ठेइ अब्भुट्ठेत्ता कंठाकंठि अववासेइ खेमकुलसं पुच्छइ पुच्छित्ता ण्हाया [कयवलिक-कम्मा कय-कोउय-मंगल]-पायच्छित्ता विपुलाइं भोगभोगाइं भुंजमाणी विहरइ तए णं से विजए तक्करे चारगसालाए तेहि बंधेहि य वहेहि य कसप्पहारेहि य [छिवापहारेहि य लयापहारेहि य] तण्हाए व छुहाए य परज्झमाणे कालमासे कालं किच्चा नरएसु नरइयत्ताए उववण्णे से णं तत्थ नरइए जाए काले कालो भासे [गंभीरलोमहरिसे भीसे उत्तासणए परमकण्हे वण्णेणं से णं तत्थ निच्चं भीए निच्चं तत्थे निच्चं तसिए निच्चं परमऽसुहसंबद्धं नरगगति] वेयणं पच्चणुब्भवमाणे विहरइ से णं तओ उव्वट्ठित्ता अणादीयं अणवदागं दीहमद्धं चाउरंते संसारकंतां अनुपरियट्ठिस्सइ एवामेव जंबूजो णं अहं निगंथो वा निगंथी वा आयरिय-उवज्झायाणं अंतिए मुंडे भवित्ता अगाराओ अणगारियं पव्वइए समाणे विपुलमणि-पोत्तिय-धण-कणग-रयणसारेणं लुब्भइ सो वि एवं चेव । ४३१-४१

(५३) तेणं कालेणं तेणं समएणं थेरा भगवंतो जाइसंपत्ता जाव पुव्वाणुपुत्थिं चरमाणा [गामाणुगामं दूइज्जमाणा सुहंसुहेणं विहरमाणा] जेणेव रायगिहे नयरे जेणेव गुणसिलए चेइए [तिणामेव उवागच्छंति उवागच्छित्ता] अहापडिरूवं ओगहं ओगिण्हित्ता संजमेणं तवसा अप्पाणं भावेमाणा विहरंति परिसा निग्गवा धम्मो कहिओ तए णं तस्स धणस्स सत्थवाहस्स यहुजणस्स

अंतिए एयमइं सोच्चा निसम्म इमेचारूवे अज्झत्थिए [चिंतिए पत्थिए मणोगए संकप्पे] समुप्प-
ज्जित्था-एवं खलु थेरा भगवंतो जाइसंपण्णा इहमागवा इहसंपत्ता तं गच्छामि णं थेरे भगवंते वंदामि
नमंस्सामि एवं संपेहेइ संपेहेत्ता पहाए [कयबलिकम्भे कय-कोउय-मंगल-पायच्छित्ते] सुद्धप्पावेसाइं
मंगलाइं वत्थाइं पवर परिंहेए पाचविहारचारेणं जेणेव गुणसिलए चेइए जेणेव थेरा भगवंतो तेणेव
उवागच्छित्ता वंदइ नमंसइ तए णं थेरा भगवंतो धरणस्स विवित्तं धम्ममाइक्खंति तए णं से धणे
सत्यवाहे धम्मं सोच्चा एवं वयासी-सद्वहामि णं भंते निग्गंथं पाचयण [पत्तियामि णं भंते निग्गंथं
पाचयणं रोएमि णं भंते निग्गंथं पाचयणं अट्ठुद्धेमि णं भंते निग्गंथं पाचयणं एवमेयं मंते तहमेयं
भंते अविहहमेयं भंते इच्छियमेयं भंते पडिच्छिमेयं भंते इच्छि-पडिच्छिमेयं भंते से जहेयं तुळ्मे वयह
त्ति कडु थेरे भगवंते वंदइ नमंसइ वंदित्ता नमंसित्ता। जाव पव्वइए जाव बहूणि वासाणि सामण्ण-
परियागं पाउणिता भत्तं पच्चक्खाइत्ता मासियाए संलेहणाए अम्पाणं झोसेत्ता सट्ठि भत्ताइं अणस-
णाए छेदित्ता कालमारो कालं किच्चा सोहम्मे कप्पे देवत्ताए उववण्णे तत्थ णं अत्थेगइयाणं देवाणे
चत्तारि पत्तिओवमाइं टिई पत्तत्ता तस्स णं धणस्स देवस्स चत्तारि पत्तिओवमाइं टिई से णं धणे देवे
त्ताओ देललोगाओ आउक्खएणं टिइक्खएणं भवक्खएणं अनंतरं चयं चइत्ता महाविदेहे वासे
सिञ्जिहिइ जाव सब्बदुक्खाणमंतं करेहिइ ॥४८१-४२

(५४) जहा णं जंबू धणेणं सत्थवाहेणो नो धम्मो त्ति वा [तवो त्ति वा कयपडिकया इ वा
लोगजत्ता इ वा नाए इ वा घाडियए इ वा सहाए इ वा सुहि त्ति वा] विजवस्स तक्करस्स ताओ
विपुत्ताओ असण-पाण-खाइम-साइमाओ संविभागे कए नण्णत्थ सरीरसारक्खणट्ठाए एवामेव
जंबू जे णं अहं निग्गंथे वा निग्गंथी वा आचरिय-उवज्झायाणं अंतिए मुंडे भवित्ता अगाराओ अण-
गारियं पव्वइए समाणे ववगय-ण्हाणुमदण-पुप्फ-गंध-मल्लालंकार-विभूसे इमस्स ओरालियसरी-
रस्स नो वण्णहेउं वा नो रुवहेउं वा नो हलहेउं वा नो विसयहेउं वा तं विपुलं अरणं पाणं खाइमं
साइमं आहारमाहारेइ नण्णत्थ नाणदंसणचरित्ताणं वहणट्ठयाए से णं इहलोए चेव बहूणं समाणाणं
वहूणं समणीणं वहूणं सावगाणं बहूणं सवियाणं य अच्चणिज्जे [वंदणिज्जे नमंसणिज्जे पूयणिज्जे
सक्कारणिज्जे सम्भाणिज्जे कल्लाणं मंगलं देवयं चेइयं विणएणं] पज्जुवासणिज्जे भवइ परलोह वि य
णं नो बहूणि हत्थच्छेयणाणि य कण्णच्छेयणाणि य नासाच्छेयणाणि य एवं हिययउप्पायणाणि य
वसणुप्पायणाणि य उल्लंबणाणि य पावाहिइ पुपो अणाइयं च णं अणवदगं दीहमद्धं [चाउरंतं
संसारकंतारं] वीईवइस्सइ-जहा व से धणे सत्यवाहे, एवं खलु जंबू समणेणं भगवया महावीरेणं
जाव संपत्तेणं दोच्चस्स नायज्झयणस्स अयमट्ठे पत्तत्ते-त्ति वेमि ॥४९१-४३

● पदमे सुयक्खंथे वीअं अज्झयणं समत्तं ●

तइअं अज्झयणं-अंउ

(५५) जइ णं भंते समणेणं भगवया महावीरेणं दोच्चस्स अज्झयणस्स नाचाधम्मकहाणं
अयमट्ठे पत्तत्ते तच्चस्स णं भंते नायज्झयणस्स के अट्ठे पन्नत्ते एवं खलु जंबू तेणं कालेणं तेणं समएणं
घंपा नामं नयरी होत्था-वण्णओ तीसे णं घंपाए नयरीए बहिया उत्तापुरत्थिमे दिसीभाए सुभूमि-
भागे नामं उज्जाणे-सव्वउय-पुप्फ-फल-समिद्धे सुरम्मे नंदनवणे इव सुह-सुभिमि-सीयलच्छायाए
समणुबद्धे तस्स णं सुभूमि भागस्स उज्जाणस्स उत्तरओ एगदेसम्भि मालुयाकच्छए होत्था-वण्णओ
तत्थ णं एगा वणमयूरी दो पुट्ठे परियागए पिट्ठुंडी-पंडुरे निव्वणे निरुवहए भिण्णमुट्ठिमभाणे

मयूरी-अंडए पसवइ पसविता सएणं पक्खवाएणं सारक्खएमाणी संगोवेमाणी संविट्ठेमाणी विहरइ तत्थ णं चंपाए नयरीए दुवे सत्थवाहदारगा परिवसंति तं जहा-जिणदत्तपुत्ते य सगरदत्तपुत्ते य -सहजायया सहवड्ढियया सहपंसुकीलियया सहदारदरिसी अण्णमण्णमणुरत्तया अण्णमण्णमणुव्वयया अण्णमण्णच्छंदाणुवत्तया अण्णमण्णहिय इच्छियकारया अण्णमण्णेसु गिहेसु किच्चाइं करणिज्जाइं पच्चणुब्भवमाणा विहरंति ।५०।-४४

(५६) तए णं तेसिं सत्थवाहदारगाणं अण्णया कयाइं एगयओ सहियाणं समुवागयाणं सण्णिसण्णाणं सण्णिविट्ठाणं इमेयारूवे मिहोकहासमुल्लावे समुप्पज्जित्था-जण्णं देवाणुप्पिया अहं सुहं वा दुक्खं वा पव्वजा वा विदेसगमणं वा समुप्पज्जइ तण्णं अहेहिं एगयओ समेच्चा नित्थरिय ति कट्टुअण्णमण्णमेयारूवसंगारं पडिसुणेति पडिसुणेता सकम्मसंपउत्ता जायायाविहोत्था ।५१।-४५

(५७) तत्थ णं चंपाए नयरीए देवदत्ता नामं गणिया परिवसइ-अइढा [दिता वित्ता विट्ठिण्ण-विउल-भवण-सयणासण-जाण-वाहणाबहुंधण-जायरूव-रयया आओग-पओगह-संपउत्ताविच्छ-डिय-पउर]-पत्तपाणा चउसट्टिकलापंडिया चउसट्टि-गणियागुणोववेया अउणतीसं विसेसे रममाणी एकक्कीस-इगुणाप्पहाण वतीस-पुरिसोवयारकुसला नवंगसुत्तपडिबोहिया अट्टरसदेसीभासादि-सारया सिंगारा-गारचारुवेसा संगव-गय-हसिय-[मणिव-चेड्डय-विलाससंलाबुल्लव-निउण-जुत्तो-वयारकुसला] ऊसियज्जया सहस्सलंभा विदिण्णछत्त-चामर-बालवीयणिया कण्णीरहुप्पयाया विहोत्था बहूणं गणियासहस्साणं आहेवच्चं [पोरेवच्चं सामितं भट्टितं महतरगतं आणा-ईसर-सेणावच्चं कारेमाणी पालेमाणी महयाऽहय-नट्ट-गीय-वाइय-तंती-तल-ताल-तुडिय-घण-मुडंग- पडुप्पवाइ-यरवेणं विउलाइं भोगभोगाइं भुंजमाणी] विहरइ तए णं तेसिं सत्थवाहदारगाणं अण्णया कयाइ पुव्ववरण्हकालसमयंसि जिमियभुत्तुत्तरागयाणं समाणाणं आयंताणं चोक्खाणं परमसुइभूयाणं सुहासणवरगयाणं इमेयारूवे मिहोकहासमुल्लावे समुप्पज्जित्था-सेयं खलु अहं देवाणुप्पिया कल्लं पाउप्पभावाए रयणीए जाव उट्टियेमिं सूरे सहस्सरस्सिमिं दिणयरे तेयसा जलंते विपुलं असणं पाणं खाइमं साइमं उवक्खडावेत्ता तं विपुलं असणं पाणं खाइमं साइमं धूव-पुप्फ-गंध-वत्थ-मल्लालंकारं गहाय देवदत्ताए गणियाए सद्धिं सुभूमिभागस्स उज्जाणस्स उज्जाणसिंरिं पच्चणुब्भवमाणाणं विहरित्तए ति कट्टुअण्णमण्णस्स एयमइं पडिसुणेति पडिसुणेता कल्लं पाउप्पभावाए रयणीए जाव उट्टियेमिं सूरे सहस्सरस्सिमिं दिणयरे तेयसा जलंते कोडुंबियपुरिसे सद्दावेत्ति सद्दावेत्ता एवं वयासी-गच्छह णं देवाणुप्पिया विपुलं असण-पाणं-खाइम-साइमं उवक्खडेह उवक्खडेत्ता तं विपुलं असण-पाण-खाइम-साइमं धूव-पुप्फ-गंध-वत्थ-मल्लालंकारं गहाय जेणेव सुभूमि-भागे उज्जाणे जेणेव नंदा पुक्खरिणी तेमेव उवागच्छह उवागच्छित्ता नंदाए पोक्खरिणीए अदूर-सामंते धूणामंडव आहाणह-आसियसम्मज्जिओवलित्तं [पंचवण्ण-सरसुरभि-मुक्कपुप्फपुंजोवयारकलियं कालागरु-पवरकुंदुरुक्क-तुरुक्क-धूव-डज्जंति-सुरभि-मधमघेतं-गंधुल्लुयाभिरामं सुगंधवरगंधिय गंधवट्टिभूगंयं] करेह करेत्ता अहे पडिवालेमाणा-पडिवालेमाणा विट्ठह जाव चिट्ठित्ति तए णं ते सत्थवाहदारगा दोच्चं पि कोडुंबियपुरिसे सद्दावेत्ति सद्दावेत्ता एवं वयासी-खिप्पामेव भो देवाणुप्पिया लहुकरण-जुत्त-जोइयं समखुर-वाल्लिहाण-समलिहिय-त्तिकखग्गसिंगाएहिं रययामय-घंट-सुत्तरज्जु-पवरकंचण खचिय-नत्थपगहोग्गहियएहिं नीलुप्पलकयामेलएहिं पवर-गोण-जुवा-णएहिं नाना-मणि-रयण-कंचण-धंहियाजालपरिक्खित्तं पवरलक्खणोववेयं जुत्तामेव पवहणं

उवणेह ते वि तहेव उवणोति तए णं ते सत्यवाहदारगा ण्हाया [कयवलिकम्मा कय-कोउय- मंगल-पायच्छिता अप्पमहग्धाभरणालंकिय सरीरा पवहणं दुरुहंति दुरुहिता जेणेव देवदत्ताए गणियाए गिहे तेणेव उवागच्छंति उवागच्छिता पवहणाओ पच्चोरुहंति पच्चोरुहिता देवदत्ताए गणियाए गिहं अनुप्विसंति

तए णं सा देवदत्ता गणिया ते सत्यवाहदारए एज्जमाणे पासइ पासित्ता हइतुइआ आसणाओ अब्भट्ठेइ अब्भुट्ठेत्ता सत्तइपयाइ अनुगच्छइ अनुगच्छित्ता ते सत्यवाहदारए एवं वयासी- संदिसंतु णं देवाणुप्पिया किमिहागमणप्पओयणं तए णं ते सत्यवाहदारगा देवदत्तं गणियं एवं वयासि इच्छामो णं देवाणुप्पिए तुमे सद्धि सुभूमि भागस्स उज्जावास्स उज्जाणसिरिं पच्चणुप्पवमाणा विहस्तिए तए णं सा देवदत्ता तेसिं सत्यवाहदारगाणं एयमइं पडिसुणेइ पडिसुणेत्ता ण्हाया कयवलिकम्मा जाव सिरी-समाणवेसा जेणेव सत्यवाहदारगा तेणेव उवागया तए णं ते सत्यवाहदारगा देवत्ताए गणियाए सद्धिं जाणं दुरुहंति दुरिहिता चंपाए नयरीए मज्झंमज्झेणं जेणेव सुभूमिभागे उज्जाणे जेणेव नंदा पोक्खरिणी तेणेव उवागच्छंति उवागच्छिता पवहणाओ पच्चोरुहंति पच्चोरुहिता नंदं पोक्खरिणिं ओगाहेति ओगाहेत्ता जलमज्जणं करंति करेत्ता जलकिइं करंति करेत्ता ण्हाया देव-दत्ताए सद्धिं नंदाओ पोक्खरिणीओ पच्चुत्त- रंति जेणेव धूणांमंडवे तेणेव उवागच्छंति उवागच्छिता धूणांमंडवं अनुप्विसंति अनुप्विसित्ता सव्वालंकारभूसियआसत्था वीसत्था गुहासणवरगया देवदत्ताए सद्धिं तं विपुलं असण-पाण- छाइम-साइमं धूव-पुप्फ-वत्थ-गंध-मल्लालंकारं आसाए-माणा विसाएमाणा परिभाएमाणा परिभुंजे- माणा एवं च णं विहरंति जिमियभुत्तारगया वि य णं समाणा देवदत्ताए सद्धिं विपुलाइं कामभोगाइं भुंजमाणा विहरंति ।५२।-४६

(४८) तए णं ते सत्यवाहदारगा पुव्वारण्हकालसमयंसि देवदत्ताए गणियाए सद्धिं धूणा-मंडवाओ पडिणिकखंमति पडिणिकखमिता हत्थसंगेद्वीए सुभूमिभागे उज्जाणे बहूसु आलिघरएसु च [कवलिघरएसु य लतारघरएसु अच्छणघरएसु य पेच्छघरएसु य पसाहणघरएसु य मोहणघरएसु य सालघरएसु य जालघरएसु य] कुसुमघरएसु य उज्जाणसिरिं पच्चणुप्पवमाणा विहरंति ।५३।-४७

(५९) तए णं ते सत्यवाहदारगा जेणेव से मालुयाकच्छए तेणेव पहारेत्थ गमणाए तए णं सा वणमयूरी ते सत्यवाहदारए एज्जमाणे पासइ पासित्ता भीया तत्था महया-महया सद्देणं केकारेवं विणिम्पुयमाणी-विणिम्पुयमाणी मालुयाकच्छओ पडिणिकखमइ पडिणिकखमिता एणांसि रुक्खडा-लयंसि ठिद्या ते सत्यवाहदारए मालुयाकच्छं च अणिमिसाए दिट्ठीए पेच्छमाणी चिट्ठइ तए णं ते सत्यवाहदारगा अण्णमण्ण सद्दावेत्ता सद्दावेत्ता एवं वयासी-जहा णं देवाणुप्पिया एसा वणम-यूरी अम्हे एज्जमाणे पासित्ता भीया तत्था तसिया उव्विग्गा पलाया महया-महया सद्देणं [केकारेवं विणिम्पुयमाणी-विणिम्पुयमाणी मालुयाकच्छओ पडिणिकखमइ पडिणिकखमिता एणांसि रुक्ख-डालयंसि ठिद्या] अम्हे मालुयाकच्छं च अणिमिसाए दिट्ठीए पेच्छमाणी चिट्ठइ तं भवियव्वमेत्थ कारणेणं ति कइ मालुयाकच्छं अंतो अनुप्विसंति तत्थ णं दो पुट्ठे परिथाए जाव पासित्ता अण्णमण्णं सद्दावेत्ता सद्दावेत्ता एवं वयासी-सेयं खलु देवाणुप्पिया अम्हं इमे वणमयूरी-अंडए साणं जातिपंताणं कुक्कुडियाणं अंडएसु पक्खि- वलित्तए तए णं ताओ जातिपंताओ कुक्कुडियाओ एए अंडए सए य अंडए सएणं पंखवाएणं सारक्खमाणीओ संगोवेमाणीओ विहरिस्संति तए णं अम्हं एत्थ दो कोलावणा मयूरी-पोयमा भविस्संति ति कइ अण्णमण्णस्स एयमइं पडिसुणेति

पडिसुणेत्ता सए सए दासचेडए सद्दवेंति सद्दवेत्ता एवं वयासी-गच्छह णं तुब्धे देवानुप्पिवा इमे अंडए गहाय सगणं जातिमंताणं कुक्कुडीणं अंडएसु पक्खिवए जाव ते वि पक्खिवेंति तए णं ते सत्यवाहदारगा देवदत्ताए गणियाए सद्धि सुभूमिभागस्स उज्जाणस्स उज्जाणसिरिं पद्दणुब्भवमाणा विहरित्ता तमेव जाणं दुरूढा समाणा जेणेव चंपा नयरी जेणेव देवदत्ताए गणियाए गिहे तेणेव उवागच्छंति उवागच्छित्ता देवदत्ताए गिहं अनुप्पविसंति अनुप्पविसित्ता देवदत्ताए गणियाए विउलं जीवियारिहं पीइदाणं दलयंति दलइत्ता सक्कारेति सम्माणेति सक्कारेत्ता सम्माणेत्ता देवदत्ताए गिहाओ पडिणिक्खमंति पडिणिक्खमिन्ता जेणेव सलाइ साइं गिहाइं तेणेव उवागच्छंति उवागच्छित्ता सकम्मसंपउत्ता जाया यावि होत्था 1५४1-48

(६०) तए णं जे से सागरदत्तपुत्ते सत्तवाहदारए से णं कळं [पाउप्पमायाए रयणीए जाव उट्ठियमिं सूरु सद्दस्सरस्सिमि दिणपरे तेयसा जलंते] जेणेव से वणमयूरी अंडए तेणेव उवा- गच्छइ उवागच्छित्ता तंसि मयूरी-अंडयंसी संकिए कंखिए वित्तिगिहसमावण्णे भेयसमावण्णे कलुससमावण्णे किण्णं ममं एत्थ कीलावणए मयूरी-पोयए भविस्सइ उदाहु नो भविस्सइ ति कट्टु तं मयूरी-अंडयं अभिक्खणं-अभिक्खणं उव्वत्तेइ परियत्तेइ आसारेइ संसारेइ चालेइ फंदेइ घट्टेइ खोभेइ अभिक्खणं-अभिक्खणं कण्णमूलंसि टिट्ठियावेइ तए णं से मयूरी-अंड अभिक्खणं- अभिक्खणं उव्वत्तिज्जमाणे [परियत्तिज्जमाणे आसारिज्जमाणे संसारिज्जमाणे चालिज्जमाणे फंदिज्जमाणे घट्टिज्जमाणे खोभिज्जमाणे अभिक्खणं-अभिक्खणं कण्णमूलंसि] टिट्ठियावेज्जमाणे पोछडे जाए यावि होत्था ते णं से सागरदत्तपुत्ते सत्तवाहदारए अण्णया कयाइं जेणेव से मयूरी-अंडए तेणेव उवागच्छइ उवागच्छइ तं मयूरी-अंडयं पोछडेमेव पासइ अहो णं ममं एत्थ कीलावणए मयूरी-पोयए न जाए ति कट्टु [ओहयमण संकप्पे करतलपल्हत्थमुहं अइज्जाणोवगाए] झियाइ एवामेव समणाउसो जो अहं निगंथो वा निगंथी वा आयरिय-उवज्झायाणं अंतिए मुंडे भवित्ता अगाराओ अणगारियं पव्वइए समाणे पंचमहव्वएसु छळीवनिक्काएसु निगंथे पाववणे संकिए [कंखिए वित्तिगिहसमावण्णे भेयसमावण्णे कलुससमावण्णे से णं इहभवे चेव बहूणं समणाणं बहूणं समणाणं बहूणं सावगाणं बहूणं सावियाणं य हीलणिज्जे निंदणिज्जे खिसणिज्जे गरहणिज्जे परिभवणिज्जे परलोए वि य णं आगच्छइ बहूणि दंडणाणि य [बहूणि मुंडणाणि य बहूणि तज्जणाणि य बहूणि तालणाणि य बहूणि अंदुबंधणाणि य बहूणि घोलणाणि य बहूणि माइमरणाणि य बहूणि पिइमरणाणि य बहूणि भाइमरणाणि य बहूणि भगिणीमरणाणि य बहूणि भज्जामरणाणि य बहूणि पुत्तमरणाणि य बहूणि धूवमरणाणि य बहूणि सुण्हामरणाणि य बहूणं दारिदाणं बहूणं दोहग्गाणं बहूणं अप्पियसंवासाणं बहूणं पियविप्पओगाणं बहूणं दुक्ख-दोमणस्साणं आभागी भविस्सति अणादियं च णं अणवयाणं दीहमच्चं चाउरंतं संसारकंतरं मुज्जे-भुज्जे] अनुपरियाट्टिस्सइ 1५५1-49

(६१) तए णं से जिणदत्तपुत्ते जेणेव से मयूरी-अंडए तेणेव उवागच्छइ उवागच्छित्ता तंसि मयूरी-अंडयंसि निस्संकिए निक्कंखिए निव्वित्तिगिंछे सुव्वत्तए णं मम एत्थ कीलावणए मयूरी-पोयए भविस्सइ ति कट्टु तं मयूरी-अंडयं अभिक्खणं-अभिक्खणं नो उव्वत्तेइ [नो परियत्तेइ नो आसारेइ नो संसारेइ नो चालेइ नो फंदेइ नो घट्टेइ नो खोभेइ अभिक्खणं-अभिक्खणं कण्णमूलंसि] नो टिट्ठियावेइ तए णं से मयूरी-अंडए अनुव्वत्तिज्जमाणे जाव अटिट्ठियावज्जमाणे कालेणं समएणं उब्भिन्ने मयूरी-पोयए एत्थ जाए तए णं से जिणदत्तपुत्ते तं मयूरी-पोययं पासइ

पासित्ता हृदुतुद्धे मयूर-पोसए सद्दावेइ सद्दावेत्ता एवं वयासी-तुब्भे णं देवाणुप्पिया इमं मयूर-पोयगं वहुंहिं मयूरपोसण-पाओग्गेहिं दब्बेहिं अनुपुब्बेणं सारक्खमाण्णा संगोवेमणा संवइद्देहं नदुल्लगं च सिक्खावेह ते णं ते मयूर-पोसगा जिणदत्तपुत्तस्स एयमद्धं पडिसुणेति तं मयूर-पोयगं गेण्हंति जेणेव सए गिहे तेणेव उवागच्छंति तं मयूर-पोयगं जाव नदुल्लगं च सिक्खावेति तए णं से मयूर-पोयए उम्मुक्क- बालभावे विण्णय-परिणयमेते जोव्वणगमणुपत्ते लक्खण-वंजण-गुणोवदेए माणुष्माण-प्पमाण- पडिपुत्रपक्ख पेहुणकलावे विचित्तपिच्छसत्तचंदए नीलकंठए नच्चणसीलए एगाए चप्पु-डियाए कयाए समाणीए अणेगाइ नदुल्लगसयाइ केकाइयसयाणि य करेमाणे विहरइ तए णं ते मयूर- पोसगा तं मयूर-पोयगं उम्मुक्कबालभावं जाव केकाइयसयाणि य करेमाणं पासित्ता णं तं मयूर-पोयगं गेण्हंति गेण्हिता जिणदत्तपुत्तस्स उवणेति

तए णं से जिणदत्तपुत्ते सत्थवाहदारए मयूर-पोयगं उम्मुक्कबालभावं जावं केकाइयस-याणि य करेमाणं पासित्ता हृदुतुद्धे तेसिं विपुलं जीविचारिहं पीइढाणं दलचइ दलइत्ता पडिविसञ्जेइ तए णं से मयूर-पोयगे जिणदत्तपुत्तेणं एगाए चप्पुडियाए कयाए समाणीए नंगोला-भंग-सिरोधरे सेयावंगे ओयारिचं-पइण्णपक्खे उक्खित्तचंद- काइय-कलावे केकाइयसयाणि मुंचमाणे नच्चइ तए णं से जिणदत्तपुत्ते तेणं मयूर-पोयएणं चंपाए नयरीए सिंघाडग-जाव पहेसु सएहि य साहसिएहि य रायसा- हस्सिएहि य पणिएहिं जयं करेमाणे विहरइ एवामेव समणाउसो जो अहं निग्गंथो वा निग्गंथी वा आयरिय-उवज्झायाणं अंतिए मुंठे भवित्ता अगाराओ अणगारियं पव्वइए समाणे पंचमहब्बएसु छज्जीअनिकाएसु निग्गंथे पावऽणे निपांकेए निक्कंखिए निव्वित्तिगिंछे से णं इहभवे चेव ब्रह्मण सम्भणाणं | ब्रह्मणं समर्णाणं ब्रह्मणं सावगाणं ब्रह्मणं सावियाणं य अच्चणिजे वंद-गिजे नमंसणिजे पूयणिजे सक्कारणिजे सम्माणणिजे कल्लणं मंगलं देवयं चेइयं विणएणं पज्जुवा-सणिजे भवइ परलोए वि य णं नो बहूणि हत्थच्छेयणाणि य कण्णच्छेयणाणि य नास्साछेयणाणि य एवं-हिययउप्पायणाणि य वसणुप्पावणाणि य उल्लंघणाणि य पाविहिइ पुणो अणाइयं च णं अणव-दणं दीहमइं चाउरंतं संसारकंठारं | वीईवइस्सइ एवं खलु जंबू समणेणं भगवया महावीरेणं आइगरेणं तित्थगरेणं जाव सिद्धिगइनामधेज्जं ठाणं संपरोणं तच्चस्स नायज्झणस्स अयमट्ठे पत्रत्ते ति वेमि । ५६।-50

● पटमे सुयक्त्रये तइअं अञ्जयणं सप्ततं ●

चउत्थं अञ्जयणं—कुम्भे

(६२) जइ णं भंते सप्तणेणं भगवया महावीरेणं तच्चस्स नायज्झयणस्स अयमट्ठेपत्रत्ते चउत्थस्स णं भंते नायज्झयणस्स के अट्ठे पत्रत्ते एवं खलु जंबू तेणं कालेणं तेणं समएणं बाणारसी नामं नयरी होत्था वण्णओ तीसे णं बाणारसीए नयरीए उत्तरपुरत्थिमे दिसीआए गंगाए महानईए मचंगतीरइहे नाम देहे होत्था-अनुपुब्बपुजायवप्प-गंभीरसीयलजले अच्छ-विमल-सलिल-पलि-च्छण्णे संछण्णं-पत्त-पुष्प-पलासे बहुउप्पल-पउम-कुमुय-नल्लिण-सुभग-सोगंधिय-पुंडरीय- महापुं-डरीय-सयपत्त-सहस्सपत्त-केसरपुष्पोवचिए पासाईए दरिसणिजे अभिरूवे पडिरूवे तत्थ णं बहूणं मच्छणं य कच्छभाणं य गाहाणं य मगराणं य सुंसुमारणं य सयाणि य सहस्साणि य सयसहस्साणि य जूहाइं निब्बयाइं निरुब्बिग्गाइं सुहंसुहेणं अभिरममाण्णाइं-अभिरममाण्णाइं विहरंति तस्स णं मयंगतीरइहस्स अदूरसामंते एत्थ णं महं एगे मालुयकच्छए होत्ता-वण्णओ तत्थ णं दुवे पावसि-

यालगा परिवसंति-यावा चंडा रुद्धा तद्धिच्छा साहसिया लोहियपाणी आमिसत्थी आमिसा- हरा आमिसप्यिया आमिसलोला आमिसं गवेसमाणा रत्तिवियालचारिणो दिया पच्छं या वि चिद्धंति

तए णं ताओ मयंगतीरद्दहाओ अण्णया कयाइं सूरियंसि चिरत्थमियंसि लुलियाए संझाए पविरलमाणुसंसि निसंत-पडिनियंतंसि समाणंसि दुवे कुम्मगा आहारत्थी आहारं गवेसमाणा सणियं-सणियं उत्तरंति तस्सेव मयंगतीरद्दहस्स परिपेरंतेणं सव्वओ समंता परिघोलमाणा- परिघोलमाणा वित्तिं कप्पेमाणा विहरंति तथाणंतरं च णं ते पावसियालगा आहारत्थी आहारं गवेसमाणा मालुयाकच्छाओ पडिणिकखमंति पडिणिकखमिता जेणेव मयंगतीरद्दहे तेणेव उवागच्छंति उवागच्छिता तस्सेव मयंगतीरद्दहस्स परिपेरंतेणं परिघोलमाणा-परिघोलमाणा वित्तिं कप्पेमाणा विहरंति तए णं ते पावसियालगा ते कुम्मए पासंति पासिता जेणेव ते कुम्मए तेणेव पहारेत्थ गमणए तए णं ते कुम्मगा ते पावसियालए एज्जमाणे पासंति पासिता भीया तत्था तसिया उच्चिग्गा संजायभया हत्थे य ए य गीहाओ य सएहिं-सएहिं काएहि साहरंति साहरिता निच्चला निष्फंदा तुसिणीया संचिद्धंति तए णं ते पावसियालगा जेणेव ते कुम्मगा तेणेव उवागच्छंति उवागच्छिता ते कुम्मए सव्वओ समंता उव्वत्तेति परियत्तेति आसारंति संसारंति चालंति घट्टेति फंदेति खोभंति नहेहि आलुंपंति दंतेहि य अक्खोडेति नो चेव णं संचाएंति तेसि कुम्मगाणं सरीरस्स किंचि आवाहं वा वावाहं वा उप्पाइत्तए छविच्छेयं वा करत्तए तए णं ते पावसियालगा ते कुम्मए दोहंपि तद्धंपि सव्वओ समंता उव्वत्तेति जाव नो चेव णं संचाएंति करत्तए ताहे संता तंता परितंता निच्चिण्णा समाणा सणियं-सणियं पच्चोसक्कंति एगंतमवक्कमंति निच्चला निष्फंदा तुसिणया संचिद्धंति तए णं एगे कुम्मे ते पावसियालए चिरगए दूरंगए जाणित्ता सणियं-सणियं एणं पायं निच्छुभइ तए णं ते पावसियालगा तेणं कुम्मएणं सणियं-सणियं एणं पायं नीणियं पासंति पासिता सिग्धं तुरियं चवलं चंडं जइण वेगियं जेणेव से कुम्मए तेणेव उवागच्छंति उवागच्छिता तस्स णं कुम्मगस्स तं पायं नक्खेहिं आलुंपंति दंतेहि अक्खोडेति तओ पच्छा मंसं च सोयं च आहारंति आहारत्ता तं कुम्मगं सव्वओ समंता उव्वत्तेति जाव नो चेव णं संचाएंति [तस्स कुम्मगस्स सरीरस्स किंचि आवाहं वा वावाहं वा उप्पाइत्तए छविच्छेइं वा करत्तए तए णं ते पावसियालगा तं कुम्मयं दोहंपि तद्धंपि सव्वओ समंता उव्वत्तेति परियत्तेति आसारंति संसारंति चालंति घट्टेति फंदेति खोभंति नहेहि आलुंपंति दंतेहि य अक्खोडेति नो चेव णं संचाएंति तस्स कुम्मगस्स सरीरस्स किंचि आवाहं वा वावाहं वा उप्पाइत्तए छविच्छेयं वा करत्तए ताहे संता तंता परितंता निच्चिण्णा समाणा सणियं-सणियं पच्चोसक्कंति दोहंपि एगंतमवक्कमंति] एवं चत्तारि वि पाया [तए णं से कुम्मए ते पावसियालए चिरगए दूरंगए जाणित्ता] सणियं-सणियं गीवं नीणेइ तए णं ते पावसियालगा तेणे कुम्मएणं सणियं-सणियं गीवं नीणियं पासंति पासिता सिग्धं तुरियं चवलं [चंडं जइण वेगियं जेणेव से कुम्मए तेणेव उवागच्छंति उवागच्छिता तस्स णं कुम्मगस्स तं गीवं] नहेहि आलुंपंति दंतेहि क्वालं विहाडेति विहाडेता तं कुम्मगं जीवियाओ ववरोवेति ववरोवेत्ता मंसं च सोणियं च आहारंति

एवामेव समाणाउसो जो अहं निग्गंधो वा निग्गंधि वा आयरिय-उवज्जायाणं अंतिए मुंडे भवित्ता अगारओ अणगारियं पव्वइए समाणे पंच य से इंदिया अगुत्ता भवंति से णं इहमवे चेव बहूणं समाणाणं बहूणं समणीणं बहूणं सावगाणं बहूणं सावियाणं य हीलणिजे [निंदणिजे

त्रिसण्णिजे गरहणिजे परिभवणिजे परलोए वि य णं आगच्छइ-बहूणि दंडणाणि [य बहूणि मुंडणाणि य बहूणि तज्जणाणि य बहूणि तालणाणि य बहूणि अंदुबंधणाणि य बहूणि धोलणाणि य बहूणि माइमरणाणि य बहूणि पिइमरणाणी य बहूणि भाइमरणाणि य बहूणि भगिणीपरणाणी य बहूणि भज्जामरणाणि य बहूणि पुत्तमरणाणि य बहूणि धूयमरणाणि य बहूणि सुण्हामरणाणि य बहूणं दारिहाणं बहूणं दोहणाणं बहूणं अपियसंवासाणं बहूणं पियविष्पओगाणं बहूणं दुक्ख-दोमण-स्साणं आभागी भविस्संति अणादियं च णं अणवयगं दीहमद्धं चाउरंतं संसारकंतारं भुज्जो-भुज्जो] अनुपरियट्टिसस्स-जहा व से कुम्मए अगुत्तिदिए तए णं ते पावसियालगा जेणेव से दोधे कुम्मए तेणेव उवागच्छंति उवागच्छता तं कुम्मणं सब्बओ समता उव्वतेति [परियतेति आसारंति संसारंति चालेति पट्टेति फदेति खोमेति नहेहिं आलुंपंति दंतेहि य अक्खोडेति नो वेव णं संचाएति तस्स कुम्मणस्स सरीरस्स किंचि आवाहं वा वावाहं वा उप्पाइत्तए छविच्छेयं] वा करेतए

तए णं ते पावसियालगा तं कुम्मणं दोधंपि तद्धंपि उव्वतेति जाव नो चेव मणं संचायति तस्स कुम्मणस्स सरीरस्स किंचि आवाहं वा वावाहं वा छविच्छेयं वा करेतए ताहे संता तंता परितंता निव्विण्णा समाणा जामेव दिसं पाउब्भूया तामेव दिसं पडिगया तए णं से कुम्मए ते पावसियालए चिराए दूरंगए जाणित्ता सणियं-सणियं गीवं नीणेइ नीणेत्ता दिसावलोयं करेइ करेत्ता जभगसमणं चत्तारि वि पाए नीणेइ नीणेत्ता ताए उक्किक्कहा [तुरियाए चवलाए चंडाए सिग्धाए उद्दुयाए जइणाए छेयाए] कुम्मणइए वीईवयमाणे-वीईवयमाणे जेणेव मयंगतीरइहे तेणेव उवागच्छइ उवागच्छित्ता मित्त-नाइ-नियग-सयण-संबंधि-परियणेणं सद्धि अभिसमण्णागए यावि होत्था एवा- मेव समाणउसो जो अहं समाणे वा समाणी वा आयरिय-उव्वज्जायाणं अंतिए मुंडे भविता अगा- राओ अणगारियं पव्वइए समाणे पंच च से इंदियाइ गुत्ताइं भवंति [से णं इहभवे वेव बहूणं समाणं बहूणं समाणीं बहूणं सावगाणं बहूणं सावियाणं य अद्यणिजे बंदणिजे नमंसण्णिजे पूयणिजे सक्कारणिजे सम्माणणिजे कल्लणं मंगलं देवयं चेइयं विणएणं पज्जुवासण्णिजे भवइ परलोए वि य णं नो बहूणि हत्यच्छेयणाणि य कण्णच्छेयणाणि य नासाछेयणाणि य एवं हिययउप्पायणाणि य वसणुप्पायणाणि य उल्लंबणाणि य पाविहिइ पुणो अणाइयं च णं अणवदग्गं दीहमद्धं चाइरंतं संसारकंतारं वीइवइस्सइ-जहा व से कुम्मए गुत्तिदिए एवं खलु जंबू समाणेणं भगवया महावीरेणं चउत्थस्स नायज्जयणस्स अयमट्टे पत्रत्ते ति वेमि ।५७।-५१

● पदमे सुयक्षणे चउत्वं अञ्जयणं समत्तं ●

पंचमं अञ्जयणं—सेलगे

(६३) जइ णं भंते समाणेणं भगवया महावीरेणं चउत्थस्स नायज्जयणस्स अयमट्टे पत्रत्ते पंचमस्स णं भंते नायज्जयणस्स के अट्टे पत्रत्ते एवं खलु जंबू तेणं कालेणं तेणे समाणं बारवती नामं नयरी होत्था-पाईणपडीणायया उदीणदाहिणवित्थिण्णा नवजोयणवित्थिण्णा दुवालसजोयणा-यामा धणवइ-मइ-निम्मिया चामीयर-पवर-पागारा नाणामणि-पंचवण्ण-कविसीसग-सोहिया अलका-पुरि-संकासा पमुइव-पक्कीलिया पच्चकखं देव-लोगमूया तीसे णं बारवईए नयरीए बहिया उत्तपुरस्थिमे दिसीभाए रेवतगे नामं पव्वए होत्था-तुंगे गगणतलमणुलिहंतसिहरे नाणाविह-गुच्छ-गुम्म-लया-यल्लि-परिगए हंस-मिग-मयूर-कोंच-सारस-चक्कवाय-मयणसाल-कोइलकुलो-ववेए अणेगतड-कडम-विचर-उज्जर-पवायपब्भारसिहरपउरे अच्छरगण-देवसंघ-चारण- विज्जा-

हरमिहुण-संविधिण्णे निच्चच्छणए दसारवर-वीरपुरिस-तेलोककबलवगाणं सोमे सुमणे पिय-दंसणे सुरुवे पासाईए दरिसणीए अभिरूवे पडिरूवे तस्स णं रेवयगस्स अदूरसामंते एत्थ णं नंदनवणे नामं उज्जाणे होत्था-सव्वोउय-पुष्फ-फल-समिद्धे रम्मे नंदणवणप्पगासे पासाईए दरि-सणीए अभिरूवे पडिरूवे तस्स णं उज्जाणस्स बहुमज्झदेसभाए सुरप्पिए नामं जक्खाययणे होत्था-दिव्वे वण्णओ तत्थ णं वारवईए नयरीए कण्हे नामं वासुदेवे राया परिवसइ से णं तत्थ समुद्धियजयपामोक्खाणं दसण्हं दसाराणं बलदेवपामोक्खाणं पंचण्हं महावीराणं उग्गसेणपा-मोक्खाणं सोलसण्हं राईसाहस्सीणं पञ्जुन्नपामोक्खाणं अद्धुद्धाणं कुमारकोडीणं संबपामोक्खाणं सट्टीए दुद्धंतसाहस्सीणं वीरसेणपामोक्खाणं एककवीसाए वीरसाहस्सीणं महासेणपामोक्खाणं छप्पण्णाए बलवगसाहस्सीणं रुप्पिणिप्पामोक्खाणं बत्तीसाए महिलासाहस्सीणं अणंगसेणपा-मोक्खाणं अणेगाणं गणियासाहस्सीणं अण्णेसिं च बहूणं ईसर-त्तलवर जाव-सत्यवाहपभिईणं वेयइद्धगिरि-सागरपेरंतस्स य दाहिणइद्ध भरहस्स वारवईए नयरीए आहेवच्चं [पोरेवच्चं सामित्तं भट्टित्तं महत्तरगतं अणा-ईसर-सेणावच्चं कारेमाणे] पालेमाणे विहरइ 141-52

(६४) तत्थ णं वारवईए नयरीए धावच्चा नामं गाहावइणी परिवसइ-अइठा [दिता वित्ता वित्थिण्ण-विउल-भवण-सयणासण-जाणवाहणा बहुधण-जावरूव-रयया आओग-पओग-संप-उत्ता विच्छइय-पउर-भत्तापाणा बहुदासी-दास गो महिस-गवेलग-प्पभूया बहुजणस्स] अपरिभूया तीसे णं धावच्चाए गाहावइणीए पुत्ते धावच्चापुत्ते नामं सत्यवाहदारए होत्था- सुकुमालपाणिए [अहीण-पडिपुत्र-पंचिंदियसरीरे लक्खण-वंजण-गुणोववेए माणुम्माण-प्पमाणपडिपुन्न- सुजाय-सव्वंगसुदरंगे ससिसोमाकारे कंते पियदंसणे] सुरुवे तए णं सा धावच्चा गाहावइणी तं दारणं साइरेगअट्ठवासजाययं जाणित्ता सोहणंसि तिहि-करण-नक्खत्त-मुहत्तंसि कलापरियस्स उवणेइ जाव भोगसमत्थं जाणित्ता बत्तीसाए इब्बकुलबालियाणं एगदिवसेणं पाणिं गेण्हावेइ वत्तीसओ दाओ जाव बत्तीसाए इब्बकुलबालियाहिं सद्धिं विपुले सह-परिस-रस-रूव-गंधे [पंचविहे माणुस्सए कामभोए] भुंजमाणे विहरइ तेणं कालेणं तेणं समएणं अरहा अरिइनेमी आइरे तित्थयारे सो चेव वण्णओ दसधणुस्सेहे नीलुप्पल-गवलगुलिय-अयसिक्कुसुमप्पगासे अट्ठारसहिं समण-साहस्सीहिं चत्तालीसाए अज्जियासाहस्सीहिं सद्धिं संपरिवुडे पुब्बाणुपुव्विं चरमाणे [गामाणुगामं दूइजमाणे सुहंसुहेणं विहरमाणे] जेणेव वारवइ नामं नगरी जेणेव रेवतगपव्वए जेणेव नंदणवणे उज्जाणं जेणेव सुरप्पियस्स जक्खस्स जक्खाययणे जेणेव असोगवरपायवे तेणेव उवागच्छइ उवागच्छिता अहापडिरूवं ओग्गहं ओगिण्हिता संजमेणं तवसा अप्पाणं भावेमाणे विहरइ परिसा निग्गया घम्मो क्हिओ तए णं से कण्हे वासुदेवे इमीसे कहाए लद्धइ समणे कोडुंबियपुरिसे सदावेइ सदावेत्ता एवं वयासी-खिप्पामेव भो देवाणुप्पिया सभाए सुहम्माए मेघोघरसियं गंभीरमहुरसहं कोमुइयं भेरिं तालेह

तए णं ते कोडुंबियपुरिसा कण्हेणंवासुदेवेणं एवं वुत्ता समाप्ता हट्टवुत्ता-[चित्तमाणंदिया जाव हरिसवस-विसप्पमाणहियया करयलपरिग्गहियं दसण्हं सिरसावत्तं] मत्थए अंजलिं कइ एवं सामी तए ति [आणाए विणएणं वयणं] पडिसुणोति पडिसुणेत्ता कण्हस्स वासुदेवस्स अंतियाओ पडिनिक्खमंति पडिनिक्खमिन्ता जेणेव सभा सुहम्मा जेणेव कोमुइया भेरी तेणेव उवागच्छंति उवा-गच्छित्ता तं मेघोघरसियं गंभीरमहुरसहं कोमुइयं भेरिं तालोति तओ निच्च-महुर-गंभीर-पडिसुएणं

पिव सारइएणं बलाहएणं अनुरसियं भेरीए तए णं तीसे कोमुइयाए भेरीए तालियाए समाणीए बारवईए नयरीए नवजोयणवित्थिण्णाए दुवालसजोयणायामाए सिंघाडग- तिय- चउकूक- चच्चर- कंदर-दरी-विवर-कुहर-गिरिसिहर-नगरगोउर-पासाय-दुवार-भवण-देउल-पडिसुया-सयहसहस्स संकुलं करेमाणे बारवत्तिं नयरी सत्थितर-वात्थिरियं सब्बओ समंता सद्दे विप्पसरित्था तए णं बारवईए नयरीए नवजोयणवित्थिण्णाए बारसजोयणायामाए समुइ विजयपामोक्खा दस दसारा जाव गणियासहस्साइं क्रोमुइयाए भेरीए सद्दे सोद्या निसम्मं हट्टुट्टु-चित्तमाणंदिया जाव हरिसवस-विसप्पमाणहियया प्हाया आविद्ध- वग्धारिय- मल्लदाम- कलावा अहयवत्थ- चंदणो- कित्रगावसरीरा अप्पेगइया हयगया एवं गवगया रह-सीया-संदमाणीगया अप्पेगइया पायविहार- चारेणं पुरिसवगपुरापरिक्खिता कणहरस वासुदेवस्स अंतियं पाउत्थमवित्था

तए णं से कण्हे वासुदेवे समुद्विजयपामोक्खे दस दसारे जाव अंतियं पाउत्थमवमाणे पासिता हट्टुट्टु-चित्तमाणंदिए जाव हरिसवस-विसप्पमाणहियए कोडुंबियपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया चाउरंगिणि तेणं सज्जेह विजयं च गंधहत्थिय उवट्टुवेह तेवि तहत्ति उवट्टुवेत्ति [तए णं से कण्हे वासुदेवे प्हाए जाव सब्बालंकारविभूसिए विजयं गंधहत्थिय दुरूढे समाणे सकोरेंटपल्लदामेणं छत्तेणं धरिज्जमाणेणं महया भड-चडगर-वंद-परियाल-संपरिवुडे बारव- तीए नयरीए मज्झमज्झेणं निगगच्छइ निगगच्छिता जेणेव रेवतगपव्वए जेणेव नंदणवणे उज्जाणे जेणेव सुरप्पिंसस्स जक्खस्स जक्खायवणे जेणेव असोगवरपायवे तेणेव उवागच्छइ उवागच्छिता अरहओ अरिद्धनेमिस्स छताइच्छत्तं पडागाइपडागं विज्जाहरचारणे जंभाए य देवे ओवयमाणे उप्पा- यमाणे पासइ पासिता विजयाओ गंधहत्थीओ पच्चोरूहइ पच्चोरूहत्ता अरहं अरिद्धनेमिं पंचविडेणं अभिगमेणं अभिगच्छइ जेणामेव अरहा अरिद्धनेमी तेणामेव उवागच्छइ उवागच्छिता अरहं अरिद्ध- नेमिं तिक्खुत्तो आयाहिण-पयाहिणं करेइ वंदइ नमंसइ वंदित्ता नमंसित्ता अरहओ अरिद्धनेमिस्स नज्जासत्ते नाइदूरे सुस्सुसमाणे नमंसमाणे पंजलिउडे अभिमुहे विणएणं] पञ्चवासइ 1491-53

(६५) थावच्चापुत्ते वि निग्गए जहा मेहे त्थेव धम्मं सोच्चा निसम्म जेणेव थावच्चा गाहावइणी तेणेव उवागच्छइ उवागच्छिता पायग्गहणं करेइ जहा मेहस्स तथा चेव निवेयणा तए णं तं थावच्चापुत्तं थावच्चा गाहावइणी जाहे नो संचाएइ विसयाणुलोमाहि च विसयपडिकूलाहि य बहूहिं आघवणाहि य पत्रवणाहि य सण्णवणाहि य विण्णवणाहि य आघवित्तए वा पत्रवित्तए वा सण्ण- वित्तए वा विण्णवित्तए वा ताहे अकामिया चेव थावच्चापुत्तस्स दारगस्स निक्खमणमणुमन्नित्था तए णं सा थावच्चा गाहावइणी आसणाओ अब्बुडेइ अब्बुडेत्ता महत्थं महग्धं महरियं रायारिहं पाहुडं गेण्हइ गेण्हित्ता मित्त-जाव संपरिवुडा जेणेव कण्हस्स वासुदेवस्स भाणवरपडिदुवार- देसभाए तेणेव उवागच्छइ उवागच्छिता पडिहारदेसिएणं मग्गेणं जेणेव कण्हे वासुदेवे तेणेव उवागच्छइ उवागच्छिता करयल-परिग्गहियं सिरसावत्तं मत्थाए अंजलिं कट्टु जएणं विजएणं वच्चावेइ वच्चावेत्ता तं महत्थं महग्धं महरिहं रायारिहं पाहुडं उवणेइ उवणेत्ता एवं वयासी-एवं खलु देवाणुप्पिया मम एगे पुत्ते थावच्चापुत्ते नामं दारए-इडे [कंते पिए मणुण्णे मणामे थेज्जे वेसासिए सम्मए बहुमए अनुए भंडकरंडगसमाणे रयणे रयणभूए जीविचऊसासए हिययनंदिजणए उंबरपुष्पं पिव दुल्लहे सवणयाए किमंग पुण दरिसणयाए से जहानामए उप्पले ति वा पउमे ति वा कुमुदे ति वा पंके जाए जले संवडिइए नोवलिप्पइ पंकरएणं नोवलिप्पएइ जलरएणं एवामेव

थावद्यापुते कामेसु जाए भोगेसु संवडिडेए नोवलिप्यइ कापरएणं नोलिप्यइ भोगरएणं] से णं देवाणुप्पिया संसारभउव्विग्गे भीए जम्मणजरमरणणं इच्छइ अरहओ अरिद्धनेमिस्स जाव पव्वइत्तए अहण्णं निक्खमणसक्कारं करेमि तं इच्छामि णं देवाणुप्पिया थावद्यापुत्तस्स निक्खम-माणस्स छत्तमउड्ढामराओ य विदित्राओ तए णं कण्हे वासुदेवे थावच्चं गाहावइणीए एवं वयासी-अच्छाहि णं तुमं देवाणुप्पिए सुनिव्वुत-वीसत्या अहण्णं सयमेव थावद्यापुत्तस्स दारगस्स निक्ख-मणसक्कारं करिस्सामि तए णं से कण्हे वासुदेवे चाउरंगिणीए सेणाए विजयं हत्थिरयणं दुरूढे समाणे जेणेव थावद्याए गाहावइणीए भवणे तेणेव उवागच्छइ उवागच्छिता थावद्यापुत्तं एवं वयासी-मा णं तुमं देवाणुप्पिया मुंडे भविता पव्वयाहि भुंजाहि णं देवाणुप्पिया विपुले माणुस्सए कामभोगे मम बाहुच्छाय-परिग्गहिए केवलं देवाणुप्पियस्स अहं नां संचाएमि वाउकायं उवरिमेणं गच्छमाणं निवारित्तए अण्णो णं देवाणुप्पियस्स जं किंचि आबाहं वा वाबाहं वा उप्पाएइ तं सव्वं निवारेमि तए णं से थावद्यापुत्ते कण्हेणं वासुदेवेणं एवं वुत्ते समाणे कण्हं वासुदेवं एवं वयासी-जइ णं देवाणुप्पिया मम जीविदंतरं मच्चुं एज्जमाणं निवारिसि जरं वा सरिररूव-विणासणिं सरिं अइवय-माणिं निवारिसि तए णं अहं तव बाहुच्छाय-परिग्गहिए विउले माणुस्सए कामभोगे भुंजमाणे विहरामि

तए णं से कण्हे वासुदेवे थावद्यापुत्तेणं एवं वुत्ते समाणे थावद्यापुत्तं एवं वयासी-एए णं देवाणुप्पिया दुरइक्कमणिज्जा नो खलु सक्का सुबलिएणावि देवेण वा दाणवेण वा निवारित्तए नण्णत्थ अप्पणो कम्मक्खएणं तए णं से थावद्यापुत्ते कण्हं वासुदेवं एवं वयासी-जइ णं एए दुरइक्कमणिज्जा नो खलु सक्का [सुबलविएणावि देवेण वा दाणवेण वा निवारित्तए] नण्णत्थ अप्पणो कम्मक्खएणं तं इच्छामि णं देवाणुप्पिया अण्णाण-मिच्छत-अविइ-कसाय-संचियस्स अत्तणो कम्मक्खयं करित्तए तए णं से कण्हे वासुदेवे थावद्यापुत्तेणं एवं वुत्ते समाणे कोडुंबियपुरिसे सद्दावेइ सद्दावेत्ता एवं वयासी-गच्छह णं देवाणुप्पिया बारवईए नयरीए सिंघाडग- तिग- [चउक्क-चघर-चउम्पुह-महापह] पहेसु हत्थिखंधवरगया मरुया-मरुया सद्देणं उग्घोसेमाणा-उग्घोसेमाणा उग्घोसणं करेह-एवं खलु देवाणुप्पिया थावद्यापुत्ते संसारभउव्विग्गे भीए जम्मण-जर-मरणणं इच्छइ अरहओ अरिद्धनेमिस्स अंतिए मुंडे भविता पव्वइत्तए तं जो खलु देवाणुप्पिया राया वा जुवराया वा देवी वा कुमारे वा ईसरे वा तलवरे वा कोडुंबिय-माडंबिय-इब्भ- सेट्टि- सेणावइ-सत्यवाहे वा थावद्यापुत्तं पव्वयंतमणुपव्वयइ तस्स णं कण्हे वासुदेवे अनुजाणइ पच्छाउरस्स वि य से मित्त-नाइ जाव जोगक्खेम-वट्टमाणी पडिवहइ ति कडु धोसणं धोसेह जाव धोसंति तए णं थावद्यापुत्तस्स अनुराएणं पुरिससहस्सं निक्खमणाभिमुहं ण्हायं सव्वालंकारविभूसियं पत्तेयं-पत्तेयं पुरिससहस्सवाहिणीसु सिवियासु दुरूढं समाणं मित्त-नाइ- परिवुडं थावद्यापुत्तस्स अंतियं पाउब्भूयं तए णं से कण्हे वासुदेवे पुरिससहस्सं अंतियं पाउब्भवमाणं पासइ पासिता कोडुंबियपुरिसे सद्दावेइ सद्दावेत्ता एवं वयासी-जहा मेहस्स निक्खमणाभिसेओ [त्रिप्पामेव भो देवाणुप्पिया अणेगखंभ-सयसन्निविडुं जाव सीयं उवट्टवेह तए णं से थावद्यापुत्ते बारवतीए नयरीए मज्झंमज्जेणं निगगच्छइ निगगच्छिता जेणेव रेवतगपव्वए जेणेव नंदणवणे उज्जाणे जेणेव सुरप्पियस्स जक्खस्स जक्खयणे जेणेव असोगवरपायवे तेणेव उवागच्छइ उवागच्छिता अरहओ अरिद्धनेमिस्स छत्ताइछत्तं पडागाइपडागं विज्जाहरचारणे जंभए य देवे औवयमाणे उच्यमाणे पासइ] पासिता

सीयाओ पद्योरूहइ तए णं से कण्हे वासुदेवे धावद्यापुत्तं पुरओ काउं जेणेव अरहा अरिद्वनेमि [तेणेव उवागच्छंति उवागच्छिता अरहं अरिद्वनेमि तिकखुत्तो आयाहिण-पयाहिणं करोति जाव एवं वयासी-एस णं देवाणुप्पिया धावद्यापुत्ते थावद्याए गाहावइणीए एगे पुत्ते इट्ठे कंते जाव दुल्लहे सवणचाए किमंग पुण दरिसणयाए से जहानामए उप्पत्ते ति वा जाव जले संबड्ढिए नोवलिप्पइ पंकरएणं नोवलिप्पइ जलरएणं एवामेव थावद्यापुत्ते कामेसु जाए भोगेसु संबड्ढिए नोवलिप्पइ कामरएणं नोवलिप्पइ भोगरएणं एस णं देवाणुप्पिया संसारभउव्विगे भीए जम्पण-जर-मरणणं इच्छइ देवाणुप्पियाणं अंतिए मुंडे भविता पव्वइत्ताए अन्हे णं देवाणुप्पियाणं सिस्सभिकखं दलयामो पडिच्छंतु णं देवाणुप्पिया सिस्सभिकखं तए णं अरहा अरिद्वनेमि कण्हेणं वासुदेवणं एवं वुत्ते समाणे एयमड्डं सप्पं पडियुणेइ

तए णं से थावद्यापुत्ते अरहओ अरिद्वनेमिस्स अंतियाओ उत्तरपुरस्थिमं दिसीभायं अव-कूमइ सयमेव] आभरणमल्लालंकारं ओमुयइ तए णं सा थावद्या गाहावइणीं हंसलक्खणेणं पडसाडएणं आभरण-मल्लालंकारं पडिच्छइ हार-वारिधार-सिंदुवापर-छिन्नमुत्तावलि-प्पयासाइं अंगुणि विणिम्मयमाणी-विणिम्मयमाणी [रोवमाणी-रोयमाणी कंदमाणी-कंदमाणी विलवमाणी-विलवमाणी] एवं वयासी-जइयव्वं जाचा पडियव्वं जाया परक्कमियव्वं जाया अस्सि च णं अट्ठे नो पमाएयव्वं [अहंपि णं एसेव मणे भवउ ति कट्टु थावद्या गाहावइणी अरहं अरिद्वनेमि वंदति नमंसति वंदिता नमंसिता जामेव दिसिं पाउव्वूया तामेव दिसिं पडिगया तए णं से थावद्यापुत्ते पुरिससहस्सेणं सद्धिं सयमेव पंचमुट्ठियं लोयं करेइ करेत्ता जेणामेव अरहा अरिद्वनेमि तेणामेव उवागच्छइ उवागच्छिता अरहं अरिद्वनेमि तिकखुत्तो आयाहिण-पयाहिणं करेइ करेत्ता वंदइ नमंसइ जाव पव्वइए तए णं से थावद्यापुत्ते अणगारे जाए-इरियासमिए भासासमिए जाव उच्चार-पासवण-खेल-सिंधान-जल्ल-पारिद्धावणियासमिए मणसमिए वइसमिए कायसमिए मणगुत्ते वइ-गुत्ते कायगुत्ते गुत्ते गुत्तिदिए गुत्तवंभयारी अकोहे जाव अलोहे संते पसंते उवसंते परिनिव्वुडे अणासवे अममे अकंचणे निरुवलेवे कंसपाईव मुक्कतोए संखो इव निरंगणे जीवो विव अप्पडिहयगई गगणमिब निरालंबणे वायुरिव अप्पडिबद्धे सारयसलिलं व सुद्धहियए पुक्खरपत्तं पिव निरुवलेवे कुम्भो इव गुत्तिदिए खगविसाणं व एगजाए विहग इव विप्पमुक्के भारंडपक्खीव अप्पमत्ते कुंजरो इव सौंडीरे वसभो इव जायत्थामे सीहो इव दुद्धारिसे मंदरो इव निप्पकंपे सादगरो इव गंभीरे चंदो इव सोमलेस्से सूरु इवे दिततेए जल्लकंचणं व जायरूवे वसुंधरव्व सव्वफालविसाहे सुहुयहुयासणेव्व तेयसा जलंते नत्थि णं तस्स भगवंतस्स कत्थइ पडिवंधे भवइ सेचं पडिबंधे चउव्विहे पन्नत्ते तं जहा-दव्वओ खेत्तओ कालओ भावओ दव्वओ-सच्चित्ताचित्तमीसेसु खेत्तओ-गामे वा नगरे वा रण्णे वा खले वा घरे वा अंगणे वा कालओ-समाए वा आवालियाए वा अणा-पाणुए वा थोवे वा लवे वा मुहुत्ते वा अहोरत्ते वा पक्खे वा मासे वा अयणे वा संबच्छरे वा अण्णवरे वा दीहकालसंजए भावओ-कोहे वा जाव लोहे वा भए वा हासे वा एवं तस्स न भवइ से णं भगवं वयासीचंदणकप्ये समतिणमणि-लेट्टुंकंचणे समसुहदुक्खे इहलोग-परलोग-अप्पडिबद्धे जिविय-मरण-निरवकंछे संसारपारगामी कम्मनिग्घायणट्ठाए एवं च णं] विहरइ तए णं से थावद्यापुत्ते अरहओ अरिद्व-नेमिस्स तहारूवाणं थेराणं अंतिए सामाइवमाइयाइं चोइसपुव्वाइं अहिज्जइ अहिज्जिता बहूहिं [चउत्थ-छट्टम-दसम-दुवालसेहिं मासद्धमासखमणेहिं अप्पाणं भावेमाणे] विहरइ

तए णं अरहा अरिद्धनेमि थावच्चापुत्तस्स अणगारस्स तं इब्भाइयं अणगारसहस्सं सीसत्ताए दलयइ तए णं से थावच्चापुत्ते अण्णया कयाइं अरहं अरिद्धनेमि वंदइ नमसइ वंदित्ता नमसित्ता एयं वयासी-इच्छामि णं भंते तुब्भेहिं अट्ठमणुण्णाए समाणे अहासुहं तए णं से थावच्चापुत्ते अणगारसहस्सेणं सद्धिं बहिया जणवयविहारं विहरइ । ६०१-५४

(६६) तेणं कालेणं तेणं समएणं सेलगुरे नामं नगरे होत्था सुभूमिभागे उज्जाणे सेलए राया पउमावई देवी मंडुए कुमारे जुवरया तस्स णं सेलगस्स पंथगपामोक्खा पंच मंतिस्सया होत्था-उप्पत्तियाए वेणइयाए कम्मियाए पारिणामियाए उववेया रज्जधुरं चित्तवन्ति थावच्चापुत्ते सेलगपुरे समोसडे राया निग्गए [तए णं से सेलए राया थावच्चापुत्तस्स अणगारस्स अंतिए धम्मं सोच्चा निसम्म हट्टुत्तु-जाव हियए उट्टेइ उट्टेत्ता थावच्चापुत्तं अणगारं तिक्खुत्तो आयाहिण-पयाहिणं कोइ जाव एवं वयासी-सदहामि णं भंते निग्गंथं पावयणं पत्तियामि णं भंते निग्गंथं पायणं रोएमि णं भंते निग्गंथं पावयणं अट्ठमुट्टेमि णं भंते निग्गंथं पावयणं एवमेयं भंते तहमेयं भंते अवित्तहमेयं भंते असंदिद्धमेयं भंते इच्छियमेयं भंते पडिच्छमेयं भंते इच्छिय-पडिच्छियमेयं भंते जं णं तुब्भे वदह ति कट्टु जाव एवं वयासी-जहा णं देवाणुप्पियाणं अंतिए बहवे उग्गा उग्गपुत्ता भोगा जाव इब्भा इब्भपुत्ता चिच्चा हिरण्णं एवं-धणं धन्नं बलं वाहणं कोसं कोट्टागारं पुरं अंतेउरं चिच्चा विउलं धण-कण्ण-र-यण-मणि-मोत्तिय-संख-सिल-प्पावाल-संतसार-सावएज्जं विच्छडिइत्ता विगोवइत्ता दाणं दाइचाणं परिभाइत्ता मुंडा भवित्ता णं अगाराओ अणगारियं पव्वइया तहा णं अहं नो संचाएमि] जाव पव्वइत्तए अहं णं देवाणुप्पियाणं अंतिए चाउज्जामियं [गिहिधम्मं पडिवज्जिस्सामि अहासुहं देवाणुप्पिया मा पडिवंथं करेहि तए णं से सेलए राया थावच्चापुत्तस्स अणगारस्स अंतिए चाउज्जामियं गिहिधम्मं उवसंपअइ तए णं से सेलए राया समणोवासए जाए-अभिगयजीवाजीवे उवलद्धपुत्रपावे आसव-संवरनिज्जर-किरिया-अहिगरण-बंधमोक्ख-कुसले असहेजे देवासुरनाग-जक्ख-रक्खस-किण्णर-किंपुरिस-गरुल-गंधव्व- महोर- गाइएहिं देवगणेहिं निग्गंथाओ पावय-णाओ अणइक्कमणिजे निग्गंथे पावयणं निस्संकिए निक्कंखिए निव्वित्तिगिच्छे लद्धे गहियट्टे पुच्छियट्टे अभिगयट्टे विणिच्छयट्टे अट्टिमिंजपे- माणुरागरत्ते अयमाउसो निग्गंथे पावयणं अट्टे अयं परमट्टे सेसे अणट्टे ऊसियफलहे अवंगुयदुवारे चित्तंतेउर-परधरदार-प्पवेसे चाउइसइमुद्दिइपुत्र-मासिणीसु पडिपुन्नं पोसहं सम्मं अनुपालेमाणे समणे निग्गंथे फासु-एसणिज्जेणं असण- पाण-खाइम-साइमेगं वत्थ-पडिग्गह-कंबल-पायपुंछणेणं ओसहमेसज्जेणं पडिहारिएणं य पीढफल-गरोज्जा-संधारएणं पडिलाभेमाणे सीलव्वय-गुण- वेर- मण-पद्यक्खाणं-पोसहोवयासेहिं अहाप-रिग्गहिएहिं तवोक्कमेहिं] अप्पाणं भावेमाणे विहरइ पंथग- पामोक्खा पंच मंति-सया समणोवासया जाया थावच्चापुत्ते बहिया जणवयविहारं विहरइ । ६१-११-६१-१

(६७) तेणं कालेणं तेणं समएणं सोगंधिया नामं नयरी होत्था-वण्णओ नीलासेहए उज्जाणे-वण्णओ तत्थ णं सोगंधियाए नयरीए सुदंसणे नामं नयरसेट्ठी परिवसइ अट्टे जाव अपरिभूए तेणं कालेणं तेणं समएणं सुए नामं परिव्वाचए होत्था-रिउव्वेय-जजुव्वेय-सामवेय-अथव्वणवेय- सट्ठि तंतकुसलेसंखसमए लद्धे पंचजम-पंचनियभजुत्तं सोयमूलयं दसप्पयारं परिव्वायगधम्मं दाणधम्मं च सोयधम्मं च तित्थाभिसंयं च आद्यवेमाणे पन्नवेमाणे धाउरत्त-वत्थ-पयर-परिहिए तिदंड- कुडिय-छत्तं-उ-नालय-अंकुस-पवित्तय-केसरि-रत्थगए परिव्वायगसहस्सेणं सद्धिं संपरिवुडे जेणेव सोगं-

धिया नयरी जेणेच परिव्वायगावसहे तेणेच उवागच्छइ उवागच्छिता परिव्वायगावसहंसि भंडगनिक्खेवं करेइ करेता संखसमएणं अप्पाणं भावेमाणे विहरइ तए णं सोगंधियाए नगरीए सिंघाडग-जाव बहुजणो अण्णामण्णस्स एवमा- इक्खइ एवं खलु सुए परिव्वायए इहमागए जाव विहरइ परिसा निग्गया सुदंसणो वि नीति तए णं से सुए परिव्वायए तीसे परिसाए सुदेसणस्स च अण्णोसि च बहूणं संखाणं परिकहेइ एवं खलु सुदंसणा अहं सोयमूलए धम्मे पत्रत्ते से वि य सोए दुविहे पत्रत्ते तं जहा-दव्वसोए य भावसोए य दव्वसोए उदएणं मट्टियाए य भावसोए दव्वेहि य मंतेहि य जं गं अहं देवाणुप्पिया किंचि असुई भवइ तं सव्वं सज्जपुट्ठीए आलिप्पइ तओ पच्छा सुद्धेणं वारिणा पक्खालिज्जइ तओ तं असुई सुई भवइ एवं खलु जीया जलाभिसेय-पूयप्पाणो अविग्घेणं सग्गं गच्छंति तए णं से सुदंसणे सुयस्स अंतिए धम्मं सोच्चा हट्ठुट्ठे सुयस्स अंतियं सोयमूलयं धम्मं गेण्हइ गेण्हिता परिव्वायए विउलेणं असण-पाण-खाइम-साइमंणं पडिलाभेमाणे [संखसमएणं अप्पाणं भावेमाणे] विहरइ तए णं से सुए परिव्वायए सोगंधियाओ नयरीओ निग्गच्छइ निग्गच्छिता बहिया जणवयविहारं विहरइ

तेणं कालेणं तेणं समएणं थावच्चापुत्तस्स समोसरणं परिसा निग्गया सुदंसणो वि णीइ थावच्चापुत्तं वंदइ नमंसइ वंदित्ता नमंसित्ता एवं वयासी-तुम्हाणं किंमूलए धम्मे पत्रत्ते तए णं थावच्चापुत्ते सुदंसणेणं एवं वुत्ते समाणे सुदंसणं एवं वयासी-सुदंसणा विणयमूलए धम्मे पत्रत्ते से वि य विणए दुविहे पत्रत्ते तं जहा-अगारविणए अणगारविणए य तत्थ णं जे से अगारविणए से णं चाउज्जामिए गिहिधम्मे तत्थ णं जे से अणगारविणए से णं चाउज्जामा तं जहा-सव्वाओ पाणाइ-वायाओ वेरमणं सव्वाओ मुसावायाओ वेरमणं सव्वाओ अदिन्नादाणाओ वेरमणं सव्वाओ बहिद्धादाणाओ वेरमणं इच्चेएणं दुविहेणं विणयमूलएणं धम्मेणं आनुपुव्वेणं अट्टकम्मपगडोओ खवेत्ता लोयगपइड्डाणा भवंति तए णं थावच्चापुत्ते सुदंसणं एवं वयासी-तुम्हणं सुदंसणा किंमूलए धम्मे पत्रत्ते अम्हाणं देवाणुप्पिया सोयमूलए धम्मे पत्रत्ते [से वि य सोए दुविहे पत्रत्ते तं जहा-दव्वसोए य भावसोए य जाव एवं खलु जीया जलाभिसेय-पूयप्पाणो अविग्घेणं] सग्गं गच्छंति तए णं थावच्चापुत्ते सुदंसणं एवं वयासी-सुदंसणा से जहानामए केइ पुरिसे एणं महं रुहिरकयं वत्थं रुहरेणं चेव धोवेज्जा तए णं सुदंसणा तस्स रुहिरकयस्स वत्थस्स रुहिकरेणं चेव पक्खालिज्ज-माणस्स अत्थि काइ सोही नो इण्ठे समइएवामेव सुदंसणा तुम्हं पि पाणाइवाएणं जाव बहिद्धादाणेणं नत्थि सोही जहा तस्स रुहिरकयस्स वत्थस्स रुहरेणं चेव पक्खालिज्जमाणस्स नत्थि सोही सुदंसणा से जहानामए केइ पुरिसे एणं महं रुहिरकयं वत्थं सज्जिय-खारेणं आलिपइ आलिपित्ता पयणं आरुहेइ आरुहेत्ता उण्हं गाहेइ तओ पच्छा सुद्धेणं वारिणा धोवेज्जा से नूणं सुदंसणा तस्स रुहिरकयस्स वत्थस्स सज्जिय-खारेणं अनुलित्तस्स पयणं आरुहियस्स उण्हं गाहियस्स सुद्धेणं वारिणा पक्खा- लिज्जमाणस्स सोही भवइ हंता भवइ एवामेव सुदंसणा अहं पि पाणाइवायवेरमणेणं जाव बहिद्धादाणवेरमणेणं अत्थि सोही जहा वा तस्स रुहिरकयस्स वत्थस्स जाव सुद्धेणं वारिणा पक्खालिज्जमाणस्स अत्थि सोही तत्थ णं सुदंसणे संकुद्धे थावच्चापुत्तं वंदइ नमंसइ वंदित्ता नमंसित्ता एवं वयासी-इच्छामि णं भंते तुम्हं अंतिए धम्मं सोच्चा जाणित्तए

तए णं थावच्चापुत्ते अणगारे सुदंसणस्स तीसे य महइमहालियाए महच्चपरिसाए चाउज्जामं धम्मं कहेइ तं जहा-सव्वाओ पाणाइवायाओ वेरमणं सव्वाओ मुसावायाओ वेरमणं सव्वाओ

अदिन्नादाणाओ वेरमणं सव्वाओ बहिन्नादाणाओ वेरमणं जाव तए णं से सुदंसणे सपणोवासए जाए-अभियग्यजीवाजीवे जाव समणे निग्गंथे फासु-एसणिज्जेणं असण-पाण-खाइम-साइमेणं वत्थ-पडिगह-कंबल-पायपुंछणेणं ओसह-भेसज्जेणं पाडिहारिएण य पीढ-फलग-सेज्जा-संधारएणं] पडि-लाभेमाणे विहरइ तए णं तस्स सुयस्स परिव्वायगस्स इमीसे कहाए लद्धइस्स समाणस्स अयमे-यास्सूवे [अज्झस्सिए चिंतिए पत्थिए मणोगए संकप्पे] समुप्पज्जित्था-एवं खलु सुदंसणेणं सोयधम्मं विप्पजहाय विणयमूले धम्मे पडिवण्णे तं सेयं खलु मम सुदंसणस्स दिङ्खिं वामेत्तए पुणरवि सोयमूलए धम्मे आपवित्तए त्ति कइ एवं सपेहेइ सपेहेत्ता परिव्वायगसहस्सेणं सद्धिं जेणेव सोगं-धिया नगरी जेणेव परिव्वायगावसहे तेणेव उवागच्छइ उवागच्छित्ता परिव्वायगावसहंसि भंडग-निक्खेवं करेइ करेत्ता धाउरत्त-वत्थ-पवर-परिहिए-पविरल-परिव्वायगेणं सद्धिं संपरिवुडे परिव्वा-यगावसहाओ पडिनिक्खमइ पडिनिक्खमिन्ना सोगंधियाए नयरीए मज्झंमज्जेणं जेणेव सुदंसणस्स गिहे जेणेव सुदंसणे तेणेव उवागच्छइ तए णं से सुदंसणे तं सुयं एज्जमाणं पासइ पासित्ता नो अब्बुट्ठेइ न पच्चुग्गच्छइ नो आढाइ नो वंदइ तुसिणीए संचिइइ तए णं से सुए परिव्वायए सुदंसणं अणब्बुट्ठिये पासित्ता एवं वयासी-तुमं णं सुदंसणा अण्णाया ममं एज्जमाणं पासित्ता एवं वयासी-तुमं णं सुदंसणा अण्णया ममं एज्जमाणं पासित्ता अब्बुट्ठेसि [पच्चुग्गच्छसि आढासि] वंदसि इयाणि सुदंसणा तुमं ममं एज्जमाणं पासित्ता नो अब्बुट्ठेसि [नो पच्चुग्गच्छसि नो आढासि] वंदसि तं कस्स णं तुमे सुदंसणा इमेयास्सूवे विणयमूले धम्मे पडिवण्णे तए णं से सुदंसणे सुएणं परिव्वायगेणं एवं वुत्ते समाणे आसणाओ अब्बुट्ठेइ अब्बुट्ठेत्ता करयल [परिग्गहियं सिरसावत्तं मत्थए अंजलिं कइ सुयं परिव्वायगं एवं वयासी एवं खलु देवाणुप्पिया अरहओ अरिद्धनेमिस्स अंतेवासी थावच्चापुत्ते नामं अणगारे | पुव्वाणुपुव्विं चरमाणे गामाणुगामं दूइज्जमाणे इहमागए इह चेव नीलासोए उज्जाणे विहरइ तस्स णं अंतिए विणयमूले धम्मे पडिवण्णे तए णं से सुए परिव्वायए सुदंसणं एवं वयासी। तं गच्छामो णं सुदंसणा तव धम्मायरियस्स थावच्चापुत्तस्स अंतियं पाउत्थवामो इमाइं च णं एयास्सूवाइं अट्ठाइं हेऊइं पसिणाइं कारणां वागरणाइं पुच्छामो तं जइ मे से इमाइं अट्ठाइं हेणाइं जाव वागरेइं तओ णं वंदामि नमंसापि अह मे से इमाइं अट्ठाइं [हेऊइं पसिणाइं कारणाइं वागरणाइं] नो वागरेइं तओ णं अहं एएहिं चेव अट्ठेहिं हेउहिं निप्पट्ठ-पसिणावा- गरणं करिस्सामि

तए णं से सुए परिव्वायगसहस्सेणं सुदंसणेण य सेट्ठिणा सद्धिं जेणेव नीलासोए उज्जाणे जेणेव थावच्चापुत्ते अणगारे तेणेव उवागच्छइ उवागच्छित्ता थावच्चापुत्तं एवं वयासी-जत्ता ते भंते जवण्णिज्जं ते भंते अब्बावाहं ते भंते फासुयं विहारं ते भंते तए णं से थावच्चापुत्ते अणगारे सुएणं परिव्वायगेणं एवं वुत्ते समाणे सुयं परिव्वायगं एवं वयासी-सुया जत्तापि मे जवण्णिज्जं पि मे अब्बाबाहं पि मे फासुयं विहारं पि मे तए णं से सुए थावच्चापुत्तं एवं वयासी-किं ते भंते जत्ता, सुया जण्णं नाण-दंसण-चरित्त-तव-संजममाइएहिं जोएहिं जयणा से तं जत्ता से किं ते भंते जवण्णिज्जं सुया जवण्णिज्जे दुविहे पत्तते तं जह-इंदियजवण्णिज्जे य नोइंदियजवण्णिज्जे य से किं तं इंदियजवण्णिज्जे सुया जण्णं ममं सोत्तिंदिय-चक्खिंदिय-घाणिंदिय-जिब्बिंदिय-फासिंदियाइं निरुवहयाइं वसे वइंति से तं इंदियजवण्णिज्जे से किं तं नोइंदियजवण्णिज्जे सुया जण्णं मम कोह-माण-माया-लोभा खीणा उवसंता नो उदयंति से तं नोइंदियजवण्णिज्जे से किं ते भंते अब्बाबाहं सुया जण्णं मम वाइय-पित्तिय-सिंभिय-सत्त्रिवाइया विविहा रोगायंका नो उदीरंति से तं अब्बाबाहं से किं ते भंते फासुयं

विहारं सुया जण्णं आरामेसु उज्जाणेसु देउलेसु सभासु पवासु इत्थी-पसु-पंडग-विचज्जियासु वसहीसु पाडिहारियं पीढ-फलग-सेज्जा-संधारयं ओगिण्हित्ता णं विहारमि से तं फासुयं विहारं सरिसवया ते णंते किं भक्खेया अभक्खेया सुया सरिसवया भक्खेया वि अभक्खेया वि से केणट्टेणं णंते एवं वुच्चइ-सरिसवया भक्खेया वि अभक्खेया वि सुया सरिसवया दुविहा पन्नत्ता तं जहा-मित्तसरिसवया य धण्णसरिसवया य तत्थ णं जे ते मित्तसरिसवया ते तिविहा पन्नत्ता तं जहा-सहजायया सहवड्ढियया सहपंसुकीलियया ते णं समणाणं निग्गंथाणं अभक्खेया तत्थ णं जे ते धण्णसरिसवया ते दुविहा पन्नत्ता तं जहा-सत्थपरिणया य असत्थपरिणया य तत्थ णं जेते असत्थपरिणया ते णं समणाणं निग्गंथाणं अभक्खेया तत्थ णं जेते सत्थपरिणया ते दुविहा पन्नत्ता तं जहा-फासुया य अफासुया य अफासुया णं सुया समणाणं निग्गंथाणं नो भक्खेया तत्थ णं जेते फासुया ते दुविहा पन्नत्ता तं जहा-एसणिज्जा य अणेसणिज्जा य तत्थ णं जेते अणेसणिज्जा ते णं समणाणं निग्गंथाणं अभक्खेया तत्थ णं जेते एसणिज्जा ते दुविहा पन्नत्ता तं जहा-जाइया य अजाइया य तत्थ णं जेते अजाइया ते णं समणाणं निग्गंथाणं अभक्खेया तत्थ णं जेते जाइया ते दुविहा पन्नत्ता जहा-लद्धा य अलद्धा य तत्थ णं जेते अलद्धा ते णं समणाणं निग्गंथाणं अभक्खेया तत्थ णं जेते लद्धा ते णं समणाणं निग्गंथाणं भक्खेया एएणं अट्टेणं सुया एवं वुच्चइ-सरिसवया भक्खेया वि अभक्खेया वि

[कुलत्था ते णंते किं भक्खेया अभक्खेया सुया कुलत्था भक्खेया वि अभक्खेया वि से केणट्टेणं णंते एवं वुच्चइ-कुलत्था भक्खेया वि अभक्खेया वि सुया कुलत्था दुविहा पन्नत्ता तं जहा-इत्थिकुलत्था य धण्णकुलत्था य तत्थ णं जेते इत्थिकुलत्था ते तिविहा पन्नत्ता तं जहा-कुलवहुया इ य कुलमाउया इ य कुलधूया इ य ते णं समणाणं निग्गंथाणं अभक्खेया तत्थ णं जेते धण्णकुलत्था ते दुविहा पन्नत्ता तं जहा-सत्थपरिणया य असत्थपरिणया य तत्थ णं जेते असत्थपरिणया ते समणाणं निग्गंथाणं अभक्खेया तत्थ णं जेते सत्थपरिणया ते दुविहा पन्नत्ता तं जहा-फासुया य अफासुया य अफासुया णं सुया समणाणं निग्गंथाणं नो भक्खेया तत्थ णं जेते फासुया ते दुविहा पन्नत्ता तं जहा-एसणिज्जा य अणेसणिज्जा य तत्थ णं जेते अणेसणिज्जा ते णं समणाणं निग्गंथाणं अभक्खेया तत्थ णं जेते एसणिज्जा ते दुविहा पन्नत्ता तं जहा-जाइया य अजाइया य तत्थ णं जेते जाइया ते णं समणाणं निग्गंथाणं अभक्खेया तत्थ णं जेते जाइया ते दुविहा पन्नत्ता तं जहा-लद्धा य अलद्धा य तत्थ णं जेते अलद्धा ते अभक्खेया तत्थ णं जेते लद्धा ते णं समणाणं निग्गंथाणं भक्खेया एएणं अट्टेणं सुया एवं वुच्चइ-कुलत्था भक्खेया वि अभक्खेया वि मासा ते णंते किं भक्खेया अभक्खेया सुया मासा भक्खेया वि अभक्खेया वि से केणट्टेणं णंते एवं वुच्चइ-मासा भक्खेया वि अभक्खेया वि सुया मासा तिविहा पन्नत्ता तं जहा-कालमासा य अथ-मासा य धण्णमासा य तत्थ णं जेते कालमासा ते दुवालसविहा पन्नत्ता तं जहा सावणे भट्टवए आसोए कतिए मागसिरे पोसे पाहे फाग्गुणे चेते वइसाहे जेड्ढामूले आसाडे ते णं समणाणं निग्गंथाणं अभक्खेया तत्थ णं जेते अत्थमासा ते दुविहा पन्नत्ता तं जहा-रिरणमासा य सुवण्ण-मासा य ते णं समणाणं निग्गंथाणं अभक्खेया तत्थ णं जेते धण्णमासा ते दुविहा पन्नत्ता तं जहा-सत्थपरिणया य असत्थपरिणया य तत्थ णं जेते असत्थपरिणया ते समणाणं निग्गंथाणं अभक्खेया तत्थ णं जेते सत्थपरिणया ते दुविहा पन्नत्ता तं जहा-फासुया य अफासुया य अफासुया णं सुया समणाणं निग्गंथाणं नो भक्खेया तत्थ णं जेते फासुया ते दुविहा पन्नत्ता तं जहा-एसणिज्जा

य अणेसणिज्जा य तत्थ णं जेते अणेसणिज्जा ते णं समणाणं निगंथाणं अभक्खेया तत्थ णं जेते एसणिज्जा ते दुविहा पन्नत्ता तं जहा जाइया य अजाइया य तत्थ णं जेते अजाइया ते णं समणाणं निगंथाणं अभक्खेया तत्थ णं जेते जाइया ते दुविहा पन्नत्ता तं जहा-लद्धा य अलद्धा य तत्थ णं जेते अलद्धा ते णं समणाणं निगंथाणं अभक्खेया तत्थ णं जेते लद्धा ते णं समणाणं निगंथाणं भक्खेया एएणं अट्ठेणं सुया एवं तुच्चइ-भासा भक्खेया वि अभक्खेया वि]

एणे भवं दुवे भवं अक्खए भवं अव्वए भवं अवट्ठिए भवं अणेगभूय भाव-भविए भवं सुया एणे वि अहं [दुवेहिं अहं अक्खए वि अहं अव्वए वि अहं अवट्ठिए वि अहं] अणेगभूय- भाव-भवि वि अहं से केणट्ठेणं मंते एणे वि अहं जाव भविए वि अहं सुया दव्वट्ठयाए एणे वि अहं नाणदंसणइ-याए दुवे वि अहं पएसट्ठयाए अक्खए वि अहं अव्वए वि अहं अवट्ठिए वि अहं उवओगट्ठयाए अणेगभूय भाव-भविए वि अहं एत्थ णं से सुए संबुद्धे थावच्चापुत्तं वंदइ नमंसइ वंदित्ता नमंसित्ता एवं वयासी- इच्छामि णं मंते तुब्भं अंतिए केवल्लिपन्नत्तं धम्मं निसामित्ताए तए णं थावच्चापुत्ते अणगारे सुयस्स चाउज्जामं धम्मं बहेइ [तए णं से सुए परिव्वायए थावच्चापुत्तस्स अंतिए धम्मं सोच्च निसम्म एवं वयासी-इच्छामि णं मंते परिव्वायगसहस्सेणं सद्धिं संपरिवुडे देवाणुप्पियां अंतिए मुंडे भवित्ता पव्वइत्ताए अहासुहं देवाणुप्पिया तए णं से सुए परिव्वायए उत्तरपुरत्थिमे दिसीभाएअ वक्कम्मइ अवक्कमिप्ता तिदंडयं य कुंडियाओ य छत्ताए य छत्रालए य अंकुसए य पवित्तए य केसरियाओ य] धाउरत्ताओ य एगंते एडेइ सयमेव सिंहं उप्पाडेइ उप्पाडेत्ता जेणेव थावच्चापुत्ते [अणगारे तेणेव उवागच्छइ उवागच्छित्ता थावच्चापुत्तं अणगारं वंदइ नमंसइ वंदित्ता नमंसित्ता थावच्चापुत्तस्स अणगारस्स अंतिए] मुंडे भवित्ता पव्वइए सामाइयमाइयाइं चोइसपुव्वाइं अहिज्जइ तए णं थावच्चापुत्ते सुयस्स अणगारसहस्स सीसत्ताए वियरइ तए णं थावच्चापुत्ते सोगंधियाओ नयरीओ नीलासोयाओ उज्जाणाओ पडिणिक्खमइ पडिणिक्खमिप्ता बहिया जणवयविहारं विहरइ तए णं से थावच्चापुत्ते अणगारसहस्सेणं सद्धिं संपरिवुडे जेणेव पुंडरीए पव्वए तेणेव उवागच्छइ उवागच्छित्ता पुंडरीयं पव्वयं सणियं-सणियं दुरुहइ दुरुहिता मेघघणसत्तिगासं देवसन्नवियं पुढवि [सिलापट्टयं पडिलेहेइ पडिलेहेत्ता जाव संलेहणा-झूसणा-झूसिए भत्तपाण-पडियाइक्खिए] पाओ-वपणंणुवत्ते तए णं से थावच्चापुत्ते बहूणि दासाणि सामण्णपरियाणं पाउणित्ता मासियाए संलेहणाए अत्ताणं झूसित्ता सद्धिं भत्ताइं अणसणाए छेदिता जाव केवल्लवरनाणदंसणं समुप्पाडेत्ता तओ पच्छा सिद्धे युद्धे मुत्ते अंतगडे परिनिव्वुडे सब्बदुक्ख प्पहीणे । ६१।-५५

(६८) तए णं से सुए अण्णया कयाइ जेणेव सेलगपुरे नगरे जेणेव सुभूमिभागे उज्जाणे तेणेव उवागच्छइ उवागच्छित्ता अहापडिरूवं ओग्गहं ओगिण्हित्ता संजमेणं तवसा अप्पाणं भावेभाणे विहरइ परिसा निग्गया सेलओ निग्गच्छइ तए णं से सेलए सुयस्स अंतिए धम्मं सोच्चा निसम्मं हट्ठतुट्ठे सुयं तिकखुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता एवं वयासी-सद्दाहामि णं मंते निगंथं पावयणं जाव नवरं देवाणुप्पिया पंथगपामोक्खाइं पंच मंतिसयाइं आपुच्छामि मंडुयं च कुमारं रत्ते ठावेमि तओ पच्छा देवाणुप्पियाणं अंतिए मुंडे भवित्ता अगाराओ अणगारियं पव्वयामि अहासुहं देवाणुप्पिया तए णं से अनुप्पविसइ अनुप्पविसित्ता जेणेव साए गिहे जेणेव बाहिरिया उवट्ठानसाला तेणेव उवागच्छइ उवागच्छित्ता सीहासाणे सणिसण्णे तए णं से सेत्ताए राया पंथपामोक्खे पंच मंतिसए सद्दावेइ सद्दावेत्ता एवं वयासी-एवं खल्लु देवाणुप्पिया मए

सुयस्स अंतिए धम्मे निसंते से वि च मे धम्मे इच्छिए पडिच्छिए अभिरुइए तए णं अहं देवाणुप्पिया संसारभउव्विग्गे । भीए जम्मण-जर-मरणाणं सुयस्स अणगारस्स अंतिए मुंडे भवित्ता अगाराओ अणगारियं पच्चयामि तुब्भे णं देवाणुप्पिया किं करेह किं ववसह किं वा भे हियइच्छिए सामत्ये तए णं ते पंथगपामोक्खा पंच भंतिसया सेलगं रायं एवं वयासी-जइ णं तुब्भे देवाणुप्पिया संसारभउ-व्विग्गा जाव पच्चयह अहं णं देवाणुप्पिया के अण्णे आहारे वा आलंवे वा अहं वि च णं देवाणु-प्पिया संसारभउव्विग्गा जाव पच्चयामो जहा णं देवाणुप्पिया अहं बहूसु कज्जेसु य कारणेसु य [कुडुंवेसु य मंतेसु य गुज्जेसु य रहस्सेसु च निच्छएसु य आपुच्छणिज्जे पडिपुच्छणिज्जे मेढि पमाणं आहारे आलंवरणं चक्खू मेढीभूए पमाणभूए आहारभूए आलंवरणभूए चक्खुभूए] तहा णं पच्चइयाण वि समाणाणं बहूसु कज्जेसु य जाव चक्खुभूए तए णं से सेलगे पंथगपामोक्खे पंच मंतिसए एवं वयासी

जइ णं देवाणुप्पिया तुब्भे संसारभउव्विग्गा जाव पच्चयइ तं गच्छह णं देवाणुप्पिया सएसु-सएसु कुडुंवेसु जेइपुत्ते कुट्टंयमज्जे ठावेत्ता पुरिससहस्सवाहणीओ सीयाओ दुरूढा समाणा मम अंतियं पाउत्थवह ते वि तहेव पाउत्थववति तए णं से सेलए राया पंच मंतिसयाइं पाउत्थ-वमाणाइं पासइ पासित्ता हइतुट्ठे कोडुंविचपुरिसे सदावेइ सदावेत्ता एवं वयासी-खिप्पामेव भो देवाणुप्पिया मंडुयस्स कुमारस्स महत्थं [महत्थं महरिहं विउलं] रायाभिसेयं उवइवेह [तए णं ते कोडुंविचपुरिसा मंडुयस्स कुमारस्स महत्थं जाव उवइवेति तए णं से सेलए राया बहूहिं गगनायगेहि य जाव संधिवालेहि य सद्धि संपरिवुडे मंडुयं कुमारं जाव रायाभिसेएणं अभिसिइ तए णं से मंडुए राया जाए-महयाहिमवंत-महंत-मलय-मंदर-महिंदसारे जाव रज्जं पसासेमाणे] विहरइ तए णं से सेलए मंडुयं रायं आपुच्छइ तए णं मंडुए राया कोडुंविचपुरिसे सदावेइ सदावेत्ता एवं वयासी-खिप्पामेव भो देवाणुप्पिया सेलगपुरं नयरं आसिय जाव गंधवट्ठिभूयं करेह य कारवेह य एवमाण-त्तियं पच्चप्पिणए तए णं से मंडुए दौच्चं पि कोडुंविचपुरिसे एवं वयासी-खिप्पामेव भो देवाणुप्पिया सेलगस्स रण्णे महत्थं जाव निकूखमणाभिसेयं करेह जहेव मेहस्स तहेव नवरं-पउमावती देवी अगकसे पडिच्छइ सच्चेव पडिगहं गहाय सीयं दुरूहइ अवसेसं तहेव जाव [तए णं से सेलगे पंचहिं मंतिसएहिं सद्धि सयमेव पंचमुट्ठियं लोचं करेइ करेत्ता जेणामेव सुए तेणामेव उवागच्छइ उवा-गच्छित्ता सुयं अणगारं तिक्खुत्तो जाव पच्चइए तए णं से सेलए अणगारे जाए जाव कम्मनिधा-यणट्ठाए एवं च णं विहरइ तए णं से सेलए सुयस्स तहारूवाणं धेराणं अंतिए] सामाइयमाइयाइं एककारस अंगाइं अहिज्जइ अहिज्जित्ता बहूहिं चउत्थ- [छट्टइम-दसम-दुवालसेहिं] मासद्धमासख-मणेहिं अप्पाणं भावेमाणे] विहरइ तए णं से सुए सेलगस्स अणागारस्स ताइं पंथगपामोक्खाइं पंचं अणगारसयाइं सीसत्ताए वियरइ तए णं से सुए अण्णया कयाइ सेलगपुराओ नगराओ सुभूमिभागाओ उज्जाणाओ पडिनिक्खमइ पडिनिक्खमिता बहिया जणवयविहारं विहरइ तए णं से सुए अणगारे अण्णया कयाइ तेणं अणगारसहस्सेणं सद्धि संपरिवुडे पुच्चाणुप्पिवि चरमाणे गामाणुगामं दूइजमाणे सुहसुहेणं विहरमाणे जेणेव पुंडरीयप्पवए [तेणेव मेघणसन्निगासं देवसन्नि-वायं पुढविंसिलापट्ठयं पडिलेहेइ पडिलेहेत्ता जाव संलेहणा-झूसणा-झूसिए भत्तपाण- पंडिया-इक्खिए पाओवमगमणंणुवन्ने तए णं से सुए बहूणि वासाणि सामण्णपरियागं पाउणिता मासियाए, संलेहणाए अत्ताणं झूसित्ता सद्धिं भत्ताइं अणसणाए छेदिता जाव केवलवरनाणदंसणं समुप्पाडेत्ता

तओ पच्छा सिद्धे बुद्धे मुत्ते अंतगडे परिनिब्वुडे सब्बदुक्खप्पहीणे।।६३।-५६

(६९) तए णं तस्स सेलगस्स रायरिसिस्स तेहिं अंतेहि य पंतोहि य तुच्छिहि य लूहेहि य अरसेहि य विरसेहि य सीएहि य उण्हेहि य कालाइक्कंतेहि य पमाणाइक्कंतेहि य निच्चं पाण-भेयणेहिं य पयइ-सुकुमालस्स सुहोचियस्स सरीरगंसि वेयणा पाउब्भूया-उज्जला [विउला कक्खडा पगाढा चंडा दुक्खा] दुरहियासा कंडु-दाह-पित्तज्जर-परिगयसरीरे यावि विहरइ तए णं से सेलए तेणं रोययंकेणं सुक्के भुक्खे जाए यावि होत्था तए णं से सेलए अण्णया कयाइ पुब्बाणुपुब्बि चरमाणे [गामाणुगामं दूइजमाणे सुहंसुहेणं विहरमाणे जेणेव सेलगपुरे नयरे जेणेव सुमूषिभागे उज्जाणे तेणेव उवागच्छइ उवागच्छिता अहापडिरुवं ओगहं ओगिण्हिता संजमेणं तवसा अप्पाणं भावे-माणे] विहरइ परिसा निग्गया मंडुओ वि निग्गओ सेलगं अणगारं वंदइ नमंसइ पज्जुवासइ तए णं से मंडुए राया सेलगस्स अणगारस्स सरीरगं सुक्कं भुक्खं सब्बावाहं सरोगं पासइ पासिता एवं वयासी-अहण्णं भंते तुब्भं अहापवत्तेहिं तेगिच्छिएहिं अहापवत्तेणं ओसहभेसज्जभत्तपाणेणं तेगिच्छं आउट्टेवमि तुब्भे भंते मम जाणसालासु सनोसरह फासु-एसणिज्जं पीढफलग-सेज्जा-संधारणं ओगिण्हिताणं विहरइ तए णं से सेलए अणगारे मंडुयस्स रण्णो एयमट्ठं तह त्ति पडिसुणेइ तए णं से मंडुए सेलगं वंदइ नमंसइ वंदित्ता नमंसित्ता जामेव दिसिं पाउब्भूए तामेव दिसिं पडिगए तए णं से सेलए कल्लं पाउप्पभायाए रयणीए जाव उट्टियमि सूरु सहस्सरस्सिमि दिणयरे तेयसा जलंतं स-भंड-मतोरवगरणमायाए पंतगमपाओक्खेहिं पंचहिं अणगारसएहिं इद्धिं सेलगपुरमणुप्पविसइ अनुपविसित्ता जेणेव मंडुवस्स रण्णो जाणसाला तेणेव उवागच्छइ उवागच्छिता फासु-एसणिज्ज [पीढ-फलग-सेज्जा-संधारणं ओगिण्हिताणं] विहरइ तए णं से मंडुए तेगिच्छिए सद्दावेइ सद्दावेत्ता एवं वयासी-तुब्भे णं देवाणुप्पिया सेलगस्स फासु-एसणिज्जेणं [ओसह-भेसज्ज-भत्तपाणेणं] तेगिच्छं आउट्टेह तए णं ते तेगिच्छिया मंडुएणं रण्णा एवं वुत्ता समाणा हट्टुट्ठा सेलवगस्स अहापवत्तेहिं ओसह-भेसज्ज-भत्तपाणेहिं तेगिच्छं आउट्टेति मज्जपाणणं च से उवदिसंति तए णं तस्स सेलगस्स अहापवत्तेहिं जाव मज्जपाणएण य से रोगायंके उवसंते यावि होत्था-हट्टे गल्लसरीरे जाए ववगयरो-गायंके तए णं से सेलए तंसि रोगायंकंसि उवलंतंसि समारणंसि तंसि विपुले असण-पाण-खाइम-साइमे मज्जपाणए य मुच्छिए गट्टिए गिद्धे अज्झोववत्ते ओसत्ते ओसन्नविहारी पासतो [पासत्थ-विहारी कुसीले कुसलविहारी पमत्ते पमत्तलिहारी] संसते संसत्तविहारी उउवद्ध-पीढं पमत्ते यावि विहरइ नो संचाएइ फासु-एसणिज्जं पीढ-फलग-सेज्जा-संधारणं पच्चप्पिणित्ता मंडुयं च रायं आपुच्छित्ता बह्निवा जणवयविहारं विहरित्ताए।।६३।-५७

(७०) तए णं तंसि पंथगवज्जाणं पंचण्हं अणगारसयाणं अण्णया कयाइ एगयओ सहियाणं [समुवागयाणं सण्णिसण्णाणं सण्णिविद्धाणं] पुव्वरतावरत्तकाल समयंसि धम्मजागरियं जागरमा-णाणं अयमेयारुवे अज्झत्थिए [चित्थिए पत्थिए मणोगए संकप्पे] समुप्पज्जित्था-एवं खलु सेलए रावरिसी चइत्ता रज्जं जाव पव्वइए विउले असण-पाण-खाइम-साइमे मज्जपाणए य मुच्छिए नो संचाएइ [फासु-एसणिज्जं पीढ-फलग-सेज्जा-संधारणं पच्चप्पिणित्ता मंडुयं च रायं आपुच्छित्ता बह्निवा जणवयविहारं] विहरित्ताए नो खलु कप्पइ देवाणुप्पिया समणाणं [निग्गंथाणं ओसत्त्राणं पासत्थाणं कुसीलाणं पमत्ताणं संसताणं उउ-वद्धं-पीढ-फलग-सेज्जा-संधारणं] पमत्ताणं विहरित्ताए तं सेयं खलु देवाणुप्पिया अन्हं कल्लं सेलगं रायरिसिं आपुच्छित्ता पाडिहारियं पीढ-फलग-सेज्जा-संधारणं पच्चप्पि-

णित्ता सेलगस्स अणगारस्स पंधयं अणगारं वेयावच्चकरं ठावेत्ता वहिया अब्भुज्जएणं जणवय-
विहारोणं विहरित्तए एवं संपेहेत्ति संपेहेत्ता कळं जेणेव सेलए रायरिसी तेणेव उवागच्छंति
वागच्छित्ता सेलयं रायरिसि अपुच्छित्ता पाडिहारियं पीढ-फलग-सेज्जा-संधारयं पच्चप्पिण्णंति
पच्चप्पिण्णित्ता पंधयं अणगारं वेयावच्चकरं ठावेत्ति ठावेत्ता वहिया जणवयविहारं विहरंति । ६४।-58

(७१) तए णं से पंधए सेलगस्स सेज्जा-संधारय-उच्चार- पासवण- खेज्ज- सिघाणमत्त-
ओसह-भेसज्ज-भत्तपाणएणं अगिलाए विणएणं वेयावडियं करेइ तए णं से सेलए अण्णया कयाइ
कत्तियं-चाउम्मासियंसि विउलं असण-पाण-खाइम-साइमं आहारमाहारिए सुबहुं च मज्जपाणयं
पीए पच्चावरण्हकालसमयंसि सुहप्पसुत्ते तए णं से पंधए कत्तिय-चाउम्मासियंसि कयकाउस्सग्गे
देवसियं पडिक्कमणं पडिक्कंते चाउम्मासियं पडिक्कमिउकामे सेलगं रायरिसिं खामणट्टायाए
सीसेणं पाएसु संघट्टेइ तए णं से सेलए पंधएणं सीसेणं पाएसु संघट्टिए समाणे आसुरुत्ते [रुट्टे कुविए
चंडिक्किए] मिसिमिसेमाणे उट्टेइ उट्टेत्ता एवं वयासी-से केस णं भो एसं अपत्थियपत्थए
[दुरंत-पंत-त्तकखणे हीणपुत्रचाउइत्तिए सिरि-हिरि-धिइ-कित्ति-परि] वज्जिए जे णं मयं युहपसुत्तं
पाएसु संघट्टेइ तए णं से पंधए सेलएणं एवं वुत्ते समाणे भीए तत्थे तसिए करयल-[परिग्गहियं
सिरसावत्तं मत्थए अंजलिं] कट्टुं एवं वयासी-अहं णं भंते पंधए कयकाउस्सग्गे देवसियं पडिक्क-
मणं पडिक्कंते चाउम्मासियं खामेमाणे देवाणुप्पियं वंदमाणे सीसेणं पाएसु संघट्टेभि तं खामेभि णं
तुत्थे देवाणुप्पिया खमंतुं णं देवाणुप्पिया खंतुमरहंति णं देवाणुप्पिया नाइ भुज्जो एवंकरणवाए ति
कट्टु सेलयं अणगारं एयमद्धं सम्मं विणएणं भुज्जो-भुज्जो खामेइ तए णं तस्स सेलगस्सरायरिसिस्स
पंधएणं एवं वुत्तस्स अयमेवारुत्ते अज्झत्थिए [चित्तिए पत्थिए मणोगए संकप्पे] समुप्पज्जित्था-एवं
खलु अहं [चइत्ता रज्जं जाव पच्चइए ओसत्रे ओसत्रविहारी पासत्थे पासत्थविहारी कुसीले
कुसीलविहारी पमत्ते पमत्तविहारी संसत्ते संसत्तविहारी उउवद्ध-पीढ-फलग-सेज्जा-संधारए पत्ते
यावि] विहरामि तं नो खलु कप्पइ समणाणं निगंथाणं ओसत्राणं पासत्थाणं कुसीलाणं पमत्ताणं
संसत्ताणं उउवद्ध- जाव विहरित्तए तं सेयं खलु नमे कळं मंडुयं रायं आपुच्छित्ता पाडिहारियं पीढ-
फलग-सेज्जा-संधारयं पच्चप्पिण्णित्ता पंधएणं अणगारेणं सद्धिं वहिया अब्भुज्जएणं जणवयविहारेणं
विहरित्तए-एवं संपेहेइ संपेहेत्ता कळं जाव विहरइ । ६५।-59

(७२) एवामेव समणाउसो जे निगंथे वा निगंथी वा ओसत्रे [ओसत्रविहारी पासत्थे
पासत्थविहारी कुसीले कुसीलावेहारी पमत्ते पमत्तविहारी संसत्तेसंसत्तविहारी उउवद्ध-पीढ-
फलग-सेज्जा]-संधारए पमत्ते विहरइ से णं इहलोए चेव बहूणं समणाणं बहूणं समणीणं बहूणं
सावयाणं बहूणं सावियाण य हीलणित्ते [निंदणित्ते खिसणित्ते गरहणित्ते परभवणित्ते परलोए वि य
णं आगच्छइ बहूणि वंडणाणि य अणादियं च णं अणवयग्गं दीहमद्धं चाउरंत-संसार कंतांरं भुज्जो-
भुज्जो अनुपरियट्टस्सइ] तए णं ते पंधगवज्जा पंच अणगारसया इमीसे कहाए लद्धट्टा समाणा
अण्णमण्णं सद्दावेत्ति सद्दावेत्ता एवं वयासी-एवं खलु देवाणुप्पिया सेलए रायरिसीपंधएणं
[अणगारेणं सद्धिं वहिया अब्भुज्जएणं जणवयविहारेणं] विहरइ तं सेयं खलु देवाणुप्पिया अहं
सेलगं रायरिसिं उवसंपज्जित्ता णं विहरित्तए-एवं संपेहेत्ति संपेहेत्ता सेलगं रायरिसिं उवसंपज्जित्ता णं
विहरंति । ६६।-60

(७३) तए णं से सेलए रायरिसी पंधगपामोकूछा पंच अणगारसया बहूणि वासाणि सामत्र

परियागं पाउणिता [जेणेव पुंडरीए पव्वए तेणेव उवागच्छंति उवागच्छिता पुंडरीयं पव्वयं सणियं-सणियं दुरुहंति दुरुहिता मेघघणसन्निगासं देवसन्निवायं पुढविसित्तापट्टयं पडिलेहंति पडिलेहिता जाव संलेहणा-झूसणा-झूसिया मत्तपाण-पडियाइक्खिया पाओवगमइणंणुवन्ना तए णं से सैलए रायरिसी पंथयपामोक्खा पंच अणगारसया बहूणि वासाणि सामण्णपरियागं पाउणिता मासियाए संलेहणाए अत्ताणं झूसित्ता सट्ठिं भत्ताइं अणसणाए छेदिता जाव केवलवरानाणदंसणं समुप्पाडेत्ता तओ पच्छा सिद्धा बुद्धा मुत्ता अंतगडा परिनिव्वुडा सव्वदुक्खप्पहीणा] एवामेव समणाउसो जो निगंथो वा निगंथी वा [अब्भुज्जएणं जणवयविहारेणं विहरइ से णं इहलोए चेव वहूणं समणाणं वहूणं समणीणं वहूणं सावगाणं वहूणं सावियाणं य अच्चणिजे वंदणिजे नमंसणिजे पूयणिजे सक्कारणिजे सम्माणणिजे कल्लणं मंगलं देवयं चेइयं विणएणं पज्जुवासणिजे भवइ परलोए वि य णं नो बहूणि हत्थेच्छेयणाणि य कण्णच्छेयणाणि य नासाछेयणाणि य एवं हिययपउ-वप्पायणाणि य वसणुप्पायणाणि य उल्लंणाणि य पाविहिइ पुणो अणाइयं च णं अणवदग्गं दीहमद्धं चाउरंतं संसारकंतारं] वीईवइस्सइ एवं खलु जंबू समणेणं भगवया महावीरेणं पंचमस्स नायज्ज-यणस्स अयमट्ठे पत्रते ति वेमि । ६१-61

● पढमे जुयक्खंये पंचमं अज्जयणं समत्तं ●

छट्टं अज्जयणं-तुंबे

(७४) जइ णं भंते समणेणं भगवया महावीरेणं पंचमस्स नायज्जयणस्स अयमट्ठे पत्रते छट्टस्स णं भंते नायज्जयणस्स के अट्ठे पत्रते एवं खलु जंबू तेणं कालेणं तेणं समएणं रावगिहे समोसरणं परिता निगया तेणं कालेणं तेणं समएणं समणस्स भगवओ महावीरस्स जेइ अंतेवासी इंदभूई नामं अणगारे समणस्स भगवओ महावीरस्स अदूरसामंते जाव सुक्कज्जाणोवगाए विहरइ तए णं से इंदभूई नामं अणगारे जावसइडे जाव एवं वयासि-कहण्णं भंते जीवा गरुयत्तं वा लहुयत्तं वा हव्वमागच्छंति गोयमा से जहानामए केइ पुरिसे एगं महं सुक्कतुंबं निच्छिइं निरुवहयं दब्भेहि य कुसेहि य वेडेइ वेडेत्ता मट्टियालेवेणं लिंपइ लिंपित्ता उण्हे दलयइ दलयित्ता सुक्कं समाणं दोच्चं पि दब्भेहि य कुसेहि य वेडेइ वेडेत्ता मट्टियालेवेणं लिंपइ लिंपित्ता उण्हे दलयइ दलयित्ता सुक्कं समाणं तच्चं पि दब्भेहि य कुसेहि य वेडेइ मट्टियालेवेणं लिंपइ उण्हे दलयइ एवं खलु एएणुवाएणं अंतरा वेडेमाणे अंतरा लिपमाणे अंतरा सुक्कवेमाणे जाव अट्टहि मट्टियालेवेहि लिंपइ अत्थाहमतार-पपोरिसियंसि उदगंसि पक्खिवेज्जा से नूणं गोयमा से तुंबे तंसि अट्टण्हं मट्टियालेवेणं गरुययाए भारिययाए गरुय-भारिययाए उप्पि सलिलमइवइत्ता अहे धरणियल-पइट्टाणे भवइ एवामेव गोयमा जीवा वि पाणाइवाएणं [मुसावाएणं अदिन्नादाणेणं मेहुणेणं परिग्गहेणं जाव] मिच्छादंसणसल्लेणं अनुपुव्वेणं अट्टकम्मपगडीओ समज्जिणित्ता तांसि गरुययाए भारिययाए गरुय-भारिययाए कालमासे कालं किच्चा धरणियलमइवइत्ता अहे नरगतल-पइट्टाणा भवंति एव खलु गोयमा जीवा गरुयत्तं हव्वमागच्छंति अह णं गोयमा से तुंबे तंसि पढमिल्लुगंसि मट्टियालेवंसि तित्तंसि कुहियंसि परिसडियंसि ईंसि धरणियलाओ उप्पतित्ता णं चिइइ तयाणंतरं दोच्चं पि मट्टियालेवे [तित्ते कुहिए परिसडिए ईंसि धरणियलाओ] उप्पतित्ता णं चिइइ एवं खलु एएणं उवाएणं तेसु अट्टसु मट्टियालेवेसु तित्तेसु कुहिएसु परिसडिएसु से तुंबे विमुक्कबंधणे अहे धरणियलमइवइत्ता उप्पि सलिलतलं-पइट्टाणे भवइ एवामेव गोयमा जीवा पाणाइवायवेरमणेणं जाव मिच्छादंसण-

सल्लवेरमणेणं अनुपुब्बेणं अट्टकम्मपगडीओ खवेत्ता गगणतलमुप्पइत्ता उप्पि लोयग-पइड्डाणा भवंति एवं खलु गोयमा जीवा लहुवत्तं हव्वमागच्छंति एवं खलुं जंबू समणेणं भगवया महावीरेणं जाव संपत्तेणं छट्ठस्स नायज्झयणस्स अयमट्ठे पन्नत्ते ति वेमि ।६८।-६२

● पदमे सुयक्खंये छट्ठं अज्झयणं समत्तं ●

सत्तमं अज्झयणं—रोहिणी

(७५) जइ णं भंते समणेणं भगवया महावीरेणं छट्ठस्स नायज्झयणस्स अयमट्ठेपन्नत्ते सत्तमस्स णं भंते नायज्झयणस्स के अट्ठे पन्नत्ते एवं खलु जंबू तेणं कालेणं तेणं समएणं रायगिहे नामं नयरे होत्था सुभूमिभागे उज्जाणे तत्थ णं रायगिहे नयरे धणे नामं सत्थवाहे परिवसइ-अइडे जाव अपरिभूए भद्दा भारिया-अहीणपंचिंदियसरीरा जाव सुरुवा तस्स णं धणस्स सत्थवाहस्स पुत्ता भद्दाए भारियाए अत्तथा चत्तारि सत्थवाहदारगा होत्था तं जहा-धणपाले धणदेवे धणगोवे धणरक्खिअए तस्स णं धणस्स सत्थवाहस्स चउण्हं पुत्ताणं भारियाओ चत्तारि सुण्हाओ होत्था तं जहा-उज्झिया भोगवइया रक्खिअया रोहिणिगया तए णं तस्स धणस्स सत्थवाहस्स अण्णया कयाइ पुव्वरत्तावरत्तकालसमयंसि इमेवारूवे जाव समुप्पज्जित्था-एवं खलु अहं रायगिहे नयरे बहूणं ईसर जाव पभित्तीणं सयस्स य कुडुंयस्स यहुसु कज्जेसु य कारणेसु य कोडुंवेसु य मंतेसु य गुज्झेसु य रहस्सेसु य निच्छएसु य ववहारेसु य आपुच्छणिज्जे पडिपुच्छणिज्जे मेढी पमाणं आहारे आलंबणं चक्खू मेढीभूत्ते पमाणभूत्ते आहारभूत्ते आलंबणभूत्ते चक्खूभूए सब्बकज्जवइड्ढावए तं न नज्जइ णं मए गयंसि वा चुयंसि वा मयंसि वा भग्गंसि वा लुगंसि वा सडियंसि वा पडियंसि वा विदेसन्थंसि वा विम्पवासियंसि वा इमस्स कुडुंयस्स के भन्ने आहारे वा आलंबे वा पडिदंधे वा भविस्सइ तं सेयं खलु मम कळं पाउप्पभायाए रयणीए जाव उट्ठियम्मि सूरै सहस्सरस्सिम्मि दिणचरे तेयसा जलंते विपुलं असणं पाणं खाइमं साइमं उक्खअवेत्ता मित्त-नाइ- [नियग- सयण- संबंधि-परियणं] चउण्ह य सुण्हाणं कुलघरवग्गं आमंतेत्ता तं मित्त-नाइ-नियग-सयण-संबंधि-परियणं चउण्ह य सुण्हाणं कुलघरवग्गं विपुलेणं असण-पाण-खाइम-साइमेणं धूव- पुप्फ- वत्थ- गंध-[मल्लालंकारेणं य] सक्कारेत्ता सम्भाणेत्ता तस्सेव मित्त-नाइ-जाव चउण्ह य सुण्हाणं कुलघरवग्गस्स पुरओ चउण्हं सुण्हाणं परिकखणद्ववाए पंच-पंच सालिअक्खए दलइत्ता जाणामि तव का किह वा सारक्खेइ वा संगोवेइ वा संयइडेइ वा एवं संपेहेइ संपेहेत्ता कळं पाउप्पभायाए रयणीए जाव उट्ठियम्मि सूरै सहस्सरस्सिम्मि दिणचरे तेयसा जलंते विपुलं असणं पाणं खाइमं साइमं उक्खअवेइ मित्त- जाव चउण्ह य सुण्हाणं कुलघरवग्गं आमंतेइ तओ पच्छा ण्हाए षोयणमंडवंसि सुहासणवरगए तेणं मित्त नाइ- [नियग-सयण-संबंधि-परियणं] चउण्ह य सुण्हाणं कुलघरवग्गेणं सद्धिं तं विपुलं असणं पाणं खाइमं साइमं आस्रादेवमाणे जाव सक्कारेइ सकारेत्ता तस्सेव मित्त- नाइ- जाव चउण्ह य सुण्हाणं कुलघरवग्गस्स पुरओ पंच सालिअक्खए गेण्हइ गेण्हत्ता जेइ सुण्हं उज्झियं सद्दावेइ सद्दावेत्ता एवं वयासी-तुमं णं पुत्ता मम हत्थाओ इमे पंच सालिअक्खए गेण्हाहि अनुपुब्बेणं सारक्खमाणी संगोवेमाणी विहरहि जया णं अहं पुत्ता तुमं इमे पंच सालिअक्खए जाएज्जा तया णं तुमं मम इमे पंच सालिअक्खए पडिनिज्जाएज्जासि ति कट्ठु सुण्हाए हत्थे दलयइ दलइत्ता पडिविसज्जेइ

तए णं सा उज्झिया धणस्स तह ति एयमट्ठं पडिसुणेइ पडिसुणेत्ता धणस्स सत्थवाहस्स

हत्याओ तं पंच सालिअक्खए गेण्हइ गेण्हिता एंगंतमवक्कमइ एंगंतमवक्कमियाए इमेयारूवे अञ्जत्थिए चित्तिए पत्थिए मणोगए संकप्ये समुप्पिञ्जित्था-एवं खलु तायाणं कोड्ढागारंसि बहवे पद्दा सालीणं पडिपुण्णा चिट्ठंति तं जया णं मम ताओ इमे पंच सालिअक्खए जाएसइ तया णं अहं पञ्चतराओ अण्णे पंच सालिअक्खए गहाय दाहामि ति कट्ठ एवं संपेहेइ संपेहेत्ता ते पंच सालिअक्खए एंगंते एडेइ सकम्मसंजुत्ता जाया यावि होत्था एवं भोगवइयाए वि नवरं-सा छोल्लेइ छोल्लेत्ता अनुगिलइ अनुगिलित्ता सकम्मसंजुत्ता जाया यावि होत्था एवं रक्खियाए वि नवरं-गेण्हइ गेण्हिता एंगंतमवक्कमइ एंगंतमवक्कमियाए इमेयारूवे अञ्जत्थिए चित्तिए पत्थिए मणोगए संकप्ये समुप्पिञ्जित्था-एवं खलु ममं ताओ इमस्स मित्त-नाइ-जाव चउण्ह य सुण्हाणं कुलधरवग्गस्स पुरओ सद्दावेत्ता एवं वयासी-तुमं णं पुत्ता मम हत्याओ इमे पंच सालिअक्खए गेण्हहि अनुपुब्बेणं सारक्खमाणी संगोवेमाणी विहराहि जया णं अहं पुत्ता तुमं | इमे पंच सालिअक्खए जाएज्जा तया णं तुमं मम इमे पंच सालिअक्खए | पडिनिज्जाएज्जासि ति कट्ठम हत्थंसि पंच सालिअक्खए दलयइ तं भवियच्चमेत्थ कारणेणं ति कट्ठ एवं संपेहेइ संपेहेत्ता ते पंच सालिअक्खए सद्धे वत्थे बंधइ बंधित्ता रचणकरंडियाए पक्खिवइ पक्खिवित्ता उसीसामूले ठावेइ ठावेत्ता तिसंजं पडिजागर-माणी-पडिजागरमाणी विहरइ तए णं से धणे सत्थवाहे तहेव पित्त- [नाइ- निघग- सयण-संबंधि-परिचणस्स] चउण्ह य सुण्हाणं कुलधर-वग्गस्स पुरओ पंच सालिअक्खए गेण्हइ गेण्हिता | चउत्थं रोहिणीयं सुण्हं सद्दावेइ [सद्दावेत्ता एवं वयासी-तुमं णं पुत्ता मम हत्याओ इमे पंच सालिअक्खए गेण्हहि जाव गेण्हइ गेण्हिता एंगंतमवक्कमइ एंगंतमवक्कमियाए इमेयारूवे अञ्जत्थिए चित्तिए पत्थिए मणोगए संकप्ये समुप्पिञ्जित्था-एवं खलु ममं ताओ इमस्स मित्त-जाव परिचणस्स चउण्ह य सुण्हाणं कुलधरवग्गस्स पुरओ सद्दावेत्ता एवं वयासी-तुमं णं पुत्ता मम हत्याओ इमे पंच सालिअक्खए गेण्हहि जाव जया णं अहं पुत्ता तुमं इमे पंच सालिअक्खए जाएज्जा तया णं तुमं मम इमे पंच सालिअक्खए पडिनिज्जाएज्जासि ति कट्ठ मम हत्थंसि पंच सालिअक्खए दलयइ | तं भवियच्चं एत्थ कारणेणं

तं सेयं खलु मम एए पंच सालिअक्खए सारक्खमाणीए संगोवेमाणीए संवड्ढेमाणीए ति कट्ठ एवं संपेहेइ संपेहेत्ता कुलधर-पुरिसे सदावेइ सद्दावेत्ता एवं वयासी-तुम्मे णं देवाणुप्पिदा एए पंच सालिअक्खए गेण्हइ गेण्हिता पढमपाउसंसि महावुट्ठिकायंसि निवइयंसि समाणंसि खुड्ढागं केयारं सुपरिकम्मियं करेह करेत्ता इमे पंच सालिअक्खए वावेह वावेत्ता दोहं पि तच्चं पि उक्खय-निहए करेह करेत्ता वाडिपक्खेवं करेह करेत्ता सारक्खमाणा संगोवेमाणे आनुपुब्बेणं संवड्ढेह तए णं ते कोडुंबिया रोहिणिणिए एयमट्ठं पडिसुणेति ते पंच सालिअक्खए गेण्हंति अनुपुब्बेणं सारक्खंति संगोविति तए णं कोडुंबिया पढमपाउसंसि महावुट्ठिकायंसि निवइयंसि समाणंसि खुड्ढागं केयारं सुपरिकम्मियं करेति ते पंच सालिअक्खए दवंति दोहं पि तच्चं पि उक्खए-निहए करेति वाडि-परिकक्खेवं करेति अनुपुब्बेणं सारक्खेमाणा संगोवेमाणा संवड्ढेमाणा विहरंति तए णं ते साली अनुपुब्बेणं सारक्खिज्जमाणा संगोविज्जमाणा संवड्ढिज्जमाणा साली जाया-किण्हा किण्होभासा [नीला नीलोभासा हरिया हरिओभासा सीया सीओभासा निद्धा निद्धोभासा तिच्चा तिच्चोभासा किण्हा किण्हच्छाया नीला नीलच्छाया हरिया हरियच्छाया सीया सीयच्छाया निद्धा निद्धच्छाया तिच्चा तिच्चच्छाया धण-कडियकडिच्छाया रम्मा महामेह] निउरंभूया पासाईया दरिसणिज्जा

अमिपरूवा पडिरूवा तए णं ते साली पत्तिया दत्तिया गम्भिया पसुइया आगयगंधी खीराइया बद्धफला पक्का परियागया सल्लइ-पत्तइया हरिय-फेरंडा जाया यावि होत्था तए णं ते कोडुंबिया ते साली पत्तिए जाव परियागए सल्लइय-पत्तइए जाणिता तिकखेहिं नवपज्जणएहिं असिएहिं लुणंति लुणिता करयलमलिए करंति करेत्ता पुणंति तत्थ णं चोक्खाणं सूइयाणं अखंडाणं अफुडियाणं छडछडापूयाण सालीणं मागहए पत्थए जाए तए णं ते कोडुंबिया ते साली नवएसु घडएसु पक्खिवंति पक्खिविता ओलिंपति ओलिंपिता लंछिय-मुद्दिए करंति करेत्ता कोटअठागरस्स एगदेसंसि ठावेति ठावेत्ता सारक्खमाणा संगोवेमाणा विहरंति तए णं ते कोडुंबिया दोब्बंसि वासारत्तंसि पढम्पाउसंसि महावुट्टिकावंसि निवइयंसि समानंसि खुद्दाणं केयारं सुपरिकम्मियं करंति ते साली ववंति दोब्बंसि उक्खाय-निहए करंति जाव असिएहिं लुणंति लुणिता चलणतल-मलिए करंति करेत्ता पुणंति तत्थ णं सालीणं बहवे कुडवा जाव एगदेसंसि ठावेति ठावेत्ता सारक्ख-माणा संगोवेमाणा विहरंति

तए णं ते कोडुंबिया तद्यंसि वासारत्तंसि महावुट्टिकावंसि निवइयंसि समानंसि केयारे सुपरिकम्मिए करंति जाव असिएहिं लुणंति लुणिता संवहति संवहित्ता खलयं करेति मलंति पुणंति तत्थ णं सालीणं बहवे कुंभा जाया तए णं ते कोडुंबिया ते साली कोट्टागरंसि पल्लंसि [पक्खिवंति पक्खिवित्ता ओलिंपति ओलिंपिता लंछिय-मुद्दिए करंति करेत्ता सारक्खमाणा संगोवे माणा] विहरंति चउत्थे वासारत्ते बहवे कुंभसया जाया तए णं तस्स धणस्स पंचमयंसि संवच्छरंसि परिणममाणंसि पुव्वरत्तावरत्त- कालसमयंसि इमेयारूवे अज्झत्थिए चित्तिए पत्थिए मणोगए संकप्पे समुप्पज्जित्था-एवं खलु मए इओ अतीते पंचमे संवच्छरे चउण्हं सुण्हाणं परिकूखणद्वायाए ते पंच-पंच सालिअक्खया हत्थे दिन्ना तं सेयं खलु मम कल्लं पाउप्पभायाए रयणीए जाव उट्टियम्मि सूरु सहस्सरस्समिम्मि दिणयरे तेयसा जलंते पंच सालिअक्खए परिजाइत्ताए जाव जाणामि ताव काए किह सारक्खिया वा संगोविया वा संवइडिया वा ति कट्टु एवं संपेहेइ संपेहेत्ता कल्लं पाउप्पभायाए रयणीए जाव उट्टियम्मि सूरु सहस्सरस्सिम्मि दिणयरे तेयसा जलंते विपुलं असणं [पाणं खाइमं साइमं उवक्खडावेत्ता मित्त-नाइ-निधण-सयण-संवंधि-परियणं चउण्हं य सुण्हाणं कुलघरवग्गं जाव] सम्माणित्ता तस्सेव मित्त-जाव परियणस्स चउण्हं य सुण्हाणं कुलघरवग्गस्स पुरओ जेट्ठं उज्झियं सद्दावेइ सद्दावेत्ता एवं वयासी-एवं खलु अहं पुत्ता इओ अतीते पंचमम्मि संवच्छरे इमस्स मित्त-जाव परियणस्स चउण्हं य सुण्हाणं कुलघरवग्गस्स य पुरओ तव हत्थंसि पंच सालिअक्खए दलयामि जया णं अहं पुत्ता एए पंच सालिअक्खए जाएत्ता तया णं तुमं मम इमे पंच सालिअक्खए पडिनिज्जाएसि से नूणं पुत्ता अट्ठे समट्ठे हंता अत्थि तं णं तुमं पुत्ता मम ते सालिअक्खए पडिनिज्जाएसि तए णं सा उज्झिया एयमड्डं धणस्स सत्थवाहस्स पडिसुणेइ जेणेव कोट्टागारं तेणेव उवागच्छइ उवागच्छित्ता पल्लाओ पंच सालिअक्खए गेण्हइ गेण्हित्ता जेणेव धणे सत्थवाहे तेणेव उवागच्छइ उवागच्छित्ता धणं सत्थवाहं एवं वयासी-एए णं ताओ पंच सालिअक्खए ति कट्टु धणस्स हत्थसि ते पंच सालिअक्खए दलयइ तए णं धणे सत्थवाहे उज्झियं सवह-सावियं करेइ करेत्ता एवं वयासी-किण्णं पुत्ता ते चेव पंच सालिअक्खए उदाहु अण्णे तए णं उज्झिया धणं सत्थवाहं एवं वयासी-एवं खलु तुम्हे ताओ इओ अतीए पंचमे संवच्छरे इमस्स मित्त- [नाइ- पुरओ पंच सालिअक्खए गेण्हह गेण्हित्ता ममं सद्दावह सद्दावेत्ता एवं वयासी तुमं णं पुत्ता मम हत्थाओ इमे

पंच सालिअक्खए गेण्हिहाहि अनुपुब्बेणं सारक्खमाणी संगोवेमाणी विहराहि तए णंहुं तुब्बं एयमड्डं पडिसुणेमि ते पंच सालिअक्खे गेण्हामि एगंतमवक्कमामि तए णं मम इमेयारूवे अज्झत्थिए-संकप्पे समुप्पज्झित्या-एवं खलु ताताणं कोट्टागारंसि [बहवे पल्ला सालीणं पडिपुत्रा चिट्ठित्ति तं जया णं मम ताओ इमे पंच सालिअक्खए जाएसइ तया णं अहं पल्लंतराओ अण्णे पंच सालिअक्खए गहाय दाहामि ति कट्ठु एवं संपेहेमि संपेहेत्ता ते पंच सालिअक्खए एगंते एडेमि सक्कमसंजुत्ता यावि भवामि] तं नो खलु ताओ ते चेव पंच सालिअक्खए एए णं अण्णे तए णं से धणे सत्यवाहे उज्झियाए अंतिए एयमड्डं सोच्चा निसम्मा आलुरुत्ते जाव मिसिमिसेमाणे उज्झियं तस्स मित्त-नाइ-[नियग-सयण-संवंधि-परियणस्स] चउण्हं सुण्हाणं कुलधरवग्गस्स य पुरओ तस्स कुलधरस्स छारुज्झियं च छणुज्झियं च कययरुज्झियं च संपुच्छियं च सम्पज्झियं च पाओवदाइयं च ण्णाणो-वदाइयं च बाहिर-पेसणकारियं च ठवेइ

एवामेव समणाउसे जो अहं निगंधो वा निगंधी वा [आयरिय-उवज्जायाणं अंतिए मुंडे भविता अगाराओ अणगारियं] पव्वइए पंच य से महव्वयाइ उज्झियाइ भवति से णं इहभवे चेव बहूणं समणाणं बहूणं समणीणं बहूणं सावयाणं बहूणं सावियाणं य हीलणिजे जाव चाउरंत-संसार-कंतारं भुज्जो-भुज्जो अनुपरियट्ठिस्सइ-जहा सा उज्झिया एवं भोगवइया वि नवरं-छोळ्ळिमि छोळ्ळित्ता अनुगिलेमि अनुगिलित्ता सकम्मसंजुत्ता यावि भवामि तं नो खलु ताओ ते चेव पंच सालिअक्खए एए णं अण्णे तए णं से धणे सत्यवाहे भोगवइयाए अंतिए एयमड्डं सोच्चा निराम्मा आसुरुत्ते जाव मिसिमिसेमाणे भोगवइ तस्स मित्त-नाइ-पुरओ तस्स कुलधरस्स कंडितियं च कोट्टितियं च पीसतियं च एवं-रंधतियं रंधतियं परिवेसंतियं परिभायंतियं अट्ठितरियं पेसणकारिं महाणसिणिं ठवेइ एवामेव समणाउसो जो अहं निगंधो वा निगंधी वा [आयरिय-उवज्जायाणं अंतिए मुंडे भविता अगाराओ अणगारियं] पव्वइए पंच य से महव्वयाइ फालियाइ भवति से णं इहभवे चेव बहूणं समणाणं बहूणं समणीणं बहूणं सावयाणं बहूणं सावियाणं य हीलणिजे जाव चाउरंत-संसार-कंतार-भुज्जो-भुज्जो अनुपरियट्ठिस्सइ-जहा व सा भोगवइया एवं रक्खियावि नवरं-जेणेव वासधरे तेणेव उवागच्छइ उवागच्छित्ता मंजूसं विहाडेइ विहाडेत्ता रयणकरंडगाओ ते पंच सालिअक्खए गेण्हइ गेण्हित्ता जेणेव धणे सत्यवाहे तेणेव उवागच्छइ उवागच्छित्ता पंच सालिअक्खए धणस्स हत्थे दलयइ तए णं से धणे सत्यवाहे रक्खियं एवं वयासी-किं णं पुत्ता ते चेव एए पंच सालिअक्खए उदाहु अण्णे तए णं रक्खिया धणं सत्थवाहं एवं वयासी-त्ते चेव ताओ एए पंच सालिअक्खए नो अम्णे क्कहणं पुत्ता एवं खलु ताओ तुब्बे इओ अतीते पंचमे [संवच्छरे इमस्स मित्त-नाइ-पुरओ पंच सालिअक्खए गेण्हइ गेण्हित्ता ममं सद्दावेह सद्दावेत्ता ममं एवं वयासी-तुमं णं पुत्ता मम हत्थाओ इमे पंच सालिअक्खए गिण्हिहाहि अनुपुब्बेणं सारक्खमाणी संगोवेमाणी विहराहि जया णं अहं पुत्ता तुमं इमे पंच सालिअक्खे जाएज्जा तया णं तुमं मम इमे पंच सालिअक्खए पडिनिज्जाएज्जासि ति कट्ठु मम हत्थंसि पंच सालिअक्खए दलयह तं] मवियव्वं एत्थ कारणेणं ति कट्ठु ते पंच सालिअक्खए सुद्धे वत्थे बंधेमि बंधित्ता रयणकरंडियाए पक्खिवेमि पक्खिवित्ता उसीसामूले ठावेमि ठेवात्ता] तिसंसं पडिज्जागरमाणी यावि विहरामि तओ एएणं कारणेणं तओ ते चेव पंच सालिअक्खए नो अन्ने तए णं से धणे सत्यवाहे रक्खियाए अंतियं एयमड्डं सोच्चा हट्ठुट्ठे तस्स कुलधरस्स हिरण्णस्स य कंस-दूस-विपुल-धण-कणग-रयण-पणि-मोत्तिय-संख-

सिल-ध्ववाल-रचारयण-संत-सार]-सावएज्जस्स च भंडागारिणी ठवेइ

एवामेव समणाउसो [जो अहं निग्गंधो वा निग्गंधी वा आयरिय-उवज्जायाणं अंतिए मुंडे भविता अगाराओ अणगारियं पव्वइए] पंच य से महव्वयाइं रक्खियाइं भवति से णं इहभवे चेव बहूणं समणाणं बहूणं समणीणं बहूणं सावयाणं बहूणं सावियाणं य अच्चणिजे जाव चाउरंतं संसारकंतारं वीइवइस्सइ-जहा व सा रक्खिया, रोहिणीया वि एवं चेव नवरं-तुम्हे ताओ मम सुवहुयं सगडि-सागडं दलाह जा णं अहं तुमं ते पंच सालिअक्खे पडिनिज्जाएमि तए णं से धणे सत्थवाहे रोहिणिं एवं वयासी-कहं णं तुमं पुत्ता ते पंच सालिअक्खए सगडि-सागडेणं निज्जाइस्ससि तए णं सा रोहिणीं घणं सत्थवाहं एवं वयासी-एवं खलु ताओ तुम्हे इओ अतीते पंचमे संवच्छेरे इमस्स मित्त-नाइ-पुरिओ पंच सालिअक्खए गेण्हह गेण्हिता ममं सद्दावेह सद्दावेत्ता एवं वयासी-तुमं णं पुत्ता मम हत्थाओ इमे पंच सालिअक्खए गेण्हहि अनुपुब्बेणं सारक्खमाणी संगोवेमाणी विहराहि जया णं अहं पुत्ता तुमं इमे पंच सालिअक्खए जाएज्जा तथा णं तुमं मम इमे पंच सालिअक्खए पडिनिज्जाएज्जासि ति कट्टु मम हत्थंसि पंच सालिअक्खए दलयह तं भवियव्वं एत्थ कारणेणं तं सेवं खलु मम एए पंच सालिअक्खए सारक्खमाणीए संगोवेमाणीए संवडअडेमाणीए जावा बहवे कुंभसयाजाया तेणेव कमेण एवं खलु ताओ तुम्हे ते पंच सालिअक्खए सगडि-सागडेणं निज्जाएमि तए णं से धणे सत्थवाहे रोहिणीयाए सुवहुयं सगडि-सागडं दलाति तए णं से रोहिणी सुवहुं सगडि-सागडं यहाय जेणेव सए कुलपरे तेणेव उवागच्छइ उवागच्छिता कोट्टागारे विहाडेइ विहाडिता पत्ते उट्थिदइ उट्थिदिता सगडि-सागडं भरेइ भरेत्ता राचगिहं नगरं मज्झं-मज्झेणं जेणेव सए गिहे जेणेव घणे सत्थवाहे तेणेव उवागच्छइ तए णं राचगिहे नयरे सिंघाडग-जाव पहेसु बहुजणो अण्णमण्णं एदमाइक्खइ-धण्णे णं देवानुप्पिया धणे सत्थवाहे जस्स णं रोहिणीया सुण्हा पंच सालिअक्खए सगडि-सागडेणं निज्जाएइ तए णं से धणे सत्थवाहे ते पंच सालिअक्खए सगडि-सागडेणं निज्जाइए पासइ पासित्ता हट्टुट्टे पडिच्छइ पडिच्छिता तस्सेव मित्त-नाइ-[नियग-सयण-संवंधि-परियणस्स] चउण्ह य सुण्हाणं कुलघरवगस्स पुरओ रोहिणीयं सुण्हं तस्स कुलधरस्स बहसु कजेसु य [कारणेसु य कुडुंवेसु य मंतेसु य गुबझेसु य] रहस्सेसु य आपुच्छणिज्जं [पडिपुच्छणिज्जं मेढिं पमाणं आहारं आलवणं चक्खुं मेढीमूवं पमाणभूयं आहारभूयं आलवणभूयं चक्खुभूयं सव्वकज्जं वड्ढावियं पमाणभूयं ठवेइ एवामेव समणाउसो [जो अहं निग्गंधो वा निग्गंधी वा आयरिय-उवज्जायाणं अंतिए मुंडे भविता अगाराओ अणगारियं पव्वइए] पंच से महव्वया संवडिइया भवति से णं इहभवे चेव बहूणं समणाणं बहूणं समणीणं बहूणं सावियाणं बहूणं सावयाणं य अच्चणिजे जाव चाउरंतं संसारकंतारं वीइवइस्सइ-जहा व सा रोहिणीय एवं खलु जंबू समणेणं भगवया महावीरेणं आइगरेणं तित्थगरेणं जाव सिद्धिगइनामधेज्जं ठाणं संपत्तेणं सत्तामस्स नायज्झयणस्स अयमट्ठे पत्रते ति वेमि ।६९।-६३

● पट्टे सुयक्खंधे सत्तमं अज्झयणं सम्पत्तं ●

जह सेट्ठी तह गुरुणो जह नाइ-जणो तथा सभणसंधो जह वहुया तए भव्वा जह सालिकणा तह वयाइं

अट्टमं अज्झयणं—मल्ली

(७६) जइ णं भंते समणेणं भगवया महावीरेणं जाव संपत्तेणं सत्तामस्स नायज्झयणस्स

अयमङ्गे पत्रत्ते अट्टमस्स णं भंते नायज्जवणस्स के अट्टे पन्नरो एवं खलु जंबू तेणं कालेणं तेणं समएणं इहेव जंबुद्वीवे दीवे महाविदेहे वासे मंदरस्स पव्वयस्स पच्चत्थिमेणं निसट्टस्स वासहर-पव्वयस्स उत्तरेणं सीओदाए महानदीए दाहिणेणं सुहावहस्स बक्खारपव्वयस्स पच्चत्थिमेणं पच्चत्थिमल-वणसमुहस्स पुरत्थिमेणं एत्थ णं सलिलावई नामं विजए पत्रत्ते तत्थ णं सलिलावई-वजए वीयसोगा नामं रायहाणी-नवजोयणवित्थिण्णं जाव पच्चक्खं देवलोगभूया तीसे णं वीयसो-गाए रायहाणीए उत्तरपुरत्थिमे दिसीभाए इंदकुंभे नामं उज्जाणे तत्थ णं वीयसोगाए रायहाणीए बले नामं राया तस्स धारिणीपामोक्खं देवीसहस्सं ओरोहे होत्था तए णं सा धारिणी देवी अण्णया कयाइ सीहं सुमिणे पासित्ता णं पडिबुद्धा जाव महब्बले दारए जाए-उम्मुक्कवालभावे जाव भोग-समत्थे तए णं तं महब्बलं अम्मापियरो सरिसियाणं कमलसिरिपामोक्खाणं पंचण्हं रायवरकत्ता-सवाणं एगदिवसेणं पाणिं गेण्हावेत्ति पंच पासायसया पंचसओ दाओ जाव माणुस्सए कामभोगे पच्चणुब्भवमाणे विहरइ तेणं कालेणं तेणं समएणं इंदकुंभे उज्जाणे थेरा समोसद्धा परिसा निग्गया बलो वि निग्गओ धम्मं सोच्चा निसम्मं [हट्टतुट्टे थेरे तिक्खुत्तो आयाहिण-पयाहिणं करेइ करेत्ता वंदइ नमंसि वंदित्ता नमंसित्ता एवं वयासी-सद्दहामि णं भंते निग्गंथं पावयणं जाव नवरं महब्बलं कुमारं रत्ते] ठावेमि तओ पव्वा देवाणुप्पियाणं अंतिए मुंडे भविता अगाराओ अणगारियं पव्वयामि

अहासुहं देवाणुप्पिया जाव एककारसंगवी बहूणि वासाणि परियाओ जेणेव चारुपव्वए तेणेव उवागच्छइ उवागच्छित्ता मासिएणं भतेणं सिद्धे तए णं सा कमलसिरी अण्णया सीहं सुमिणे पासित्ता णं पडिबुद्धा जाव बलभद्दो कुमारो जाओ जुवराया यावि होत्था तस्स णं महब्बलस्स रण्णो इमे छप्पि य बालवयसंगा रायाणो होत्था तं जहा-अयले धरणे पूरणे वसु वेसमणे अभिचंदे-सहजायया [सहवड्ढिया सहपंसुकोलियथा सहदारदरिसी अण्णमण्णमणुरत्तया अण्णमण्ण-मणुव्वयया अण्णमण्णच्छंदाणुवत्तया अण्णमण्णहियइच्छियकारया अण्णमण्णेसु रत्तेसु किच्चाइं करिण्णजाइं पच्चणुब्भवमाणा विहरंति तए णं तेसिं रायाणं अन्नया कयाइं एगयओ सहियाणं समुवागयाणं सण्णिसण्णाणं सण्णिविद्वानं इमेयारूवे मिहोकहा-समुल्लावे समुप्पत्तिव्या-जण्णं देवाणुप्पिया अहं सुहं वा दुक्खं वा पव्वजा वा विदेसमगणं वा समुप्पत्ति तण्णं अम्मेहिं एगयओ] समेच्चा नित्थरियव्वे ति कट्टु अण्णमण्णस्स एयमड्डं पडिसुणंति तेणं कालेणं तेणं समएणं इंदकुंभे उज्जाणे थेरा समोसद्धा परिसा निग्गया महब्बले णं धम्मं सोच्चा निसम्मं हट्टतुट्टे जं नवरं-छप्पि य बालवयसंए आपुच्छामि बलभद्दं च कुमारं रत्ते ठावेमि जाव ते छप्पि य बालवयसंए आपुच्छइ तए णं ते छप्पि य बालवयसंगा महब्बलं रायं एवं वयासी-जइ णं देवाणुप्पिया तुब्भे पव्वयह अहं के अण्णे आहारे वा [आलवे वा अहे वि य णं] पव्वयामो तए णं से महब्बले राया ते छप्पि य बाल-वयसंए एवं वयासी-जइ णं तुब्भे मए सद्धिं पव्वयह तं गचअछह जेड्डपुत्ते सएहिं-सएहिं रत्तेहिं ठावेह पुरिससहस्सवाहिणीओ सीयाओ दुरुद्धा [समाणा मम अंतियं पाउट्ठभवह तेवि तहेव] पाउट्ठ-वंति तए णं से मव्वले राया छप्पि य बालवयसंए पाउट्ठमूए पासइ पासित्ता हट्टतुट्टे कोडुंविपपुरिसे सद्दावेइ जाव बलभद्दस्स अभिसेओ जाव बलभद्दं रायं आपुच्छइ तए णं से महब्बले [छहिं बालवयसंगेहिं सद्धिं] महया इइट्ठीए पव्वइए एककारसंगवी बहूहिं चउत्थ- [छट्टुडम- दसम-दुवालसेहिं मासद्धमासखमणेहिं अण्णाणं भावेमाणे] विहरइ तए णं तेसिं महब्बलपामोक्खाणं सत्तण्हं अणगाराणं अण्णया कयाइ एगयओ सहियाणं इमेयारूवे मिहोकहा-समुल्लावे

सुयक्षयो-१, अन्वयणं-८

६७

समुप्यज्जित्वा-जण्णं अम्हे देवाणुप्पिया एणे तवोकम्मं उवसंपज्जिता णं विहरइ तण्णं अम्हेहिं सव्वेहिं तवोकम्मं उवसंपज्जिता णं विहरित्ताए त्ति कट्ठु अण्णमण्णस्स एयमट्ठं पडिसुणेति पडिसुणेत्ता बहूहिं चउत्थं-जाव विहरंति तए णं से महव्वले अणगारे इमेणं कारणेणं इत्थिनामगोवं कम्मं निव्वत्तिसु-जइ णं ते महव्वलवज्जा छ अणगारा चउत्थं उवसंपज्जिता णं विहरंति तओ से महव्वले अणगारे छट्ठं उवसंपज्जिता णं विहरइ जइ णं ते महव्वलवज्जा छ अणगारा अट्ठ उवसंपज्जिता णं विहरंति तओ से महव्वले अणगारे अट्ठमं उवसंपज्जिता णं विहरइ एवं-अह अट्ठमं तो दसमं अह दसमं तो दुवालसमं इमेहि य णं वीसाए णं कारणेहिं आसेविय-वहुलीकएहिं तित्थयरनामगोवं कम्मं निव्वत्तिसु [तं जहा]- 1७०-१164-1

(७७) अरहंत-सिद्ध-पवयण-गुरु-धेर-वहुसुय-तवस्सीसु

वच्छइय्य य तेसिं अभिक्ख नाणोवओगे य ॥४॥-1

(७८) दंसण-विणए आवस्सए य सीलव्वए निरइयारो

खणलवतवच्चियाए वेयावच्चे समाहीए ॥५॥-2

(७९) अपुव्वनाणगहणे सुयभत्ती पवयण-पहावणया

एएहिं कारणेहिं तित्थयरत्तं लहइ सो उ ॥६॥-3

(८०) तए णं ते महव्वलपामोक्खा सत्त अणगारा मासियं भिक्खुपडिमं उवसंपज्जिता णं विहरंति जाव एगराइवं तए णं ते महव्वलपामोक्खा सत्त अणगारा खुड्ढागं सीहनिक्कीलियं तवोकम्मं उवसंपज्जिता णं विहरंति तं जहा- चउत्थं करेति सव्वकामगुणियं पारेति छट्ठं करेति चउत्थं करेति, अट्ठमं करेति छट्ठं करेति दसमं करेति अट्ठमं करेति, दुवालसं करेति दसमं करेति चोदसमं करेति दुवालसमं करेति, सोलसमं करेति चोदसमं करेति अट्ठारसमं करेति सोलसमं करेति, वीसइमं करेति सोलसमं करेति अट्ठारसमं करेति चोदसमं करेति, सोलसमं करेति दुवालसमं करेति चोदसमं करेति दसमं करेति, दुवालसमं करेति अट्ठं करेति दसमं करेति छट्ठं करेति, अट्ठमं करेति चउत्थं करेति छट्ठं करेति चउत्थं करेति, करेत्ता सव्वत्थ सव्वकामगुणिएणं पारेति एवं खलु एसा खुड्ढागसीहनिक्कीलियस्स तवोकम्मस्स पढमा परिवाडी छहिं मासेहिं सत्तहियं अहोरतेहिं अहामुत्तं जाव आराहिया भवइ तथाणंतरं दोच्चाए परिवाडीए चउत्थं करेति नवरं-विगइवज्जइ पारेति एवं तच्चा वि परिवाडीनवरं-पारणए अलेवाडं पारेति एवं चउत्था वि परिवाडी नवरं-पारणए आंयविलेणं पारेति तए णं ते महव्वलपामोक्खा सत्त अणगारा खुड्ढागं सीह निक्कीलियं तवोकम्मं दोहिं संवच्छरेहिं अट्ठवीसाए अहोरतेहिं अहामुत्तं जाव आणाए आराहेत्ता जेणेव धेरे भगवंते तेणेव उवागच्छंति उवागच्छित्ता धेरे भगवंते वंदंति नमंसंति वंदित्ता नमंसित्ता एवं वयसी-इच्छामो णं भंते महालयं सीहनिक्कीलियं तवोकम्मं उवसंपज्जिता णं विहरित्ताए

तहेव जहा खुड्ढागं नवरं-चोर्त्तीसइमाओ नियत्ताइ एगाए परिवाडीए कालो एगेणं संवच्छरेणं छहिं मासेहिं अट्ठारसहि य अहोरतेहिं समप्पेइ सव्वंपि महालयं सीहनिक्कीलियं छहिं वारोहिं दोहिं मासेहिं वारसहि य अहोरतेहिं समप्पेइ तए भं ते महव्वलपामोक्खा सत्त अणगारा महालयं सीहनिक्कीलियं अहामुत्तं जाव आराहित्ता जेणेव धेरे भगवंते तेणेव उवागच्छंति उवागच्छित्ता धेरे भगवंते वंदंति नमंसंति वंदित्ता नमंसित्ता बहूणि चउत्थं जाव विहरंति तए णं ते महव्वलपामोक्खा सत्त अणगारा तेणं उरालेणं तवोकम्मं सुक्का भुक्खा निम्मसा किडिकिडिया-

भूया अड्डिचम्मावणद्धा किंसा धमणिसंतया जाया या वि होत्था जहा खंदओ नवरं-येपे आपुच्छित्ता चारुपव्वयं सणियं-सणियं दुरुहंति जाव दोमासियाए संलेहणाए अप्पाणं झोसेत्ता सवीसं भत्तसयं अणसणाए छेएत्ता चतुरासीईं वाससयसहस्साईं सामण्णपरियाणं पाउणित्ता चुलसीईं पुव्वसयस-हस्साईं सव्वाउयं पालइत्ता जयंते विमाणे देयत्ताए उववण्णा 1901-64

(८१) तत्थ णं अत्थेगइयाणं देवाणं बत्तीसं सागरोवमाईं ठिईं पन्नत्ता तत्थ णं महव्व-लवज्जाणं छण्हं देवाणं देसूणाईं बत्तीसं सागरोवमाईं ठिईं महव्वलस्स देवस्स य पडिपुण्णाईं बत्तीसं सागरोवमाईं ठिईं तए णं ते महव्वलवज्जा छप्पि देवा जयंताओ देवलोगाओ आउक्खएणं मवक्खएणं ठितिक्खएणं अणंतरं चयं चइत्ता इहेव जंबुद्वीवे दीवे भारहे वासे विसुद्धपिडमाइवंसेसु रायकुलेसु पत्तेयं-पत्तेयं कुमारत्ताए पच्चायाया तं जहा-पडिबुद्धी इक्खागराया चंदच्छाए अंगराया संखे कासिराया रुष्पी कुणालाहिवई अदीणसत्तू कुरुराया जियसत्तू पंचलाहिवई तए णं से महव्वले देवे तिहिं नाणेहिं समग्गे उच्चाट्टाणगएसु गहेसुं सोमासु दिसासु वितिमिरासु विसुद्धासु जइएसु सउणेषु पयाहिणाणुकूलंसि भूमिसप्पंसि मारुवंसि पवायंसि निष्फण्ण-सस्स-मेइणीयंसि कालंसि पमुइयपक्कीलिएसु जणवएसु अद्धरत्तकालसमयंसि अस्सिणीनक्खत्तेणं जोगमुवागएणं जे से हेमंताणं चउत्थे मासे अट्टमे पक्खे तस्स णं फग्गुणसुद्धस्स चउत्थीपक्खेणं जयंताओ विमाणाओ वत्तीसं सागरोवमड्डिइयाओ अणंतरं चयं चइत्ता इहेव जंबुद्वीवे दीवे भारहे वासे मिहिलाए राय-हाणीए कुंभस्स रण्णो पभावतीए देवीए कुच्छिसि आहारवक्कंतीए भवक्कंतीए सरीवक्कंतीए गम्भत्ताए वक्कंते [जं रयणि च णं महव्वले देवे पभावतीए देवीए कुच्छिसि गम्भत्ताए वक्कंते तं रयणि च णं सा पभावती देवी वोहस महासुमिणे पासित्ता णं पडिबुद्धा] भत्तार-कहणं सुमिणपाढ-गपुच्छा जाव [विपुलाईं भोगभोगाईं भुंजमाणी] विहरइ

तए णं तीसे पभावईए देवीए तिण्हं मासाणं बहुपडिपुत्राणं इनेयारुवें डोहले पाउव्वभू-एधण्णाओ णं ताओ अम्मयाओ जाओ णं जल-थलय-भासरय्यभूएणं दसद्धवण्णेणं मल्लेणं अत्थुय-पच्चत्थुयंसि सयणिजंसि सण्णिसण्णाओ निव्वण्णाओ य विहरंति एगं च महं सिरिदामगंडं पाडल-मत्थियचंपग- असोग-पुत्राग-नाग-मरुयग-दमणग-अणोज्जकोज्जय-पटरं परमसुहफासं दरिसणिजं महया गंधद्धणिं मुयंतं अघायमाणीओ डोहलं विणेति तए णं तीसे पभावईए इमं एयारुवें डोहलं पाउव्वभूयं पासित्ता अहासण्णिहिया वाणमंतरा देवा खिप्पामेव जल-थलय-भासरय्यभूयं दसद्ध-वण्णं] मल्लं कुंभगसो य भारगसो य कुंभस्स रण्णो भवणंसि साहरंति एगं च णं महं सिरिदामगंडं जाव गंधद्धणिं मुयंतं उवणेति तए णं सा पभावई देवी जल-थलय-जाव मल्लेणं दोहलं विणेइ तए णं सा पभावई देवी पसत्यदोहला [सम्माणियदोहला विणीयदोहला संपुण्णदोहला संपत्तदोहला विउलाईं माणुस्सगाईं भोगभोगाईं पद्यणुभवमाणी] विहरइ तए णं सा पभावई देवी नवण्हं मासाणं बहुपडिपुण्णाणं अद्धट्टमाण य राईदियाणं वीडक्कंताणं जे से हेमंताणं पढमे मासे दोह्णे पक्खे मग्गसिरसुद्धे तस्स णं एककारसीए पुव्वरत्तावरत्तकालसमयंसि अस्सिणीनक्खत्तेणं जोगमुवाग-एणं उच्चट्टाणगएसु गहेसु जाव पमुइय-पक्कीलिएसु जणवएसु आरोयरोयं एगूणवीसइमं तित्थयरं पयाया 1991-65

(८२) तेणं कालेणं तेणं समएणं अहेलोगवत्थव्वाओ अट्ट दिसाकुमारीमहयरियाओ जहा जंबुद्वीवपन्नतीए जम्पणुस्सवं नवरं-मिहिलाए कुंभस्स पभावईए अभिलाओ संजोएयव्वो जाव

नंदीसरवरदीवे महिमा तथा णं कुंभए राया बहूहि भवणवइ- [जाव वेमागिएहिं देवेहिं तित्थयर-
जम्पणाभिसेयमहियाए कयाए समाणीए पद्दूसकालसमयंसि नगर-गुत्तिए सद्दावेइ] जावकम्मं
जाव नामकरणं-जम्हा णं अन्हं इमीसे दारियाए माऊए मल्लसयणिज्जंसि डोहले विणीए तं होउ णं
अन्ह दारिया नामेणं मल्ली तए णं सा मल्ली पंचधाईपरिक्खिता जाव सुंहंसुहेणं परिवइडई ॥७३-६६

(८३) सा वड्डई भगवई दियल्लोयचुया अणोवमसिरीया

दासी दास परिवुडा परिकिण्णा पीढमद्देहि

॥७॥-१

(८४) असियसिरया सुनयणा विवोद्वी धवलदंतपंतीया

वरकमल कोमलंगी फुल्लुपल गंध नीसासा

॥८॥-२

(८५) तए णं सा मल्ली विदेहरायवरकत्रा उम्मुक्कबालभावा [विण्णय-परिणयमेत्ता जोव्व-
णगमणुपता] रूवेण य जोव्वणेण य लावणेण य अईव-अईव उक्किक्क उक्किक्कडुसरीरा जाया
यावि होत्था तए णं सा मल्ली देसूणयासयजाया ते छप्पि य रायाणो विउत्तेणं ओहिया आभोए-
माणी-आभोएमाणी विहरइ तं जहा-पडिवुद्धिं [इक्खागरायं चंदगच्छायं अंगरायं संखं कासिरायं
रूपिं कुणालाहिवइ अदीणसत्तुं कुरुयां] जिवसत्तुं पंचालाहिवइ तए णं सा मल्ली कोडुवियपुरिसे
सद्दावेइ सद्दावेत्ता एवं वयासी-तुत्थे णं देवाणुप्पिया असोगवणियाए एगं महं मोहणघरं करेह-
अणेगखंभसवसण्णिविदुं तस्स णं मोहणघरस्स बहुमज्झदेसभाए जालघरयं करेह तस्स णं
जालघरयास्स बहुमज्झदेसभाए मणिपेढियं करेह [एयमाणतियं पच्चप्पिणह तेवि तहेव] पच्चप्पिणंति
तए णं सा मल्ली मणिपेढियाए उवरिं अप्पणो सरिसियं सरित्तयं सरिव्वयं सरिस- लावण- रूव-
जोव्वण-गुणोववेयं कणगामइं मत्थयच्छिडुं पउमुप्पल-पिहाणं पडिमं करेइ करेत्ता जं विउलं
असण-पाण-खाइम-साइमं आहारेइ तओ मणुण्णाओ असण- पाण- खाइम- साइमाओ कल्लकच्छिं
एगमेगं पिंडं गहाय तीसे कणगामईए मत्थयच्छिडुए [पउमुप्पल-पिहाणाए पडिमाए मत्थयंसि
पक्खिमाणो-पक्खिवमाणो विहरइ तए णं तीसे कणगामईए मत्थयच्छिडुए [पउमुप्पल-पिहाणाए]
पडिमाए एगमेगंसि पिंडे पक्खिप्पमाणे पक्खिप्पमाणे तओ गंधे पाउत्थवेइ से जहाणनामए-
अहिमडे इ वा [गोमडे इ वा सुणहमडे इ वा मज्जारमडे इ वा मणुस्समडे इ वा महिसमडे इ वा
मूसगमडे इ वा आसमडे इ वा हत्थिमडे इ वा सीहमडे इ वा वग्घमडे इ वा विगमडे इ वा दीविगमडे
इ वा मय-कुहिय-विणडु-दुरभिवा-वण्ण-दुत्थिगंधे किमिजालाउलसंसते अमुइ-विलीण- विगय-
वीभत्सदरिसणिजे भवेवारूवे सिमा नो इण्ठे सम्ठे एत्तो अण्हिततराए चेव अकंततराए चेव
अप्पियतराए चेव अमणुण्णतराए चेव] अमणामतराए चेव ॥७३-६७

(८६) तेणं कालेणं तेणं समएणं कोसला नामं जणवए तत्थ णं सागेए नामं नयरे तस्स णं
उत्तरपुरत्थिमे दिसीभाए एत्थ णं महगे नागघरए होत्था- दिव्वे सच्चे सच्चोवाए सण्णिहिय-पाडिहेरे
तत्थ णं सागेए नयरे पडिवुद्धी नामं इक्खागरया परिवसइ-पउमावई देवी सुवुद्धी अमच्चे
साम-दंड- [भय-उवप्याण-नीति-सुपउत्त-नय-विहण्णू विहरई] तए णं पउमावईए देवीए अण्णया
कयाइ नागजण्णए चावि होत्था तए णं सा पउमावई देवी नागजण्णमुवद्धियं जाणित्ता जेणेव
पडिवुद्धिं [राया तेणेव उवागच्छइ उवागच्छिता करलपरिग्गहियं दसनहं सिरसावत्तं मत्थए अंजलि
कडु जएणं विजएणं वद्धावेइ वद्धावेत्ता] एवं वयासी-एवं खलु सामी मम कल्लं नागजण्णए भवि
स्सइ तं इच्छामि णं सामी तुत्थेहिं अत्थमणुण्णया सामी नागजण्णयं गमित्तए तुत्थे वि णं सामी मम

नागजण्णयंसि समोसरह तए णं पडिवुद्धी पउमावईए एयमद्धं पडिसुणेइ तए णं पउमावई पडि-
बुद्धिणा रण्णा अठ्ठणुण्णाया समाणी हइतुइहा कोडुंबिय-पुरिसे सदावेइ सदावेत्ता एवं वयासी-एवं
खलु देवाणुण्णिया मम कल्लं नागजण्णं भविस्सइ तं तुठ्ठे मालागारे सदावेह सदावेत्ता एवं वदाह-एवं
खलु पउमावईए देवीए कल्लं नागजण्णए भविस्सइ तं तुठ्ठे णं देवाणुण्णिया जल- थलय- [भास-
रप्यभूयं] दसद्धवण्णं मल्लं नागधरयंसि साहरह एगं च णं महं सिरिदामगंडं उवणेह

तए णं जल-थलय-भासरप्यभूएणं दसद्धवण्णेणं मल्लेणं नामाविह-भत्ति सुविरइयं हंस-
पिय- मयूर-कोंच-सारस-चक्रवाय-भयणसाल-कोइल-कुलोववेयं इहामिय- उसभ-नुरय- नर-
मगर- विहग-वालग-किनर-रुह-सरभ-चमर-कुंजर-वणलय-पउमलय-] मत्तिचित्तं महग्धं महरिहं
विउलं पुफ्फमंडवं विरएह तस्स णं बहुमज्झदेसभाए एगं महं सिरिदामगंडं जाव गंधद्धणिं मुयंतं
उल्लोयंसि ओलएह पउमावई देविं पडिवालेमाणा चिद्धइ तए णं ते कोडुंबिया जाव पउमावतिं देविं
पडिवालेमाणा चिद्धंति तए णं सा पउमावई देवी कल्लं [पाउप्पभायाए रयणीए जाव उद्धियम्भि सूरे
सहस्सरस्सिम्भि दिणवरे तेयसा जलंते] कोडुंबिय पुरिसे सदावेइ सदावेत्ता एवं वयासी-खिष्पामेव
भो देवाणुण्णिया सागेयं नयरं सभ्भितरबाहिरियं आसिय-सम्मज्जिओवलित्तं जाव गंधवड्ढिभूयं करेह
कारवेह च एयमाणत्तियं पच्चपिणह ते वि तहेव पच्चपिणंति तए णं सा पउमावई देवी दोच्चंपि
कोडुंबिय-पुरिसे सदावेइ सदावेत्ता एवं वयासी-खिष्पामेव भो देवाणुण्णिया लहुकरणजुत्तं जाव
धम्मियं जाणप्पवरं उवड्ढवेह ते वि तहेव उवड्ढवेति तए णं सा पउमावई देवी अंतो अंतेउरंसि ण्हाया
जाव धम्मियं जाणं दुरुद्धा तए णं सा पउमावई देवी नियग-परियाल-संपरिवुडा सागेयं नयरं
मज्झमज्झेणं निज्जाइ जेणेव पोक्खरणी तेणेव उवागच्छइ उवागच्छिता पोक्खरणिं ओगाहत्ति
ओगाहत्ता जलमज्झणं करेइ जाव परमसुइभूया उल्लपडसाइया जाइं तत्थ उप्पलाइं जाव ताइं
गेण्हइ जेणेव नागघरए तेणेव पहारेत्थ गमणाए तए णं पउमावईए देवीए दासचेडीओ बहूओ
पुफ्फपडलग-हत्थगयाओ धूवकडक्खुय-हत्थगयाओ पिद्धओ समणुगच्छंति तए णं पउमावई देवी
सव्विड्डीए जेणेव नागघरए तेणेव उवागच्छइ उवागच्छिता नागघरं अनुप्पविसइ लोमहत्थयं
परामुसइ जाव धूवं ड्हइ पडिवुद्धिं पडिवालेमाणी-पडिवालेमाणी चिद्धइ

तए णं से पडिवुद्धि ण्हाए हत्थियंखंधवरगए सकोरेंट [मल्लदामेणं छत्तेणं धरिज्जमाणेणं]
सेयवरचामराहिं वीइज्जमाणे हय-गय-रह-पवरजोहकलियाए चाउरंगिणीए सेणाए सद्धिं संपरिवुडे
महया भडचडगर- रह-पहकर-विंदपरिविकूखत्ते सागेयं नगरं मज्झमज्झेणं निग्गच्छइ निग्गच्छिता
जेणेव नागघरए तेणेव उवागच्छइ उवागच्छिता हत्थियंखाओ पच्चोरुहइ पच्चोरुहत्ता आलोए
पणामं करेइ करेत्ता पुफ्फमंडवं अनुप्पविसइ अनुप्पविसित्ता पासइ तं एगं महं सिरिदामगंडं तए णं
पडिवुद्धी तं सिरिदामगंडं मुचिरं कालं निरिक्खइ तंसि सिरिदामगंडंसि जायविहए सुवुद्धिं अमच्चं
एवं वयासी-तुभं देवाणुण्णिया मम दोच्चेणं बहूणि गामागर जाव सण्णिवेसाइं आहिंडंसि बहूणं य
राईसर जाव सत्थवाहपभिर्धं गिहाइं अनुप्पविससि तं अत्थि णं तुमे कहिंचि एरिसए सिरिदामगंडे
दिद्धपुब्बे जारिसए णं इमे पउमावईए देवीए सिरिदामगंडे तए णं सुवुद्धी पडिवुद्धिं गवं एवं
वयासी-एवं खलु सामी अहं अण्णया कयाइ तुठ्ठं दोच्चेणं भिहितं रायहाणिं गए तत्थ णं मए
कुमपस्सा रण्णो धूयाए पभावईए देवीए अत्तायाए मल्लोए संवच्छर-पडिलेहणंसि दिव्वे
रिदामगंडे दिद्धपुब्बे तस्स णं सिरिदामगंडस्स इमे पउमावईए देवीए सिरिदामगंडे सयसहस्स-

सुयक्त्वधो-१, अञ्जयण-८

७१

इमपि कलं न आग्ध इ तए णं पडिबुद्धी सुबुद्धिं अमच्चं एवं वयासी-केरिसिया णं देवाणुप्पिया मल्ली विदेहरायवरकन्ना जस्स णं संवच्छर-पडिलेहणयंसि सिरिदामगंडस्स पउमावईए देवीए सिरिदा-मगंडे सयसहस्सइमपि कालं न आग्ध इ तए णं सुबुद्धी पडिबुद्धिं इक्खागरायं एवं वयासी-एवं खलु सामी मल्ली विदेहरायवरकन्ना सुपइद्धियकुम्मुण्णय-चारुचरणा जाव पडिबुद्धा तए णं पडिबुद्धी सुबुद्धिस्स अमच्चस्स अंतिए एयमइं सोच्चा निसम्म सिरिदामगंडं-जणियहासे दूयं सद्दावेइ सद्दावेत्ता एवं वयासी-गच्छाहि णं तुमं देवाणुप्पिया मिहिलं रायहाणिं तत्थ णं कुंभगस्स रण्णो धूयं पभावईए अतयं मड्ढिं विदेहरायवरकत्तं मम भारियत्ताए वरेहि जइ वि य णं सा सचं रज्जुसुंका तए णं से दूए पडिबुद्धिणा रण्णा एवं वुत्ते समाणे हइतुट्ठे पडिसुणेइ पडिसुणेत्ता जेणेव सए गिहे जेणेव चाउग्धंटे आसरहे तेणेव उवागच्छइ उवागच्छत्ता चाउग्धंटे आसरहं पडिकप्पावेइ पडिकप्पावेत्ता दुरूढे हय गय-रह पवर-जोहकलियाए चाउरंगिणीए सेणाए सद्धिं संपरिवुडे] महया भउ-वडगरेणं साएयाओ निग्गच्छइ निग्गच्छित्ता जेणेव विदेहजणवए जेणेव मिहिला रायहाणीं तेणेव पहारेत्थ गमणाए 1371-68

(८७) तेणं कालेणं तेमं समएणं अंगनामं जणवए होत्था तत्थ णं चंपा नामं नवरी होत्था तत्थं णं चंपाए नवरीए चंदच्छाए अंगराया होत्था तत्थं णं चंपाए नवरीए अरहण्णगपामोक्खा बहवे संजत्ता-नावावाणियगा परिवसंति-अइद्धा जाव बहुजणस्स अपरिभूया तए णं से अरहण्णगे समणोवासए वावि होत्था-अहिगयजीवाजीवे वण्णओ तए णं तेसिं अरहण्णगपामोक्खाणं संजत्ता-नावावाणियगाणं अण्णया कयाइ एगयओ सहियाणं इमेयारूवे मिहोक्काहा समुल्लवे समुप्प-जित्ता-सेयं खलु अण्णं गणिमं च धरिमं च मेज्जं च पारिच्छेज्जं च भंडगं गहाय लवणसमुद्धं पोय-वहणेणं ओगाहित्तए ति कइ अण्णमण्णस्स एयमइं पडिसुणेति पडिसुणेत्ता गणिमं च धरिमं च मेज्जं च पारिच्छेज्जं च भंडगं गेण्हंति गेण्हित्ता सगडीसागडयं सज्जेति सज्जेत्ता गणिमस्स धरिमस्स मेज्जस्स पारिच्छेज्जस्स य भंडगस्स सगडी-सागडीयं भरेति भरेत्ता सोहणंसि तिहि-करण-नक्खत्त-मुहुत्तंसि विउल असणं पाणं खाइमं साइमं उवक्खडावेति उवक्खडावेत्ता मित्त-नाइ-नियग-सयण-संबंधि-परिजणं भोयणवेलाए [भुंजावेति भुंजावेत्ता मित्त-नाइ-नियग-सयण-संबंधि-परिजणं] आपुच्छति आपुच्छित्ता सगडीसागडियं जोयंति जोइत्ता चंपाए नवरीए मज्झमज्झेणं निग्गच्छति निग्गच्छित्ता जेणेव गंभीरए पोयपट्टणे तेणेव उवागच्छति उवागच्छित्ता सगडीसागडियं भोयंति पोयवहणं सज्जेति सज्जेत्ता गणिमस्स [धरिमस्स मेज्जस्स पारिच्छेज्जस्स य भंडगस्स पोयवहणं भरेति तंदुलाण य समियस्स य तेलस्स य धयस्स य गुलस्स य गोरसरस्स य उदगस्स य भावणाण य ओसहाण य भेसज्जाण य तणस्स य कइस्स य आवरणाण य पहरणाण य अण्णेसिं च बहूणं पोयव-हणपाउगाणं दव्वाणं पोयवहणंभरेति सोहणंसि तिहि-करण-नक्खत्त-मुहुत्तंसि विउलं असणं पाणं खाइमं साइमं उवक्खडावेति उवक्खडावेत्ता मित्त-नाइ-नियग-सयण-संबंधि-परिजणं भोय-णवेलाए भुंजावेति भुंजावेत्ता मित्त-जाव परिजणं आपुच्छति जेणेव पोयट्टाणे तेणेव उवागच्छति

तए णं तेसिं अरहण्णग पामोक्खाणं बहूणं संजत्ता-नावा वाणियगाणं जाव परिजणा ताहिं इइहिं [कत्ताहिं पियाहिं मणुण्णाहिं मणामाहिं ओरालाहिं] वाग्गूहिं अभिनंददंता य अभिसंयुणमाणा य एवं वयासी-अज्ज ताय भाय माउल भाइणेज्ज भगवया समुद्धेणं अभिरक्खिज्जमाणा- अभि-रक्खिज्जमाणा चिरं जीवह मइं च भे पुणरवि लद्धेइ कयकज्जे अणहसमग्गे निजणं घरं हव्वमागए

पासामो त्ति कट्टु ताहिं सोमाहिं निदाहिं दीहाहिं सप्पिवासहिं पप्पुयाहिं दिट्ठीहिं निरिक्खमाणा
 मुहुत्तमेत्तं संचिद्धंति तओ समाणिएसु पुप्फबलकम्भेसु दित्रेसु सरस- रत्त-चंदण-दइर-पंचंगुलितलेसु
 अनुक्खित्तंसि ध्वंसि पूइएसु समुद्दवाएसु संसारियासु बलयासु ऊसिएसु सिएसु झयगोसु
 पट्टुप्पवाइएसु तूरेसु जइएसु सब्वसउणेसु गहिएसु तयवरसासणेसु महया उक्किद्ध- सीहनाय-
 [बोल-कलकल] रवेणं पक्खुभिय- महासमुद्द-रवभूयं पिद मेइणिं करेमाणा एगिदिं [एगाभिमुहा
 अरहण्णगपामोक्खा संजत्ता- नावा]-वाणियगा नावाए दुक्खं तओ पुस्समाणवो वक्कमुदाहु-हं
 भो सव्वेसिमेव भे अत्थसिद्धी उवट्ठियाइं कल्लाणाइं पडिगहयाइं सव्वपावाइं जुत्तो पूसो विजओ
 मुहुत्तो अयं देसकालो ताओ पुस्समाणवेणं वक्कमुदाहिए हट्टुत्तुत्ता कण्णधार- कुच्छिधार-
 गत्थिज्ज-संजत्ता-नावावाणियगा वावा- रिसुं तं नावं पुत्तुच्छंगं पुत्तमुहिं बंधणेहिं तो मुंचंति तए णं सा
 नावा विमुक्कबंधणा पवणबल- समाहया ऊसियसिया विततपक्खा इव गरुलजुवइ गंगासलिल-
 तिकूख-सोयवेगेहिं संखुब्बमाणी-संखुब्बमाणी उम्भी-तरंग-मालासहस्साइं समइच्छमाणी- सम-
 इच्छमाणी कइवएहिं अहोरत्तेहिं लवणसमुद्दं अणेगाइं जोयणसयाइं ओगाढा तए णं तेसिं
 अरहण्णगपामोक्खाणं संजत्ता-नावावाणियगाणं लवणसमुद्दं अणेगाइं जोयणसयाइं ओगाढाणं
 समाणाणं वहुइं उप्पाइयसयाइं पाउब्बूयाइं तं जहा अकाले गज्जिए अकाले विज्जुए अकाले
 थणियसट्ठे अत्थिक्खणं- अत्थिक्खणं आगासे देवयाओ नच्चंति

तए णं ते अरहण्णगवज्जा संजत्ता-नावावाणियगा एणं च णं महं तालपिसायं पासंति-
 तालजंधं दिवंगयाहिं वाहाहिं फुट्टिसिं भमर-निगर-वरमासरासि- महिसकालगं भरिय-मेहवणं
 सुप्पणहं फास-सरिस-जीहं लंबोद्धं धवलवट्ट- असिलिद्धतिक्खधिर-पीण- कुडिल- दाढोवगूढवण-
 यंविक्कोसिय-धारसिजुयल-समसरिस-तणुय-चंचल-गलतरसलोल-चयल-फुरुफुरेंत-नित्थालियगा
 जीहं अवयत्थिय-महल्ल-विगय-बीभच्छ-लालपगलंत-रत्ततालुयं हिंगुलय-सगळ्भ-कंदरविलं व
 अंजणगिरिस्स अगिज्जालुगिंलंतवयणं आऊसिया- अक्खचम्पउ- इद्धगंडदेसं चीण- चिमिद्ध-
 वंक्-भग्गनासं रोसागय-धमधमंत-मारुय-निट्टर-खर-फरुसझुसिरं ओभुग्ग-नासियपुडं धाडुब्बड-
 रइय-भीसणमुहं उद्धमुहकण्णसक्कुलिय-महंतविगय-लोमसंखा-लग लंबंत-चलियकण्णं पिंगल-
 दिप्पंतलोवणं मिउडि-तडिनिडालं नरसिरमाल-परिणद्धविंधं विचित्तगोणस-सुबद्धपरिकरं अव-
 होलंत-फुप्पुयाचंत-सप्प-विच्छुय- गोधुंदुर-नउल-सरड- विरइय- विचित्त-वेयच्छामलियागं भोग-
 कूर-कण्हसप्प-धमधमंत-लंबंतकण्णपूरं मजार-सियाललइयखंधं दित्त- घुघुयंत- धूय- कय-
 मुंभरसिरं घंटारवेणं भीम-मयंकरं-कायर-जणहिययफोडणं दित्तं अट्टट्टहासं विणिम्भुयंतं वसा-
 रुहिर-पूय-मंस-मल-मलिण-पोच्चइतणुं उत्तासणयं विसालवच्छं पेच्छता भिन्नखमुह-नयणकण्णं
 वरवाध-चित्त-कत्ती-नियंसणं सरस- रुहिर- अणिट्ट- असुभ- अप्पिय- अकंत-वाग्गूहिं य तज्जयंतं-तं
 तालपिसायरूवं एज्जमाणं पासंति पासित्ता भीया [तत्था तसिया उच्चिगा] संजायभया अन्नमणस्स
 कायं समतुरंगेमाणा-समतुरंगेमाणा बहूणं इंदाणं य खंदाणं य रूद्धाणं य शिवाणं य वेसमणाणं य
 नागाणं य भूयाणं य जक्खाणं य अज्ज-कोट्टिकिरियाणं य बहूणि उवाइयसयाणि उवाइमाणा
 विद्धंति

तए णं से अरहण्णए सण्णोवासए तं दिव्वं पिसायरूवं एज्जमाणं पासइ पासित्ता अभीए
 अतत्थे अवलिए असंभते अणाउले अनुच्चिगे अभिण्णामुहरागनयणवण्णे अदीण-विमण-माणसे

पोयवहणस्स एगदेसंसि वत्थेणं भूमिं पमज्जइ पमज्जिता टाणं ठाइ ठाइत्ता करयल-[परिगहिवं सिरसावत्तं मत्थए अंजलिं कट्ठु] एवं वयासी-नमोत्थु णं अरहंताणं भगवताणं जाव सिद्धिगइनाम-धेज्जं टाणं संपताणं जइ णं हं एतो उवसग्गाओ मुंचामि तो मे कप्पइ पारित? अह णं एत्तो उवसग्गाओ न मुंचामि तो मे तहा पच्चक्खाएयव्वे ति कट्ठु सागारं भत्त पच्चक्खाइ ताए णं से पिसायरूवे जेणेव अरहण्णगे समणोवासए तेणेव उवागच्छइ उवागच्छिता अरहण्णगं एवं वयासी-हंभो अरहण्णगा अपत्थियपत्थया [दुरंत-पंत-लक्खणा हीणपुण्ण-चाउइसिया सिरि-हिरि-धिइ-कित्ति] परिवत्रिया नो खलु कप्पइ तव सील-व्वय-गुण-वेरमण-पच्चक्खाण-पोसहोववासाइं चालित्तए वा खोभित्तए वा खंडित्तए वा भंजित्तए वा उज्झित्तए वा परिछइत्तए वा तं जइ णं तुमं सील-व्वय-गुण-वेरमण पच्चक्खाण-पोसहोववासाइं न चालेसि न खोभेसि न खंडेसि व भंजेसि न उज्झसि] न परिछयसि तो ते अहं एयं पोयवहणं दोहि अंगुलियाहिं गेण्हामि गेण्हिता सत्तइत्तल-लप्पमाणेत्ताइं उड्डं वेहासं उव्विहामि अंतोजलंसि निव्वोलेमि जेणं तुमं अट्ट-दुहट्ट-वसट्टे असमा-हिपत्ते अकाले चेव जीवियाओ ववरोविज्जसि ताए णं से अरहण्णगे समणोवासए तं देव मणसा चेव एवं वयासी-अहं णं देवाणुप्पिया अरहण्णए नामं समणोवासए अहिगयजीवाजीवे नो खलु अहं सक्कं केणइ देवेण वा [दानवेण वा जक्खेण वा रक्खसेणं वा किन्नरेण वा किंपुरिसेण वा महोरगेण वा गंधव्वेण वा निगंथाओ पावयणाओ चालित्तए वा खोभित्तए वा विपरिणामित्तए वा तुमं णं जा सद्धा तं करेहि ति कट्ठु अभीए जाव अभिन्नमुहराग नवणवण्णे अदीण-विमण-माणसे निच्चले निष्फंदे तुसिणीए धम्मज्जाणोवगए विहरइ ताए णं से दिव्वे पिसायरूवे अरहण्णगं समणोवासगं दोछंपि तच्चंपि एवं वयासी-हंभो अरहण्णगा जाव धम्मज्जाणोवगए विहरइ ताए णं से दिव्वे पिसायरूवे अरहण्णगं धम्मज्जाणोवग यं पासइ पासित्ता वलियतरागं आसुरत्तं तं पोयवहणं दोहिं अंगुलियाहिं गेण्हइ गेण्हिता सत्तइत्तल [प्पमाणेत्ताइं उड्डं वेहासं उव्विहइ उव्विहित्ता अरहण्णगं एवं वयासी-हंभो अरहण्णगा अपत्थियपत्थया

नो खलु कप्पइ तव सील-व्वय-गुण-वेरमण-पच्चक्खाण-पोसहोववासाइं चालित्तए वा खोभित्तए वा खंडित्तए वा भंजित्तए वा उज्झित्तए वा परिछइत्तए वा तं जइ णं तुमं सीलव्वय-गुण-वेरमण-पच्चक्खाण-पोसहोववासाइं न चालेसि न खोभेसि न खंडेसि न भंजेसि न उज्झसि न परिछयसि तो ते अहं एयं पोयवहणं अंतो जलंसि निव्वोलेमि जेणं तुमं अट्ट-दुहट्ट-वसट्टे असमा-हिपत्ते अकाले चेव जीवियाओ ववरोविज्जसि ताए णं से अरहण्णगे समणोवासए तं देवं मणसा चेव एवं वयासी-अहं णं देवाणुप्पिया अरहण्णए नामं समणोवासए-अहिगयजीवाजीवे नो खलु अहं सक्कं केणइ देवेणं वा दानवेण वा जक्खेण वा रक्खसेण वा किन्नरेण वा किंपुरिसेण वा महोरगेणं वा गंधव्वेण वा निगंथाओ पावयणाओ चालित्तए वा खोभित्तए वा विपरिणामित्तए वा तुमं णं जा सद्धा तं करेहि ति कट्ठु अभीए जाव अभिन्नमुहराग-नयनवण्णे अदीण-विमण-माणसे निच्चले निष्फंदे तुसिणीए धम्मज्जाणोवगए विहरइ ताए णं से पिसायरूवे अरहण्णगं जाहे नो संचाएइ निगंथाओ पावयणाओ चालित्तए वा खोभित्तए वा विपरिणामित्तए वा ताहे संते [तंते परित्तंते] निव्विण्णे तं पोयवहणं सणियं-सणियं उवारिं जलस्स टवेइ टवेत्ता तं दिव्वं पिसायरूवं पडिसाहरेइ पडिसाहरेत्ता दिव्वं देवरूवं विउव्वइ-अंतलिक्ख पडिव्वे सखिखिणीयाइं दसद्धवण्णाइं बत्थाइं पवरं परिहिए अरहण्णगं समणोवासगं एवं वयासी-हं भो अरहण्णगा समणोवासया धत्तेसि णं तुमं

देवाणुप्पिया [पुत्तेसि णं तुं देवाणुप्पिया कयत्थेसि णं तुमं देवाणुप्पिया कयलक्खणेसि णं तुमं देवाणुप्पिया सुलद्धे णं तव देवाणुप्पिया माणुस्सए जम्म] जीवियफले जस्स णं तव निग्गंधे पावयणे इमेचारूवा पडिवत्ती लद्धा पत्ता अभिसमण्णागया

एवं खलु देवाणुप्पिया सक्के देविंदे देवराया सोहम्मे कप्पे सोहम्मवडिंसए विमाणे सभाए सुहम्माए बहूणं देवाणं मज्झगए महया-महया सद्देणं एवं आइक्खइ एवं भासेइ एवं पन्नवेइ एवं परूवेइ-एवं खलु देवा जंबुदीवे दीवे भारहे वासे चंपाए नयरीए अरहण्णाए समणोवात्सए अभिगयजीवाजीवे नो खलु सक्के केणइ देवेण वा दाणवेण वा जक्खेण वा रक्खसेण वा किन्नरेण वा किंपुरिसेण वा महोरणेण वा गंधव्वेण वा निग्गंधाओ पावयणाओ चालिताए वा खोभिताए वा विपरिणामिताए वा तए णं अहं देवाणुप्पिया सक्कस्स देविंदस्स देवरण्णो नो एयमट्ठं सद्दहामि पत्तियामि रोएमि ते णं मम इमेचारूवे अज्झत्थिए [चित्थिए पत्थिए मणोगए संकप्पे] समुप्पजित्तय गच्छामि णं अहं अरहण्णागस्स अंतियं पाउट्ठवामि जाणामि ताव अहं अरहण्णागं-किं पियधम्मे नो पियधम्मे दढधम्मे नो दढधम्मे सील-व्वय-गुण-[वेरमण-पच्चक्खाण-पोसहोववासाइ किं चालेइ नो चालेइ खोभेइ नो खोभेइ खंडेइ नो खंडेइ भंजेइ नो भंजेइ उज्झइ नो उज्झइ परिच्चयइ] नो परिच्चयइ ति कट्ठु एवं संपेहेमि संपेहेत्ता ओहिं पउंजामि पउंजित्ता देवाणुप्पियं ओहिणा आभोएमि आभोएत्ता उत्तरपुरत्थियं दिसीभागं अवक्कमामि उत्तरवेउच्चियं रूवं विउच्चामि विउच्चित्ता ताए उक्किट्ठाए देवगईए जेणेव लवणसमुद्धे जेणेव देवाणुप्पिए तेणेव उवागच्छामि उवागच्छित्ता देवाणुप्पिवस्स उवसग्गं करेमि नो चेव णं देवाणुप्पिया भीए [तत्थे चलिए संभंते आउले उच्चिये भिण्णमुहराग-नयणवण्णे दीणविमणमाणसे जाए] तं जं णं सक्के देविंदे देवराया एवं वचइ सद्धे णं एसमट्ठे तं दिट्ठे णं देवाणुप्पियस्स इइदी [जुई जसा बलं विरीयं पुरिसकार]-परक्कमे लद्धे पत्ते अभिसमण्णागए तं खामेमि णं देवाणुप्पिया खमेसु णं देवाणुप्पिया पंजलिउडे पायवडिए एयमट्ठं विणएणं भुज्जो-भुज्जो खामेइ अरहण्णागस्स य दुवे कुंडलजुये दलयइ दलइत्ता जामेव दिसिं पाउट्ठमूए तामेव दिसिं पडिगए ।७५।-६९

(८८) तए णं से अरहण्णाए निरुवसग्गपिति कट्ठु पडिमं पारेइ तए णं ते अरहन्गपामोक्खा [संजत्ता-नावा] वाणियगा दक्खिणाणुकूलेणं वाएणं जेणेव गंभीरए पोचट्ठाणे तेणेव उवागच्छंति उवाग्छित्ता पोयं लंबेति लंबेत्ता सगडि-सागडं सज्जेति तं गणिमं धरिमं मेज्जं परिच्छेज्जं च सगडिसागडं संकामेति संकामेत्ता सगडि-सागडं जोविंति जोवित्ता जेणेव मिहिला तेणेव उवागच्छंति उवागच्छित्ता मिहिलाए रायहाणीए बहिया अण्णुज्जाणंसि सगडि-सागडं मोएंति मोएंत्ता महत्थं महरिहं विउलं रायरिहं पाहुडं दिव्वं कुंडलजुलं च गेण्हति गेण्हित्ता मिहिलाए रायहाणीए अनुप्पविसंति अनुप्पविसित्ता जेणेव कुंभए राया तेणेव उवागच्छंति उवागच्छित्ता करयल [पारिग्गहिवं सिरसावत्तं मत्थए अंजलि कट्ठु] महत्थं [महधं महरिहं विउलं रायरिहं पाहुडं] दिव्वं कुंडलजुयलं च उवणेति तए णं कुंभए राया तेसि संजत्ता [नावावाणियगणं तं महत्थं जाव कुंडल-जुयलं च पडिच्छइ पडिच्छित्ता मल्लि विदेहवररायकन्नं सद्दावेइ सद्दावेत्ता तं दिव्वं कुंडलजुयलं मल्लीए विदेह रायकन्नगाए पिणद्धेइ पिणद्धेत्ता पडिविसज्जेइ तए णं से कुंभए राया ते अरहन्गपामोक्खे [संजत्ता-नावा]-वाणियगे विपुलेणं वत्थ-गंध-[मल्लालंकारेणं य सक्कारेइ सम्माणेइ सक्कारेत्ता सम्माणेत्ता] उस्सुककं विवरइ विवरित्ता रावमग्गमोगाढे य आवासे विवरइ विवरित्ता

पडिविसज्जेइ

तए णं अरहण्णग जेणेव रायमग्गमोगाढे आवासे तेणेव उवागच्छंति उवागच्छिता भंडववहरणं करंति पडिभंडे गेण्हंति गेण्हिता सगडी-सागडं भरंति भरेत्ता जेणेव गंभीरए पोयपट्टणे तेणेव उवागच्छंति उवागच्छिता पोयवहरणं सज्जेति सज्जेत्ता भंडं संकामेति संकामेत्ता दक्खिणाणुकूलेणं वाएणं जेणेव चंपाए पोयट्टाणे तेणेव उवागच्छंति उवागच्छिता पोयं लंबेति लंबेत्ता सगडी-सागडं सज्जेति सज्जेत्ता तं गणिमं धरिमं मेज्जं परिच्छेज्जं च सगडी-सागडं संकामेति संकामेत्ता [सगडि-सागडं जोविंति जोविता जेणेव चंपानयरी तेणेव उवागच्छंति उवागच्छिता चंपाए रायहाणीए वहिया अग्गुज्जाणंसि सगडि-सागडं मोएति मोएत्ता महत्थं महग्गं महरिहं विउलं रायारिहं] पाहुडं दिव्वं च कुंडलजुयलं गेण्हंति मोएत्ता महत्थं [महग्गं महरिहं विउलं रायारिहं पाहुडं दिव्वं च कुंडलजुयलं] उवणंति तए णं चंदच्छाए अंगराया तं महत्थं पाहुडं दिव्वं च कुंडलजुयलं पडिच्छइ पडिच्छिता ते अरहन्नगपामोक्खे एवं वयासी तुब्भे णं देवाणुप्पिया चहूणि गामागार जाव सण्णिवेसाइ आहिडह लवणसमुद्दं च अभिक्खणं अभिक्खणं पोयवहणेहिं ओहाहेह तं अत्थियाइं भे केइ कर्हिंघिं अच्छेरए दिट्टुपुब्बे तए णं ते अरहन्नगपामोक्खा चंदच्छायं अंगरायं एवं वयासी-

एवं खलु सामी अन्हे इहेव चंपाए नयरीए अरहन्नगपामोक्खा वहवे संजत्ताग- नावा-वाणियगा परिवसामो तए णं अन्हे अन्नया कयाइ गणिमं च धरिमं च मेज्जं च परिच्छेज्जं च गेण्हामो तहेव अहीण अइरितं जाव कुंभगरस रण्णो उवणेमो ते णे रो कुंभए मल्लीए विदेहरायवरकत्राए तं दिव्वं कुंडलजुयलं पिणज्जेइ पिणज्जेत्ता पडिविसज्जेइ तं एस णं सामो अन्हेहिं कुभगरायभवणंसि मल्ली विदेहरायवरकत्रा अच्छेरए दिट्ठे तं नो खलु अण्णा कावि तारिसिया देयकत्रा वा [असुरकुन्ना वा नागकत्रा वा जक्खकत्रा वा गंधव्वकत्रा वा रायकत्रा वा] जारिसिया णं मल्ली विदेहरायवरकत्रा तए णं चंदच्छाए अरहण्णगपामोक्खे सक्कारेइ सम्माणेइ सक्कारेत्ता सम्माणेत्ता उम्सुककं वियरइ वियरित्ता पडिविसज्जेइ तए णं चंदच्छाए वाणियग-जाणियहासे दूयं सद्दावेइ सद्दावेत्ता एवं वयासी-जाव मल्लिं विदेहरायवरकत्रं मम भारियत्ताए वरेहि जइ वि च णं सा सयं रज्जमुंका तए णं से दूए चंदच्छाएणं एवं वुत्ते समाणे हट्टुत्तुत्ते जाव पहारेत्थ गमणाए ।१९६-७१

(८९) तेणं कालेणं तेमं समएणं कुणाला नाम जणवए होत्था तत्थ णं सावत्थीनाम नयरी होत्था तत्थ णं रूप्पी कुणालाहिवई नाम राया होत्था तस्स णं रूप्पिस्स घूया धारिणीए देवीए अत्तया सुवाहू नाम दारिया होत्था-सुकमाल-पाणिपाया रूवेण य जोव्वणेण य सावण्णेण उक्ककट्ठा उक्ककट्ठसरीरा जाया यावि होत्था तीसे णं सुवाहूए दारियाए अण्णया चाउम्मासिय-मज्जणए जाए यावि होत्था तए णं से रूप्पी कुणालाहिवई सुवाहूए दारियाए चाउम्मासिय-मज्जणयं उवट्ठियं जाणइ जाणित्ता क्रोडुंविद्यपुरिसे सद्दावेइ सद्दावेत्ता एवं वयासी-एवं खलु देवाणुप्पिया सुवाहूए दारियाए कळं चाउम्मासिय-मज्जणए भविस्सइ तं तुब्भे णं रायमग्गमोगाढंसि चउक्कंसि जल- थलय-दसद्धवणं मल्लं साहरह [जाव एणं महं सिरिदामगंडं गंधद्वणिं मुयंतं उल्लोयंसि ओलएह ते वि तहेव] ओलयंति तए णं से रूप्पी कुणालाहिवई सुवण्णगर-सेणिं सद्दावेइ सद्दावेत्ता एवं वयासी-खिण्यामेव भो देवाणुप्पिया रायमग्गमोगाढंसि पुप्फमंडबंसि नाणाविहपंचवण्णेहिं तंदुलेहिं नगरं आलिहह तस्स बहुमज्जदेसभाए पइयं एएह एयमाणंतियं पच्चप्पिणह ते वि तहेव पच्चप्पिणंति तए णं से रूप्पी कुणालाहिवई हत्थिखंधवरगए चाउरंगिणीए सेणाए महया भड-[चडगर-रह- पहकर-

विदपरिक्खिते] अंतेउर-परियाल-संपरिवुडे सुवाहुं दारियं पुरओ कट्ट जेणेव रायमग्गे जेणेव पुष्फमंडवे तेणेव उवागच्छइ उवागच्छिता हत्थिखंधाओ पच्चोरूहइ पच्चोरूहिता पुष्फमंडवे अनुप्पविसइ अनुप्पविसिता सीहासणवरगए पुरत्थामुहे सण्णिसण्णे तए णं ताओ अंतेउरियाओ सुवाहुं दारियं पट्टयंसि दुरुहेति दुरुहेत्ता सेयापीयएहिं कलसेहिं ण्हाणेति ण्हाणेत्ता सव्वालं-कारविभूसियं करेति करेत्ता पिउणो पाचवंदियं उवणेति तए णं सुवाहुं दारिया जेणेव रूप्पी राया तेणेव उवागच्छइ उवागच्छिता पायग्गहणं करेइ

तए णं से रूप्पी राया सुवाहुं दारियं अंके निवेसेइ निवेसिता सुवाहुं दारियाए रूवेण य जोव्वणेण य लावण्णेण य जावविन्हए वरिसधरं सद्दावेइ सद्दावेत्ता एवं वयासी-तुमं णं देवाणुप्पिया मम दोच्चेणं बह्णि गामगार-नगर [जाव सण्णिवेसाइं आहिंइसि बहूं य राईसर जाव सत्थवाह-पभिईणं] गिहाणि अनुप्पविससि तं अत्थियाइं तेकस्सइ रण्णा वा ईसरस्स वा कहिंघि एयारिसए मज्जणए दिट्ठपुञ्जे जारिसए णं इमीसे सुवाहुं दारियाए मज्जणए तए णं से वरिसधरे रूप्पिं रायं करयल परिग्गहियं सिरसावत्तं मत्थए अंजलिं कट्ट एवं वयासी-एवं खलु सामी अहं अण्णया तुब्भं दोच्चेणं मिहिलं गए तत्थ णं मए कुंभगस्स रण्णो धूयाए पभावईए देयीए अत्थयाए मल्लीए विदेहरायवरकत्रगए मज्जणए दिट्ठे तस्स णं मज्जणगस्स इमे सुवाहुं दारियाए मज्जणए मयसहस्स-इमपि कलं न अग्घइ तए णं से रूप्पी राया वरिसधरस्स अंतियं एयमट्ठं सोच्चा निसम्म मज्जणग-जणिय-हासे दूवं सद्दावेइ सद्दावेत्ता एवं वयासी-जाव मल्लिं विवेहरायवरकत्रं मम भारियत्ताएव रेहि जइ वि य णं सा सयं रज्जसुंका तए णं से दूए रूप्पिणा एदं वृत्ते समाणे हट्ठतुट्ठे जाव जेणेव मिहिला नयरी तेणेव पहारेत्थ गमणाए 1७७1-72

(९०) तेणं कालेणं तेणं समएणं कासी नामं जणवए होत्था तत्थ णं वाणारसी नामं नयरी होत्था तत्थ णं संखे नामं कासीराया होत्था तए णं तीसे मल्लीए विदेहवररायकत्राए अण्णया कयाइं तस्स दिव्वस्स कुंडलजुयलस्स संधी विसंघडिए यावि होत्था तए णं से कुंभए राया सुवण्णगारसेणिं सद्दावेइ सद्दावेत्ता एवं वयासी-तुब्भे णं देवाणुप्पिया इमस्स दिवस्स कुंडलजुयलस्स संधिं संघाडेह संघाडेत्ता एयमाणत्तियं पच्चप्पिणह तए णं सा सुवण्णगारसेणी एयमट्ठं तरुत्ति पडिसुणेइ पडिसुणेत्ता तं दिव्वं कुंडलजुयलं गेण्हइ गेण्हित्ता जेणेव सुवण्णगार-भिसियाओ तेणेव उवागच्छइ उवागच्छिता सुवण्णगार-भिसियासु निवेसेइ निवेसेत्ता बहूहिं आप्हिं य [उवाएहिं य उप्पत्तियाहिं य वेणइयाहिं य कम्मयाहिं य परिणामियाहिं य बुद्धीहिं] परिणामेमाणा इच्छंति तस्स दिव्वस्स कुंडलजुयलस्स संधिं घडित्ताए नो वेव णं संचाएइ घडित्ताए तए णं सा सुवण्णगारसेणी जेणेव कुंभए राया तेणेव उवागच्छइ उवागच्छिता करयल-[परिग्गहियं सिरसावत्तं मत्थए अंजलिं कट्ट जएणं विजएणं वद्धावेइ] वद्धावेत्ता एवं वयासी-एवं खलु सामी अज्ज तुम्हे अन्हे सद्दावेह जाव संधिं संघाडेत्ता एयमाणत्तियं पच्चप्पिणह तए णं अन्हे तं दिव्वं कुंडलजुयलं गेण्हामो गेण्हित्ता जेणेव सुवण्णगाए-भिसियाओ तेणेव उवगच्छामो जाव नो संचाएमो संधिं संघाडेत्ताए तए णं अन्हे सामी एयस्स दिव्वस्स कुंडलजुयलस्स अण्णं सरिसयं कुंडलजुयलं धडेमो तए णं से कुंभए राया तीसे सुवण्णगारसेणीए अंतिए सोच्चा निसम्म आसुरुत्ते रुट्ठे कुबिए चंडिकिक्कए मिसिमिसेमाणे तिवलियं भिउडिं निडाले साहट्ट एवं वयासी-केस णं तुब्भे कलाया णं भवह जे णं तुब्भे इमस्स दिव्वस्स कुंडलजुयलस्स नो संचाएह संधिं संघाडित्ताए ते सुवण्णगारे निव्विसए आणवेइ

तए णं ते सुवण्णगारा कुंभगेणं रण्णा निव्विसवा आणत्ता समाणा जेणेव साइंसाइं गिहाइं तेणेव उवागच्छंति उवागच्छिता सभंडमतोवगरणमायाए मिहिलाए रायहाणीए मज्झंमज्झेणं निक्खमंति निक्खमिता विदेहस्स जणवयस्स मज्झंमज्झेणं निक्खमंति निक्खमिता जेणेव कासी जणवए जेणेव वाणारसी नयरी तेणेव उवागच्छंति उवागच्छिता आगुज्जाणंसि सगडी-सागडं मोएंति मोएत्ता महत्थं जाव पाहुडं गेण्हंति गेण्हित्ता वाणारसीए नयरीए मज्झंमज्झेणं जेणेव संखे कासीरावतेणेव उवागच्छंति उवागच्छिता करयल-[परिणहियं सिरसावत्तं मत्थए अंजलि कट्टु जएणं विजएणं वद्धावेति वद्धावेत्ता पाहुडं उवणेति उवणेत्ता एवं वयासी-अन्हे णं सामी मिहिलाओ कुंभएणं रण्णा निव्विसवा आणत्ता समाणा इह हव्वमागया तं इच्छामो णं सामी तुव्वं बाहुच्छयापरिणहिया निब्भया निरुव्विणा सुहंसुहेणं परिवसित्तं तए णं संखे कासीरावा ते सुवण्णगारे एवं वयासी-किं णं तुब्भे देवाणुप्पिया कुंभएणं रण्णा निव्विसवा आणत्ता तए णं ते सुवण्णगारा संखं कासीरायं एवं वयासी-एवं खलु सामी कुंभगस्स रण्णो घूयाए पभावईए देवीए अत्तयाए मल्लीए विदेहरायवरकत्राए कुंडलजुयलस्स संधी विसंघडिए तए णं से कुंभए राया सुवण्णगारसेणं सद्दावेइ जाव निव्विसवा आणत्ता तं एएणं कारणेणं सामी अन्हे कुंभएणं रण्णा निव्विसवा आणत्ता तए णं से संखे कासीराया सुवण्णगारे एवं वयासी केरिसिया णं देवाणुप्पिया कुंभगस्स रण्णो घूया पभावइदेवीए अत्तया मल्ली विदेहरायवरकत्रा तए णं ते सुवण्णगारा संखं कासीरायं एवं वयासी-नो खलु सामी अण्णा कावि तारिसिया देवकन्ना वा [असुरकत्रा वा नागकत्रा वा जक्ककत्रा वा गंधव्वकत्रा वा रायकत्रा वा] जारिसिया णं मल्ली विदेहरायवरकत्रा तए णं से संखे कासीराया कुंडल-जणिय-हासे दूयं सद्दावेइ [सद्दावेत्ता एवं वयासी-त्राव मल्लिं विदेहरायवरकत्रं मम भारियत्ता वरेहि जइ वि य णं सा सयं रज्जसुंका तए णं से दूए संखेणं एवं वुत्ते समाणे हट्टुट्टे जाव जेणेव मिहिला नयरी तेणेव] पहारेत्थ गमणाए ॥७८१-७३

(९१) तेणं कालेणं तेणं समएणं कुरु नामं जणवए होत्था तत्थ णं हत्थिणाउरे नाम नयरे होत्था तत्थ णं अदीणसत्तु नामं राया होत्था जाव रज्जं पसासेमामे विहरइ तत्थ णं मिहिलाए तस्स णं कुंभगस्स रण्णो पुत्ते पभावईए देवीए अत्ताए अल्लीए अनुपपजायए मल्लदित्रे नामं कुमारे सुकुमाल-पाणिपाए जाव जुवराया यावि होत्था तए णं मल्लदित्रे कुमारे अन्नया कयाइ कोडुंविद्यपुरिसे सद्दावेइ सद्दावेत्ता एवं वयासी-गच्छह णं तुब्भे मम पमदवणंसि एणं महं चित्तसभं करेह-अणेग-खंभसयसण्णिविट्ठं एयमाणत्तियं पच्चप्पिणह तेवि तहेव पच्चप्पिणंति तए णं से मल्लदित्रे कुमारे चित्तगर-सेणं सद्दावेइ सद्दावेत्ता एवं वयासी-तुब्भे णं देवाणुप्पिया चित्तसभं हाव-भाव-विलास-विब्बोयकलिएहिं रूवेहिं चित्तेह चित्तेत्ता एयमाणत्तियं पच्चप्पिणह तए णं सा चित्तगर-सेणी एयमट्ठं तहत्ति पडिसुणेइ पडिसुणेत्ता जेणेव सयाइ गिहाइं तेणेव उवागच्छइ उवागच्छिता तूलियाओ वण्णाए य गेण्हइ गेण्हित्ता जेणेव चित्तसभा तेणेव अनुप्पविसइ अनुप्पविसित्ता भूमिभागे विरचत्ति विरचित्ता भूमि सज्जेइ सज्जेत्ता चित्तसभं हाव-भाव-विलास-विब्बोयकलिएहिं रूवेहिं चित्तेउं पयत्ता यावि होत्था तए णं एगस्स चित्तगरस्स इमेयारूवा चित्तगर-लल्ली-लद्धा पत्ता अभिसमण्णा-गया-जस्स णं दुपयस्स वा चउपयस्स वा अपयस्स वा एगदेसमवि पासइ तस्स णं देसानुसारेणं तयाणुरूवं निव्वत्तेइ तए णं से चित्तगरे मल्लीए जवणियंतरियाए जालंतरेण पायंगुडुं पासइ तए णं तस्स चित्तगरस्स इमेयारूवे अज्जत्थिए जाव समुप्पजित्था-सेयं खलु ममं मल्लीए विदेहरायवर-

कत्राए पायगुड्डाणुसारेणं सरिसगं [सरित्तयं सरिव्वयं सरिसलावण्ण-रूव-जोव्वण] गुणोववेयं रूवं निव्वत्तित्तए-एवं संपेहेइ संपेहेता भूमिभागं सज्जेइ सज्जेता मल्लीए विदेहरायवरकत्राए पायंगुड्डा-सारेणं सरिसगं जाव रूवं निव्वत्तेइ तए णं सा चित्तगर-सेणी चित्तसभं हाव-भाव जाव चित्तेइ चित्तेता जेणेव मल्लदित्रे कुमारे तेणेव उवागच्छइ उवागच्छित्ता एयमाणत्तियं पच्चप्पिणइ

तए णं से मल्लदित्रे कुमारे चित्तगर-सेणि सक्कारेइ सम्माणेइ सक्कारेत्ता सम्माणेत्ता विपुलं जीवियारिहं पीइदाणं दलयइ दलइत्ता पडिविसज्जेइ तए णं से मल्लदित्रे कुमारे प्हाए अंतेउर-परियाल-संपरिवुडे अम्मधाईए सद्धि जेणेव चित्तसभा तेणेव उवागच्छइ उवागच्छित्ता चित्तसभं अनुप्पविसइ अनुप्पविसित्ता हाव-भाव-विलास-विब्वोयकलिचाई रूवाइं पासमाणे-पासमाणे जेणेव मल्लीए विदेहरायवरकत्राए तयाणुरूवे रूवे निव्वत्तिए तेणेव पहारेत्थ गमणाए तए णं से मल्लदित्रे कुमारे मल्लीए विदेहरायवरकत्राए तयाणुरूवे रूवं निव्वत्तियं पासइ पासित्ता इमेचारूवे अज्झत्थिए जाव समुत्थत्थिया - एस णं मल्ली विदेहरायवरकत्रे त्ति कट्टु लज्जिए विलिए वेड्डे सणियं-सणियं पच्चोसक्कइ तए णं तं मल्लदित्रं कुमारं अम्मधाई सणियं-सणियं पच्चोसक्कत्तं पासित्ता एवं वयासी-किण्णं तुपं पुत्तां लज्जिए विलिए वेड्डे सणियं-सणियं पच्चोसक्कसि तए णं से मल्लदित्रे कुमारे अम्मधाई एवं वयासी-जुत्तं णं अम्मो मम जेड्डाए भगिणीए गुरु-वेदयभूयाए लज्जणिज्जाए मम चित्तसभं अनुपविसित्ताए तए णं अम्मधाई मल्लदित्रं कुमारं एवं वयासी-नो खलु पुत्ता एस मल्ली विदेहरायवरकत्रा एस णं मल्लीए विदेहरायवरकत्राए चित्तगरएणं तयाणुरूवे रूवे निव्वत्तिए तए णं से मल्लदित्रे कुमारे अम्मधाईए एयमद्धं सोच्चा निसम्मं आसुरुत्ते एवं वयासी-केस णं भो से चित्ताए अपत्थिय [पत्थए दुरंत-पंत-लकवणे हीणपुण्णचाउहसिए सिरि-हारे धिइ-कित्ति] परिवज्जिए जे णं मम जेड्डाए भगिणीए गुरु-देवयभूयाए लज्जणिज्जाए मम चित्तसभाए तयाणुरूवे रूवे निव्वत्तिए त्ति कट्टु तं चित्तगरं वज्जं आणवेइ

तए णं सा चित्तगर-सेणी इमीसे कहाए लद्धड्डा समाणा जेणेव मल्लदित्रे कुमारे तेणेव उवागच्छइ उवागच्छित्ता करयलपरिग्गहिंयं [सिरसावत्तं मत्थए अंजलिं कट्टु जएणं विजएणं वद्धावेइ] वद्धावेत्ता एवं वयासी- एवं खलु सामी तस्स चित्तगरस्स इमेयारूवा चित्तगर-लद्धी लद्धा पत्ता अभिसमण्णागया-जस्स णं दुपयस्स वा [चउप्पयस्स वा अपयस्स वा एगदेसमवि पासइ तस्स णं देसाणुसारेणं तयाणुरूवे रूवं] निव्वत्तेइ तं ना णं सामी तुब्भे तं चित्तगरं वज्जं आणवेह तं तुब्भे णं सामी तस्स चित्तगरस्स अप्णं तयाणुरूवं दंडं निव्वत्तेहं तए णं से मल्लदित्रे कुमारे तस्स चित्तगरस्स संडासगं छिंदावेइ छिंदावेत्ता निव्विसंयं आणवेइ तए णं से चित्तगरे मल्लदित्रेणं कुमारेणं निव्विसए आणत्ते समाणे सभंडमत्तो-वगरणमायाए मिहिलाओ नयरीओ निक्खमइ निक्खमिता विदेहस्स जणवयस्स मज्झमज्झेणं जेणेव कुरुजणवए जेणेव हत्थिणाउरे नयरे तेणेव उवागच्छइ उवाग-च्छित्ता भंडनिक्खेवं करेइ करेत्ता चित्तफलं सज्जेइ सज्जेता मल्लीए विदेहरायवरकत्राए पायंगुड्डाणु-सारेण रूवं निव्वत्तेइ निव्वत्तेत्ता ककखंतंरंसि षुब्भइ घुब्भित्ता महत्थं जाव पाहुडं गेण्हइ गेण्हित्ता हत्थिणाउरस्स नयरस्स मज्झमज्झेणं जेणेव अदीणसत्तूं राथा तेणेव उवागच्छइ उवागच्छित्ता करयल जाव वद्धावेइ वद्धावेत्ता पाहुडं उवणेइ उवणेत्ता एवं वयासी-एवं खलु अहं सामी मिहि-लाओ रायहाणीओ कुंभगस्स रण्णो पुत्तेण पभावईए देवीए अत्तएणं मल्लदित्रेणं कुमारेणं निव्विसए आणत्ते समाणे इहं हव्वमागए तं इच्छामि णं सामी तुब्भं बाहुच्छाया-परिग्गहिए जाव परिवसितए

तए णं से अदीणसत्तू राया तं चित्तगरं एवं वयासी-किण्णं तुमं देवाणुप्पिया मल्लदित्रेणं निव्विसए आणत्ते तए णं से चित्तगरे अदीणसत्तू रायं एवं वयासी-एवं खलु सामी मल्लदित्रे कुमारे अण्णया कयाइ चित्तगर-सेणि सद्दावेइ सद्दावेत्ता एवं वयासी-तुत्थे णं देवाणुप्पिया मम चित्तसमं हाय-भाव-विलास-विब्बोयकलिएहिं रूवेहिं चित्तेह तं चेव सव्वं भाणियव्वं जाव मम संडासगं छिंदावेइ छिंदावेत्ता निव्विसयं आणवेइ एवं खलु अहं सामी मल्लदित्रेणं कुमारेणं निव्विसए आणत्ते तए णं अदीणसत्तू राया तं चित्तगरं एवं वयासी से केरिसए णं देवाणुप्पिया तुमे मल्लीए विदेह-रायवरकत्राए तयाणुरूवे रूवे निव्वत्तिए तए णं से चित्तगरे ककखंतरोओ चित्तफलगं नीणेइ नीणेत्ता अदीणसत्तुरास उवणेइ उवणेत्ता एवं वयासी-एस णं सामी मल्ली विदेहरायवरकत्राए तयाणुरूवस्स रूवस्स केइ आगार-भाव-पडोवारे निव्वत्तिए नो खलु सकका केणइ देवेण वा [दाणवेण वा जक्खेण वा रक्खसेण वा किन्नरेण वा किंपुरिसेण वा मोहरणेण वा गंधव्वेण वा] मल्लीए विदेहरायवरकत्राए तयाणुरूवे रूवे निव्वत्तिए तए णं से अदीणसत्तू पडिरूवं-जणिय-हासे दूयं सद्दावेइ सद्दावेत्ता एवं वयासी-[जाव मल्लि विदेहरायवरकत्रं मम भारियत्ताए वरेहिं जइ वि य णं सा सवं रअसुंका तए णं से दूए अदीणसत्तुणा एवं वुत्ते समाणे हइतुइ जाव जेणेव मिहिला नवरी तेणेव] पहारेत्थ पणणाए [७९] -74

(९२) तेणं कालेणं तेणं समाणं पंचाले जणवए कपिलपुरे नवरे जियसत्तू नामं राया पंचालाहिवइ तस्स णं जियसत्तुस्स धारिणीपामोक्खं देवीसहरसं ओरोहे होरथा तत्थ णं मिहिलाए चोक्खा नामं परिव्वाइया-रिउव्वेय-[वज्जुव्वेद-सामवेद-अहव्वणवेद-इतिहासपंचमाणं निघंटुख-द्वामं संगोवंगाणं सरहस्साणं चउण्हं वेदाणं सारया जाव वंभण्णएसु य सत्थेसु] सुपरिणिट्ठिया याधि होत्था तए णं सा चोक्खा परिव्वाइया मिहिलाए वहुणं राईसर जाव सत्थवाहपभिईणं पुरओ दाणधम्मं च सोयधम्मं च तित्थाभिसेयं च आघवेमाणी पन्नवेमाणी परूवेमाणी उवदंसेमाणी विहरइ तए णं सा चोक्खा अन्नया कयाइ तिदंडं च कुंडियं च जाव धाउरत्ताओ य गेण्हइ गेण्हित्ता परिव्वाइयावसहाओ पडिनिक्खमइ पडिनिक्खमित्ता पविरलपरिव्वाइया-सत्तिं संपरिवुडा मिहिलं रायहाणि मज्झमज्झेणं जेणेव कुंमगस्स रण्णो भवणे जेणेव कत्रंतेउहे जेणेव मल्ली विदेहरायवरकत्रा तेणेव उवागच्छइ उवागच्छित्ता उदचपरिफोसियाए दम्भोवरिपच्चत्थुयाए भिसियाए निसी-यइ निसीइत्ता मल्लीए विदेहरायवरकत्राए पुरओ दाणधम्मं च [सोयधम्मं च तित्थाभिसेयं च आघ-वेमाणी पन्नवेमाणी परूवेमाणी उवदंसेमाणी] विहरइ तए णं मल्ली विदेहरायवरकत्रा चोक्खं परिव्वाइयं एवं वयासी-तुत्थणं चोक्खे किंमूलए धम्मे पन्नते तए णं सा चोक्खा परिव्वाइया मल्लि विदेहरायवरकत्रं एवं वयासी-अहं णं देवाणुप्पिया सोयमूलए धम्मे पन्नते जं णं अहं किंचि असुई भवइ तं णं उदएणं य मट्टियाए [य सुई भवइ एवं खलु अहं जलाभिसेय-पूयप्पाणो] अविधेणं सगं गच्छामो

तए णं मल्ली विदेहरायवरकत्रा चोक्खं परिव्वाइयं एवं वयासी-चोक्खे से जहानामए केइ पुरिसे रूहिरकयं वत्थं रूहिरं चेव धोवेज्जा अत्थि णं चोक्खे तस्स रूहिरकयस्स वत्थस्स रूहिरं धोव्वमाणस्स काइ सोही नो इण्ठे समठ्ठे एवामेव चोक्खे तुत्थणं पाणाइवाएणं जाव मिच्छादंसणसल्लेणं नत्थि काइ सोही जहा तस्स रूहिरकयस्स वत्थस्स रूहिरं चेव धोव्वमाणस्स तए णं सा चोक्खा परिव्वाइया मल्लीए विदेहरायवरकत्राए एवं वुत्ता समाणी संक्रिया कंखिया

वित्तिगिच्छिया भेयसमावण्णा जाया यावि होत्था मल्लीए विदेहरायवरकत्राए नो संचाएइ किंचिवि पामोक्खमाइक्खित्तए तुसिणीया संचिद्धइ तए णं तं चोक्खं मल्लीए विदेहरायवरकत्राए बहूओ दासचेडीओ हीलेति निदंति खिसंति गरिहंति अप्पेगइयाओ हेरुयालेति अप्पेगइयाओ मुहमक्कडियाओ करेति अप्पेगइयाओ बग्घाडियाओ करेति अप्पेगइयाओ तज्जेमाणीओ तालेमाणीओ निच्चुहंति तए णं सा चोक्खा मल्लीए विदेहरायवरकत्राए दासचेडियाहिं [हीलिज्जमाणी निदिज्जमाणी खिसिज्जमाणी] गरहिज्जमाणी आसुरुत्ता जाव मिसिमिसेमामी मल्लीए विदेहरायवरकत्रयाए पओ-समावज्जइ भिसियं गेण्हइ गेण्हिता कत्रंतेउराओ पडिणिक्खमई पडिणिक्खमिता मिहिलाओ निग्गच्छइ निग्गच्छित्ता परिव्वाइया-संपरिवुडा जेणेव पंचालजणवए जेणेव कपिल्लपुरे तेणेव उवागच्छइ उवागच्छित्ता बहूणं राईसर [जाव सत्थवाहपभिईणं पुरओ दाणधम्मं च सोयधम्मं च तित्थाभिसियं च आघवेमाणी पन्नवेमाणी परूवेमाणी उवदंसेमाणी विहरइ तए णं से जियसत्तू अण्णया कयाइ अंतो अंतेउर-परियाल-सद्धि संपरिवुडे सीहासणवरगए यावि विहरइ तए णं सा चोक्खा परिव्वाइया-संपरिवुडा जेणेव जियसत्तुस्स रण्णो भवणे जेणेव जियसत्तू राया तेणेव अनुपविसइ अनुपविसित्ता जियसत्तु जएणं विजएणं बद्धावेइ तए णं से जियसत्तू चोक्खं परिव्वाइयं एज्जमाणं पासइ पासित्ता सीहासणाओ अब्भुद्धेइ अब्भुद्धेत्ता चोक्खं सक्कारेइ सम्माणेइ सक्कारेत्ता सम्माणेत्ता आसणेण उवनिमंतेइ तए णं सा चोक्खा उदगपरिफोसिवाए दत्थोवरि पच्चत्थुवाए भिसियाए निविसइ निविसित्ता जियसत्तुं रायं रज्जे य [रद्धे य कोसे य कोट्टागारे य बले य वाहणे य पुरे य] अंतउरे य कुसलोदंतं पुच्छइ तए णं सा चोक्खा जियसत्तुस्स रण्णो दाणधम्मं च सोयधम्मं च तित्थाभिसियं च आघवेमाणी पन्नवेमाणी परूवेमाणी उवदंसेमाणी विहरइ

तए णं से जियसत्तू अण्णो ओरोहंसि जायविम्हए चोक्खं एवं वयासी तुमं णं देवाणुप्पिया बहूणि गामागर जाव सण्णिवेसंसि आहिंसि बहूणं य राईसर-सत्थवाहपभिईणं गिहाइ अनुप्प-विससि तं अत्थियाइ ते कसइ रण्णो वा [इसरस्स वा कहिंचि] एरिसए ओरोहे दिट्ठपुच्चे जारिसए णं इमे मम ओरोहे तए णं सा चोक्खा परिव्वाइया जियसत्तुणा एवं वुत्ता समाणी ईसि विहसियं करेइ करेत्ता एवं वयासी-सरिसए णं तुमं देवाणुप्पिया तस्स अगडदहुरस्स के णं देवाणुप्पिए से अगडदहुरे जियसत्तू से जहानामए अगडदहुरे सिया सेणं तत्थ जाए तत्थेव वुड्ढे अण्णं अगडं वा तलागं वा दहं वा सरं वा सागरं वा अपासमाणे मण्णइ-अयं चेव अगडे वा [तलागे वा दहे वा सरं वा] सागरे वा तए णं तं कूवं अण्णे सामुद्दए अदुरे हव्वमागए तए णं से कूवदहुरे तं सामुद्दयं दहुरं एवं वयासी-से के तुमं देवाणुप्पिया कत्तो वा इह हव्वमागए तए णं सामुद्दएदहुरे तं कूवदहुरं एवं वयासी-एवं खलु देवाणुप्पिया अहं सामुद्दए दहुरे तए णं से कूवदहुरे तं सामुद्दयं दहुरं एवं वयासी केमहालए णं देवणुप्पिया से समुद्दे तए णं से सामुद्दए दहुरे तं कूवदहुरं एवं वयासीए-महालए णं देवाणुप्पियासे समुद्दे तए णं से कूवदहुरे पाएणं लीहे कइडेइ कइडेत्ता एवं वयासी-महालए णं देवाणुप्पिया समुद्दे तए णं से कूवदहुरे पाएणं लीहं कइडेइ कइडेत्ता एवं वयासी-एमहालए णं देवाणुप्पिया से समुद्दे नो इण्ढे सम्ढे महालए णं से समुद्दे तए णं से कूवदहुरे पुरत्थिमिल्लाओ तीराओ उप्फिट्ठित्ता णं पच्चत्थिमिल्लं तीरं गच्छइ गच्छित्ता एवं वयासी-एमहालए णं देवाणुप्पिया से समुद्दे नो इण्ढे सम्ढे एवामेव तुमंपि जियसत्तू अण्णेसि बहूणं राईसर जाव सत्थवाहपभिईणं भज्जं वा भगिणिं वा धूयं वा सुण्हं वा अपासमाणे जाणसि जारिसए मम चेव णं ओरोहे तारिसए नो अण्णेसि तं एवं खलु

जियसत्तू मिहिलाए नयरीए कुंभगस्स घूया पभावईए अत्तया मल्ली नामं विदेहरायवरकत्रा रूवेणं य जोव्वणेणं य [लावण्णेण य उक्किक्का उक्किक्कसरीरा] नो खलु अण्णा काइ तारिसिया देवकत्रा वा [असुरकत्रा वा नागकत्रा वा जक्खकत्रा वा गंधव्वकत्रा वा राचकत्रा वा] जारिसिया मल्ली विदेह-रायवरकत्रा तीसे छित्रस्स वि पायंगुट्टगस्स इमे तवोरोहे सयसहस्सइमपि कलं न अग्घइ ति कट्टु जामेव दिसं पाउब्भूया तामेव दिसं पडिगया तए णं से जियसत्तू परिव्वाइया-जणिय-हासे दूयं सद्दावेइ [सद्दावेत्ता एवं वयासी-जाव मल्लिं विदेहरायवरकत्रं मम भारियत्ताए वरोहि जइ वि य णं सा सयं रज्जसुंका तए णं से दूए जियसत्तुणा एवं वुत्ते समाणे हट्टतुट्टे जाव जेणेव मिहिला नयरी तेणेवा] पहारेत्थ गमणाए ।८०१-७४

(१३) तए णं तेसि जियसत्तुपामोक्खाणं छण्हं राईणं दूया जेणेव मिहिला तेणेव पहारेत्थ गमणाए तए णं छप्पि दूयागा जेणेव मिहिला तेणेव उवागच्छंति उवागच्छिता मिहिलाए अण्णज्जाणंसि पत्तेयं-पत्तेयं खंधावारनियेसं करंति करेत्ता मिहिलं रायहाणि अनुप्पविसंति अनुप्पविसित्ता जेणेव कुंभए तेणे उवागच्छंति उवागच्छिता पत्तेयं करयल परिग्गहियं सिरसावत्तं मत्थए अंजलिं कट्टु साणं-साणं राईणं वयणाइ निवेदेति तए णं से कुंभए तेसि दूयाणं अंतियं एयमट्टं सोच्चा आसुरुत्ते [रुट्टे कुविए चंडिकिक्कए भिसिमिसेमाणे तिबलियं भिउडिं निडाले साहट्टु एवं वयासी-न देमि णं अहं तुब्भं मल्लिं विदेहरायवरकत्रं ति कट्टु ते छप्पि दूए असक्कारियं असम्माणिय अवहारेणं निच्छुभावेइ तए णं ते जियसत्तुपामोक्खाणं छण्हं राईणं दूया कुंभएणं रण्णा असक्कारिया असम्माणियं अवहारेणं निच्छुभाविया समाणा जेणेव सगा-सगा जणवया जेणेव सयाइ-सयाइं नगराइं जेणेव सया-सया रायाणो तेणेव उवागच्छंति उवागच्छिता करयल [परिग्गहियं सिरसावत्तं मत्थए अंजलिं कट्टु एवं वयासी-एवं खलु सामी अम्हे जियसत्तुपामोक्खाणं छण्हं राईणं दूया जमगसमगं चेव जेणेव मिहिला तेणेव उवागया जाव अवहारेणं निच्छुभावेइ तं न देइ णं सामी कुंभए मल्लिं विदेहरायवरकत्रं साणं-सामं राईणं एयमट्टं निवेदेति

तए णं ते जियसत्तुपामोक्खा छप्पि रायाणो तेसि दूयाणं अंतिए एयमट्टं सोच्चा निसम्मं आसुरुत्ता रुट्टा कुविया चंडिकिकया भिसिमिसेमाणा अण्णमण्णास्स दूयसंपेसणं करंति करेत्ता एवं वयासी-एवं खलु देवाणुप्पिया अम्हं छण्हं राईणं दूया जमगसमगं चेव मिहिला तेणेव उवागया जाव अवहारेणं निच्छूदा तं सेयं खलु देवाणुप्पिया कुंभगस्स जत्तं गेण्हित्तए ति कट्टु अण्णमण्णास्स एयमट्टु पडिसुणेंति पडिसुणेत्ता ण्हाया सण्णद्धा हत्थिखंधवरगया सकोरेटमल्लदामेणं [छत्तेणं धरिज्जमाणेणं सेयवरचामराहिं वीइज्जमाणा मत्थया हय-गय-रह-पवर-जोहकलियाए चाउरंगिणीए सेणाए सद्धिं संपरिवुडा सच्चिइदीए जाव दुंदुभि-नाइयारवेणं सएहिंतो-सएहिंतो नगरेहिंतो निग्गच्छंति निग्गच्छिता एगयओ मिलायंति जेणेव मिहिला तेणेव पहारेत्थ गमणाए तै णं कुंभए राया इमीसे कहाए लद्धेइ समाणे बलवाउयं सद्दावेइ सद्दावेत्ता एवं वयासी-खिप्पामेव हय-गय-रह-पवर-जोहकलियं चाउरंगिणीसेणं] सत्राहेहि सत्राहेत्ता एयमाणत्तियं पच्चप्पिणाहि सेवी जाव पच्चप्पिणति

तए णं कुंभए राया ण्हाए सण्णद्धे हत्थिखंधवरगए [सकोरेटमल्लदामेणं छत्तेणं धरिज्ज-माणेणं] सेयवरचामराहिं वीइज्जमाणे मत्थया हय-गय-रह-पवर-जोहकलियाए चाउरंगिणीए सेणाए सद्धिं संपरिवुडे सच्चिइदीए जाव दुंदुभि-नाइयारवेणं मिहिलं मज्झंमज्जेणं निज्जाइ निज्जावेत्ता

विदेह- जणवयं मज्झमज्झेणं जेणेव देसणं तेणेव खंधावारनिवेसं करेइ करेता जियसत्तुपामोक्खा छप्पि य रायाणो पडिवालेमाणे जुञ्जसज्जे पडिचिद्दइ तए णं ते जियसत्तुपामोक्खा छप्पि रायाणो जेणेव कुंभए राया तेणेव उवागच्छति उवागच्छिता कुंभगएणं रण्णा सद्धिं संपलग्गा यावि होत्था तए णं ते जियसत्तुपामोक्खा छप्पि रायाणो कुंभयं रायं हय- महिय- पवरवीर- धाइय- विवडि- चिंध-धय-पडागं किच्छोवगयपाणं दिसोदिसिं पडिसेहेति ते णं से कुंभए जियसत्तुपामोक्खेहिं छहिं राईहिं हय-महिय-(पवरवीर-घाइयविवडियचिंधधय-पडागे किच्छोवगयपाणे दिसोदिसिं) पडिसे-हिए समाणे अत्थामे अबले अवीरिए अपुरिसक्कारपरक्कमे अघार- णिज्जमिति कट्टु सिग्धं तुरियं [चयलं चंडं जइण] वेइयं जेणेव मिहिला तेणेव उवागच्छइ उवागच्छिता मिहिलं अनुपविसइ अनुपविसिता मिहिलाए दुवाराइं पिहेइ पिहेता रोहसज्जे चिद्दइ तए णं ते जियसत्तुपामोक्खा छप्पि रायाणो जेणेव मिहिला तेणेव उवागच्छति उवागच्छिता मिहिलं रायहाणं निस्संचारं निरुच्चारं सब्बओ समंता ओरुंभित्ता णं चिद्दति तए णं से कुंभए राया मिहिलं रायहाणि ओरुद्धं जाणित्ता अत्थितरियाए उवट्ठाणसालाए सीहासणवरगए तेसिं जियसत्तुपामोक्खाणं छण्हं राईणं अंतराणि य छिद्दाणि य विवराणि य मम्माणि य अलभमाणे बहूहिं आएहिं य उवाएहिं य उप्पत्तियाहिं य वेणइयाहिं य कम्मयाहिं य पारिणामियाहिं य-बुद्धीहिं परिणामेमाणे-परिणामेमाणे किंचि आयं वा उवायं वा अलभमाणे ओहयमणसंकप्पे [करतलपल्हत्थमुहा अट्टज्जाणोवगए श्रियायइ

इमं च णं मल्ली विदेहरायवरकत्रा ण्हाया [कयबलिकम्मा कयकोउयमंगलपावच्छित्ता सब्बालंकारविभूसिया] बहूहिं खुज्जाहिं संपरिवुडा जेणेव कुंभए तेणेव उवागच्छइ उवागच्छिता कुंभगसस पायगगहणं करेइ तए णं कुंभए मद्धिं विदेहरायवरकत्रं नो आढाइ नो परियाणाइ तुसिणीए संचिद्दइ तए णं मल्ली विदेहरायवरकत्रा कुंभगं एवं वयासी-तुब्बे णं ताओ अण्णया ममं एज्जमाणि [पासित्ता आढाइ परियाणाह अंके निवेसेह इयाणि ताओ तुब्बे ममं नो आढाइ नो परियाणाह नो अंके निवेसेह किण्णं तुब्बं अज्ज ओहय [मणसंकप्पा करतलपल्हत्थमुहा अट्टज्जाणो-वगया] श्रियायह तए णं कुंभए मद्धिं विदेहरायवरकत्रं एवं वयासी-एवं खलु पुत्ता तव कज्जे जियसत्तुपामोक्खेहिं छहिं राईहिं दूया संपेसिया ते णं मए असक्कारियं [असम्माणिय अवहारेणं] निचइत्ता तए णं जियसत्तुपामोक्खा छप्पि रायाणो तेसिं दूयाणं अंतिए एयमट्टं सोद्या परिकुविया समाणा मिहिलं रायहाणि निस्संचारं [निरुच्चारं सब्बओ समंता ओरुंभित्ता णं] चिद्दति तए णं अहं पुत्ता तेसिं जियसत्तुपामोक्खाणं छण्हं राईणं अंतराणि य छिद्दाणि य विवराणि य मम्माणि य अलभमाणे जाव अट्टज्जाणोवगए श्रियामि तए णं सा मल्ली विदेहरायवरकत्रा कुंभगं रायं एवं वयासी-माणं तुब्बे ताओ ओहयमणसंकप्पा [करतलपल्हत्थमुहा अट्टज्जाणोवगया] श्रियायह तुब्बे णं ताओ तेसिं जियसत्तुपामोक्खाणं छण्हं राईणं पत्तेयं-पत्तेयं रहस्सिए दूयसंपेसे करेह एगमेणं एवं वयह-तव देमि मद्धिं विदेहरायवरकत्रं ति कट्टु संज्ञकालसमयंसि पविरल-मणूसंसि निसंत-पडिनिसंतंसि पत्तेयं-पत्तेयं मिहिलं रायहाणि अनुप्पवेसेह अनुप्पवेसेत्ता गब्बधरएसु अनुप्पवेसेह अनुप्पवेसेत्ता मिहिलाए रायहाणीए दुवाराइं पिहेह पिहेत्ता रोहासज्जा चिद्दइ तए णं कुंभए [तेसिं जियसत्तुपामोक्खाणं छण्हं राईणं पत्तेयं-पत्तेयं रहस्सिए दूयसंपेसे करेइ जाव रोहासज्जे चिद्दइ तए णं ते जियसत्तुपामोक्खा छप्पि रायाणो कल्लं पाउप्पयाए रयणीए जाव उड्ढिवम्पि सूरे सहस्सरस्सिम्मि दिणयरे तेयसा जलंते जालंतरेहिं कणगमइं मत्थयछिइं पउमुप्पल-पिहाणं पडिमं

सुपकुंभो-१, अञ्जयण-८

८३

पासंति-एस पं मल्ली विदेहराय-वरकत्रति कद्रु मल्लीए रायवरकत्राए रूवे य जोव्वणे य लावण्णे य मुच्छिया गिद्धा गढिया अञ्जोववण्णा अणिसिसाए दिट्ठीए पेहमाणा-पेहमाणा चिड्ढति

तए पं सा मल्ली विदेहरायवरकत्रा णहाया [कयबलिकम्मा कयकोउय-मंगल]-पायच्छिता सव्वालंकारविभूसिया बहूहिं खुज्जाहिं जाव परिकिखत्ता जेणेव जालधरए जेणेव कणगमई मत्थ-यछिद्धा पउमुप्पल-पिहाणा-पडिमा तेणेव उवागच्छइ उवागच्छिता तीसे कणगमईए मत्थयछिद्धाए पउमुप्पल-पीहाणाए पडिमाए मत्थयाओ तं पउमुप्पल-पिहाणं अवणेइ तओ पं गंधे निद्धावेइ से जहाणामए-अहिमडे इ वा जाव इएतो असुभतराए चैव तए पं कते जियसत्तुपामोक्खे छप्पि रायाणो तेणं असुभेणं गंधेणं अभिभूया समाणा सएहिं-सएहिं उत्तरिज्जेहिं आसाइ पिहेति पिहेत्ता परम्मुहा चिड्ढति तए पं सा मल्ली विदेहरायवरकत्रा ते जियसत्तुपामोक्खे एवं वयासी-किण्णं तुब्भे देवाणुप्पिया सएहिं-सएहिं उत्तरिज्जेहिं आसाइ पिहेत्ता परम्मुहा चिड्ढह तए पं ते जियसत्तुपामोक्खा मल्लि विदेहरायवरकत्रं एव कयंति-एवं खलु देवाणुप्पिया अन्हे इमेणं असुभेणं गंधेणं अभिभूया समाणा सएहिं-सएहिं उत्तरिज्जेहिं आसाइ पिहेत्ता चिड्ढामो तए पं मल्ली विदेहरायवरकत्रा ते जिय-सत्तुपामोक्खे एवं वयासी-जए ताव देवाणुप्पिया इमीसे कणगं [मईए मत्थयछिद्धाए पुमुप्पल-पिहाणाए] पडिमाए कल्लकल्लि ताओ मणुण्णाओ असण-पाण-खाइम-साइमाओ एगमेगे पिंडे पक्खिण्णमाणे-पक्खिण्णमाणे इमेयारूवे असुभे पोगल-परिणामे इमस्स पुण ओरालियसरीरस्स खेलासवस्स वंतासवस्स पित्तासवस्स सुक्कासवस्स सोणियपूयासवस्स दुरुय- ऊसास- नीसा-सस्स दुरुय-मुत्त-पूइय-पुरीस- पुत्रस्स- सडण-पडण-छेयण-विद्धंसण-धम्मस्स केरिसए य परिणामे भविस्सइ तं माणं तुब्भे देवाणुप्पिया माणुस्सएसु कामभोगेसु सज्जह रज्जह गिज्जह मुज्जह अज्जोववज्जए एवं खलु देवाणुप्पिया अन्हे इमाओ तच्चे भवग्गहणे अवरविदेहवासे सलिलवतिसि विजए वीयसोगाए रायहाणीए महब्बल-पामोक्खा सत्तवि य बालवयंसया रायाणो होत्था- सह-जाया जाव पव्वइया तए पं अहं देवाणुप्पिया इमेणं कारणेणं इत्थीनामगोयं कम्मं निव्वत्तेमि-जइ पं तुब्भे वउत्थं उवसंपजित्ता पं विहरह तए पं अहं छट्ठं उवसंपजित्ता पं विहरामि सेसं तहेव सव्वं तए पं तुब्भे देवाणुप्पिया कालमासे कालं किच्चा जयंति विमाणे उववण्णा तत्थ पं तुब्भं देसूणाइ बत्तीसं सागरोवमाइं ठिई तए पं तुब्भे ताओ देवलोगाओ अणंतरं चयं चइत्ता इहेव जंबुदीवे दीवे जाव साइं-साइं रजाइं उवसंपजित्ता पं विहरइ तए पं अहं ताओ देवलोगाओ आउक्खएणं जाव दारियत्ताए पद्यायावा 1८9-91-75-1

(१४) क्रियं तयं पम्हुइं जंथ तया भो जयंतपवरम्मि

वुत्था समय-निव्वद्धा देवा तं संभरह जाइ

॥९॥-1

(१५) तए पं तेसिं जियसत्तुपामोक्खाणं छण्हं राईणं मल्लीए विदेहरायवरकत्राए अंतिए एयमट्ठं सोच्चा निसम्मा सुभेणं परिणामेणं पसत्थेणं अज्जवसाणेणं लेसाहिं विसुज्जमाणीहिं तयावर [णिज्जाणं कम्माणं खओवसमेणं इहापूह-मग्गण-गवेसणं करेभाणाणं सण्णिपुव्वे] जाइसरणे समुप्पण्णे एयमट्ठं सम्मं अभिसमागच्छंति तए पं मल्ली अरहा जियसत्तुपामोक्खे छप्पि रायाणो समुप्पण्णजाइसरणे जाणित्ता गब्भघराणं दारइं विहाडेइ तए पं ते जियसत्तुपामोक्खा छप्पि रायाणो जेणेव मल्ली अरहा तेणेव उवागच्छंति तए पं महब्बलपामोक्खा सत्तवि य बालवयंसया एगयओ अभिसमण्णागया वि होत्था तए पं मल्ली अरहा ते जियसत्तुपामोक्खे छप्पि रायाणो एवं

वयासी-एवं खलु अहं देवाणुप्पिया संसारभउच्चिग्गा जाव पच्चयामि तं तुब्भे णं किं करेह किं वयसह किं वा मे हियच्छिए सामत्ये तए णं जियसत्तुपामोक्खा छप्पि रायाणो मल्लिं अरहं एवं वयासी-जइ णं तुब्भे देवाणुप्पिया संसारभउच्चिग्गा जाव पच्चयह अहं णं देवाणुप्पिया के अण्णे आलंबणे वा आहारे वा पडिबंधे वा जह चेव णं देवाणुप्पिया तुब्भे अहं इओ तच्चे भवण्णहणे बहूसु कज्जेसु य मेढी पमाणं जाव धम्मधुरा होत्था तए चेव णं देवाणुप्पिया इण्हिं पि जाव धम्मधुरा भविस्सह अहं वि णं देवाणुप्पिया संसारभउच्चिग्गा भीया जम्मणमरणाणं देवाणुप्पिया-सद्धि पुंडा भविता [णं अगाराओ अण्णारिये] पच्चयामो तए णं मल्ली अरहा ते जियसत्तुपामोक्खे छप्पि रायाणो एवं वयासी-जइ णं तुब्भे संसारभउच्चिग्गा जाव मए सद्धिं पच्चयइ तं गच्छह णं तुब्भे देवाणुप्पिया सएहिं-सएहिं जेट्टुपुते ठावेह ठावेत्ता पुरिससहस्सावहिणीओ सीयाओ दुरुहह मम अंतिय पाउब्भवह तए णं ते जियसत्तुपामोक्खा छप्पि रायाणो मल्लिस्स अरहओ एयमइं पडि- सुणेंति तए णं मल्ली अरहा ते जियसत्तुपामोक्खा छप्पि रायाणो गहाय जेणेव कुंभए तेणेव उवागच्छइ उवागच्छिता कुंभगस्स पाएसु पाडेइ तए णं कुंभए ते जियसत्तुपामोक्खे विउलेणं असण- पाण- खाइम-साइमेणं पुप्फवत्थ गंध-मल्लालंकारेणं सक्कारेइ सम्माणेइ सक्कारेत्ता सम्माणेत्ता पडिविसज्जेइ तए णं ते जियसत्तुपामोक्खा छप्पि रायाणो कुंभएणं रण्णा विसज्जिया समाणा जेणेव साइं-साइं रखाइं जेणेव साइं-साइं नगराइं तेणेव उवागच्छति उवागच्छिता सगाइं-सगाइं रखाइं उवसंपज्जिता णं विहरंति ते णं मल्ली अरहा संयच्छरावसाणे निक्खमिस्सामि ति मणं पहारेइ । ८१-७५

(९६) तेणं कालेणं तेणं समएणं सक्कस्स आसणं चलइ तए णं से सक्के देविदे देवराया आसणं चलियं पासइ पासित्ता ओहिं पउंजइ पउंजित्ता मल्लिं अरहं ओहिणा आभोएइ इमेयारूवे अज्जत्थिए चित्तिए पत्थिए मणोए संकप्पे समुप्पज्जित्था-एवं खलु जंबुद्वीवे दीवे भारहे वासे मिहिलाए नयरीए कुंभगस्स रण्णो धूया पभावईए देवीए अत्तया मल्ली अरहा निक्खमिस्सामिति मणं पहारेइ तं जीवपेयं तीय-पच्चुप्पणमणागयाणं सक्काणं अरहंताणं भगवंताणं निक्खम-माणानं इमेयारूवं अत्यसंपयाणं दलइत्तए [तं जहा] । ८२-१-७६-१

(९७) तिण्णेव य कोडिसया अठासीइं च हुंति कोडीओ

असिइं च सयसहस्सा इंदा दलयंति अरहाणं

॥१०॥-१

(९८) एवं संपेहेइ संपेहेत्ता वेसमणं देवं सद्दावेइं सद्दावेत्ता एवं वयासी-एवं खलु देवाणुप्पिया जंबुद्वीवे दीवे भारहे वासे [मिहिलाए रायहाणीए कुंभगस्स रण्णो धूया पभावईए अत्तया मल्ली अरहा निक्खमिस्सामिति मणं पहारेइ जाव इंदा दलयंति अरहाणं] तं गच्छह णं देवाणुप्पिया जंबुद्वीवं दीवं भारहं वासं मिहिलं रायहाणिं कुंभगस्स रण्णो भवणंसि इमेयारूवं अत्यसंपयाणं साहराहिं साहरित्ता खिप्पामेव मम एयमाणत्तियं पच्चप्पिणाहिं तए णं से वेसमणे देवे सक्केणं देविदेणं देवरण्णा एवं वुत्ते समाणे हइत्तुडे करयल [परिग्गहियं दसणहं सिरसावत्तं मत्थए अंजलिं कट्टु एवं देवो तहत्ति आणाए विणएणं वयणं] पडिसुणेइ पडिसुणेत्ता जंभए देवे सद्दावेइं सद्दावेत्ता एवं वयासी-गच्छह णं तुब्भे देवाणुप्पिया जंबुद्वीवं दीवं भारहं वासं मिहिलं रायहाणिं कुंभगस्स रण्णो भवणंसि तिण्णि कोडिसया अठासीइं च कोडीओ असीइं सयसहस्साइं-इमेयारूवं अत्य-संपयाणं साहरह साहरित्ता मम एयमाणत्तियं पच्चप्पिणह तए णं ते जंभगा देवा वेसमणेणं देवेणं एवं वुत्ता समाणा जाव पडिसुणेत्ता उत्तरपुरत्थियं दिसीभागं अवक्कमंति अवक्कमित्ता

वेडव्वियसमुग्धाएणं समोहण्णांति समोहणित्ता संखेज्जाइं जोयणाइं दंडं निसिरंति जाव उत्तरवेड-
व्वियाइं रुवाइं विडव्वंति विडव्विता ताए उक्किट्ठाए जाव देवगईए वीईययमाणा-वीईययमाणा
जेणेव जंबुदीवे दीवे भारहे वासे जेणेव मिहिला रायहाणी जेणेव कुंभगस्स रण्णो भवणे तेणेव
उवागच्छंति उवागच्छित्ता कुंभगस्स रण्णो भवणंसि तिण्णि कोडिसया जाव साहरंति साहरित्ता
जेणेव वेसमणे देवे तेणेव उवागच्छंति उवागच्छित्ता करयल जाव पच्चप्पिणंति तए णं से वेसमणे
देवे जेणेव सक्के देविंदे देवराया तेणेव उवागच्छइ उवागच्छित्ता करयलपरिग्गहियं जाव
तमाणात्तियं पच्चप्पिणइ

तए णं मल्ली अरहा कल्लाकल्लि जाव भागहओ पायरासो ति बहूणं सणाहाण य अणाहाण य
पंधियाण य पहियाण य करोडियाणं य कप्पडियाणं य एगमेणं हिरण्णकोडिं अट्ट य अण्णुणाइं सय-
सहस्साइं इमेयारूवं अत्थ-संपयाणं दलयइ तए णं कुंभए राथा मिहिलाए रायहाणीए तत्थ-तत्थ
तहिं-तहिं देसे-देसे वहुओ महाणससालाओ करेइ तत्थ णं बहवे मणुया दिण्णभइ-भत्त-वेयणा विउलं
असण-पाण-खाइम-साइमं उवक्खडंति जे जहा आगच्छंति तं जहा-पंधिया वा पहिया वा करोडिया
वा कप्पडिया वा पासंडत्था वा गिहत्था वा तस्स य तथा आसत्थस्स वीसत्थस्स सुहासण-वरगयस्स तं
विउलं असण-पाण-खाइम-साइमं परिभाएमाणा परिवेसेमाणा विहरंति तए णं भिहि-लाए नयरीए
सिंघाडग-जाव महापहपहेसु बहुजणो अण्णमण्णस्स एवमाइक्खइ-एवं खलु देवाणु-प्पिया कुंभगस्स
रण्णो भवणंसि सब्बाकामगुणियं किमिच्छियं विपुलं असण-पाण-खाइम-साइमं बहूणं समणाण य
माहाणाण य जाव करोडियाणं य कप्पडियाणं य परिभाइज्जइ परिवेसिज्जइ। १८२-२१-७६-२

(१९) वरवरिया घोसिज्जइ किमिच्छियं दिज्जए बहुविहीयं ।

सुर-असुर देव-दानव-नरिंद-महियाण निक्खमणे

॥११॥-१

(१००) तए णं मल्ली अरहा संवच्छरेणं तिण्णि कोडिसया अट्टासीइं च कोडीओ असीइं
सयसहस्साइं इमेयारूवं अत्थ-संपयाणं दलयइत्ता निक्खमामि ति मणं पहारेइ। १८२-७६

(१०१) तेणं कालेणं तेणं समएणं लोगंतिया देवा बंधलोए कप्पे रिद्धे विमाणपत्थडे
सएहिं-सएहिं विमाणेहिं सएहिं-सएहिं पासायवडिसएहिं पत्तेय-पत्तेयं चउहिं सामाणियसाहस्सीहिं
तिहिं परिसाहिं सत्तहिं अणिएहिं सत्तहिं अणियाहिवईहिं सोलसहिं आयरक्खदेवसाहस्सीहिं
अण्णेहिं य बहूहिं लोगतिएहिं देवेहिं सद्धिं संपरिवुडा महयाऽहय-नट्ट-गीय-वाइय-[तंती- तल-
ताल-तुडिय-धण-मुंजपडुप्पवाइय] रवेणं विउलाइं भोगभोगाइं भुंजमाणा विहरंति। १८३-११७७-१

(१०२) सारस्सयमाइच्चा वण्ही वरुणा य गदतोचा य

तुसिया अब्बाबाहा अग्गिच्चा चेव रिद्धा य

॥१२॥-१

(१०३) तए णं तेसिं लोगंतियाणं देवाणं पत्तेयं-पत्तेयं आसणाइं चलंति तहेव जाव तं
जायमेयं लोगंतियाणं देवाणं अरहंताणं भगवंताणं निक्खममाण्णाणं संबोहणं करित्ताए ति तं
गच्छामो णं अहे वि मद्धिस्स अरहओ संबोहणं करेमो ति कट्टु एवं संपेहेति संपेहेत्ता उत्तरपुरत्थियं
दिसीभागं अवक्कमंति अवक्कमिन्ता वेडव्वियसमुग्धाएणं समोहण्णांति समोहणित्ता संखेज्जाइं
जोयणाइं दंडं निसिरंति एवं जहा जंभगा जाव जेणेव मिहिला रायहाणी जेणेव कुंभगस्स रण्णो
भवणे जेणेव मल्ली अरहा तेणेव उवागच्छंति उवागच्छित्ता अंतलिक्ख पडिवण्णा सखिखिणियाइं
[दसद्धवण्णाइं] वत्थाइं पवर परिहिया करयल [परिग्गहियं दसनहं सिरसावत्तं मत्थए अंचलिं कट्टु

ताहिं इड्डाहिं [कताहिं पियाहिं मणुण्णाहिं मणामाहिं वग्गूहिं] एवं वयासी-बुद्धाहिं भगवं लोगणाहा पवतेहिं धम्मतित्यं जीवाणं हियसुहनिस्सेयसकरं भविस्सइ ति कडु दोछंपि तच्चंपि एवं वयंति मल्लिं अरहं वंदंति नमंसंति वंदिता नमंसिता जामेव दिसिं पाउब्भूया तामेव दिसिं पडिगया तए णं मल्ली अरहा तेहिं लोगंतिएहिं देवेहिं संबोहिंए समाणे जेणेव अमामपियरो तेणेव उवागच्छइ उवागच्छिता करयल [परिग्गहियं दसनहं सिरसावत्तं मत्थए अंजलिं कडु] एवं वयासी-इच्छामि णं अम्मयाओ तुब्भेहिं अब्भणुण्णाए समाणे मुंडे भविता णं अगाराओ अणगारियं पव्वइत्तए अहासुहं देवाणुप्पिया मा पडिबंधं करेह

तए णं कुंभए राया कोडुंबियपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया अट्टसहस्सेणं सोवण्णियाणं कलसाणं जाव अट्टसहस्सेणं भोमेज्जाणं कलसाणं अण्णं च महत्थं [महग्धं महरिहं विउलं] तित्थयराभिसेयं उवडुवेह तेवि जाव उवडुवेति तेणं कालेणं तेणं समएणं चमरे असुरिंदे जाव अच्चुयपज्ज साणा आगया तए णं सक्के देविंदे देवराया आभिओगिए देवे सद्दावेइ सद्दावेत्ता एवं वयासी-खिप्पामेव भो देवाणुप्पिया अट्टसहस्सेणं सोवण्णियाणं कलसाणं जाव अण्णं च महत्थं [महग्धं महरिहं विउलं] तित्थयराभिसेयं उवडुवेह तेवि जाव उवडुवेति तेवि कलसा तेसु चेव कलसेसु अनुपविट्ठा तए णं से सक्के देविंदे देवराया कुंभए य राया मल्लिं अरहं सीहासणंसि पुरत्याभिमुहं निवेसेति अट्टसहस्सेणं सोवण्णियाणं कलसाणं जाव तित्थयराभिसेयं अभिसिं वति तए णं मल्लिस्स भगवओ अभिसेए वट्टमाणे अप्पेगइया देवा मिहिलं च सत्थितर-बाहिरियं जाव सव्वओ समंता आधावंति परिधावंति तए णं कुंभए राया दोछंपि उत्तरावक्क-मणंसीहासणं रयावेइ जाव सव्वालंकारविभूसियं करेइ करेत्ता कोडुंबियपुरिसे सद्दावएइ सद्दावेत्ता सद्दावेत्ता एवं वयासी-खिप्पामेव भो देवाणुप्पिया मणोरमं सीयं उवडुवेह तेवि उवडुवेति तए णं सक्के देविंदे देवराया आभिओगिए देवे सद्दावेइ सद्दावेत्ता एवं वयासी-खिप्पामेव भो देवाणुप्पिया अणेगखंभसय-सण्णिविट्ठं जाव मणोरमं सीयं उवडुवेह तेवि जाव उवडुवेति सावि सीया तं चेव सीयं अनुपविट्ठा तए णं मल्ली अरहा सीहासणाओ अब्बुट्ठेइ अब्बुट्ठेत्ता जेणेव मणोरमा सीया तेणेव उवागच्छइ उवागच्छिता मनोरमं सीयं अनुपयाहिणीकरेमाणे मणोरमं सीयं दुरुहइ दुरिहत्ता सीहासणवरगए सद्दावेइ सद्दावेत्ता एवं वयासी-तुब्भे णं देवाणुप्पिया णहाया जाव सव्वालंकार-विभूसिया मल्लिस्स सीयं परिवहह तेवि जाव परिवहंति तए णं सक्के देविंदे देवराया मणोरमाए सीयाए दक्खिणिल्ल उवरिल्लं वाहं गेण्हइ ईसाणे उत्तरिल्लं उवरिल्लं वाहं गेण्हइ चमरे दाहिणिल्लं हेड्डिल्लं बली उतारिल्लं हेड्डिल्लं अवसेसा देवा जहारिहं मणोरमं सीयं परिवहंति ।८३-२।-७७-२

(१०४) पुब्बि उक्खित्ता माणुसेहिं साहडुरीमकूवेहिं

पच्छा वहंति सीयं असुरिंदसुरिंदनागिंदा

॥१३॥-१

(१०५) चलचवलकुंडलधरा सच्छंदविउब्बियाभरणधारी

देविंददाणविंदा वहंति सीयं जिणिंदस्स

॥१४॥-२

(१०६) तए णं मल्लिस्स अरहओ मणोरमं सीयं दुग्गस्स समाणस्स इमे अट्टमंगला पुरओ

अहाणुपुब्बीए संपत्थिया-एवं निग्गामो जहा जमालिस्स तए णं मल्लिस्स अरहओ निक्खममाणस्स अप्पेगइया देवा मिहिलं राचहाणि अत्थितरबाहिरं आसिय- संमज्जिय- संमट्ट- सुइ- रत्थंतरा- वण- वीहियं करंति जाव परिधावंति तए णं मल्ली अरहा जेणेव सहस्संबवणे उज्जाणे जेणेव असोग-

वरपायवे तेणेव उवागच्छइ उवागच्छिता सीयाओ पच्चोरुहइ आभारणालंकारं औनुयइ तए णं पभावई हंसलक्खणेणं पडसाडएणं आभारणालंकारं पडिच्छइ तए णं मल्ली अरहा सयमेव पंचमुद्धियं लोयं कोइ तए णं सक्के देविंदे देवराया मल्लिस्स केसे पडिच्छइ पडिच्छिता खीरोदगसमुद्धे साहरइ तए णं मल्ली अरहा नमोत्तु णं सिद्धाणं ति कट्टु सामाइयचरित्तं पडिवज्जइ जं समयं च णं मल्ली अरहा सामाइयचरित्तं पडिवज्जइ तं समयं च णं देवाणं माणुसाणं य निग्घोसे तुडिय-निनाए गीय-वाइय-निग्घोसे य सक्कावयणसंदेसेणं निलुक्के यावि होत्था जं समयं च णं मल्ली अरहा सामाइयचरित्तं पडिवज्जणे तं समयं च मल्लिस्स अरहओ माणुसधम्माओ उत्तरिए मणपज्जवाणे समुप्पण्णे मल्ली णं अरहा जे से हेमंताणं दोच्चे मासे चउत्ते पक्खे पोससुद्धे तस्स णं पोससुद्धस्स एककारसीपक्खेणं पुव्वण्हकालसमयंसि अट्टमेणं भूतेणं अपाणएणं अस्सिणीहिं नक्खतेणं जोगमुवागएणं तिहिं इत्थीसएहिं-अब्भितरियाए परिसाए तिहिं पुरिससएहिं-आहिरियाए परिसाए सद्धिं मुंडे भविता पव्वइए मल्लिं अरहं इमे अट्ट नायकुमारा अनुपव्वइंसु १८३-३१-७७-३

(१०७) नंदे य नंदिमित्ते सुमित्त बलमित्त भाणुमित्ते य

अमरवइ अमरसेणे महसेणे चेव अट्टमए

॥१५॥-१

(१०८) तए णं ते भवणवइ-वाणमंतर-जोइसिय-वेमाणिया देवा मल्लिस्स अरहओ निक्खमण-महिंमं करेति करेत्ता जेणेव नंदीसरे [दीवे तेणेव उवागच्छंति उवागच्छिता अट्टाहियं महिमं करेति करेत्ता जामेव दिंसि पाउब्भूया तामेव दिंसि पडिगया तए णं मल्ली अरहा जं चेव दिवसं पव्वइए तस्सेव दिवसस्स पच्चावरण्हकालसमयंसि असोगवरपावयस्स अहे पुढविसिला-पट्टयंसि सुहासणवरगयस्स सुहेणं परिणामेणं पसत्थाहिं लेसाहिं तयावरण-कम्मरय-विकरणकरं अपुव्वकरणं अनुपविट्टस्स अनंते अनुत्तरे निव्याधाए निरावरणे कसिणे पडिपुत्ते केवलवरनाणइंणे समुप्पत्ते १८३-४-१८३१-७७-४ - ७७

(१०९) तेणं कालेणं तेणं समएणं सव्वदेवाणं आसणाइं चलेंति समोसद्धा धम्मं सुणेति सुणेत्ता जेणेव नंदीसरे दीवे तेणेव उवागच्छंति उवागच्छिता अट्टाहियं महिमं करेति करेत्ता जामेव दिंसि पाउब्भूया तामेव दिंसि पडिगया कुंभए वि निग्गच्छइ तए णं ते जियसत्तुपामोक्खा छप्पि रावाणो जेट्टपुत्ते रउं ठावेत्ता पुरिससहस्सवाहिणीयाओ सीयाओ दुरूद्धा समाणा सव्विइदीए जेणेव मल्ली अरहा तेणेव उवागच्छंति जाव पञ्चवासंति तए णं मल्ली अरहा तीसे महइमहालियाए परिसाए कुंभगस्स रण्णो तेसि च जियसत्तुपामोक्खाणं छण्हं राईणं धम्मं परिकहेइ परिसा जामेव दिंसि पाउब्भूया तामेव दिंसि पडिगया कुंभए समणोवासए जाव पडिगए पभावई य तए णं जियसत्तुपामोक्खा छप्पि रावाणो धम्मं सोद्धा निसम्मं एवं वयासी-आलित्तए णं भंते लोए पलित्तए णं भंते लोए आलित्त-पलित्तए णं भंते लोए जराए मरणेण य जाव पव्वइया जाव चोइसपुव्विणे अनंते वरनाणइंसणे केवले समुप्पाडेत्ता तओ पच्चा सिद्धा तए णं मल्ली अरहा सहस्संबवणाओ उज्जाणाओ निक्खमइ निक्खमित्ता बहिया जणवयविहारं विहरइ मल्लिस्स णं अरहओ भिसगपा-मोक्खा अट्टावीसं गणा अट्टावीसं गणहरा होत्था मल्लिस्स णं अरहओ चत्तालीसं समणसाहस्सीओ उक्कोसिया समणसंपया होत्था बंधुमइपामोक्खाओ पणपत्रं अज्रियासाहस्सीओ उक्कोसिया अज्रियासंपया होत्था सावयाणं एगा सयसाहस्सी चुलसीइं सहस्सा सावियाणं तिण्णि सयसा-हस्सीओ पत्रं च सहस्सा छस्यया चोइसपुव्वीणं बीसं सया ओहिनाणीणं वत्तीसं सया केवल-

नाणीणं पणतीसं सया वेउब्बियाणं अड्डसया मणपञ्चवनाणीणं चोद्दससया वार्इणं वीसं सया अनुत्तरोववाइयाणं मल्लिस्स णं अरहओ दुविहा अंतकरभूमी होत्था तं जहा-जुगंतकरभूमी परिया-यंतकरभूमी य जाव वीसइमाओ पुरिसजुगाओ जुगंतकरभूमी दुवासपरियाए अंतमकासी मल्ली णं अरहा पणुवीसं धणुइ उड्ढं उच्चतेणं वण्णेणं पियंगुसामे समचउरंसंठाणे वज्जरिस- हनाराय-संघयणे मज्जेदेसे सुहंसुहेणं विहरिता जेणेव सम्पेए पव्वए तेणेव उवागच्छइ उवागच्छिता सम्पेयसेलसिहरे पाओवगमणंणुवत्रे मल्ली णं अरहा एणं वाससयं अगारवासमज्जे पणपण्णं वाससहस्साइ वाससयऊणाइ केवलिपरियाणं पाउणिता पणपत्रं वाससहस्साइ सव्वाउयं पालइत्ता जे से गिम्हाणं पढमे मासे दोब्बे पक्खे चेतसुद्धे तस्स णं चेतसुद्धस्स चउत्थीए पक्खेणं भणीए नक्खत्तेणं जोगमुवागएणं अद्धरत्तकालसमयंसि पंचहिं अज्जियासएहिं-अत्थितरियाए परिसाए पंचहिं अणगारसएहिं-वाहिरियाए परिसाए मासिएणं भत्तेणं अपाणएणं वण्धारियापाणी पाए साहट्टु खीणे वेयणिल्ले आउए नामगोए सिद्धे एवं परिनिव्वानमहिमा भाणियव्वा जहा जंबुद्धी-वपन्नत्तीए नंदीसरे अट्ठाहियाओ पडिगयाओ एवं खलु जंबू समणेणं भगवया महावीरेणं अट्टमस्स नायज्झवणस्स अयमट्टे पन्नत्ते त्ति वेमि ।८४।-७८

● पढमे सुयक्खंथे अट्टमं अज्झयणं समत्तं ●

नवमं अज्झयणं—मायंदी

(११०) जइ णं भंते समणेणं भगवया महावीरेणं जाव संपत्तेणं अट्टमस्स नायज्झयणस्स अयमट्टे पन्नत्ते नवमस्स णं पंते नायज्झयणस्स के अट्टे पन्नत्ते एवं खलु जंबू तेणं कालेणं तेमं समएणं चंपा नामं नयरी पुन्नभदे वेइए तत्थ णं मायंदी नाम सत्यवाहे परिवसइ-अइडे तस्स णं भदा नामं भारिया तीसे णं भदाए अत्तया दुवे सत्यावाहदारया होत्था तं जहा-जिणपालिए य जिण-रक्खिए य तए णं तेसिं मागंदिय-दारगाणं अण्णया कयाइ एगयओ सहियाणं इमेयारूवे भिहोक-हासमुल्लावे समुप्पजित्थ्या-एवं खलु अन्हे लवणसमुद्दं पोयवहणेणं एककारसवाराओ ओगाढा सव्वत्थ वि य णं लद्धइ कयकज्जा अणहसमग्गा पुणरवि नियधरं हव्वमागया तं सेयं खलु अण्णं देवाणुप्पिया दुवालसंपि लवणसमुद्दं पोयवहणेणं ओगाहितए त्ति कट्टु अण्णमण्णस्स एयमट्टं पडिसुणेत्ति पडिसुणेत्ता जेणेव अम्मापियरो तेणेव उवागच्छंति उवागच्छिता एवं वयासी एवं खलु अण्णं अम्मयाओ लवणसमुद्दं पोयवहणेणं एककारसवाराओ [ओगाढा सव्वत्थ वि य ण वद्धइ कयकज्जा अणहसमग्गा पुणरवि] नियधरं हव्वमागया तं इच्छामो णं अम्मयाओ तुब्भेहिं अम्म-णुण्णाया समाणा दुवालसंपि लवणसमुद्दं पोयवहणेणं ओगाहितए तए णं ते मागंदिय-दारए अम्मापियरो एवं वयासी-इमे भे जाया अज्झय-[पज्जय-पिउपज्जागाए सुबहु हिरण्णे य सुवण्णे य कसे य दूसे य मणिमोत्तिय-संख-सिल-प्पवाल-रत्तरयण-संतसार-सावएज्जे य अलाहि जाव आसत्तामओ कुलवंसाओ पगामं दाउं पगामं भोत्तुं पगामं] परिभाएउं तं अनुहोह ताव जाया विपुले माणुस्सए इइदीसक्कारसमुदए किं भे सपच्चावाएणं निरालंबणेणं लवणसमुद्देत्तारेणं एवं खलु पुत्ता दुवालसमी जत्ता सोवसग्गा थावि भवइ तं मा णं तुब्भे दुवे पुत्ता दुवालसंपि लवण [समुद्दं पोयवहणेणं] ओगाहेह मा हु तुब्भं सरीरस्स वावत्ती भविस्सइ तए णं ते मागंदिय-दारगा अम्मापियरो दोच्चंपि तच्चंपि एवं वयासी-एवं खलु अण्णं अम्मयाओ एककारसवाराओ लवण [समुद्दं पोयवहणेणं ओगाढा] सव्वत्थ वि य णं लद्धइ कयकज्जा अणहसमग्गा पुणरवि निवधरं

हव्यमागया तं सेयं खलु अन्हं अम्पायाओ दुवालसंपि लवणसमुद्दं पोचवहणेणं ओगाहितए तए णं ते मार्गदिय-दारए अम्पापियरो जाहे नो संचाएंति बहूहिं आपवणाहिं य पन्नवणाहिं य आपवित्तए वा पन्नवित्तए वा ताहे अकमा चेव एयमद्दं अनुमण्णित्था तए णं ते मार्गदियदा रगा अम्पापिऊहिं अब्बणुण्णाया समाणा गणिमं च धरिमं च मेज्जं च पारिच्छेज्जं च भंडं गेण्हति जहा अरहत्रगस्स जाव लवणसमुद्दं बहूइं जोयसयाइं ओगाढा ।८५।-७९

(१११) तए णं तेसिं मार्गदिय-दारगाणं लवणसमुद्दं अणेगाइं जोयणसयाइं ओगाढाणं समाणाणं अणेगाइं उप्पाइयसयाइं पाउब्भूयाइं तं जहा-अकाले गज्झिए [अकाले विज्जुए अकाले] यणियसद्दे कालियवाए जाव समुद्धिए तए णं सा नावा तेणं कालियवाएणं आहुणिज्ज-माणी-आहुणिज्जमाणी संचालिज्जमाणी-संचालिज्जमाणी संखोभिज्जमाणी-संखोभिज्जमाणी सलिल-तिक्ख-वेगेहिं अइअट्टिज्जमाणी-अइअट्टिज्जमाणी कोट्टिमंसि करतलाहते विव तिंदूसए तत्थेव-तत्थेव ओवयमाणी य उप्पयमाणी य उप्पयमाणी विव धरणीचलाओ सिद्धविज्जा विज्जाहरकत्रगा ओवयमाणी विव गगणतलाओ भट्टविज्जा विज्जाहरकत्रगा विपलायमाणी विव महागरुल-वेग-वित्तासिच भुयगवरकत्रगा धावमाणी विव महाजण-रसियसद्द-वित्तत्था ठाणभट्टा आसकि-सोरी निगुजमाणी विव गुरुजण-दिट्ठावराहा सुजणकुलकत्रगा धुम्ममाणी विव वीचि-पहार-सय-तलिय गलिय-लंयणा विव गगणतलाओ रोयमाणी विव सलिलगंधि-विप्पइर-माण-थोरंसुवाएहिं नववहू उवरयभत्तुया विलवमाणी विव परचक्करायाभिरोहिंया परमपहब्भयाभिहुया महापुरवरी ज्ञायमाणी विव कयड-च्छोमण-पओगजुत्ता जोगपरिव्वाइया नीससमाणी विव महाकतार-विणिग्गय-परिस्संता परिणयवया अम्मया सोयमाणी विव तव-चरण-खीणपरिभोगा चवणकाले देववरवहू संचुण्णिकट्ट-कूवरा भग्गमेढि-मोडियसहस्समाला सुलाइय-वंकपरिमासा फलहंतर-तडडंत-फुट्टंतसंधिवियलंत-लोहकिलिया सव्वंग-विचंभिया परिसडियरज्जुविसरंतसव्वगहरा आमगमल्लगभूया अकयपुत्र-जणमणोरहो विव चित्तिज्जमाणगुरुई हाहाकूकय-कण्णधारनाविय-वाणियगजण-कम्मकरविलविया नामाविह-रयण-पणिय-संपुण्णा बहूहिं पुरिससएहिं रोयमाणेहिं कंदमाणेहिं सोयमाणेहिं तिप्पमाणेहिं विलवमाणेहिं एणं महं अंतोजलगयं गिरिसिहरमासाइत्ता संभग्गकूवतोरणा मोडियज्जयदंडा बलयसयखंडिय करकरस्स तत्थेव विद्दवं उवगया तए णं तीए नावाए भिज्जमाणीए ते बहवे पुरिसा विपुल-पणिय-भंडमायाए अंतोजलंभि निमज्जाविवा यावि होत्था ।८६।-७९-R

(११२) तए णं ते मार्गदिय-दारगा छेया दक्खा पत्तट्ठा कुसला मेहावी निउणसिप्पो वगया बहूसु पोचवहण-संपराएसु कयकरणा लद्धविजया अमूढा अमूढहत्था एणं महं फलगखंडं आसादेति जंसि च णं पएंसंसि से पोचवहणे विवण्णे तंसि च णं पएंसंसि एगे महं रयणदीवे नामं दीवे होत्था-अणेगाइं जोयणाइं आयामविकखंभेणं अणेगाइं जोयणाइं परिक्खेवेणं नाणादुम-संड-मंडिउद्देसे सस्सिसरीए पासाईए दरिसणिज्जे अभिरूवे पडिरूवे तस्स बहुमज्जदेसभाए एत्थ णं महं एगे पासाववडेंसए यावि होत्था-अब्भुग्गयमूसिय-पहसिए जाव सस्सिसरीयरूवे पासाईए दरिसणिज्जे अभिरूवे पडिरूवे तत्थ णं पासाववडेंसए रयणदीव-देवया नामं देवया परिवसइ-पावा चंडा रुदा खुदा साहस्सिया तस्स णं पासाववडेंसयस्स चउदिसिं चत्तारि वणसंडा-किण्हा किण्हो-भासा तए णं ते मार्गदिय-दारगा तेणं फलयखंडेणं ओवुज्जमाणा-ओवुज्जमाणा रयणदीवतेणं

संवूढा यावि होत्या तए णं ते मार्गदिय-दारगा थाहं लभंति मुहुत्तरं आससंति फलगखंडं विसर्जेति रयणदीयं उत्तरंति फलाणं मग्गण-गवेसणं करेति फलाइं आहारेति नालिएताणं मग्गण-गवेसणं करेति पोक्खरणीओ ओगाहेति जलमज्जणं करेति पोक्खरणीओ पच्चुतरंति पुढविसिला वट्टयंसि निसीयंति निसीइत्ता आसत्या वीसत्या सुहासणवरगया चंपं नयरिं अम्पापिउआपुच्छणं च लवण-समुदोत्तारणं च कालियवायसम्भुच्छणं च पोयवहणविवत्ति च फलयखंडस्सा सायणं च रयणदीवो-त्तारं च अनुचितेमाणा-अनुचितेमाणा ओहयमणसंकम्पा [करतलपल्हत्थमुहा अट्टज्झाणोवगया] श्रियावन्ति

तए णं सा रयणदीवदेवया ते मार्गदिय-दारए ओहिणा आभोएइ असिखेडगवग्ग-हत्था-सत्तडुत्तलपमाणं उड्डं वेहासं उप्पयइ उप्पइत्ता ताए उक्किट्ठाए जाव देवगईए वीईवयमाणी-वीईवयमाणी जेणेव मार्गदिय-दारया तेणेव उवागच्छइ उवागच्छिता ते मार्गदिय-दारए खर-फरुस-निट्टर-वयणेहिं एवं वयासी-हंभो मार्गदिय-दारया जइ णं तुब्भे मए सद्धि विउलाइं भोग-भोगाइं भुंजमाणा विहरह तो भे अत्थि जीवियं अहण्णं तुब्भे मए सद्धि विउलाइं भोगभोगाइं भुंजमाणा नो विहरह तो भे इमेणं नीलुप्पलगवलगुलिय- [अयसिकुसुमप्पगासेण] खुरधारेणं असिणा रत्तगंडमसुयाइं माउआहिं उवसोहियाइं तालफलाणि व सीसाइं एगंते एडेसि एतए णं ते मार्गदिय-दारगा रयणदीवदेवयाए अंतिए एयमट्टं सोद्धा निसम्म भीया करयल [परिण्हियं सिरसा-वत्तं मत्थए अंजलि कट्टु] एवं वयासी-जण्णं देवाणुप्पिया वइस्संति तस्स आणा- उववाय-वयण-निदेसे चिद्धिस्सामो तए णं सा रयणदीवदेवया ते मार्गदिय-दारए गेण्हइ जेणेव पासाय-वडेसए तेणेव उवागच्छइ असुभपोग्गलावहारं करेइ सुभपोग्गलपक्खेवं करेइ तओ पच्छा तेहिं सद्धि विउलाइं भोगभोगाइं भुंजमाणी विहरह कल्लकल्लिं च समथफलाइं उवणेइ ।८७।-६०

(११३) तए णं सा रयणदीवदेवया सक्कवयण-संदेसेणं सुद्धिएणं लवणाहिवइणा लवणसमुदुं तिसत्तखुत्तो अनुपरियट्टेयव्वे त्ति जं किंचि तत्थ तणं वा पत्तं वा कट्टं वा कयवर वा असुइ पूइयं दुरभिगंधमचोक्खं तं सव्वं आहुणिय-आहुणिय तिसत्तखुत्तो एगंते एडेयव्वं ति कट्टु निउत्ता तए णं सा रयणदीवदेवया ते मार्गदिय-दारए एवं वयासी-एवं खलु अहं देवाणुप्पिया सक्कवयण-संदेसेणं सुद्धिएणं लवणाहिवइणा तं चेव जाव निउत्ता तं जाव अहं देवाणुप्पिया लवणसमुदुं [तिसत्तखुत्तो अनुपरियट्टिता जं किंचि तत्थ तणं वा पत्तं वा कट्टं वा कयवर वा असुइ पूइयं दुरभिगंधमचोक्खं तं सव्वं आहुणिय-आहुणिय तिसत्तखुत्तो एगंते] एडिमि ताव तुब्भे इहेव पासाववडेसए सुहंसुहेणं अभिरममाणा चिट्ठह जइ णं तुब्भे एयंसि अंतरंसिउच्चिग्गा वा उस्सुया वा उप्पुया वा भवेज्जाह तो णं तुब्भे पुरत्थिमिल्लं वणसंडं गच्छेज्जाह तत्थ णं दो उऊ सया साहीणा तं जहा-पाउसे य वासारत्ते य ।८८-१।-६१-१

(११४) तत्थ उ-कंदल-सिलिंध-दंतो निउस-वरपुप्फपीवरकरो
कुडयज्जुण-नीव-सुरभिदाणो पाउसउऊ गयवरो साहीणो ॥१६॥-१

(११५) तत्थ य-सुरगोवमणि-विचित्तो दट्टरकुलरसिय-उज्जररवो
वरहिणवंद-परिणद्धसिरहो वासारत्तउऊ पव्वओ साहीणो ॥१७॥-२

(११६) तत्थ णं तुब्भे देवाणुप्पिया बहूसु वावीसु य जाव सरसरपंतियासु य बहूसु आली-धरएसु य मालीधरएसु य जाव कुसुमधरएसु य सुहंसुहेणं अभिरममाणा अभिरमाणा विहरिज्जाह

जइ णं तुब्भे तत्थ वि उब्बिग्गा वा उस्सुया वा उप्पुया वा भवेज्जाह तो णं तुब्भे उत्तरिळ्ळं वणसंडं गच्छेज्जाह तत्थ णं दो उऊ सया साहीणा तं जहा-सरदी य हेमंतो य १८८-२१-७१-२

(११७) तत्थ उ-सण-सत्तिवण्ण-कउहो नीलुप्पल-पउम-नलिण-सिंगो
सारस-चक्ककाय-रवियघोसो सरयउऊ गोवई साहीणो ॥१८॥-१

(११८) तत्थ य-सियकुंद-धवलजोण्हो कुसुमिय-लोद्धवणसंड-मंडलतलो
तुसार-दगघार-पीवरकरो हेमंतउऊ ससी सया साहीणो ॥१९॥-२

(११९) तत्थ णं तुब्भे देवाणुप्पिया वहूसु वावीसु य [जाव सरसपंतियासु य वहूसु आलीघरएसु य मालीघरएसु य जाव कुसुमघरएसु य सुहंसुहेणं अभिरममाणा अभिरममाणा] विहरिज्जाह जइ णं तुब्भे तत्थ वि उब्बिग्गा वा उस्सुया वा उप्पुया वा भवेज्जाह तो णं तुब्भे अवरिळ्ळं वणसंडं गच्छेज्जाह तत्थ णं दो उऊ सया साहीणा तं जहा-वसंते य गिह्हे य १८८-३-७१

(१२०) तत्थ उ-सहकार-चारुहारो किंसुय-कण्णियारासोगमउडो
ऊसियतिलग-बकुलायवत्तो वसंतउऊ नरवई साहीणो ॥२०॥-१

(१२१) तत्थ य-पाडल-सिरीस सलिलो मड्डिया-वासंतिय-धवलवेलो
सीयलसुरभि-निल-मगरवरिओ गिह्हेउऊ सगरो साहीणो ॥२१॥-२

(१२२) तत्थ णं वहूसु [वावीसु य जाव सरसपंतियासु य वहूसु आलीघरएसु य मालीघरएसु य जाव कुसुमघरएसु य सुहंसुहेणं अभिरममाणा-अभिरममाणा विहरेज्जाए जइ णं तुब्भे देवाणु-प्पिया तत्थ वि उब्बिग्गा वा उस्सुया वा उप्पुया वा भवेज्जाह तओ तुब्भे जेणेव पासयवडेंसए तेणेव उवागच्छेज्जाह ममं पडिवालेमाणा-पडिवालेमाणा चिट्ठेज्जाह मा णं तुब्भे दक्खिणिल्ले वणसंडं गच्छेज्जाह तत्थ णं महं एगे उग्गविसे चंडविसे धोरविसे अइकाए महाकाए मसि- महिस- मूसा-कालए नयणविसरोसपुत्रे-वेणिभूए उक्कड- फुड- कुडिल- जडुल- कक्खड- वियड- फडाडोव-करणदच्छे लोहागरधम्माण-धमधमंतघोसे अणागलिय-चंडतिव्वरोसे समुहिय-तुरिय-चवलं धमंते दिट्ठीविसे सप्पे परिवसइ मा णं तुब्भं सरीरगस्स वावत्ती भविस्सइ-ते मार्गदिय-दारए दोच्चंपि तच्चंपि एवं वदति यदित्ता वेउब्बियसमुग्धाएणं समोहण्णइ समोहणित्ता ताए उक्किक्काए देवगईए लवणसमुद्द तिसत्तखुत्तो अनुपरियट्ठेउं पयत्ता यावि होत्था १८८-७१

(१२३) तए णं ते मार्गदिय-दारया तओ मुहुत्तरस्स पासायवडेंसए सइ वा रइ वा धिइं वा अलभमाणा अण्णमण्णं एवं वयासी-एवं खलु देवाणुप्पिया रयणदीवदेवया अन्हे एवं वयासी-एवं खलु अहं सकक्कवयण-संदेसेणं सुट्ठिएणं लवणा-हिवइणा निउत्ता जाव मा णं तुब्भं सरीरगस्स वावत्ती भविस्सइ तं सेयं खलु अहं देवाणुप्पिया पुरत्थिमिल्लं वणसंडं गमित्ताए-अण्णमण्णस्स एयमट्ठं पडिसुणेत्ता पडिसुणेत्ता जेणेव पुरत्थिमिल्ले वणसंडे तेणेव उवागच्छति तत्थ णं वावीसु य जाव आलीघरएसु य जाव सुहंसुहेणं अभिरमाणा-अभिरममाणा विहरंति तए णं ते मार्गदिय-दारगा तत्थ वि सइं वा रइं वा धिइं वा अलभमाणा जेणेव उत्तरिल्ले वणसंडेतेणेव उवागच्छति तत्थ णं वावीसु य जाव आलीघरएसु य सुहंसुहेणं अभिरममाणा-अभिरममाणा विहरंति तए णं ते मार्गदिय-दारगा तत्थ वि सइं वा [रइं वा धिइं वा] अलभमाणा जेणेव पच्चत्थिमिल्ले वणसंडे तेणेव उवागच्छति तत्थ णं वावीसु य जाव आलीघरएसु य सुहंसुहेणं अभिरममाणा-अभिरममाणा विहरंति तए णं ते मार्गदिय-दारगा तत्थ वि सइं वा जाव अण्णमण्णं एवं वयासी-एवं खलु देवाणुप्पिया अन्हे रयणदीवदेवया एवं वयासी-एवं खलु अहं देवाणुप्पिया सकक्कवयण-संदेसेणं

सुद्धिएणं लवणाहिवड्डणा निउत्ता जाव मा णं तुब्भं सरीरगस्स वावत्ती भविस्सइ तं भवियब्बं एत्थ कारणेणं तं सेयं खलु अम्हं दक्खिणिल्ले वणसंडे गमित्ताए ति कट्टु अण्णमण्णस्स एयमट्ठं पडिसुणेति पडिसुणेत्ता जेणेव दक्खिणिल्ले वणसंडे तेणेव पहारेथ्य गमणाए तओ णं गंधे निद्धाइ से जहानामए-अहिमडे इ वा जाव अणिट्ठतराए चेव

तए णं ते मागंदिय-दारगा तेणं असुभेणं गंधेणं अभिभूया समाणा सएहिं-सएहिं उत्तरिञ्जेहिं आसाइं पिहेति पिहेत्ता जेणेव दक्खिणिल्ले वणसंडे तेणेव उवागया तत्थ णं महं एणं आघयणं पासंति-अट्टियरासि-सय-संकुलं भीम-दरिसणिञ्जं एणं च तत्थ सूलाइयं पुरिसं कलुणाइं कट्टाइं विस्सराइं कूवमाणं पासंति भीया [तत्था तसिया उच्चिगा] संजायमया जेणेव से सूलाइए पुरिसे तेणेव उवागच्छंति उवागच्छित्ता तं सूलाइयं पुरिसं एवं वयासी-एस णं देवाणुप्पिया कस्साघयणे तुमं च णं के कओ वा इहं हव्वमागए केणं वा इमेयारूवं आवयं पाविए तए णं से सूलाइए पुरिसे ते मागंदिय-दारगे एवं वयासी-एस णं देवाणुप्पिया रयणदीवदेवयाए आघयणे अहं णं देवाणुप्पिया जंयुद्दीवाओ दीवाओ भारहाओ वासाओ कागंदए आसवाणियए विपुलं पणियभंडमायाए पोयवहणेणं लवणसमुद्धं ओयाए तए णं अहं ओवुज्झमाणे-ओवुज्झमाणे रयणदीवतेणं संवूढे तए णं सा रयणदीवदेवया ममं पासइ पासित्ता ममं गेण्हइ गेण्हित्ता मए सद्धिं विउलाइं भोगभोगां भुंजमाणी विहरइ तए णं सा रयणदीवदेवया अण्णया कयाइ अहालहुसांसि अवराहंसि परिकुविया समाणी ममं एयारूवं आवयं पावेइ तं न नज्जइ णं देवाणुप्पिया तुब्भं पि इमेसिं सरीरगाणं का मण्णे आवई भविस्सइ ।८९।-८२

(१२४) तए णं ते मागंदिय-दारगा तस्स सूलाइगस्स अंतिए एयमट्ठं सोच्चा निसम्पं वलियतरं भीया तत्था तसिया उच्चिगा संजायमया सूलाइयं पुरिसं एवं वयासी-कहण्णं देवाणुप्पिया अम्हे रयणदीवदेवयाए हत्थाओ साहत्थिं नित्थरेज्जामो तए णं से सूलाइए पुरिसे ते मागंदिय-दारगे एवं वयासी-एस णं देवाणुप्पिया पुरत्थिमिल्ले वणसंडे सेलगस्स जक्खस्स जक्खाययणे सेलए नामं आसरूवधारी जक्खे परिवसइ तए णं से सेलए जक्खे चाउइसट्ठमुद्धिड्डुपुत्र-मासिणीसु आगय-समए पत्तसमए महया-महया सट्ठेणं एवं वदइ-कं तारायामि कं पालयामि तं गच्छह णं तुब्भे देवाणुप्पिया पुरत्थिमिल्ले वणसंडे सेलगस्स जक्खस्स महरिहं पुप्फच्चणियं करेह करेत्ता जञ्जुपायवड्डिया पंजलिउडा विणएणं पञ्जुवासमाणा विरह जाहे णं से सेलए जक्खे आगयसमए पत्तसमए एवं वएज्जा-कं तारायामि कं पालयामि ताहे तुब्भे एवं वदह-अम्हे तारायाहि अम्हे पालयाहि सेलए भे जक्खे परं रयणदीवदेवयाए हत्थाओ साहत्थिं नित्थरेज्जा अण्णाहा भे न याणामि इमेसिं सरीरगाणं का मण्णे आवई भविस्सइ तए णं ते मागंदिय-दारगा तस्स सूलाइयस्स पुरिसस्स अंतिए एयमट्ठं सोच्चा निसम्मा सिग्धं चंडं चवलं तुरियं वेइयं जेणेव पुरत्थिमिल्ले वणसंडे जेणेव पोक्खरिणी तेणेव उवागच्छंति उवागच्छित्ता पोक्खरिणी ओगाहेति ओगाहेत्ता जलमज्जणं करेति करेत्ता जाइं तत्थ उप्पलाइं जाव ताइं गेण्हंति गेण्हित्ता जेणेव सेलगस्स जक्खस्स जक्खाययणे तेणेव उवागच्छंति उवागच्छित्ता आलोए पणामं करेति करेत्ता महरिहं पुप्फच्चणियं करेति करेत्ता जञ्जुपायवड्डिया सुत्सूसमाणा नमंसमाणा पञ्जुवासंति

तए णं से सेलए जक्खे आगयसमए पत्तसमए एवं वयासी-कं तारायामि कं पालयामि तए णं ते मागंदिय-दारगा उट्टाए उट्टेति उट्टेत्ता करयल [परिग्गहियं सिरसावत्तं मत्थए अंजलिं कट्टु एवं

वयासी-अम्हे तारयाहि अम्हे पालयाहि तए णं से सेलए जक्खे ते मागंदिय-दारए एवं वयासी-एवं ख्लु देवाणुप्पिया तुअं मए सद्धि लवणसमुद्धं मज्झमज्झेणं वीईवयमाणेणं सा रयणदीवदेवया पावा चंडा रुद्धा खुद्धा साहसिया बहूहिं खरएहि य मउएहि य अणुलोमेहि य पडिलोमेहि य सिंगारेहि य कलुणेहि य उवसग्गेहिं उवसग्गे करेहिइ तं जइ णं तुअं देवाणुप्पिया रयणदीवदेवयाए एयमद्धं आढाह वा परियाणहा वा अवयक्खह वा तो भे अहं पट्ठाओ विहुणाभि अह णं तुअं रयणदीवदेवयाए एयमद्धं नो आढाह नो परियाणह नो अवयक्खह तो भे रयणदीवदेवयाएहत्याओ साहसिय नित्थारोभि तए णं ते मागंदिय-दारगा सेलगं जक्खं एवं वयासी-जं णं देवाणुप्पिया वइस्संति तस्स णं आणा उववाय-ययण-निद्वेसे चिद्धिस्साओ तए णं से सेलए जक्खे उत्तरपुरस्थिमं दिसीभागं अवक्कमइ अवक्कमिता वेउव्वियसमुग्धाएणं समोहण्णइ समोहणित्ता संखेज्जाइं जोयणाइं दंडं निस्सरइ दोअं पि वेउव्वियसमुग्धाएणं समोहण्णइ समोहणित्ता एणं महं आसरुवं विउव्वइ विउव्वित्ता मागंदिय-दारए एवं वयासी-हंभो मागंदिय-दारया आरुहह णं देवाणुप्पिया मम पट्ठंति तए णं ते मागंदियदारया हद्दा सेलगस्स जक्खस्स पणामं करंति करेत्ता सेलगस्स पट्ठं दुरूढा तए णं से सेलए ते मागंदिय-दारए पट्ठे दुरूढे जाणित्ता सत्तद्धतलपमाणमेत्ताइं उड्ढं वेहासं उप्पयइ उप्पइत्ता तए उक्किक्कट्ठाए तुरियाए चवलाए चंडाए दिव्वाए देवगईए लवणसमुद्धं मज्झमज्झेणं जेणेव जंबुद्दीवे दीथे जेणेव भारहे वासे जेणेव चंपा नयरी तेणेव पहारेत्थ गमणाए ।१०।-८३

(१२५) तए णं सा रयणदीवदेवया लवणसमुद्धं तिसत्तखुत्तो अनुपरियट्ठइ जं तत्थ तणं वा जाव एगंते एडेइ जेणेव पासायवडेंसए तेणेव उवागच्छइ उवागच्छित्ता ते मागंदिय-धारए पासायवडेंसए अपासमाणी जेणेव पुरत्थिमिल्ले वणसंडे तेणेव उवागच्छइ जाव सब्बओ समंता मग्गण-गवेसणं करेइ करेत्ता तेसिं मागंदिय-दारगाणं कत्थइ सुइ वा [खुइ वा पउत्तिं वा] अलप-माणी जेणेव उत्तरिल्ले एवं चेव पच्चत्थिमिल्ले वि जाव अपासमाणी ओहिं पउंजइ ते मागंदिय-दारए सेलएणं सद्धि लवणसमुद्धं मज्झमज्झेणं वीइवयमाणे पासइ पासित्ता आसुरुत्ता असिखेउगं गेणहइ पेण्हित्ता सत्तद्ध [तलपमाणमेत्ताइं उड्ढं वेहासं उप्पयइ उप्पइत्ता तए उक्किक्कट्ठाए देवगईए जेणेव मागंदिय-दारया तेणेव उवागच्छइ उवागच्छित्ता एवं वयासी-हंभो मागंदिय-दारगा अपत्थिय-पत्थाया किण्णं तुअं जाणह ममं विप्पजहाय सेलएणं जक्खेणं सद्धि लवणसमुद्धं मज्झमज्झेणं वीइवयमाणे तं एवमवि गए जइ णं तुअं ममं अवयक्खह तो भे अत्थि जीवियं अह णं नावयक्खह तो भे इमेणं नीलुप्पलगवल [गुलिय-अयसिक्कुसुगप्पगासेणं खुरधारेणं अस्सिणा रत्तगंडमंसुयाइं माउआहिं उवसोहियाइं तासफलाणि व सीसाइं एगंते एडेमि तए णं ते मागंदिय-दारगा रयणदीवदेवयाए अंतिए एयमद्धं सोच्चा निसम्म अभीया अत्तत्था अनुव्विग्गा अक्खुभिया असंभंता रयणदीवदेवयाए एयमद्धं नो आढंति नो परियाणंति नो अवयक्खंति अणाढामाणा अपरियामाणे अणवयक्खमाणा सेलएणं जक्खेणं सद्धि लवणसमुद्धं मज्झमज्झेणं वीइवयंति

तए णं सा रयणदीवदेवया ते मागंदिय-दारए जाहे नो संचाएइ बहूहिं पडिलोमेहि उव-सग्गेहिं चालित्तए वा लोभित्तए वा खोभित्तए वा विपरिणामित्तए वा ताहे म्हुरेहिं सिंगारेहि य कलुणेहि य उवसग्गेहिं उवसग्गेउं पयत्ता थावि होत्था-हंभो मागंदिय-दारगा जइ णं तुअं देवाणुप्पिया मए सद्धि हसियाणि य रमियाणि य ललियाणि य कीलियाणि य ऱ्हिडियाणि य मोहि-याणि य ताहे णं तुअं सव्वाइं अगणेमाणा ममं विप्पजहाय सेलएणं सद्धि लवणसमुद्धं मज्झमज्झेणं

वीईवयह तए णं सा रयणदीवदेवया जिणरक्खियस्स मणं ओहिणा आभोएइ आभोएत्ता एवं वयासी-निच्चंपि य णं अहं जिणपालियस्स अणिट्ठा अकंता अप्पिया अमणुण्णा अमणामा निच्चं मम जिणपालिए अणिट्ठे अकंते अप्पिए अमणुण्णे अमणाणे निच्चंपि य णं अहं जिणरक्खियस्स इट्ठा कंता पिया मणुण्णा मणामा निच्चंपि य णं ममं जिणरक्खिए इट्ठे कंते पिए मणुण्णे मणामे जइ णं ममं जिणपालिए रोयमाणिं कंदमाणिं सोयमाणिं तिप्पमाणिं विलवमाणिं नावयक्खइ किण्णं तुमंपि जिणरक्खिया ममं रोयमाणिं कंदमाणिं सोयमाणिं तिप्पमाणिं विलवमाणिं नावयक्खसि

१११-११-४-१

- (१२६) सा पवररयणदीवस्स देवया ओहिणा जिणरक्खियस्स नाऊण
वधनिमित्तं उवरीं मागंदिय-दारगाण दोण्हंपि ॥२२॥-१
- (१२७) दोसकलिया सललियं नाणाविह-चुण्णवास-मीस दिव्वं
धाण-मण-निच्चुइकरं सव्योउय-सुरभिकुसुम-वुट्ठिं पमुंचमाणी ॥२३॥-२
- (१२८) नाणामणि-कणग-रयण-घंटियाखिखिणि नेउर-मेहल-भूसणरवेणं
दिसाओ विदिसाओ पूरयंती वयणमिणं वेइ सा सकलुसा ॥२४॥-३
- (१२९) होल वसुल गोल नाह दइत्त पिय रमण
कंत सामिय निग्धिण नित्यक्क
थिण्ण निक्किव अकयण्णुय सिटिलभाव निळ्ळज्ज लुक्ख
अकलुण जिणरक्खिय मज्झं हिययरक्खगा ॥२५॥-४
- (१३०) न हु जुज्झसि एक्कयं अणाहं अबंधवं तुज्झ चलण-ओवायकारियं उज्झउमधवं
गुणसंकर हं तुमे विहूणा न समत्था जीविउ खणपि ॥२६॥-५
- (१३१) इमस्स उ अणेगइस-मगर-विविधसावय-
सयाउलधरस्स रयणागरस्स मज्झे
अप्पाणं वहेमि तुज्झ पुरओ एहि नियत्ताहि
जइ सि कुविओ खमाहि एगावराहं मे ॥२७॥-६
- (१३२) तुज्झ व विगयधण-विमलसिसमंडलागार-सस्सिरीयं
सारयनवकमल-कुमुद-कुवल्लय-दलनिकरिस निभनयणं
वयणं पिवासागयाए सद्धा मे पेच्छिउं जे
अवल्लोएहिं ता इ ममं नाह जा ते पेच्छामि वयणकमलं ॥२८॥-७
- (१३३) एव सप्पणय-सरल-महुराई पुणो-पुणो कलुणाई
वयणाई जंपमाणी सा पाया मग्गओ समण्णेइ पावहियमा ॥२९॥-८

(१३४) तए णं से जिणरक्खिए चलमणे तेणेव भूसणरवेणं कण्णसुहमणहरेणं तेहि य सप्पणय-सरल-महुर-मणिएहिं संजाय-विउण-राए रयणदीवस्स देवयाए तीसे सुंदरथण- जहण-वयण-कर-चरण-नयण-त्तावण्ण-रूव-जोवण्णसिरिं च दिव्वं सरभस-उवगूहियाई दिव्वोय-विलसियाणि य विहसिय- सकडक्खदिट्ठि- निस्सासिय- मलिय- उवल्लिय- थिय- गमण- पणय-खिज्जिय-पासाइयाणि य सरमाणे रागमोहियमती अवसे कम्मवसगए अवयक्खइ मग्गतो सविलियं तए णं जिणरक्खियं समुप्पण्णकलुणभावं मच्चु-गलत्थाए-नोल्लियमई अवयक्खंतं तहेव जक्खे उ सेलए जाणिऊण सणियं-सणियं उव्विहइ नियगपट्ठाहि विगयसद्धे तए णं सा रयणदीवदेवया

निसंसा कलुणं जिणरक्खियं सकलुसा सेलगपड्ढाहिं ओवयंतं-दास मओसि ति जंपमाणी अपत्तं सागरसलिलं गेण्हिय वाहाहिं आरसंतं उड्ढं उच्चिहइ अंबरतले ओवयमाणं च मंडलगणं पडिच्छिता नीलुप्पल-गवलगुलिय-अयसिकुसुमप्पागासेण असिबरेण खंडाखंडि करेइ करेत्ता तथेव विलवमाणं तस्स य सरस-वहियस्स घंतूणं अंगमंगाइं सरुहिराइं उक्खित्तबलि चउड्हिसिं करेइ सा पंजली पहिड्ढा १९११-८४

(१३५) एवामेव समणाउसो जो अन्हं निग्गंधो वा निग्गंधी वा आयरिय-उवज्जायाणं अंतिए मुंडे भविता अगाराओ अणगारियं पव्वइए समाणे पुनरवि माणुस्सए कामभोगे आसयइ पत्थइ पीहेइ अभिलराइ से णं इहभवे चेव बहूणं समणाणं बहूणं समणीणं बहूणं सावयाणं बहूणं साविचाणं य हीलणिजे जाव चाउरंतं संसारकंतारं भुजो-भुजो अनुपरियड्हिस्सइ-जहा व से जिणरक्खिए १९२१-८५

(१३६) छल्लिओ अवयक्खंतो निरवयक्खो गओ अविग्घेणं

तन्हा पवयणसारे निरावयक्खेणं भवियव्वं

॥३०॥-१

(१३७) भोगे अवयक्खंता पडंति संसारसागरे धोरे

भोगेहिं निरवयक्खा तरंति संसारकंतारं

॥३१॥-२

(१३८) तए णं सा रयणदीवदेवया जेणेव जिणपालिए तेणेव उवागच्छइ बहूहिं अनुलोमेहिं य पडिलोमेहिं य खरएहिं व मउएहिं य सिंगारेहिं कलुणेहिं य उवसग्गेहिं जाहे नो संचाएइ चालित्ताए वा खोभित्ताए वा विपरिणामित्ताए वा ताहे संता तंता परितंता निव्विण्णा समाणा जामेव दिसिं पाउब्भूया तामेव दिसिं पडिगया तए णं से सेलए जक्खे जिणपालिएण सद्धिं लवणसमुहं मज्झंमज्जेणं वीईवयइ वीईवइत्ता जेणेव चंपा नयरी तेणेव उवागच्छइ उवागच्छित्ता चंपाए नयरीए अग्गुज्जाजाणंसि जिणपालियं पट्ठाओ ओयारेइ ओयारेत्ता एवं वयासी-एस णं देवाणुप्पिया चंपा नयरी दीसइ ति कट्टु जिणपालियं पुच्छइ जानेव दिसं पाउब्भूए तामेव दिसिं पडिगए १९३१-८६

(१३९) तए णं से जिणपालिए चंपं नयरी अनुपविसइ अनुपविसित्ता जेणेव सए गिहे जेणेव अम्मापियरो तेणेव उवागच्छइ उवागच्छित्ता अम्मापिऊणं रोयमा णे [कंदमाणे सोयमाणे तिप्पमाणे] विलवमाणे जिणरक्खिय-वावत्तिं निवेदेइ तए णं जिणपालिए अम्मापियरो पित्त-नाइ- [नियग-सयण-संबंधि] परियणेणं सद्धिं रोयमाणा कंदमाणा सोयमाणा तिप्पमाणा विलवमाणा बहूइं लोइयाइं मयकिच्चाइं करंति करेत्ता कालेणं विगयसोया जाया तए णं जिणपालियं अण्णया कयाइं सुहासणवरगयं अम्मापियरो एवं वयासी-कहण्णं पुत्ता जिणरक्खिए कालगए तए णं से जिणपालिए अम्मापिऊणं लवणसमुहोत्तारं च कालियवाव-समुच्छयं च पोववहण-विवत्तिं च फलहखंडआसायणं च रयणदीवुत्तारं च रयणदीव देवया-गिण्हणं च भोगविभूइं च रयणदी-वदेवया-आधयणं च सूलाइयपुरिसदरिसणं च सेलगजक्खाआरुहणं च रयणदीवदेवया- उवसग्गं च जिणरक्खियवावत्तिं च लवणसमुहउतरणं च चंपागमणं च सेलगजक्खआपुच्छणं च जहाभूय-मवितहमसदिद्धं परिकहेइ तए णं से जिणपालिए अप्ससोगे जाए जाव विपुत्ताइं भोगभोगाइं भुंजमाणे विहरइ १९४१-८७

(१४०) तेणं कालेणं तेणं समएणं समणे भगवं महावीरे समोसठे जिणपालिए धम्मं सोच्चा पव्वइए एगारसंगवी मासियाए संलेहणाए अप्याणं झोसेत्ता सद्धिं भत्ताइं अणसणाए छेएत्ता

कालमासे कालं किच्चा सोहम्मे कप्पे देवत्ताए उच्चवण्णे दो सागरोवमाइं ठिई महाविदेहे वासे सिञ्जिहिइ जाव सव्वदुक्खामणमंतं काहिइ एवामेव समणाउसो [जो अहं निग्गंधो वा निग्गंधी वा आयरिय-उवज्झायाणं अंतिए मुंडे भविता अगाराओ अणगारियं पव्वइए समाणे] माणुस्सए कामभोगि नो पुणरवि आसयइ पत्थयइ पीहेइ सेणं इह भवे चेव बहूणं समणाणं बहूणं समणीणं बहूणं सावयाण बहूणं सावियाण य अन्नणिञ्जे जाव चाउरंतं संसारकतारं वीईवइस्सइ-जहा व से जिणपालिए एवं खलु जंबू समणेणं भगवया महावीरेणं आइगरेणं तित्थगरेणं जाव सिद्धि गइनामधेअं ठाणं संपत्तेणं नवमस्स नायज्झयणस्स अयमट्ठे पन्नत्ते त्ति बेमि १९५१-४४

● पढमे सुयकखंभे नवमं अज्झयणं सप्तं ●

दसमं अज्झयणं—चंदिमा

(१४१) जइ णं भंते समणेणं भगवया महावीरेणं नवमस्स नायज्झयणस्स अयमट्ठे पन्नत्ते दसमस्स णं भंते नायज्झयणस्स के अट्ठे पन्नत्ते एवं खलु जंबू तेणं कालेणं तेणं समएणं रायगिहे नयेरे गोयमो एवं वयासी-कहण्णं भंते जीवा वइढंति वा हायंति वा गोयमा से जहानामए बहुलपक्खस्स पाडिवय-चंदे पुण्णिमा-चंदं पणिहाय हीणे वण्णेणं हीणे सोम्माए हीणे निद्धयाए हीणे कंतीए एवं-दितीए जुतीए छायाए पभाए ओयाए लेसाए हीणे मंडलेणं तयाणंतरं च णं वीयाचंदे पाडिवय-चंदं पणिहाय हीणतराए वण्णेणं जाव हीणतराए मंडलेणं तयाणंतरं च णं तइया-चंदे बीया-चंदं पणिहाय हीणतराए वण्णेणं जाव हीणतराए मंडलेणं एवं खलु एएणं कमेणं परिहायमाणे-परिहायमाणे जाव अमावसा-चंदे चाउइसि-चंदं पणिहाय नट्ठे वण्णेणं जाव नट्ठे मंडलेणं

एवामेव समणाउसो जो अहं निग्गंधो वा निग्गंधी वा [आयरिय-उवज्झायाणं अंतिए मुंडे भविता अगाराओ अणगारियं] पव्वइए समाणे हीणे खंतीए एवं-मुतीए गुतीए अज्जवेणं मह्वेणं लाघवेणं सच्चेणं तवेणं चियाए अकिंचणयाए हीणे बंभचेरवासेणं तयाणंतरं च णं हीणतराए खंतीए जाव हीणतराए बंभचेरवासेणं एवं खलु एएणं कमेणं परिहायमाणे-परिहायमाणे नट्ठे खंतीए जाव नट्ठे बंभचेरवासेणं से जहा वा सुक्कपक्खस्स पाडिवय-चंदं अमावसा-चंदं पणिहाय अहिए वण्णेणं अहिए सोम्माए [अहिए निद्धयाए अहिए कंतीए एवं-दितीए जुतीए छायाए पभाए ओयासे लेसाए] अहिए मंडलेणं तयाणंतरं च णं बीया-चंदे पाडिवय-चंदं पणिहाय अहियराए वण्णेणं जाव अहियराए मंडलेणं एवं खलु एएणं कमेणं परिवइडेमाणे-परिवइडेमाणे जाव पुण्णिमा-चंदे चाउइसि-चंदं पणिहाय पडिपुण्णे वण्णेणं जाव पडिपुण्णे मंडलेणं एवामेव समणाउसो [जो अहं निग्गंधो वा निग्गंधी वा आयरियउवज्झायाणं अंतिए मुंडे भविता अगाराओ अणगारियं] पव्वइए समाणे अहिए खंतीए [एवं-मुतीए गुतीए अज्जवेणं मह्वेणं लाघवेणं सच्चेणं तवेणं चियाए अकिंचणयाए अहिए बंभचेरवासेणं तयाणंतरं च णं अहियराए खंतीए जाव अहियराए बंभचेरवासेणं एवं खलु एएणं कमेणं परिवइडेमाणे-परिवइडेमाणे पडिपुण्णे खंतीए जाव पडिपुत्रे बंभचेरवासेणं एवं खलु जीवा वइढंति वा हायंति वा एवं खलु जंबू समणेणं भगवया महावीरेणं दसमस्स नायज्झयणस्स अयमट्ठे पन्नत्ते त्ति बेमि १९६१-४४

● पढम सुयकखंभे दसमं अज्झयणं सप्तं ●

एक्कारसमं अञ्जयणं दावद्दे

(१४२) ञ्ज णं भंते समणेणं भगवया महावीरेणं दसमस्स नायज्झयणस्स अयमद्वेपत्रते एक्कारसमस्स णं भंते नायज्झयणस्स के अद्वे पत्रते, एवं खलु जंबू तेणं कालेणं तेणं समएणं रायगिहे नगरे गोयमी एवं वयासी-कहणं भंते जीवा आराहगा वा विराहगा वा भवंति गोयमा से जहानामाए एणंसि समुद्दकूलंसि दावद्देवा नामं रुक्खा पत्रत्ता-किण्हा जाव निउरंबभूया पत्तिया [पुष्फिया फलिया हरियग-रेरिज्जमाणा सिरीए अईव उवसोभेमाणा-उवसोभेमाणा] चिद्धंति जया णं दीविच्चगा ईसि पुरेवाया पच्छावाया मंदावाया महावाया वायंति तथा णं बहवे दावद्देवा रुक्खा पत्तिया [पुष्फिया फलिया हरियग-रेरिज्जमाणा सिरीए अईव उवसोभेमाणा-उवसोभेमाणा चिद्धंति अप्पेगइया दावद्देवा रुक्खा जुण्णा झोडा परिसडिय-पंडुपत्त-फला सुक्करुक्खाओ विव मिलाय-नाणा-मिलायमाणा चिद्धंति एवामेव समणाउसो जो अहं निग्गंथो वा निग्गंथी वा [आयरिय-उवज्झायाणं अंतिए मुंडे भवित्ता अगाराओ अणगारियं] पव्वइए समाणे बहूणं समणाणं बहूणं समणीणं बहूणं सावयाणं बहूणं सावियाणं य सम्मं सहइ [खमइ तितिकखइ] अहियासेइ बहूणं अण्णउत्थियाणं बहूणं गिहत्थाणं नो सम्मं सहइ जाव नो अहियासेइ-एस णं मए पुरिसे देसविराहए पत्रते

समणाउसो जया णं सामुद्दगा ईसि पुरेवाया पच्छावाया मंदावाया महावाया वायंति तथा णं बहवे दावद्देवा रुक्खा जुण्णा झोडा [परिसडिय-पंडुपत्त-पुष्फ-फला सुक्करुक्खाओ विव] मिलायमाणा-मिलायमाणा चिद्धंति अप्पेगइया दावद्देवा रुक्खा पत्तिया पुष्फिया फलिया हरियगरेरिज्जमाणा सिरीए अईव उवसोभेमाणा-उवसोभेमाणा चिद्धंति एवामेव समणाउसो जो अहं निग्गंथो वा निग्गंथी वा [आयरियउवज्झायाणं अंतिए मुंडे भवित्ता अगाराओ अणगारियं] पव्वइए समाणे बहूणं समणाणं बहूणं समणीणं बहूणं सावयाणं बहूणं सावियाणं बहूणं अण्णउत्थियाणं बहूणं गिहत्थाणं नो सम्मं सहइ खमइ तितिकखइ अहियासेइ बहूणं समणाणं बहूणं समणीणं बहूणं सावयाणं बहूणं सावियाणं य नो सम्मं सहइ जाव नो अहियासेइ-एस णं मए पुरिसे देसाराहए पत्रते समणाउसो जया णं नो दीविच्चगा नो सामुद्दगा ईसि पुरेवाया पच्छावाया मंदावाया महावाया वायंति तथा णं सब्बे दावद्देवा रुक्खा जुण्णा झोडा परिसडिय-पंडुपत्त-पुष्फ-फला सुक्करुक्खाओ विव मिलायमाणा-मिलायमाणा चिद्धंति अप्पेगइया दावद्देवा रुक्खा पत्तिया पुष्फिया फलिया हरियग-रेरिज्जमाणा सिरीए अईव उवसोभे-माणा-उवसोभेमाणा चिद्धंति एवामेव समणाउसो जो अहं निग्गंथो वा निग्गंथी वा आयरिय-उवज्झायाणं अंतिए मुंडे भवित्ता अगाराओ अणगारियं पव्वइए समाणे बहूणं समणाणं बहूणं समणीणं बहूणं सावयाणं बहूणं सावियाणं बहूणं अण्णउत्थियाणं बहूणं गिहत्थाणं नो सम्मं सहइ जाव नो अहियासेइ-एस णं मए पुरिसे सब्बविराहए पत्रते समणाउसो जया णं नो दीविच्चगा वि सामुद्दगा वि ईसि पुरेवाया पच्छावाया मंदावाया महावाया वायंति तथा णं सब्बे दावद्देवा रुक्खा पत्तिया पुष्फिया फलिया हरियगरेरिज्जमाणा सिरीए अईव उवसोभेमाणा-उवसोभेमाणा चिद्धंति एवामेव समणाउसो जो अहं निग्गंथो वा निग्गंथी वा आयरिय-उवज्झायाणं अंतिए मुंडे भवित्ता अगाराओ अणगारियं पव्वइए समाणे बहूणं समणाणं बहूणं समणीणं बहूणं सावयाणं बहूणं सावियाणं बहूणं अण्णउत्थियाणं बहूणं गिहत्थाणं नो सम्मं सहइ खमइ तितिकखइ अहियासेइ-एस णं मए पुरिसे सब्बविराहए पत्रते एवं खलु गोयमा जीवा आराहगा वा विराहगा वा भवंति एवं खलु जंबू समणेणं भगवया महावीरेणं

एककारसप्तस नायज्झयणस्स अयमट्ठे पत्रत्ते त वेमि ।१०।-७०

● पट्ठे सुयकसंभे एककारसप्तं अज्झयणं समत्तं ●

बारसमं अज्झयणं—उदगणाए

(१४३) जइ णं भंते समणेणं भगवया महावीरेणं एककारसप्तस नायज्झयणस्स अयमट्ठे पत्रत्ते बारसप्तस णं भंते नायज्झयणस्स के अट्ठे पत्रत्ते एवं खलु जंबू तेणं कालेणं तेणं समएणं चंपा नामं नयरी पुत्रभट्ठे चेइए जियसत्तू राया धारिणी देवी अदीणसत्तू कुमारे जुवराया वि होत्या सुबुद्धी अमच्च जाव रत्ताधुराचितए सप्तणोवासए तीसे णं चंपाए नयरीए बहिया उत्तरपुरत्थिमेणं एगे फरिहोदए यावि होत्या-मेय-वसा-रुहिरमंस-पूच-पडल-पोछडे मयग-कलेवर-संछण्णे अमणुण्णे वण्णेणं अमणुण्णे गंधेणं अमणुण्णे रसेणं अमणुण्णे फासेणं से जहाणनामए-अहिमडे इ वा गोमडे इ वा जाव मय-कुहिय-विणइ-किमिण-वावण्णजदुरभिगंधे किमि जालउले संसत्ते असुइ-विगइ-वीभच्छ-दरिसणिजे भवेयारूवे सिया नो इणट्ठे सप्तट्ठे एतो अणिट्ठतराए चेव [अकंततराए चेव अप्पियतराए चेव अमणुण्णतराए चेव अमणामतराए चेव] गंधेणं पत्रत्ते ।१८।-७१

(१४४) तए णं से जियसत्तू राया अण्णया कयाइ ण्हाए कयबलिकम्मे जाव अप्पम-हरधाभरणालंकियसरीरे वहुहिं ईसर जाव सत्यवाहपभिइहिं सद्धि भोयणमंडवंसि भोयणवेलाए सुहासणवरगए विउलं असणं [पाणं खाइमं साइमं आसाएमाणे विसाएमाणे परिभाएमाणे परिभुंजेमाणे एवं च णं] विहरइ जिमियभुत्तरागए [वि य णं समाणे आयंते चोक्खे परमं] सुइभूए तंसि विपुलंसि असण-पाण-खाइम-साइमंसि जायविन्हए ते बहवे ईसर जाव सत्यवाहपभिइओ एवं वयासी-अहो णं देवाणुप्पिया इमे मणुण्णे असण पाण-खाइम-साइमे वण्णेणं उववेए [गंधेणं उववेए रसेणं उववेए] फासेणं उववेए अस्सायणिजे विसायणिजे पीणणिजे दीवणिजे दप्पणिजे मयणिजे बिहणिजे सव्विदियगाय-पल्हायणिजे तए णं ते बहवे ईसर जाव सत्यवाहपभिइओ जियसत्तु रायं एवं वयासी-तहेव णं सामी जण्णं तुब्भे बयह अहो णं इमे मणुण्णे असण-पाण-खाइम-साइमे वण्णेणं उववेए जाव सव्विदियगाय-पल्हायणिजे तए णं जियसत्तू राया सुबुद्धि अमच्च एवं वयासी-अहो णं देवाणुप्पिया सुबुद्धी इमे मणुण्णे असण-पाण-खाइम-साइमे जाव सव्विदियगाय-पल्हायणिजे तए णं सुबुद्धी जियसत्तुस्स रण्णो एयमट्ठं नो आढाइ नो परियाणाइ तुसिणीए संचिइइ तए णं जियसत्तू राया सुबुद्धि दोच्चं पि तच्चं पि एवं वयासी-अहो णं देवाणुप्पिया सुबुद्धी इमे मणुण्णे असण-पाण-खाइम-साइमे जाव सव्विदियगायपल्हायणिजे

तए णं से सुबुद्धी अमच्च जियसत्तुणा रण्णा दोच्चं पि तच्चं पि एवं वुत्ते समाणे जियसत्तु रायं एवं वयासी-नो खलु सामी अन्हं एयंसि मणुण्णंसि असण-पाण-खाइम-साइमंसि केइ विन्हए एवं खलु सामी सुब्भिसद्दा वि पोग्गला दुब्भिसद्दाए परिणमंति दुब्भिसद्दा वि पोग्गला सुब्भिसद्दाए परिणमंति सुरवा वि पोग्गला दुरुवताए परिणमंति दुरुवा वि पोग्गला सुरुवताए परिणमंति सुब्भिंगंधा वि पोग्गला दुब्भिंगंधताए परिणमंति दुब्भिंगंधा वि पोग्गला सुब्भिंगंधताए परिणमंति सुरसा वि पोग्गला दुरसत्ताए परिणमंति दुरसा वि पोग्गला सुरसत्ताए परिणमंति सुहफासा वि पोग्गला दुहफासत्ताए परिणमंति दुहफासा वि पोग्गला सुहफासत्ताए परिणमंति पओग-वीससा-परिणया वि य णं सामी पोग्गला पत्रत्ता तए णं जियसत्तू राया सुबुद्धिस्स अमच्चस्स एवमाइक्ख-माणस्स भासमाणस्स पत्रवेमाणस्स परूवेमाणस्स एयमट्ठं नो आढाइ नो परियाणाइ तुसिणीए

संचिद्धइ तए णं से जियसत्तू राया अण्णया कयाइ ण्हाए आसखंधवरगए महाभाभडचडगर-आस-
 बाहिणिआए निज्जायमाणे तस्स फरिहोदयस्स अदूरसामंतेणं वीईवयइ तए णं जियसत्तू राया तस्स
 फरिहोदगस्स असुभेणं गंधेणं अभिभूए समाणे सएणं उत्तरिज्जेणेणं आसगं पिहेइ पिहेत्ता एगंतं
 अवक्कमइ अवक्कमिन्ता बहवे ईसर जाव सत्थयाहपभियओ एवं वयासी अहो णं देवाणुप्पिया
 इमे फरिहोदए अमणुण्णे वण्णेणं अमणुण्णे गंधेणं अमणुण्णे रसेणं अमणुण्णे फासेणं से
 जहानामए-अहिमडे इ वा जाव अमणामतराए चेव गंधेणं पन्नते तए णं ते बहवे ईसर जाव
 सत्थयाहभियओ एवं वयासी-तहेव णं तं सामी जं णं तुब्भे वयह-अहो णं इमे फरिहोदए अमणुण्णे
 वण्णेणं अमणुण्णे गंधेणं अमणुण्णे रसेणं अमणुण्णे फासेणं से जहानामए-अहिमडे इ वा जाव
 अमणामतराए चेव गंधेणं पन्नते तए णं से जियसत्तू राया सुबुद्धिं अमच्चं एवं वयासी-अहो णं
 सुबुद्धी इमे फरिहोदए अमणुण्णे वण्णेणं अमणुण्णे गंधेणं अमणुण्णे रसेणं अमणुण्णे फासेणं से
 जहानामए-अहिमडे इ वा जाव अमणामतराए चेव गंधेणं पन्नते तए णं से सुबुद्धी अमच्चं
 [जियसत्तुस्स रण्णो एयमट्टं नो आढाइ नो परिमाणाइ] तुरिणीए संचिद्धइ तए णं से जियसत्तू राया
 सुबुद्धिं अमच्चं दोच्चंपि तच्चंपि एवं वयासी-अहो णं [सुबुद्धी इमे फरिहोदए अमणुण्णे वण्णेणं
 अमणुण्णे गंधेणं अमणुण्णे रसेणं अमणुण्णे फासेणं से जहानामए-अहिमडे इ वा जाव
 अमणामतराए चेव गंधेणं पन्नते]

तए णं से सुबुद्धी अमच्चं जियसत्तुणा रण्णा दोच्चंपि तच्चंपि एवं वुत्ते समाणे एवं वयासी-नो
 खलु सामी अहं एयांसि फरिहोदगहंसि केइ विन्हाए एवं खलु सामी सुब्भिसद्दा वि पोग्गला
 दुब्भिसद्दाए परिणमंति [दुब्भिसद्दा वि पोग्गला सुब्भिसद्दाए परिणमंति सुब्भिंगंधा वि पोग्गला
 दुब्भिंगंधाए परिणमंति दुब्भिंगंधा वि पोग्गलासुब्भिंगंधाए परिणमंति सुरसा वि पोग्गला
 दुरसत्ताए परिणमंति दुरसा वि पोग्गला सुरसत्ताए परिणमंति सुहफासा वि पोग्गला दुहफासत्ताए
 परिणमंति दुहफासा वि पोग्गला सुहफासत्ताए परिणमंति] पओग-वीससा-परिणया वि य णं सामी
 पोग्गला पन्नत्ता तए णं जियसत्तू राया सुबुद्धिं अमच्चं एवं वयासी-मा णं तुमं देवाणुप्पिया अप्पाणं च
 परं च तदुभयं च बहूणि य असत्थ्यावुत्थ्यावणाहि मिच्छत्ताभिनिवेशेण य दुग्गाहेमाणे वुप्पाएमाणे
 विहराहि तए णं सुबुद्धिस्स इमेयारूवे अज्जत्थिए चिंतिए पत्थिए मणोगए संकप्ये समुप्पञ्जित्था-
 अहो णं जियसत्तू राया संते तच्चे तहिए अवितहे सद्धूए जिणपन्नते भावे नो उवलभइ तं सेयं खलु
 मम जियसत्तुस्स रण्णो संताणं तच्चाणं तहियाणं अवितहाणं सद्धूयाणं जिणपन्नत्ताणं भावाणं
 अभिगमण्णवाए एवमट्टं उवाइणावेत्ताए-एवं संपेहेइ संपेहेत्ता पच्चइएहिं पुरिसेहिं सद्धिं अंतरा-
 वणाओ नवए घडए य पडए य गेण्हइ गेण्हिन्ता संझाकालसमयांसि विरलमणूसंसि निसंत- पडि-
 निसंतंसि जेणेव फरिहोदए तेणेव उवागच्छइ उवागच्छित्ता तं फरिहोदगं गेण्हावेइ गेण्हावेत्ता नव-
 एसु पडएसु गालावेइ गालावेत्ता नवएसु घडएसु पक्खिवावेइ पक्खिवावेत्ता सज्जखारं पक्खिवावेइ
 पक्खिवावेत्ता लंछियमुद्दिए कारावेइ कारावेत्ता सत्तरत्तं परिवसावेइ परिवसावेत्ता दोच्चंपि नवएसु
 पडएसु गालावेइ गालावेत्ता नवएसु घडएसु पक्खिवावेइ पक्खिवावेत्ता सज्जखारं पक्खिवावेइ
 पक्खिवावेत्ता लंछिय-मुद्दिए कारावेइ कारावेत्ता सत्तरत्तं परिवसावेइ परिवसावेत्ता तच्चंपि नवएसु
 पडएसु [गालावेइ गालावेत्ता नवएसु घडएसु पक्खिवावेइ पक्खिवावेत्ता सज्जखारं पक्खिवावेइ
 पक्खिवावेत्ता लंछिय-मुद्दिए कारावेइ कारावेत्ता सत्तरत्तं] संवसावेइ एवं खलु एएणं उवाएणं

अंतरा गालावेमाणे अंतरा पन्निखवावेमाणे अंतरा य संयसावेमाणे सत्तसत्त य रांडिदिवाइं परिव-
सावेइ तए णं से फरिहोदए सत्तमंसि सत्तयंसि परिणममाणंसि उदगरयणे जाए यावि होत्था-अच्छे
पत्थे जछे तणुए फालियवण्णाभे वण्णेणं उववेए गंधेणं उववेए रसेणं उववेए फासेणं उववेए
आसायणिञ्जे [विसायणिञ्जे पीणणिञ्जे दीवणिञ्जे दप्पणिञ्जे मयणिञ्जे विंहणिञ्जे] सच्चिदियगाय-
पल्हायणिञ्जे

तए णं सुबुद्धी जेणेव से उदगरयणे तेणे उवागच्छइ उवागच्छिता करलयंसि आसादेह
आसादेत्ता तं उदगरयणं वण्णेणं उववेयं गंधेणं उववेयं रसेणं उववेयं फासेणं उववेयं आसायणिञ्जं
[विसायणिञ्जं पीणणिञ्जं दीवणिञ्जं दप्पणिञ्जं मयणिञ्जं विंहणिञ्जं] सच्चिदियगाय-पल्हायणिञ्जं जाणित्ता
हद्धुट्टे वहुहिं उदगसंभारणिञ्जेहिं दब्बेहिं संभारेइ संभारेत्ता जियसत्तुस्स रण्णां पाणियधरियं
सद्दावेइ सद्दावेत्ता एवं वयासी-तुमं णं देवाणुप्पिया इमं उदगरयणं गेण्हाहिं गेण्हित्ता जियसत्तुस्स
रण्णे भोयणवेलाए उवणेज्जासि तए णं से पाणिय-धरिए सुबुद्धिस्स एयमट्टे पडिसुणेइ पडिसुणेत्ता
तं उदगरयणं गेण्हइ गेण्हित्ता जियसत्तुस्स रण्णां भोयणवेलाए उवट्टवेइ तए णं से जियसत्तू राया तं
विपुलं असण-पाण-खाइम-साइमं आसाएमाणे [विसाएमाणे परिभाएमाणे परिभुंजेमाणे एवं च णं]
विहरइ जिमियभुत्तरागए वि य णं [समाणे आद्यंते चोक्खे] परमसुइभूए तंसि उदगरयणंसि जाय-
विन्हए ते बहवे राईसर जाव सत्थावहपभिइओ एवं वयासी-अहो णं देवाणुप्पिया इमे उदगरयणे
अच्छे जाव सच्चिदियगाय-पल्हायणिञ्जे तए णं ते बहवे राईसर जाव सत्थावहपभिइओ एवं
वयासी-तहेव णं सामी जण्णं तुब्भे वयह-इमे उदगरयणे अच्छे जाव सच्चिदियगाय-पल्हायणिञ्जे
तए णं जियसत्तू राया पाणिय-धरियं सद्दावेइ सद्दावेत्ता एवं वयासी-एस णं तुमे देवाणुप्पिया
उदगरयणे कओ आसदित्ते तए णं से पाणिय-धरिए जियसत्तुं एवं वयासी-एस णं सामी मए
उदगरयणे सुबुद्धिस्स अंतियाओ आसदित्ते तए णं जियसत्तू सुबुद्धिं अमच्चं सद्दावेइ सद्दावेत्ता एवं
वयासी-अहो णं सुबुद्धी केणं कारणेणं अहं तव अणिट्टे अकत्ते अप्पिए अमणुण्णे अमणणाणे जेणं
तुमं मम कड्ढाकल्लिं भोयणवेलाए इमं उदगरयणं न उवट्टवेसि तं एस णं तुमे देवाणुप्पिया
उदगरयणे कओ उवल्ले ते णं सुबुद्धिं जियसत्तुं एवं वयासी-एस णं सामी से फरिहोदए ते णं से
जियसत्तू सुबुद्धिं एवं वयासी-केणं कारणेणं सुबुद्धी एस से फरिहोदए

तए णं सुबुद्धी जियसत्तुं एवं वयासी-एवं खलु सामी तुब्भे तया मम एवमाइक्खमाणस्स
भासमाणस्स पन्नवेमाणस्स पल्लवेमाणस्स एयमट्टं नो सद्दहह तए णं मम इमेयारूवे अज्झत्थिए
चित्तिए पत्थिए मणोएए संकप्पे ससुपन्नित्था-अहो णं जियसत्तू राया संते [तच्छे तहिए अविताहे
ऽब्भूए जिणपन्नतो] भावे नो सद्दहइ नो पत्तियइ नो रोएइ तं सेयं खलु मम जियसत्तुस्स रण्णां संताणं
[तच्चाणं तहियाणं अविताहाणं] सत्थूयाणं जिणपन्नताणं भावाणं अभिगमणट्ठयाए एयमट्टं उवइ-
प्पावेत्तए-एवं संपेहेमि संपेहेत्ता तं चेव जाव पाणिय-धरियं सद्दावेमि सद्दावेत्ता एवं वदामि-तुमं णं
देवाणुप्पिया उदगरयणं जियसत्तुस्स रण्णां भोयणवेलाए उवणेहिं तं एणं कारणेणं सामी एस से
फरिहोदए तए णं जियसत्तू राया सुबुद्धिस्स एवमाइक्खमाणस्स भासमाणस्स पन्नवेमाणस्स
पल्लवेमाणस्स एयमट्टं नो सद्दहइ नो पत्तियइ नो रोएइ असद्दहमाणे अपत्तियमाणे अरोहएमाणे
अब्भित्तरटाणिञ्जे पुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया अंतरावणाओ
नएए चडइ पडए य गेण्हह जाव उदगसंभारणिञ्जेहिं दब्बेहिं संभारेह तेवि तहेव संभारेत्ति संभारेत्ता

जियसत्तुसा उवणेते तए णं से जियसत्तू राया तं उदगरयणं करयलंसि आसाएइ आसाएत्ता आसावणिज्जं जाव सख्खिदियगाय-पल्हायणिज्जं जाणिता सुबुद्धि अमच्चं सद्दावेइ सद्दावेत्ता एवं वयासी-सुबुद्धी एए णं तुमे संता तच्चा [तहिया अविताहा] सद्भूया भावा कओ उवल्लद्धा तए णं सुबुद्धी जियसत्तु एवं वयासी-एए णं सामी मए संता [तच्चा तहिया अविताहा सद्भूया] भावा जिणवयणाओ उवल्लत्ता तए णं जियसत्तु सुबुद्धी एवं वयासी-तं इच्छामि णं देवाणुप्पिया तव अंतिए जिणवयणं निसामितए तए णं सुहृद्धि जियसत्तुस्स विचितं केवल्लिपन्नत्तं चाउज्जामं धम्मं परिकहेइ तए णं जियसत्तु सुबुद्धिस्स अंतिए धम्मं सोच्चा निसस्स इहत्तुडे सुबुद्धि अमच्चं एवं वयासी सद्दहामि णं देवाणुप्पिया निग्गंयं पावयणं [पत्तियामि णं देवाणुप्पिया निग्गंयं पावयणं रोएमि णं देवाणुप्पिया निग्गंयं पावयणं अद्भुद्धेमि णं देवाणुप्पिया निग्गंयं पावयणं एवमेचं देवाणुप्पिया तहमेचं देवाणुप्पिया अविताहमेयं देवाणुप्पिया इच्छियमेयं देवाणुप्पिया पडिच्छियमेयं देवाणुप्पिया इच्छिय-पडिच्छियमेयं देवाणुप्पिया] से जहेयं तुब्भे वयह तं इच्छामि णं तव अंतिए चाउज्जामियं गिहिधम्मं उवल्लपत्तिता णं विहरित्तए अहामुहं देवाणुप्पिया मा पडिवंधं करेह तए णं से जियसत्तु सुबुद्धिस्स अंतिए चउज्जामियं गिहिधम्मं पडिवज्जइ तए णं जियसत्तु समणोवासए जाए-अहिग मजीवाजीवे जाव पडिलाभेमामे विहरइ तेणं कालेणं तेणं समएणं थेरागमणं जियसत्तु राया सुबुद्धी य निग्गच्छइ सुबुद्धी धम्मं सोच्चा निसम्मं एवं वयासी-जं नवरं-जियसत्तु आपुच्छामि [तओ पच्छा मुंडे भवित्ता णं अगाराओ अणगारियं पव्वयामि]

अहामुहं देवाणुप्पिया तए णं सुबुद्धी जेणेव जियसत्तू तेणेव उवागच्छइ उवागच्छित्ता एवं वयासी-एवं खलु सामी मए थेराणं अंतिए धम्मे निसंते से वि य धम्मे इच्छिए पडिच्छिए अमिहइए तए णं अहं सामी संसारभउव्विगे भीए जम्मणजर-मरणाणं इच्छामि णं तुब्भेहिं अद्भणुण्णाए [समाणे थेराणं अंतिए मुंडे भवित्ता णं अगाराओ अणगारियं] पव्वइत्तए तए णं जियसत्तु राया सुबुद्धि एणं वयासी-अच्छसु ताव देवाणुप्पिया कइवयाइ वासाइ उरालाइ माणुस्सागाइ भोगभोगाइ भुजमाणा तओ पच्छा एगयओ थेराणं अंतिए मुंडे भवित्ता [णं अगाराओ अणगारियं] पव्वइस्सामो तए णं सुबुद्धी जियसत्तुस्स रण्णो एवमच्चं पडिसुणेइ तए णं तस्स जियसत्तुस्स रण्णो सुबुद्धिणा सद्धिं चिपुलाइ माणुस्सागाइ कामभोगाइ पच्चणुब्भवमाणस्स दुवालस वासाइ वीइक्कंताइ तेणं कालेणं तेणं समएणं थेरागमणं जियसत्तु राया धम्मं सोच्चा निसम्मं एवं वयासी-जं नवरं-देवाणुप्पिया सुबुद्धि अमच्चं आमंतेमि जेडुपत्तं रज्जे ठावेमि तए णं तुब्भेणं अंतिए मुंडे भवित्ता णं अगाराओ अणगारियं पव्वयामि अहामुहं देवाणुप्पिया तए णं जियसत्तु राया जेणेव सए गिहे तेणेव उवागच्छइ उवागच्छित्ता सुबुद्धि सद्दावेइ सद्दावेत्ता एवं वयासी-एवं खलु मए थेराणं अंतिए धम्मे निसंते जाव पव्वयामि तुमं णं किं करेसि तए णं सुबुद्धी जियसत्तु रायं एवं वयासी-[जइ णं तुब्भे देवाणुप्पिया संसारभउव्विगा जाव पव्वयह अहं णं देवाणुप्पिया के अण्णे आहारे वा आलंवे वा अहं वि य णं देवाणुप्पिया संसारभउव्विगे जाव] पव्वयामि तं जइ णं देवाणुप्पिया जाव पव्वयाहि गच्छइ णं देवाणुप्पिया जेडुपत्तं कुडुंवे ठावेहिं ठावेत्ता पुरिससहस्सवाहिणिं सीयं दुरुहित्ता णं ममं अंतिए पाउब्भवउ सो वि तहेव पाउब्भवइ तए णं जियसत्तु राया कोडुंबियपुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया अदीणसत्तुस्स कुमारस्स रायाभिसेयं उवट्टेवह ते वि तहेव उवट्टेव्वेति जाव अभिसिंचति जाव पव्वइए तए णं जियसत्तु राया कोडुंबियपुरिसे सद्दावेइ सद्दावेत्ता

एवं वयासी-गच्छह णं तुब्बे देवाणुप्पिया अदीणसत्तुस्स कुमारस्स रायाभिसेयं उवडुवेह ते वि तहेव उवडुवेति जाव अभिसिंचति जाव पच्चइए तए णं जियसत्तू रायरीसी एककारस अंगाईं अहिज्जइ अहिञ्जिता बहूणि वासाणि सामण्णपरियागं पाउणित्ता मासियाए संलेहणाए अत्ताणं झूसित्ता जाव सिद्धे तए णं सुबुद्धी एककारस अंगाईं अहिञ्जिता बहूणि वासाणि सामण्णपरियाग पाउणित्ता मासियाए संलेहणाए अत्ताणं झूसित्ता जाव सिद्धे एवं खलु जंबू समणेणं भगवया महावीरेणं वारसमस्स नायज्जयणस्स अयमट्ठे पत्रत्ते ति बेमि ।१९।-७२

● पदमे सुयक्खंये बारसमं अज्जयणं समत्तं ●

तेरसमं अज्जयणं—मंडुकुके

(१४५) जइ णं भंते समणेणं भगवया महावीरेणं बारसमस्स नायज्जयणस्स अयमट्ठे पत्रत्ते तेरसमस्स णं भंते नायज्जयणस्स के अट्ठे पत्रत्ते एवं खलु जंबू तेषं कालेणं तेषं समएणं रायगिहे नयरे गुणसिलए चेइए समोससणं परिसा निग्गया तेषं कालेणं तेषं समएणं सोहम्मं कप्पे ददुरवडंसए विमाणे सभाए सुहम्माए दहुरंसि सीहासणंसि दहुरे देवे चउहिं सामाणियसाहस्सीहिं चउहिं अग्गमहिस्सीहिं सपरिसाहिं एवं जहा सूरियामे जाव दिव्वाइं भोगभोगाईं भुंजमाणे विहरइ इमं च णं केवलकप्पं जंबुद्दीवे दीवं विउलेणं ओहिणा आभोएमाणे जाव नट्टविहिं उवदंसित्ता पडिगए जहा-सूरियामे भंतेति भगवं गोयमे समणं भगवं महावीरं वंदइ नमंसइ वंदित्ता नमंसित्ता एवं वयासी-अहो णं भंते दहुरे देवे महिडिदए महज्जुईए महब्बले महावसे महासोक्खे महाणुभागे ददुरस्स णं भंते देवस्स सा दिव्वा देविड्डी दिव्वा देवज्जुती दिवे देवाणुभावे कहिं गए कहिं अनुपविट्ठे गोयमा सरिरं गए सरिरं अनुपविट्ठे कूडागारदिट्ठतो दहुरेणं भंते देवेणं सा दिव्वा देविड्डी दिव्वा देवज्जुती दिव्वे देवाणुभावे किण्णा लद्धे किण्णा पत्ते किण्णा अभिसमण्णागए एवं खलु गोयमा इहेव जंबुद्दीवे दीये भारे वासे रायगिहे नयरे गुणसिलए चेइए सेणिए राया तत्थ णं रायगिहे नंदे नामं मणियारसेट्ठी-अड्ढे दित्ते तेषं कालेणं तेषं समएणं अहं गोयमा समोसट्ठे परिसा निग्गया सेणिए वि निग्गए तए णं से नंदे मणियारसेट्ठी इमीसे कहाए लद्धे समाणे पायविहारचारेणं जाव पज्जुवासाइ नंदे मणियारसेट्ठी धम्मं सोच्चा समणोवासए जाए तए णंऽहं रायगिहाओ पडिनिक्खंते बहिया जणवयविहारेणं विहरामि तए णं से नंदे मणियारसेट्ठी अन्नया कयाइ असाहुदंसणेणं य अपज्जुवासणाए य अणणुसासणाए य असुस्सूसणाए य सम्मत्तपज्जवेहिं परिहायमाणेहिं-परिहायमाणेहिं मिच्छत्तपज्जवेहिं परिवड्ढमाणेहिं-परिवड्ढमाणेहिं मिच्छत्तं विष्प-डिवण्णे जाए चादि होत्था तए णं नंदे मणियारसेट्ठी अण्णया कयाइं गिन्कालसयंसि जेड्ढमूलंसि मासंसि अट्ठमभत्तं परिगेणइ परिगेण्हित्ता पोसहसालाए [पोसहिए बंभचारी उमुक्कमणिसुवण्णे ववगयमालावण्णगथिलेवणे निक्खित्तसत्तमुसले एगे अबीए दब्बसंधारोवगए] विहरइ

तए णं नंदस्स अट्ठमभत्तंसि परिणममाणंसि तण्हाए छुहाए य अभिभूयस्स समाणस्स इमेयारूवे अज्जत्थिए चितिए पत्थिए मणोगए संकप्पे समुप्पज्जित्था-धण्णा णं ते [ईसरपभियओ संपुण्णा णं ते ईसरपभियओ कयत्था णं ते ईसरपभियओ कयपुत्रा णं ते ईसरपभियओ कयल-क्खाणा णं ते ईसरपभियओ कयविमवा णं ते ईसरपभियओ जेसिं णं रायगिहस्स बहिया बहूओ वावीओ पोक्खरिणीओ [दोहियाओ गुंजालियाओ सरपंतियाओ सरसरपंतियाओ जत्थ णं बहुजणो ण्हाइ य पियइ य पाणिचं च संवहइ तं सेयं खलु मम कलं पाउप्पभायाए रथणी जाव

उद्वियमि सूरै सहस्सरस्सिमि दिणयरे तेयसा जलंते सेणियं रायं आपुच्छित्ता रायगिहस्स बहिया उत्तरपुरत्थिमे दिसीभागे वेब्भारपव्वयस्स अदूरसामंते वत्थुपादगरोइयंसि भूमिभागांसि नंदं पोक्खरिणिं खणावेत्ताए त्ति कट्टु एवं संपेहेइ संपेहेत्ता कल्लं पाउण्णयायाए रयणीए जाव उद्वियमि सूरै सहस्सरस्सिमि दिणयरे तेयसा जलंते पोसहं पारेइ पारेत्ता ण्हाए कयबलिकम्मे मित्त- [नाइ-निवाग-सयण-संबंधि-परियणेणं सद्धिं] संपरिवुडे महत्थं [महत्थं महरिहं रायारिहं] पाहुडं गेण्हइ गेण्हित्ता जेणेव सेणिए रावा तेणेव उवागच्छइ जाव पाहुडं उवडुवेइ उवडुवेत्ता एवं वयासी- इच्छामि णं सामी तुब्भेहिं अत्थणुण्णाए समाणे रायगिहस्स बहिया [उत्तरपुरत्थिमे दिसीभागे वेब्भारपव्वयस्स अदूरसामंते वत्थुपादग-रोइयंसि भूमिभागांसि नंदं पोक्खरिणिं] खणावेत्ताए अहा- सुहं देवानुप्पिया तए णं से नंदे मणियारसेट्ठी सेणिएणं रण्णा अत्थणुण्णाए समाणे हट्टुट्टे रायगिहं नगरं मज्झमज्जेणं निग्गच्छइ निग्गच्छित्ता वत्थुपादय-रोइयंसि भूमिभागांसि नंदं पोक्खरिणिं खणावेउं पयत्ते यावि होत्था तए णं सा नंदा पोक्खरणी अनुपुब्बेणं खम्ममाणा-खम्ममाणा पोक्ख- रणी जाया यावि होत्था-चाउक्कोणा समतीरा अनुपुब्बं सुजायावप्पसीवलजला संछन्नपत्त- भिस- पुणाला बहुउप्पल-पउम-कुमुदनलिण- सुभग- सोगंधिय- पुंडरीय- महापुंडरीयसयपत्त- सहस्स- पत्त-पप्पुल्लकेसरोववेया परिहत्थ-भमंउ-भत्ताछप्पय अणेग- सउणगण-मिहुण-वियरिय- सहुल्लइय- महरसरनाइया पासाईया दरिसणिज्जा अभिरूवा पडिरूवा तए णं से नंदे मणियारसेट्ठी नंदाए पोक्खरिणीए चउदिसिं चत्तारि वणसंडे रोवावेइ तए णं ते वणसंडा अनुपुब्बेणं सारक्खिज्जामाणा संगोविज्जामाणा संवड्ढिज्जामाणा य वणसंडा जाया-किण्हा जाव महामेह- निउरंबभूया पत्तिया पुप्फिवा-[फलिया हरियग-रेरिज्जामाणा सिरी अईव] उवसोभेमाणा- उवसो- भेमामा चिद्धंति

तए णं नंदे मणियारसेट्ठी पुरत्थिमिल्ले वणसंडे एगं महं चित्तसमं कारावेइ- अणेगखंभसय- सण्णिविद्धं पासाईयं दरिसणिज्जं अभिरूवं पडिरूवं तत्थ णं बहूणि किण्हाणि य [नीलाणि य लोहियाणि य हालिद्वाणि य] सुक्किक्कलाणि य कट्टुकम्माणि य पोत्थकम्माणि य चित्त- लेप्प- गंधिम- वेढिम-पूरिम-संघाइमाइ उवदंसिज्जामाणाइ-उवदंसिज्जामाणाइ चिद्धंति तत्थ णं बहूणि आसणाणि य रायणाणि य अत्थुय-पच्चत्थुयाइ चिद्धंति तत्थ णं बहवे नडा य नडा य [जल्ल- मल्ल- मुद्धिय- वेलंवग- कहग- पवग- लासग-आइक्खग-लंख-मंख-तूणइल्ल-तुंबवीणिणा य] दिन्नभइ-भत्त-वेयणा तालाय- रकम्मं करेमाणा करेमाणा विहरंति रायगिहविणिग्गओ एत्थ णं बहुजणो तेसु पुवन्नत्थेसु आसण- सयणेसु सण्णि-सण्णो य संतुयट्ठी य सुयमाणो य पेच्छमाणो य साहेमाणो य सुहंसुहेणं विहरइ तए णं नंदे मणियारसेट्ठी दाहिणिल्ले वणसंडे एगं महं महाणसालं कारावेइ- अणेगखं- भसण्णिविद्धं जाव पडिरूवं तत्थ णं बहवे पुरिसा दिन्नभइ-भत्तवेयाणा विउल्लं असण-पाण- खाइम-साइमं उवक्खडेंति बहूणं समण-माहण-अतिहि-किवण-वणीमगाणं परिभाएमाणा-परिभएमाणा विहरंति तए णं नंदे मणियारसेट्ठी पच्चत्थिमिल्ले वणसंडे एगं महं तिगिच्छयसालं कारावेइ-अणेगखंभसयसण्णिविद्धं जाव पडिरूवं तत्थ णं बहवे वेज्जा य वेज्जपुत्ता य जाणुया य जाणुयपुत्ता य कुसला य कुसलपुत्ता य दिन्नभइ-भत्त-वेयणा बहूणं बाहियाण य गिलाणाण य रोगियाण य दुब्बलाण य तेइच्छकम्मं करेमाणा-करेमाणा विहरंति अण्णे य एत्थ बहवे पुरिसा दिन्नभइ भत्त-वेयणा तेसिं बहूणं बाहियाण य गिलाणाण य रोगियाण य दुब्बलाण य ओसह-भेसज्ज-भत्तपाणं पडियारकम्मं करेमाणा विहरंति

तए णं नंदे मणियारसेट्ठी उत्तरिल्ले बणसंडे एणं महं अलंकारियत्तमं कारावेइ अणे-
गखंभसयसण्णिविट्ठं जाव पडिरूवं तत्थ णं बहवे अलंकारिय-मणुस्सा दिनभइ-भत्त-वेयणा बहूणं
समण्णणं य अणाहाण च गिलाणाण य रोगियाण य दुव्यलाण य अलंकारियकम्मं कोमाण-
कोमाण विहरंति तए णं तीए नंदाए पोक्खरिणीए बहवे सणाहा य अणाहा य पंथिया य पहिया य
करोडिया य तणहारा य पत्तहारा य कट्टहारा य-अप्पेगइया पहायंति अप्पेगइया पाणियं पियंति
अप्पेगइया पाणियं संवहंति अप्पेगइया विसज्जियसेय जल्ल-मल-परिस्सम-निद्वुत्तुपिवासा सुहंसुहेणं
विहरंति रायगिहविणिग्गओ वि यत्थ बहुजणो किं ते जलरमणविविहमज्जण- कयलिलयाकरय-
कुसुम-सत्थरय-अणेगसउणगण-कयरिभियसंकुलेसु सुहंसुहेणं अभिरममाणो-अभिरममाणो विह-
रइ तए णं नंदाए पोक्खरिणीए बहुजणो पहायमाणो य पियमाणो य पाणियं च संवहमाणो च
अणमण्णणं एवं वयासी-धण्णे णं देवाणुप्पियं नंदे मणियारसेट्ठी कयत्थे [णं देवाणुप्पिया कयल-
कखणे णं देवाणुप्पिया नंदे मणियारसेट्ठी कयपुत्रे णं देवाणुप्पिया नंदे मणियारसेट्ठी कया णं तोवा
सुलद्धे माणुस्सए] जम्मजीवियफले जस्स णं इमेयारूवा नंदा पोक्खरिणी चाउक्कोणा जाव पडि-
रूवा जाव रायगिहविणिग्गओ जत्थ बहुजणो आसणेसु च सयणेसु य सण्णिसण्णे य संतुवट्ठी य
पेच्छमाणो च साहेमाणो य सुहंसुहेणं विहरइ तं धत्ते णं देवाणुप्पिया नंदे मणियारसेट्ठी कयत्थे णं
देवाणुप्पिया नंदे मणियारसेट्ठी कयलकखणे णं देवाणुप्पिया नंदे मणियारसेट्ठी कयपुत्रे णं देवाणु-
प्पिया नंदे मणियारसेट्ठी कया णं लोया सुलद्धे माणुस्सए जम्मजीवियफले नंदस्स मणियारस्स ते णं
रायगिहे सिंघाडग-जाव-पहेसु बहुजणो अणमण्णस्स एवमाइकखइ एवं भासइ एवं पन्नवेइ एवं
परूवेइ-धत्ते णं देवाणुप्पिया नंदे मणियारसेट्ठी सो चेव गमओ जाव सुहंसुहेणं विहरइ तए णं से नंदे
मणियारसेट्ठी बहुजणस्स अंतिए एयमड्डं सोच्चा निसम्म हइतुट्ठे धाराहत-कलंबगं विव समूसवि-
योमकूवे परं सायासोक्खमणुभवमाणे विहरइ ।१००।-९३

(१४६) तए णं तस्स नंदस्स मणियारसेट्ठिस्स अण्णया कचाइ सरीरगंसि सोलस रोगायंका
पाउब्भूया तं जहा

सासे कासे जरे दाहे कुच्छिसूले भगंदरे अरिसा अजीराए दिट्ठी-

मुद्धसूले अकारए अच्छिवेयणा कण्णवेयणा कंडू दउदरे कोठे ॥३२॥-१

(१४७) तए णं से नंदे मणियारसेट्ठी सोलसहिं रोगायंकोहिं अभिभूए समाणे कोडुंबियपुरिसे
सदावेइ सदावेत्ता एवं वयासी-गच्छह णं तुत्थे देवाणुप्पिया रायगिहे नयरे सिंघाडग- [तिग- चउ-
कूक-चधर-चउम्मुह]-महापह-पहेसु महया-महया सद्देणं उगत्थोसेमाणा-उग्गोसेमाणा एवं ववह-
एवं खलु देवाणुप्पिया नंदस्स मणियारस्स सरीरगंसि सोलस रोगायंका पाउब्भूया तं जहा-सासे
जाव कोठे तं जो णं इच्छइ देवाणुप्पिया विज्जो वा विज्जपुत्तो वा ज्ञाणुओ वा जाणुअपुत्तो वा कुसलो
वा कुसलपुत्तो वा नंदस्स मणियारस्स तेसिं च णं सोलसण्हं रोगायंकाणं एगमवि रोगायंका उवास-
मिआए तस्स णं नंदे मणियारसेट्ठी विउलं अत्थसंपयाणं दलयइ ति कट्टु दोच्छंपि तच्छंपि घोसणं घोसेह
घोसेत्ता एयमाणत्तियं पच्चप्पिणह तेवि तहेव पच्चप्पिणंति तए णं रायगिहे नगरे इमेयारूवं घोसणं
सोच्चा निसम्म बहवे वेज्जा य [वेज्जपुत्ता य जाणुया य जाणुयपुत्ता य कुसला य] कुसलपुत्ता य सत्थ-
कोसहत्थगया य सिलियाहत्थगया य गुलियाहत्थगया य ओसह-भेसज्जहत्थगया य सएहिंसएहिं
गिहेहिंतो निक्खमंति निक्खमित्ता रायगिहं मज्झमज्जेणं जेणेव नंदस्स मणियारसेट्ठिस्स गिहे तेणेव

उवागच्छति उवागच्छिता नंदस्स मणियारसेद्धिस्स सरिरं पासति पासिता तेसिं रोगायंकाणं नियाणं पुच्छंति पुच्छिता नंदस्स मणियारसेद्धिस्स बहुहिं उच्चलणेहिं य उववट्टणेहिं य सिहपाणेहिं य वमणेहिं य विरेहणेहिं य सेयणेहिं य अवदहणेहिं य अवण्णवणेहिं य अणुवासवणाहिं य वतिकम्मेहिं य निरूहेहिं य शिरावेहेहिं य तच्छणाहिं य पच्छणाहिं य शिरावत्थीहिं य तप्पणाहिं य पुडवाएहिं य छर्कीहिं य वल्लीहिं य मूलेहिं य कंदेहिं य पत्तेहिं य पुष्पेहिं य फलेहिं य वीएहिं य सिलियाहिं य गुलियाहिं य ओसहेहिं य भेसजेहिं य इच्छंति तेसिं सोलसण्हं रोगायंकाणं एगमवि रोगायंकां उवसापित्ताए नो चेव णं संचाएति उवसापेतए तए णं ते बहवे वेज्जा य वेज्जपुत्ता य जाणूया य जाणुयपुत्ता य कुसला य कुसलपुत्ता य जाहे नो संचाएति तेसिं सोलसण्हं रोगायंकाणं एगमवि रोगायंकां उवसापित्ताए ताहे संता तंता परित्तंता निच्चिण्णा समाणा जामेव दिसं पाउक्कूया ताभेव दिसं पडिगया

तए णं नंदे मणियारसेद्धी तेहिं सोलसेहिं रोगायंकेहिं अभिभूए समाणे नंदाए पुक्खरिणीए भुच्छिए गडिए गिद्धे अञ्जोववणे तिरिक्खजोणिएहिं निवद्धाउए बद्धपएसिए अट्ट-दुहट्ट-वसट्टे कात्तभासे कालं किद्धा नंदाए पोक्खरिणीए ददुरीए कुच्छिसि ददुरताए उववण्णे तए णं नंदे ददुरे गट्ठाओ विणिमुक्कं समाणे उम्पुककवालभावे विण्णयपरिणयमित्ते जोव्वणगमणुप्पत्ते नंदाए पोक्खरिणीए अभिरममाणे अभिरममाणे विहरइ तए णं नंदाए पोक्खरिणीए बहुजणो प्हावमाणो य पिवमाणो य राणिवं च संवहमाणो य अण्णमण्णं एवमाइक्खइ एवं भासइ एवं पत्रवेइ एवं परूवेइ-धत्ते णं देवाणुप्पिया नंदे मणियारे जस्स णं इमेयारूता नंदा पुक्खरिणी-चाउक्कोणा जाव षडेरूवा तए णं तस्स ददुरस्स तं अभिक्खणं-अभिक्खणं बहुजणस्स अंतिए एवमट्टं सोद्धा निसम्म इमेयारूवे अज्झत्थिए चित्तिए पत्थिए मणोगए संकपे समुप्पज्जित्था-कहिं मत्ते मए इमेयारूवे राद्धे निसंतपुव्वे ति कट्ट सुभेणं परिणामेणं [पमत्थेणं अञ्जवसाणेणं लेसाहिं विसुज्जमाणीहिं तयावर-णिज्जाणं कम्माणं खओवसामेणं ईहापूह-मग्गण-गवेसणं करेमाणस्स सण्णिपुव्वे] जाईसरणे समुप्पणे पुव्वजाइं सभं समागच्छइ तए णं तस्स ददुरस्स इमेयारूवे अज्झत्थिए चित्तिए पत्थिए मणोगए संकपे समुप्पज्जित्था-एवं खलु अहं इहेव रायगिहे नयरे नंदे नामं मणियारे-अड्डे तेणं कालेणं तेणं समएणं समणे भगवं महावीरे समोसट्ठे तए णं मए समणस्स भगवओ महावीरस्स अंतिए पंचाणुव्वइए सत्तसिक्खावइए- [दुवालसविहे गिहिधम्मै] पडिवण्णे तए णं अहं अण्णया कयाइ असहदंसणेण य जाव मिच्छत विप्पडिवण्णे

तए णं अहं अण्णया कयाइ गिम्हकालसवंसि जाव पोसहं उवसंपज्जिता णं विहरामि एवं जहेव चित्ता आपुच्छणा नंदापुक्खरिणी वणसंडा सभाओ तं चेव सव्वं जाव नंदाए ददुरताए उववण्णे तं अहो णं अहं अधण्णे अपुन्ने अकयपुत्ते निर्गंथाओ पावयणाओ नट्टे भट्टे परिववट्ठे तं सेयं खलु ममं संयमेव पुव्वपडिवण्णाइं पंचाणुव्वयाइं उवसंपज्जिता णं विहरित्तए एवं संपेहेइ संपेहेत्ता पुव्वपडिवण्णाइं पंचाणुव्वयाइं आरुहेइ आरुहेत्ता इमेयारूवे अभिग्गहं अभिगिण्हइ-कप्पइ मे जावज्जीवं छट्टंछट्टेणं अणिक्वित्तेणं तवोकम्मेणं अप्पाणं भावेमाणस्स विहरित्तए छट्टस्स वि य णं पारणगंसि कप्पइ मे नंदाए पोक्खरिणीए परिपेरंतसु फासुएणं प्हाणोदएणं उम्महणालोलियहिं य वित्ति कप्पेमाणस्स विहरित्तए-इमेयारूवं अभिग्गहं अभिगिण्हइ जावज्जीवाए छट्टंछट्टेणं [अणिक्वित्तेणं तवोकम्मेणं अप्पाणं भावेमाणे] विहरइ तेणं कालेणं तेणं समएणं अहं गोयया गुणसिलए

समोसढे परिसा निग्गया तए णं नंदाए पोक्खरिणीए बहुजणो प्हायमाणो य पियमाणो य पाणियं च संवहमाणो य अण्णमण्णं [एवमाइक्खइ-एवं खलु] समणे भगवं महावीरं इहेव गुणसिलए चेइए समोसढे तं गच्छामो णं देवाणुप्पिया समणं भगवं महावीरं वंदाओ [नमंसामो सक्कारेमो सम्माणेमो कल्लाणं मंगलं देवयं चेइयं] पञ्जुवासामो एयं ने इहभवे परभवे य हियाए [सुहाए खमाए नित्सेय-साए] आपुगामियताए भविस्सइ तए णं तस्स दहुरस्स बहुजणस्स अंतिए एयमट्ठं सोच्चा निसम्म अयमेयारूवे अज्झत्थिए चित्तिए पत्थिए मणोगए संकप्पे समुप्पज्जित्या-एवं खलु समणे भगवं महावीरं समोसढे तं गच्छामि णं समणं भगवं महावीरं वंदापि-एवं संपेहेइ संपेहेत्ता नंदाओ पोक्ख-रिणीओ सणियं-सणियं पच्चुत्तरेइ जेणेव रायमग्गे तेणेव उवागच्छइ उवागच्छित्ता तए उक्किक्काए दहुरगईए वीईवयमाणे-वीईवयमाणे जेणेव ममं अंतिए तेणेव पहारेत्थ गमणाए इमं च णं सेणिए राया भंससारे प्हाए जाव सव्वालंकारविभूसिए इत्थिखंधवरगए सकोरेंटमल्लदामेणं छत्तेणं घरिज्ज-माणेणं सेववरचापरेहि य उदुधुच्चमाणेहिं महवाहय-गय-रह-भड-चडगर- कलियाए चाउरंगिणीए सेणाए सद्धिं संपरिवुडे मम पायवंदए हव्वमागच्छइ

तए णं से दहुरे सेणियस्स रण्णो एणेणं आसकिसोरएणं वामपाएणं अक्कंते समाणे अंत-निग्धाइए कए यावि होत्था तए णं से दहुरे अधामे अबले अवीरिए अपुरिसक्कारपरक्कमे अधा-रणिज्जमित्तिकट्टु एगंतमयक्कमइ करयत्तपरिग्गहिंयं सिरसावत्तं मत्थए अंजलिं कट्टु एवं वयासी-नपोत्थु णं अरहंताणं जाव सिद्धिगइनामधेज्जं ठाणं संपत्ताणं नपोत्थु णं समणस्स भगवओ महावी-रस्स जाव सिद्धिगइनामधेज्जं ठाणं संपाविउक्कामस्स पुंविप्पिच णं मए समणस्स भगवओ महावी-रस्स अंतिए [थूलए पाणाइवाए पच्चक्खाए थूलए मुसावाए पच्चक्खाए थूलए अदिन्नादाणे पच्चक्खाए थूलए मेहुणे पच्चक्खाए थूलए परिग्गहे पच्चक्खाए] तं इयाणिं पि तास्सेव अंतिए सव्वं पाणाइवायं पच्चक्खामि जाव सव्वं परिग्गहं पच्चक्खामि जावज्जीवं सव्वं असण- पाण- खाइम-साइमं पच्चक्खामि जावज्जीवं जंपि य इमं सरीरं इइं कंतं जाव मा णं विविहा रोगायंका परीस-होवसग्गा फुसंतु एयंपि य णं चरिमेहिं ऊसासेहिं वोसिरामि ति कट्टु तए णं से दहुरे कालमासे कालं किच्चा जाव सोहम्मे कप्पे दहुरवडिसिए विमाणे उववायसभाए दहुरदेवताए उववण्णे एवं खलु गोयमा दहुरेणं सा दिव्वा देविइढी लद्धा पत्ता अभिसमण्णागया दहुरस्स णं भंते देवस्स केवइयं कालं ठिई पन्नत्ता गोयमा वत्तारि पत्तविओवमाइं ठिई पन्नत्ता से णं दहुरे देवे महाविदेहे वासे सिज्जिहिइ बुज्जिहिइ [मुच्चिहिइ परिनिव्वाहिइ सव्वदुक्खाणं] अंतं करेहिइ एवं खलु जंबू समणेणं भगवया महावीरेणं जाव संपत्तेणं तेरसमस्स नायज्जवणस्स अयमट्ठे पन्नत्ते ति वेमि 19०१-१५

● पढ्मे सुयक्खंये तेरसमं अज्झयणं समत्तं ●

चौदसमं अज्झयणं—तेयली

(१४८) जइ णं भंते समणेणं भगवया महावीरेणं जाव संपत्तेणं तेरसमस्स नायज्जवणस्स अयमट्ठे पन्नत्ते चौदसमस्स णं भंते नायज्जवणस्स के अट्ठे पन्नत्ते एवं खलु जंबू तेणं कालेणं तेणं समएणं तेयलिपुरं नाम नयरं पमयवणे उज्जाणे कणगरहे राया तस्स णं कणगरहस्स पउमावई देवी तस्स णं कणगरहस्स तेयलिपुत्ते नामं अमच्चेसाम दंड- [जाव] विहरइ तत्थ णं तेयलिपुरे कलोदे नामं मूसियारदारए होत्था-अइडे जाव अपरिभूए तस्स णं भद्दा नामं भारिया तस्स णं कलायस्स भूसिया-रदारगस्स धूया भद्दाए अत्तया पोडिला नामं दारिया होत्था-रूवेण य जोव्वणेण य लावण्णेण य

उक्किक्का उक्किक्कसरीरा तए णं सा पोड्डिला दारिया अण्णया कयाइ प्हाया सव्वालंकारविभूसिया वेडिया-चक्कवालसंपरिवुडा उप्पि पासायवरगया आगासतलगंसि कणगतित्दूसएणं कीलमाणी-कीलमाणी विहरइ इमं च णं तेयलिपुत्ते अमच्चे ण्हाए आसखंधवरगए महया- भड- चडगर-आसवाहणियाए निज्जायमाणे कलायस्स मूसियारदारगस्स गिहस्स अदूरसामंतेणं वीईववइ तए णं से तेयलिपुत्ते अमच्चे मूसियारदारगस्स गिहस्स अदूरसामंतेणं वीईववमाणे वीईववमाणे पोड्डिलं दारियं उप्पि आगासतलगंसि कणग-त्तिदूसएणं कीलमाणि पासइ पासित्ता पोड्डिलाए दारियाए रूवे य जोव्वणे य लावण्णे य अज्जोववण्णे कोडुंबियपुरिसे सद्दावेइ सद्दावेत्ता एवं वयासी-एस णं देवाणुप्पिया कस्स दारिया कि नामधेज्जा वा तए णं कोडुंबियपुरिसा तेयलिपुत्तं एवं वयासी-

एस णं सामी कलायस्स मूसिरादारयस्स धूया भद्दाए अत्तया पोड्डिला नामं दारिया-रूवेणं [जोव्वणेण य लावण्णेण य उक्किक्का उक्किक्क] सरीरा तए णं से तेयलिपुत्ते आसवाहणियाओ पडिणियत्ते समाणे अम्भितरठाणिज्जे पुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया कलायस्स मूसियारदारयस्स धूयं भद्दाए अत्तयं पोड्डिलं दारियं मम भारियत्ताए वरेह तए णं ते अम्भितरठाणिज्जा पुरिसा तेयलिणा एवं वुत्ता समाणा हड्डुत्तुत्ता करयल [परिग्गहियं दसनहं सिरसावत्तं मत्थए अंजलिं कइ एवं सामी तहत्ति आणाए विणएणं वयणं पडिसुणेत्ति पडिसुणेत्ता तेयलिस्स अंतियाओ पडिनिक्खमंति पडिनिक्खमिन्ता] जेणेव कलायस्स मूसियारदारयस्स गिहे तेणेव उवागया तए णं से कलाए मूसियारदारए ते पुरिसे एज्जमाणे पासइ पासित्ता हड्डुत्तुत्ता आसाणाओ अब्बु-ड्देइ अब्बुड्देत्ता सत्तड्ढपयाइं अनुगच्छइ अनुगच्छित्ता आसणणं उवणिमंतेइ उवणिमंतेत्ता आसत्थे वीसत्थे सुहासणवरगए एवं वयासी-संदिस्संतु णं देवाणुप्पिया किमागमणपओवणं तए णं ते अम्भितरठाणिज्जा पुरिसा कलायं मूसियारदारयं एवं वयासी-अम्हे णं देवाणुप्पिया तव धूयं भद्दाए अत्तयं पोड्डिलं दारियं तेयलिपुत्तस्स भारियत्ताए वरेमो तं जइ णं जाणसि देवाणुप्पिया जुत्तं वा पत्तं वा सलाहणिज्जं वा सरिसो वा संजोगो वा दिज्ज णं पोड्डिला दारिया तेयलिपुत्तस्स तो भण देवाणुप्पिया किं दलामो सुंक्कं तए णं कलाए मूसियादारए ते अम्भितरठाणिज्जे पुरिसे एवं वयासी-एस देव णं देवाणुप्पिया मम सुंक्के जण्णं तेयलिपुत्ते मम दारियानिमित्तेणं अनुग्गहं करेइ ते अम्भितरठाणिज्जे पुरिसे विपुलेणं असणपाण- खाइम- साइमेणं पुप्फ-वत्थ-गंध-मल्लालंकारेणं सक्कारेइ सम्माणेइ सक्कारेत्ता सम्माणेत्ता पडिविसज्जेइ तए णं ते अम्भितरठाणिज्जा पुरिसा कलायस्स मूसियारदारयस्स गिहाओ पडिनिवत्तंति जेणेव तेयलिपुत्ते अमच्चे तेणेव उवागच्छंति उवाच्छित्ता तेयलिपुत्तं अमच्चं एयमट्ठं निवेइत्ति तए णं कलाए मूसियारदारए अण्णया कयाइं सोहणंसि तिहि- करण-नब्बत्त-मुहुत्तंसि पोड्डिलं दारियं ण्हायं सव्वालंकारविभूसियं सीयं दुरुहेत्ता मित्त- [नाइ- नियग-सयण-संबंधि-परियणं सद्धिं] संपरिवुडे स्साओ गिहाओ पडिनिक्खमइ पडिनिक्खमिन्ता सव्वि-इटीए तेयलिपुरं नयरं मज्जंमज्जेणं जेणेव तेयलिस्स गिहे तेणेव उवागच्छइ पोड्डिलं दारियं तेयलिपुत्तस्स सयमेव भारियत्ताए दलयइ तए णं तेयलिपुत्ते पोड्डिलं दारियं भारियत्ताए उवणीवे पासइ पासित्ता हड्डुत्तुत्ता पोड्डिलाए सद्धिं पट्ठयं दुरुहइ दुरुहिता सेयापीएहिं कलेसेहिं अप्पाणं मज्जावेइ मज्जावेत्ता अग्गिहोमं कारेइ कारेत्ता पाणिग्गहणं करेइ करेत्ता पोड्डिलाए भारियाए मित्त-नाइ- [नियग-सयण-संबंधि]-परियणं विउलेणं असणपाण-खाइम-साइमेणं पुप्फ वत्थ- [गंध- मल्लालंकारेणं सक्कारेइ सम्माणेइ सक्कारेत्ता सम्माणेत्ता] पडिविसज्जेइ तए णं से तेयलिपुत्ते पोड्डिलाए

भारियाए अनुरत्ते अविरत्ते उरालाई [माणुत्सगाई भोगभोगाई भुंजमाणे] विहरइ १००२।-१६

(१४९) तए णं से कणगरहे राया रज्जे य रद्धे य बले य वाहणे य कोसे य कोडागारे य पुरे य अंतेउरे य मुच्छिए गट्टिए गिद्धे अज्झोववण्णे जाए जाए पुत्ते विचंगेइ-अप्येगइयाणं हत्थंगुलियाओ छिंदइ अप्येगइयाणं हत्थंगुद्धए छिंदइ अप्येगइयाणं पायंगुलियाओ छिंदइ अप्येगइयाणं पायंगुद्धए छिंदइ [अप्येगइयाणं कण्णसक्कुलीओ छिंदइ अप्येगइयाणं] नासापुडाई फालेइ अप्येगइयाणं अंगो वंगाई विचत्तेइ तए णं तीसे पउमावईए देवीए अण्णया कयाइ पुज्वरत्तावरत्तकालसमयंसि अवमे-याह्वे अज्झत्थिए चिंतिए पत्थिए मणोगए संकप्पे समुप्पज्जित्था-एवं खलु कणगरहे राया रज्जे य [रद्धे य बले य वाहणे य कोसे य कोडागारे य पुरे य अंतेउरे य मुच्छिए गट्टिए गिद्धे अज्झोववण्णे जाए जाए पुत्ते विचंगेइ-अप्येगइयाणं हत्थंगुलियाओ छिंदइ अप्येगइयाणं हत्थंगुद्धए छिंदइ अप्येगइयाणं पायंगुलियाओ छिंदइ अप्येगइयाणं पायंगुद्धए छिंदइ अप्येगइयाणं कण्णसक्कुलीओ छिंदइ अप्येगइयाणं नासापुडाई फालेइ अप्येगइयाणं] अंगमंगाई विचत्तेइ तं जइ णं अहं दारयं पयायामि सेयं खलु मम तं दारयं कणगरहस्स रहस्सिययं चेव सारम्भम्भणीए संगोवेमाणे विहरितए ति कट्टु एवं संपेहेइ संपेहेत्ता तेयलिपुत्तं अमच्चं सहावेइ सहावेत्ता एवं वयासी-एवं खलु देवाणुप्पिया कणगरहे राया रज्जे य [रद्धे य बले य वाहणे य कोसे य कोडागारे य पुरे य अंतेउरे य मुच्छिए गट्टिए गिद्धे अज्झोववण्णे जाए, जाए पुत्ते विचंगेइ-अप्येगइयाणं हत्थंगुलियाओ छिंदइ अप्येगइयाणं हत्थंगुद्धए छिंदइ अप्येगइयाणं पायंगुलियाओ छिंदइ अप्येगइयाणं पायंगुद्धए छिंदइ अप्येगइयाणं कण्णसक्कुलीओ छिंदइ अप्येगइयाणं नासापुडाई फालेइ अप्येगइयाणं अंगोवंगाई] विचत्तेइ तं जइ णं अहं देवाणुप्पिया दारयं पयायामि तए णं तुमं कणगरहस्स रहस्सिययं चेव अनुपुज्जेणं सारम्भ-माणे संगोवेमाणे संवड्ढेहि

तए णं से दारए उम्मुक्कयात्तभावे [विण्णय-परिणयमेत्ते] जांघ्वणगमणुप्पत्ते तव मम य भिक्खाभायणे भविस्सइ तए णं से तेयलिपुत्ते अमच्चे पउमावईए देवीए एयमहं पडिसुणेइ पडिसुणेत्ता पडिगए तए णं पउमावई देवी पोट्टिला य अमच्ची तममेव गब्भं गेण्हंति सममेव परिवहंति ते णं सा पउमावई देवी नवण्हं मासाणं बहुपडिपुण्णाणं जाव पियदंसणं सुरूवं दारयं पयाया जं रयणिं च णं पउमावई देवी दारयं पयाया तं रयणिं च णं पोट्टिला वि अमच्ची नवण्हं मासाणं विणिहायमावन्नं दारियं पयाया तए णं सा पउमावई देवी अम्मघाई सहावेइ सहावेत्ता एवं वयासी-गच्छह णं तुमं अम्मो तेयलिपुत्तं रहस्सिययं चेव सहावेहि तए णं सा अम्मघाई तहत्ति पडिसुणेइ पडिसुणेत्ता अंतेउरस्स अवदारेणं निग्गच्छइ निग्गच्छित्ता जेणेव तेयलिस्स गिहे जेणेव तेयलिपुत्ते तेणेव उवागच्छइ उवागच्छित्ता करयल [परिग्गहियं सिरसावत्तं मत्थए अंजलिं कट्टु एवं वयासी-एवं खलु देवाणुप्पिया पउमावई देवी सहावेइ तए णं तेयलिपुत्ते अम्मघाईए अंतिए एयमहं सोच्चा हट्टुट्टे अम्मघाईए सद्धिं साओ गिहाओ निग्गच्छइ निग्गच्छित्ता अंतेउरस्स अवदारएणं रहस्सिययं चेव अनुप्पविसइ अनुप्पविसित्ता जेणेव पउमावई देवी तेणेव उवागच्छइ उवागच्छित्ता करयल [परिग्गहियं सिरसावत्तं मत्थए अंजलिं कट्टु] एवं वयासी-संदिसंतु णं देवाणुप्पिया जं मए कायध्वं तए णं पउमावई देवी तेयलिपुत्तं एवं वयासी-एवं खलु कणगरहे राया जाव पुत्ते विचंगेइ अहं च णं देवाणुप्पिया दारयं पयाया तं तुमं णं देवाणुप्पिया एयं दारयं गेण्हहि जाव तव मम य भिक्खाभायणे भविस्सइ ति कट्टु तेयलिपुत्तस्स हत्थे दलयइ तए णं तेयलिपुत्ते पउमावईए हत्थाओ

दारगं गेण्हइ उत्तरिञ्जेणं पिहेइ अंतैउरस्स रहस्सियं अवदारेणं निग्गच्छइ निग्गच्छिता जेणेव सए गिहे जेणेव पोट्टिला भारिया तेणेव उवागच्छइ उवागच्छिता पोट्टिलं एवं वयासी-

एवं खलु देवाणुप्पिया कणगरहे राया जाव पुते वियंगेइ अयं च णं दारए कणगरहस्स पुते पउमावईए अत्तए तत्रं तुमं देवाणुप्पिए इमं दारगं कणगरहस्स रहस्सियं चैव अनुपुव्वेणं सारक्खाहि य संगोवेहि य संबड्ढेहि य तए णं एस दारए उम्मुक्कवालभावे तव य मम य पउमावईए य आहारै भविस्सइ ति कट्टु पोट्टिलाए पासे निक्खिबइ निक्खिवित्ता पोट्टिलाए पासाओ तं विणिहायमावण्णियं दारियं गेण्हइ गेण्हित्ता उत्तरिञ्जेणं पिहेइ पिहेत्ता अंतैउरस्स अवदारेणं अनुप्पविसइ अनुप्पविसित्ता जेणेव पउमावई देवी तेणेव उवागच्छइ उवागच्छिता पउमावईए देवीए पासे ठावेइ जाव पडिनिग्गए तए णं तीसे पउमावईए देवीए अंगण्डियारियाओ पउमावई देविं विणिहायमानण्णियं च दारियं पयाचं पासति पासित्ता जेणेव कणगरहे राया तेणेव उवागच्छति उवागच्छिता करयल [परिग्गहियं सिरसावत्तं मत्थए अंजलिं कट्टु] एवं वयासी-एवं खलु सापी पउमावई देवी मएल्लियं दारियं पयाया तए णं कणगरहे राया तीसे मएल्लियाए दारियाए नोहरणं करेइ वहुइं लोगियाइं मयकिंवाइं करेइ करेसा कालेणं विगसोए जाए तए णं से तेयलिपुत्तं कळं कोडुं वियपुरिसे सहावेइ सहावेत्ता एवं वयासी-खिप्पामेव 'भो देवाणुप्पिया चारगसोहरणं [करेह जाव ठिइपडियं दसदेवासियं करेह कारवेह च एथमाणत्तिं पछप्पिणह तेवि तहेव करेति तहेव पन्नप्पिणंति] जम्हा णं अण्हं एम दारए कणगरहस्स रत्ते जाए तं होउ णं दारए नामेणं कणगज्झए जाव अलमोगसमत्थे जाए। १०३१-१७

(१५०) तए णं सा पोट्टिला अण्णया कयाइ तेवलिपुत्तस्स अण्णिद्धा अकंता अप्पिया अमणुण्णा अमणामा जाया यत्तिं चोत्था-नेच्छइ णं तेयलिपुत्ते पोट्टिलाए नागोयमवि सवगयाए किं पुण् दंसणं वा परिभोगं वा तए णं तीसे पोट्टिलाए अण्णया कयाइ पुव्वरतावरत्तकालसमयंसि इमेयारूवे अञ्जल्लिए चित्तिए पत्थिए मणामए संकप्पे सगुप्पअत्थिया-एवं खलु अहं तेयलिस्स पुव्वि इद्धा कंता पिचा मणुण्णा मणामा आसि इयाणि अण्णिद्धा अकंता अप्पिया अमणुण्णा अमणामा जाया नेच्छइ णं तेयलिपुत्ते मम नाम [गोयमवि सवगयाए किं पुण् दंसणं वा] परिभोगं वा ति कट्टु ओहयमणसंकप्पा [करत्तलपत्थयमुही अइञ्जाणोवगया] झियायइ तए णं तेयलिपुत्ते पोट्टिलं ओ- हयमणरंकप्पं जाव झियायमाणि पासइ पासित्ता एवं वयासी-मा णं तुमं देवाणुप्पिए ओहयमण- संकप्पा जाव झियाहि तुमं णं मम महाणसंसि विपुलं असण-पाण-खाइम-साइमं उवक्खडावेहि उवक्खडावेत्ता बहूणं-समण-माहण-अतिहि-किवण-वणीमगाणं देयमाणी य दवावेमाणी य विह- राहि तए णं सा पोट्टिला तेयलिपुत्तेणं अगद्धेणं एवं बुत्ता समाणी हद्धा तेयलिपुत्तस्स एवमइं पडि- सुणेइ पडिसुणेत्ता कळाकळिं महाणसंसि विपुलं असण [पाण-खाइम-साइमं उवक्खडावेइ उवक्ख- डावेत्ता बहूणं समण- माहण- अतिहि किवणं-वणीमगाणं देयमाणी य] दवावेमाणी य विहरइ। १०४१-१८

(१५१) तेणं कालेणं तेणं समएणं सुव्वयाओ नामं अजाओ इरियासमियाओ [भाससमियाओ एसणासमियाओ आयाण-भंड-मत्त-निकखेवणासमियाओ उच्चारपासवणखेलंसियाण- जल्ल- पारिद्धावणियासमियाओ मणसमियाओ वइसमियाओ कायसमियाओ मणगुत्ताओ वइगुत्ताओ कायगुत्ताओ गुत्ताओ गुत्तिदियाओ] गुत्तवंभचारिणीओ बहुसुयाओ बहुपरियाराओ पुव्वानुपुव्वि चरमाणीओ जेणामेव तेयलिपुरे नयेरे तेणेव उवागच्छति उवागच्छिता अहापडिरूवं ओग्गहं

ओगिण्हति ओगिण्हिता संजमेणं तवसा अप्पाणं भावेमाणीओ विहरंति तए णं तासिं सुव्वयाणं अज्जाणं एगे संघाडए पढमाए पोरिसीए सज्जायं करेइ [वीयाए पोरिसीए झाणं झियाइ तडयाए पोरिसीए अतुरियमचवलमसंभंते मुहपोत्तियं पडिलेहेइ भायणवत्थाणि पडिलेहेइ भायणाणि पमज्जेइ भायणाणि ओगाहेइ जेणेव सुव्वयाओ अज्जाओ तेणेव उवागच्छइ सुव्वयाओ अज्जाओ वंदइ नमंसइ वंदिता नमंसिता एवं वयासी-इच्छामो णं तुब्भेहि अब्भणुण्णाए तेयलीपुरे नयरे उच्च-नीय-मज्झिमाइ कुलाइं घरसमुदाणस्स भिक्खायरियाए अडित्तए अहासुहंदेवाणुप्पिया मा पडिवंधं करेहि तए णं ताओ अज्जाओ सुव्वयाहिं अज्जाहिं अब्भणुण्णाया समाणीओ सुव्वयाणं अज्जाणं अंतियाओ पडिस्सयाओ पडिनिकखमंति पडिनिकखमिता अतुरियमचवलमसंभंताए गतीए जुगं-तरपलोयणाए दिट्ठीए पुरओ रिय सोहेभाणीओ तेयलीपुरे नयरे उच्च-नीय-मज्झिमाइ कुलाइं घरस-मुदाणस्स भिक्खायरियं] अडमाणीओ तेयलिस्स गिहं अनुपविट्ठाओ

तए णं सा पोट्टिला ताओ अज्जाओ एज्जमाणीओ पासइ पासिता हट्टुट्ठा आसणाओ अट्टुट्ठेइ वंदइ नमंसइ वंदिता नमंसिता विपुलेणं असण-पाण-खाइमसाइमेणं पडिलाभेइ पडिला-भेत्ता एवं वयासी-एव खलु अहं अज्जाओ तेयलिपुत्तस्स अमच्चस्स पुव्विं इट्ठा कंता पिया मणुण्णा मणामा आसि इयाणि अणिट्ठा [जाव अमणामा जाया नेच्छइ णं तेयलीपुत्ते मम नामगोयमवि सवणयाए किं पुण] दंसणं वा परिभोगं वा तं तुब्भे णं अज्जाओ बहुनायाओ बहुसिक्खियाओ बहु-पढियाओ बहूणि गामागर-[नगर-खेड-कब्बड-दोणमुह-मंडब-पट्टण-आसम-निगम-संवाह-सण्णि-वेसाइ] आहिंडह बहूणं राईसर-[तलवर-मांडविय-कोडुंविय इत्थे सेट्ठि सेणावइ सत्थवाहपभिंणं] गिहाइ अनुपविसह तं अत्थियाइ अज्जाओ केइ कहिंवि चुण्णजोए वा मंतजोगे वा कम्मणजोए वा कम्मजोए वा हियउट्टावणे वा काउट्टावणे वा आभिओगिए वा वसीकरणे वा कोउवकम्पे वा भूइकम्पे वा मूले वा कंदे वाछली वल्ली सिलिया वा गुलिया वा ओसहे वा भेसजे वा उवलद्धपुव्वे जेणाहं तेयलिपुत्तस्स पुणरवि इट्ठा कंता पिया मणुण्णा मणामा भवेज्जामि तए णं ताओ अज्जाओ पोट्टिलाए एवं वुत्ताओ समाणीओ दोवि कण्णे ठएति ठवेत्ता पोट्टिलं एवं वयासी-अन्हे णं देवाणु-प्पिया समाणीओ निग्गंथीओ जाव गुत्तवंभचारिणीओ नो खलु कप्पइ अन्हं एयप्पगारं कण्णेहिं वि निसामित्तए किमंग पुण उवदंसित्तए वा आयरित्तए वा अन्हे णं तव देवाणुप्पिए विचित्तं केवल-पत्रत्तं धम्मं परिकहिज्जामो तए णं सा पोट्टिला ताओ अज्जाओ एवं वयासी-इच्छामि णं अज्जाओ तुब्भं अंतिए केवलपत्रत्तं धम्मं निसामित्तए तए णं ताओ अज्जाओ पोट्टिलाए विचित्तं केवलपत्रत्तं धम्मं परिकहेति तए णं सा पोट्टिला धम्मं सोट्ठा निसम्मं हट्ठा एवं वयासी-सहहामि णं अज्जाओ निग्गंथं पावयणं जाव से जहेयं तुब्भे वयह इच्छामि णं अहं तुब्भं अंतिए पंचाणुव्वइयं सरासिक्खा-वइयं-दुवालसविहं गिहिधम्मं पडिवज्जित्तए अहासुहं देवाणुप्पिए तए णं सा पोट्टिला तासिं अज्जाणं अंतिए पंचाणुव्वइयं जाव गिहिधम्मं पडिवज्जइ ताओ अज्जाओ वंदइ नमंसइ वंदिता नमंसिता पडिविसज्जेइ तए णं सा पोट्टिला समणोवासिया जाया जाव [समणे निग्गंथे फासुएणं एसणज्जेणं असण-पाण-खाइम-साइमेणं वत्थ-पडिग्गह-कंबल-पायपुंछणेणं औसहभेसज्जेणं पाडिहारिएण य पीढ-फलग-सेज्जा-संथारएणं] पडिलाभेमामी विहरइ 1१०५1-११

(१५२) तए णं तीसे पोट्टिलाए अण्णया कयाइ पुव्वरत्तावरत्तकालसमयंसि कूडुंबजागरियं जागरमाणीए अयमेयात्त्वे अज्जत्थिए चित्तिए पत्थिए मणोगए संकम्पे सपुपज्जित्था-एवं खलु अहं

तेयलिपुत्तस्स पुब्बि इद्धा कंता पिया मणुण्णा मणामा असि इयाणि अणिद्धा [अकंता अप्पिया अमणुण्णा अमणामा जाया नेच्छइ णं तेयलीपुत्ते मम नामगोयमवि सवणयाए किं पुण दंसणं वा] परिभोगं वा तं सेयं खलु मम सुव्वयाणं अञ्जाणं अंतिए पव्वइत्तए-एवं सेपेहेइ संपेहेत्ता कइं पाउपभायाए रवणीए जाव उद्धियमि सूरु सहस्सरस्सिमि दिणयरे तेयसा जलंते जेणेव तेयलिपुत्ते तेणेव उवागच्छइ उवागच्छित्ता करयल [परिगहियं सिरसावतं मत्थए अंजलिं कट्टु] एवं वयासी- एवं खलु देवाणुप्पिया मए सुव्वयाणं अञ्जाणं अंतिए धम्मे निसंते [से वि य मे धम्मे इच्छिए पडिच्छिए अभिरूइए तं इच्छामि णं तुम्भेहिं अक्खणुण्णाया पव्वइत्तए तए णं तेयलिपुत्ते पोट्टिलं एवं वयासी-एवं खलु तुमं देवाणुप्पिए मुंडा पव्वइया समाणी कालमासे कालं किच्चा अण्णयकरेसु देवलोएसु देवत्ताए उववज्जिहिसि तं जइ णं तुमं देवाणुप्पिए ममं ताओ देवलोगाओ आगम्मं केवलपत्रत्ते धम्मे बोहेहि तो हं विसज्जेमि अह णं तुमं ममं न संबोहेसि तो ते न विसज्जेमि

तए णं सा पोट्टिला तेयलिपुत्तस्स एयमइं पडिसुणेइ तए णं तेयलिपुत्ते विउलं असणं पाणं खाइमं साइमं उवक्खडावेइ उवक्खडावेत्ता मित्त-नाइ-जाव आमंतेइ जाव सक्कारेइ सम्माणेइ सक्कारेत्ता सम्माणेत्ता पोट्टिलं ण्हायं [सव्वालंकारविभूसियं] पुरिससहस्सवाहिणीयं सीयं दुरुहिता मित्त-नाइ-[नियग-सयण-संबंधि-परियणेणं सद्धिं] संपरिवुडे सव्विइदीए जाव दुंदुहिनियधोसना-इय-रवेणं तेयलिपुरं मज्झंमज्झेणं जेणेव सुव्वयाणं उवस्सए तेणेव उवागच्छइ उवागच्छित्ता सीयाओ पच्चोरुहइ पच्चोरुहिता पोट्टिलं पुरओ कट्टु जेणेव सुव्वया तेणेव उवागच्छइ उवागच्छित्ता वंदइ नमंसइ वदित्ता नमंसित्ता एवं वयासी-एवं खलु देवाणुप्पिया मम पोट्टिला भारिया इद्धा कंता पिया मणुण्णा मणामा एस णं संसारभउव्विग्गा [भीया जाव इच्छइ देवाणुप्पियाणं अंतिए मुंडा भवित्ता अगाराओ अण्णारियं] पव्वइत्तए पडिच्छंतु णं देवाणुप्पिया सिस्सिणिभिक्खं अहासुहं मा पडिवंधं करेहि तए णं सा पोट्टिला सुव्वयाहिं अञ्जाहिं एवं युत्ता समाणी हद्धा उत्तरपुरथियं दिसीमागं अवक्कमइ अवक्कमित्ता सयमेव आभरणमज्जालंकारं ओमुयइ ओमुइत्ता सयमेव पंचमुद्धियं लोयं करेइ जेणेव सुव्वयाओ अञ्जाओ तेणेव उवागच्छइ वंदइ नमंसइ वदित्ता नमंसित्ता एवं वयासी-अलिते णं अञ्जा लोए एवं जहा देवाणंदा जाव एककारस अंगाई अहिज्जइ वहृणि वासाणि सामण्णपरियागं पाउणइ पउणित्ता मासियाए संलेहणाए अत्ताणं झोसेत्ता सद्धिं भत्ताइं अणसणेणं छेएत्ता आलोइय-पडिक्कंता समाहिपत्ता कालमासे कालं किच्चा अण्णयरेसु देवलोएसु देवत्ताए उववण्णा 190६1-100

(१५३) तए णं से कणगरहे राया अण्णया कयाइ कालधम्मणा संजुत्ते यावि होत्था तए णं ते ईसर-[तलवर-माडंविद्य-कोट्टुंविद्य-इव्व-सेट्टि-सेणावइ-सत्थावाह-पभिड्ढां रोयमाणा कंदमाणा विलवमाणा तस्स कणगरहस्स सरीरस्स महया इइदी-सक्कार-समुदएणं] नीहरणं करेति कोत्ता अण्णमण्णं एवं वयासी-एवं खलु देवाणुप्पिया कणगरहे राया रज्जे य जाव मुच्छिए पुत्ते वियंगित्था अम्हे णं देवाणुप्पिया रायाहीणा रायाहिद्धिया रायाहीणकज्जा अयं च णं तेयली अमच्चे कणगरहस्स रण्णो सव्वद्धानेसु सव्वभूमियासु लद्धपद्यए दिन्नवियारे सव्वकज्जवइद्दावए यावि होत्था तं सेयं खलु अम्हं तेयलिपुत्तं अमच्चं कुमारं जाइत्तए त्ति कट्टु अण्णमण्णस्स एयमइं पडिसुणेति पडिसुणेत्ता जेणेव तेयलिपुत्ते अमच्चे तेणेव उवागच्छंति उवागच्छित्ता तेयलिपुत्तं एवं वयासी-एवं खलु देवाणुप्पिया कणगरहे राया रज्जे य जाव मुच्छिए पुत्ते वियंगित्था अम्हे णं देवाणुप्पिया रायाहीणा

रायाहिद्विया रायहीणकजा तुमं च णं देवाणुप्पिया कणगरहस्स रण्णो सव्वठाणेसु [सव्वभूमियासु लद्धपद्यए दित्रवियारे] रज्जुधारचितए होत्या तं जइ णं देवाणुप्पिया अत्थि केइ कुमारे रायलक्खण-संपन्ने अभिसेयारिहे तण्णं तुमं अमं दलाहि जण्णं अमहे महया-महया रायाभिसेएणं अभिसिचामो तए णं तेयलिपुत्ते तेसिं ईसरपभिईणं एयमद्वं पडिसुणेइ पडिसुणेत्ता कणगज्झयं कुमारे प्हायं जाव सस्सिरीयं करेइ कोरता तेसिं ईसरपभिईणं उवणेइ उवणेत्ता एवं वयासी-एस णं देवाणुप्पिया कणगरहस्स रण्णो पुत्ते पउमावईए देवीए अत्तए कणगज्झए नामं कुमारे अभिसेया- रिहे रायलक्खणसंपन्ने माए कणगरहस्स रण्णे रहस्सिययं संवडिडेए एयं णं तुमहे महया-महया रायाभिसेएणं अभिसिचए सव्वं च से उट्ठाणपरियावणियं परिकहेइ तए णं ते ईसरपभिइओ कण-गज्झयं कुमारे महया-महया रायाभिसेएणं अभिसिचंति तेणं से कणगज्झए कुमारे राया जाए-महयाहिमवंत-महंत-मलय-मंदर-महिंदसारे जाव रज्जं पसासेमाणे विहरइ तए णं सा पउमावई देवी कणगज्झयं रायं सद्दावेइ सद्दावेत्ता एवं वयासी-एस णं पुत्ता तव रजे [य रट्ठे य वत्ते य वारुणे य कोसे य कोट्टागरे य पुरे य] अंतेउरे य तुमं च तेयलिपुत्तस्स अमच्चस्स पभावेणं तं तुमं णं तेयलिपुत्तं अमच्चं आढाहि परिजाणाहि सक्कारेहि सम्माणेहि इंतं अब्भुड्ढेहि ठियं पञ्जुवासेहि वच्चंतं पडिसं- साहेहि अट्ठासणेणं उवनिमंतेहि भोगं च से अनुवड्ढेइ तए णं से कणगज्झए पउमावईए तहंति वयणं पडिसुणेइ पडिसुणेत्ता तेयलिपुत्तं अमच्चं आढाइ [परिजाणाइ सक्कारेइ सम्माणेइ इंतं अब्भुड्ढेइ ठियं पञ्जुवासेइ वच्चंतं पडिसंसाहेइ अट्ठासणेणं उवनिमंतेइ] भोगं च से अनुवड्ढेइ। १०७।-१०१

(१५४) तए णं से पोट्टिले देवे तेयलिपुत्तं अभिक्खणं-अभिक्खणं केवलपत्तने धम्मं संबोहेइ नो चेव णं से तेयलिपुत्ते संवुज्झइ तए णं तस्स पोट्टिलदेवस्स इमेयारूवे अज्झत्थिए चितिए पत्थिए मणोगए संकप्ये समुप्पाजित्या-एवं खलु कणगज्झए राया तेयलिपुत्तं आढाइ जाव भाग च से अगुवड्ढेइ तए णं से तेयलिपुत्ते अभिक्खणं-अभिक्खणं संबोहिज्जमाणे वि धम्मं नो संवुज्झइ तं संयं खलु ममं कणगज्झइं तेयलिपुत्ताओ विप्परिणामित्तए रि कट्ठु एवं संपेहेइ संपेहेत्ता कणगज्झयं तेयलिपुत्तआओ विप्परिणामेइ तए णं तेयलिपुत्ते कल्लं पाउप्पभायाए रयणीए जाव उट्ठियम्मि मूरे सहस्सरस्सिम्मि दिणवरे तेयसा जलते प्हाए कयबलिकम्मि कयकोउय-मंगल-पायच्छित्त आसवव-वरगए बहूहिं पुरिसेहि सद्धिं संपरिवुडे साओ गिहाओ निग्गच्छइ निग्गच्छित्ता जेण्वेव कणगज्झए राया तेणेव पहारेत्थ गमणाए तए णं तेयलिपुत्तं अमच्चं जे जहा बहवे राईसर-त्तलवर [माडंविद्य-कोडुविद्य-इत्थ-सेट्ठिं-सेणावइ-सत्थवाह पभियाओ पासंति ते तहेव आढायंति परियाणांति अब्भु-ट्ठेति अंजलिपग्गहं करेति इट्ठाहिं कंताहिं जाव वग्गूहिं आलवमाणा य संलवमाणा य पुरओ य पिट्ठओ य पासओ य समणुगच्छंति तए णं से तेयलिपुत्ते जेण्वेव कणगज्झए तेणेव उयागच्छइ तए णं से कणगज्झए तेयलिपुत्तं एज्जमाणं पासइ पासित्ता नो आढाइ नो परियाणाइ नो अब्भुड्ढेइ अणा-दायमाणे अपरियाणमाणे अणब्भुड्ढेमाणे परम्मूहे संचिद्धइ तए णं से तेयलिपुत्ते अमच्चे कणगज्झ-यस्स रण्णो अंजलिं करेइ तओ य णं से कणगज्झए राया अणादायमाणे अपरियाणमाणे अणब्भुड्ढे-माणे तुसिणीए परम्मूहे संचिद्धइ तए णं तेयलिपुत्ते कणगज्झयं रायं विप्परिणयं जाणित्ता भीए [तत्थे तसिए उच्चिगो] संजायभाए एवं वयासी-रुट्ठे णं मम कणगज्झए राया हीणे णं मम कणगज्झए राया अवज्झाए णं मम कणगज्झए राया तं न नज्जइ णं मम केणइ कु-मारेणं मारेहिइ रि कट्ठु भीए तत्थे जाव सणियं-सणियं पच्चोसक्कइ पच्चोसक्कित्ता तमेव आसखंयं दुरुहइ दुरुहित्ता तेयलिपुरं

मज्झमज्झेणं जेणेव सए गिहे तेणेव पहारेत्थ गमणाए तए णं तेयलिपुत्तं जे जहा ईसर जाव सत्थयाहपभियओ पासंति ते तथा नो आढायंति नो परिवाणंति नो अब्भुट्ठेति नो अजलिपगहं करेति इट्ठाइ जाव वगूहिं नो आलवंति नो संलवंति नो पुरओ य पिट्ठओ य पासओ य समणु-गच्छंति

तए णं तेयलिपुत्ते अमच्चे जेणेव सए गिहे तेणेव उवागए जा वि य से तत्थ वाहिरिया परिसा भवइ तं जहा-दासे इ वा पेसे इ वा भाइए इ वा सा वि य णं नो आढाइ नो परिवाणाइ नो अब्भुट्ठेइ जा वि य से अत्थितरिया परिसा भवइ तं जहा-पिया इ व माया इ वा [माया इ वा भगिणी इ वा भजा इ वा पुत्ता इ वा धूया इ वा] सुप्पा इ वा सा वि य णं नो आढाइ नो परिवाणाइ नो अब्भुट्ठेइ तए णं से तेयलिपुत्ते जेणेव वासपरे जेणेव सयणित्रे तेणेव उवागच्छइ उवागच्छिता सयणिज्जंसि निसीयइ निसीइत्ता एवं वयासी-एवं खलु अहं सयाओ गिहाओ निगच्छामि तं चेव जाव अत्थितरिया परिसा नो आढाइ नो परिवाणाइ नो अब्भुट्ठेइ तं सेचं खलु मम अप्पाणं जीवियाओ ववरोवि-तए रिा कट्ठु एयं संपेहेइ संपेहेत्ता तालउडं विसं आसगंसि पक्खिवइ से य विसे नो कमइ तए णं से तेयलिपुत्ते अमच्चे नीलुप्पल- [गवलगुलिय- अयसिकुसु- मप्यगासं खुरधारे] असि खंधंसि ओहरइ तत्थ वि य से धारा ओएल्ला तए णं से तेयलिपुत्ते जेणेव असोगवणिवा तेणेव उवागच्छइ उवाग-च्छिता पासगं गोवाए बंधइ बंधित्ता रुक्खं दुरुहइ दुरिहिता पासगं रुक्खे बंधइ बंधित्ता अप्पाणं मुयइ तत्थ वि य से रज्जु छिन्ना तए णं से तेयलिपुत्ते महइमहालियं सिलं गीवाए बंधइ बंधित्ता अत्थाहमतारमपोरिसीयंसि उदगंसि अप्पाणं मुयइ तत्थ वि य से थाहे जाए तए णं से तेयलिपुत्ते सुक्कंसि तणकूडंसि अगणिकायपक्खिवइ पक्खिवित्ता अप्पाणं मुयइ तत्थ वि य से अगणिकाए विज्जाए तए णं से तेयलिपुत्ते एवं वयासी-सद्धेयं खलु भो समणा वयंति सद्धेयं खलु भो माहणा वयंति सद्धेयं खलु भो समणा-माहणा वयंति अहं एगो असद्धेयं वयामि एवं खलु- अहं सह पुत्तेहिं अपुत्ते को मेदं सहहिस्सइ सह मित्तेहिं अमित्ते को मेदं सहहिस्सइ [सह अत्थेणं अणत्थे को मेदं सहहिस्सइ सह दारेणं अदारे को मेदं सहहिस्सइ सह दासेहिं अदासे को मेदं सहहिस्सइ सह पेसेहिं अपेसे को मेदं सहहिस्सइ सह परिजणेणं अपरिजणे को मेदं सहहिस्सइ

एवं खलु तेयलिपुत्तेणं अमच्चेणं कणागज्जाएणं रण्णा अवज्जाएणं समाणेणं तायपुडणे विसे आसगंसि पक्खित्ते से वि य नो कमइ नो मेयं सहहिस्सइ तेयलिपुत्तेणं नीलुप्पल- [गवलगुलिय- अयसि-कुसुमप्यगासं खुरधारे असी खंधंसि ओहरिए तत्थ वि य से धारा ओएल्ला को मेयं सहहि-स्सइ तेयलिपुत्तेणं पासगं गोवाए बंधित्ता [रुक्खं दुरुहे पासगं रुक्खे बंधित्ता अप्पा मुक्के तत्थ वि य से रज्जु छिन्ना को मेयं सहहिस्सइ तेयलिपुत्तेणं महइमहालियं [सिलं गीवाए बंधित्ता अत्थाहमतार-मपोरिसीयंसि] उदगंसि अप्पा मुक्के तत्थ वि य णं से थाहे जाए को मेयं सहहिस्सइ तेयलिपुत्तेणं सुक्कंसि तणकूडंसि [अगणिकायं पक्खिवित्ता अप्पा मुक्के तत्थ वि य से] अग्गी विज्जाए को मेयं सहहिस्सइ-ओहयमणसंकम्पे [करतलपल्लत्थमुहे अट्टज्जाणोवगए] झियावइ तए णं से पोट्टिले देवे पोट्टिलारूयं विउज्वइ विउज्वित्ता तेयलिपुत्तासस दूरं सामंते टिच्चा एवं वयासी-हं भो तेयलिपुत्ता पुरओ पवाए पिट्ठओ हत्थियं दुहओ अचक्खुफासे मज्जे सराणि वरिसंति गामे पलित्ते रण्णे झियाइ रण्णे पलित्ते गामे झियाइ आउसो तेयलिपुत्ता कओ वयामो तए णं से तेयलिपुत्ते पोट्टिलं एवं वयासी-भीयस्स खलु भो पव्वजा उक्कंठियस्स सदेसगमणं बुहियस्स अत्रं तिसियस्स पाणं आउरस्स

भेसजं भाइयस्स रहस्सं अभिजुत्तस्स पच्चयकरणं अद्धाणपरिसंतस्स वाहणगमणं तरिउ- कामस्स पवहणकिच्चं परं अभिउंजिउकामस्स सहायकिच्चं खंतस्स दंतस्स जिइंदियस्स एतो एग- मवि न भवइ तए णं से पोइत्ति देवे तेयलिपुत्ते अमच्चं एवं वयासी-सुद्धु णं तुमं तेयलिपुत्ता एयमइ आयाणाहि ति कट्टु दोच्चं पि तच्चं पि एवं वयइ वइत्ता जामेव दिस्सि पाउब्भूए तामेव दिस्सि पडिगए। १९०८-१०२

(१५५) तए णं तस्स तेयलिपुत्तस्स सुभेणं परिणामेणं जाईसरणे समुप्पन्ने तए णं तेयलि-पुत्तस्स अयमेयारूवे अज्झत्यिए चिंतिए पत्थिए मणोए संकप्पे समुप्पज्जित्या-एवं खलु अहं इहेव जंबुद्वीवे दीवे महाविदेहे वासे पोक्खलावइए विजए पोंडरीगिणीए रायहाणीए महापउमे नामं राया होत्या तए णं हं थेराणं अंतिए मुंडे भविता [पव्वइए सामाइयमाइयाइं] चोहसपुव्वाइं अहिज्जिता बहूणि वासाणि सामणपरियागं पाउणित्ता मासियाए संलेहणाए महासुकूके कप्पे देवत्ताए उव-वण्णे तए णं हं ताओ देवलोगाओ आउक्खएणं भवक्खएणं डिइक्खएणं अपंतंरं चयं चइत्ता इहेव तेयलिपुरे तेयलिस्स अमच्चस्स भद्दाए भारियाए दारयत्ताए पच्चायाए तं सेयं खलु मम पुव्वुहिइत्ताइं महव्वयाइं सयमेव उवसंपज्जिता णं विहरित्तए-एवं संपेहेइ संपेहेत्ता सयमेव महव्वयाइं आरुहेइ आरुहेत्ता जेणेव पमयवणे उज्जाणे तेणेव उवागच्छइ उवागच्छित्ता असोगरवपायवस्स अहे पुढवि-सिलापट्टयंसि सुहनिसण्णस्स अनुचिंतेमाणस्स पुव्वाहीयाइं सामाइयमाइयाइं चोहसपुव्वाइं सयमेव अभिसमण्णागयाइं तए णं तस्स तेयलिपुत्तस्स अणगारस्स सुभेणं परिणामेणं [पसत्थेणं अज्झव-साणेणं लेसाहिं चिसुज्झमाणीहिं] तयाथरणिज्जाणं कम्मण खओवसमेणं कम्मरयविकरणकरं अपुव्वकरणं पविट्ठस्स केवलवरनाणदंसणे समुप्पन्ने १९०९-१०३

(१५६) तए णं तेयलिपुरे नयरे अहासन्नहिएहिं वाणमत्तरेहिं देवेहिं देवीहि य देवदुंदुहीओ समाहायाओ दसद्धवण्णे कुसुमे निवाइए चेलुकखेवे दिव्वे गीयगंधव्वनिनाए कए यावि होत्या तए णं से कणगज्जाए राया इमीसे क्हाए लद्धे समाणे एवं वयासी-एवं कलु तेयलिपुत्ते मए अवज्जाए मुंडे भविता पव्वइए तं गच्छमि णं तेयलिपुत्तं अणगारं वंदामि नमंसामि वंदित्ता नमसित्ता एयमइं विणएणं भुज्जो-भुज्जो खामेमि-एवं सपेहेइ सपेहेत्ता ण्हाए चाउरंगिणीए सेणाए सत्तिं जेणेव पमय-वणे उज्जाणे जेणेव तेयलिपुत्ते अणगारे तेणेव उवागच्छइ उवागच्छित्ता तेयलिपुत्तं वंदइ नमंसइ वंदित्ता नमंसित्ता एयमइं च णं विणएणं भुज्जो-भुज्जो खामेइ खामेत्ता नच्चासण्णे [नाइदूरे सुत्सूस्स-माणे नमंसमाणे पंजलिउडे अभिमुहे विणएणं] पञ्चवासइ तए णं से तेयलिपुत्ते अणगारे कणगज्ज-यस्स रण्णो तीसे य महइमहालियाए परिसाए धम्मं परिकहेइ तए णं से कणगज्जाए राया तेयलि-पुत्तस्स केवलिस्स अंतिए धम्मं सोच्चा निसम्मा पंचाणुव्वइयं सत्तसिक्खावइयं-दुवालसविहं साय-गधम्मं पडिबज्जइ पडिबज्जित्ता समणोवासाए जाए-अभिगयजीवाजीवे तए णं तेयलिपुत्ते केवली बहूणि वासाणि केवलपरियागं पाउणित्ता जाव सिद्धे एवं खलु जंबू समणेणं भगवया महावीरेणं जाय संपत्तेणं चोहसमस्स नायज्जयणस्स अयमट्टे पत्रत्ते ति वेमि १९०१-१०४

● पद्ये सुयक्खं चोहसमं अज्जयणं समत्तं ●

पत्ररसमं अज्जयणं—नंदीफले

(१५७) जइ णं भंते समणेणं भगवया महावीरेणं चोहसमस्स नायज्जयणस्स अयमट्टे पत्रत्ते पत्ररसमस्स णं भंते नायज्जयणस्स के अट्टे पत्रत्ते एवं खलु जंबू तेणं कालेणं तेणं समएणं चंपा नामं नयरी होत्या पुत्रभद्दे चैइए जियसत्तू राया तत्थ णं चंपाए नयरीए धणे नामं सत्थवाहे होत्या-अइडे

जाव अपरिभूए तीसे णं चंपाए नयरीए उत्तरपुत्थिमे दिसीभाए अहिच्छत्ता नाम नयरी होत्या-
रिद्धत्थिमिय-समिद्धा वण्णओ तत्त णं अहिच्छत्ताए नयरीए कणगकैऊ नामं राया होत्या- महया
वण्णओ तए णं तस्स धणस्स सत्थवाहस्स अनया कयाइ पुव्वरत्तवरत्तकालसमयंसि इमेयारूवे
अङ्गत्थिए चित्तिए पत्थिए मणोगए संकप्पे समुप्पजित्था-सेयं खलु मम विपुलं पणियभंडमायाए
अहिच्छत्तं नयरिं वाणिज्जाए गमित्ताए-एवं संपेहेइ संपेहेत्ता गणिमं व धरिमं व भेज्जं व पारिच्छेज्जं च
-चउच्चिहं भंडं गेण्हइ गेण्हित्ता सगडी-सागडं सज्जेइ सज्जेत्ता सगडी-सागडं भरेइ भरेत्ता कोडुंबिय-
पुरिसे सद्दावेइ सद्दावेत्ता एवं वयासी-गच्छह णं तुब्बे देवाणुप्पिया चंपाए नयरीए सिंघाडग जाव
महापहपहेसु उग्घोसेमाणा-उग्घोसेमाणा एवं वयह-एवं खलु देवाणुप्पिया घणे सत्थवाहे विपुलं
पणियं आदाव इच्छइ अहिच्छत्तं नयरिं वाणिज्जाए गमित्ताए तं जो णं देवाणुप्पिया चरए वा चीरिए
वा चम्माखंडिए वा भिच्छुंडे वा पंडुरंगे वा गोयमे वा गोव्वतिए वा गिहधम्मे वा धम्मचित्ताए वा
अविच्छ-विच्छ-वुइदसावग-रत्तपड-निगंगयप्पभिई पासंडत्ये वा गिहत्ये वा घणेणं सत्थवाहेणं
सद्धिं अहिच्छत्तं नयरिं गच्छइ तस्स णं घणे सत्थवाहे अच्छत्तागस्स छत्तं दलयइ अनुवाहणस्स
उवाहणाओ दलयइ अकुडियस्स कुडियं दलयइ अपत्थयणस्स पत्थयणं दलयइ अपक्खेवगस्स
पक्खेवं दलयइ अंतरा वि य से पडियस्स वा भागलुग्गस्स सान्नेज्जं दलयइ सुहंसुहेणं य अहिच्छत्तं
संपावेइ ति कट्ठु दोच्चंपि तच्चंपि घोसणं घोसेह घोसेत्ता मम एयमाणत्तियं पच्चप्पिणह

तए णं कोडुंबियपुरिसा [धणेणं सत्थवाहेणं एवं वुत्ता समाणा हट्ठुत्ता चंपाए नयरीए
सिंघाडग जाव महापहपहेसु एवं वयासी-हंदि सुणंतु भगवंतो चंपानयरीवत्तव्वा बहवे चरगा वा
जाव गिहत्था वा जो णं धणेणं सत्थवाहेणं सद्धिं अहिच्छत्तं नयरिं गच्छइ तस्स णं घणे सत्थवाहे
अच्छत्तागस्स छत्तं दलयइ जाव सुहंसुहेण य अहिच्छत्तं संपावेइ ति कट्ठु दोच्चंपि तच्चंपि घोसणं
घोसेत्ता तमाणत्तियं] पच्चप्पिणंति तए णं तेसिं कोडुंबियपुरिसाणं अंतिए एयमट्ठं सोच्चा चंपाए
नयरीए बहवे चरगा य जाव गिहत्था य जेणेव घणे सत्थवाहे तेणेव उवागच्छंति तए णं घणे
सत्थवाहे तेसिं चरगाणं य जाव गिहत्थाण य अच्छत्तागस्स छत्तं दलयइ जाव अपत्थयणस्स पत्थयणं
दलयइ दलयित्ता एवं वयासी-गच्छह णं तुब्बे देवाणुप्पिया चंपाए नयरीए बहिया अग्गुज्जाणंसि ममं
पडिवालेमाणा पडिवालेमाणा चिट्ठह तए णं ते चरगा य जाव गिहत्था य धणेणं सत्थवाहेणं एवं वुत्ता
समाणा [चंपाए नयरीए बहिया अग्गुज्जाणंसि धणं सत्थवाहं पडिवालेमाणा-पडिवालेमाणा] चिट्ठंति
तए णं घणे सत्थवाहे सोहणंसि तिहि-करण-नक्खत्तंसि विउलं असण-याण-खाइप-साइमं उवक्ख-
डावेइ उयक्खडावेत्ता भित्त- नाइ- जाव आमंतेइ आमंतेत्ता भोयणं भोयावेइ भोयावेत्ता आपुच्छइ
आपुच्छित्ता सगडी-सागडं जोयावेइ जोयावेत्ता चंपाओ नयरीओ निग्गच्छइ निग्गच्छित्ता नाइ-
धिप्पगिठ्ठेहिं अद्धाणेहिं वसमाणे-वसमाणे सुहेहिं वसहि-पायरासेहिं अंगं जणवयं मज्झमज्जेणं
जेणेव देसणं तेणेव उवागच्छइ उवागच्छित्ता सगडी-सागडं मोयावेइ सत्थनिवेसं करेइ करेत्ता
कोडुंबियपुरिसे सद्दावेइ सद्दावेत्ता एयं वयासी-तुब्बे णं देवाणुप्पिया मम सत्थनिवेसंसि महया-
महया सहेंणं उग्घोसेमाणा-उग्घोसेमाणा एवं वयह एवं खलु देवाणुप्पिया इमीसे आगामियाए
छिण्णावायाए दीहमद्धाए अडबीए बहुमज्झदेसभाए एत्थ णं बहवे नंदिफला नामं रुक्खा-किण्हा
जाव पत्थिया पुक्किया फलिया हरिया रेरिज्जमाणा सिरीए अईवअईव उवसोभेमाणा चिट्ठंति-
मणुण्णा वण्णेणं मणुण्णा गंधेणं मणुण्णा रसेणं मणुण्णा फासेणं मणुण्णा छायाए

तं जी णं देवाणुप्पिया तेसिं नंदिफलाणं रुक्खाणं मूलाणि वा कंदाणि वा तयाणि वा पत्ताणि वा पुष्पाणि वा फलाणि वा वीयाणि वा हरियाणि वा आहारेइ छायाए वा वीसमइ तस्स णं आवाए भइए भवइ तओ पच्छा परिणममाणा-परिणममाणा अकाले चेव जीवियाओ ववरोवेति तं मा णं देवाणुप्पिया केइ तेसिं नंदिफलाणं मूलाणि वा जाव हरियाणि वा आहरउ छायाए वा वीसमउ मा णं से वि अकाले चेव जीवियाओ ववरोविञ्जिस्सउ तुब्भे णं देवाणुप्पिया अन्नेसिं रुक्खाणं मूलाणि य जाव हरियाणि य आहारेह छायासु वीसमह ति घोसणं घोसेह घोसेत्ता मम एयमाणत्तिव पच्चप्पि-णह से वि तहेव घोसणं घोसेत्ता तमाणत्तिय पच्चप्पिणंति तए णं घणे सत्यवाहे सगडी-सागडं जोएइ जोएत्ता जेणेव नंदिफला रुक्खा तेणेव उवागच्छइ उवागच्छित्ता तेसिं नंदिफलाणं अदूरसामंते सत्यनिवेसं करेइ करेत्ता दोच्चंपि तच्चंपि कोडुंबियपुरिसे सद्दावेइ सद्दावेत्ता एवं वयासी-तुब्भे णं देवाणुप्पिया मम सत्यनिवेसंसिं महया-महया सट्ठेणं उग्घोसेमाणा-उग्घोसेमाणा एवं वयह-एए णं देवाणुप्पिया ते नंदिफला रुक्खा किण्हा जाव मणुण्णा छायाए तं सो णं देवाणुप्पिया एएसिं नंदिफ-लाणं रुक्खाणं मूलाणि वा कंदाणि वा तयाणि वा पत्ताणि वा पुष्पाणि वा फलाणि वा वीयाणि वा हरियाणि वा आहारेइ जाव अकाले चेव जीवियाओ ववरोवेइ तं मा णं तुब्भे तेसिं नंदिफलाणं मूलाणि वा जाव आहारेइ छायाए वा वीसमह मा णं अकाले चेव जीवियाओ ववरोविञ्जिस्सह अन्नेसिं रुक्खाणं मूलाणि य जाव आहारेह छायाए व वीसमह ति क्रुट्टु घोसणं घोसेह घोसेत्ता मम एयमाणत्तिय पच्चप्पिणह ते वि तहेव घोसणं घोसेत्ता तमाणत्तिय पच्चप्पिणंति तत्थ णं अत्येगइया पुरिसा घणस्स सत्यवाहस्स एयमट्ठं सद्दहंति पत्तियंति रोयंति एयमट्ठं सद्दहमाणा पत्तियमाणा रोयमाणा तेसिं नंदिफलाणं दूरंदूरेणं परिहरमाणा-परिहरमाणा अण्णेसिं रुक्खाणं मूलाणि य जाव आहारंति छायासु वीसमंति तेसिं णं आवाह नो भइए भवइ तओ पच्छा परिणममाणा-परिण-ममाणा सुभरूयत्ताए [सुभगंधत्ताए सुभारतत्ताए सुमफासत्ताए सुभछावत्ताए] भुज्जो-भुज्जो परिण-मंति एवामेव समणाउसो जो अहं [निग्गंथो वा निग्गंथी वा आयरिय-उवज्जायाणं अंतिए मुंडे भवित्ता अगाराओ अणगारियं पव्वइए समाणे] पंचसु कामगुणेषु नो सज्जइ नो रज्जइ नो गिञ्जइ नो मुञ्जइ नो अज्जोववज्जइ से णं इहभवे चेव बहूणं समणाणं बहूणं समणीणं बहूणं सावगाणं बहूणं सावियाणं य अच्चणिज्जे भवइ परलोए [वि य णं नो बहूणि हत्थछेयणाणि य कण्णछेयणाणि य नासाछेयणाणि य एवं-हिययउप्पायणाणि य वसणुप्पायणाणि उल्लंघणाणि य पाविहिइ पुणो अणा-इयं च णं अणवदगं दीहमद्धं चाउरंतं संसारकंतारं] वीद्वस्सइ-जहा व ते पुरिसा तत्थ णं अप्पेगइ-या पुरिसा घणस्स एयमट्ठं नो सद्दहंति नो पत्तियंति नो रोयंति घणस्स एयमट्ठं असद्दहमाणा अपत्तियमाणा अरोयमाणा जेणेव ते नंदिफला तेणेव उवागच्छंति उवागच्छित्ता तेसिं नंदिफलाणं मूलाणि य जाव आहारंति छायासु वीसमंति तेसिं णं आहावए भइए भवइ तओ पच्छा परिणम-माणा-परिणममाणा [अकाले चेव जीवियाओ] ववरोवेति एवामेवं समणाउसो जो अहं निग्गंथो वा निग्गंथी वा आयरिय-उवज्जायाणं अंतिए मुंडे भवित्ता अगाराओ अणगारियं पव्वइए समाणे पंचसु कामगुणेषु सज्जइ [रज्जइ गिञ्जइ मुञ्जइ अज्जोववज्जइ सेणं इहभवे जाव अणादियं च णं अणवयगं दीहमद्धं संसारकंतारं भुज्जो-भुज्जो] अनुपरियट्ठिस्सइ-जहा व ते पुरिसा तए णं से घणे सत्यवाहे सगडी-सागडं जोयावेइ जोयावेत्ता जेणेव अहिच्छत्ता नयरी तेणेव उवागच्छइ उवाग-च्छित्ता अहिच्छत्ताए नयरीए दहिया अगुज्जाणे सत्यनिवेसं करेइ करेत्ता सगडी-सागडं पेयावेइ

तए णं से धणे सत्यवाहे महत्थं महत्थं महरिहं पायारिहं पाहुडं गेण्हइ गेण्हिता बहुपुरिसेहिं सद्धिं संपरिवुडे अहिच्छतं नयरीं मज्झमज्जेणं अनुप्पविसइ अनुप्पविसिता जेणेव कणगकेऊ राया तेणेव उवागच्छइ उवागच्छिता करयल जाव वद्धावेइ वद्धावेत्ता तं महत्थं महत्थं महरिहं रायारिहं पाहुडं उवणेइ तए णं से कणगकेऊ राया हट्टतुट्टे घणस्स सत्यवाहस्स तं महत्थं महत्थं महरिहं रायारिहं पाहुडं पडिच्छइ पडिच्छिता धणं सत्यवाहं सक्कारेइ सम्माणेइ सक्कारेत्ता सम्माणेत्ता उस्सुककं वियरइ वियरिता पडिविसज्जेइ भंडविणिमयं करेइ करेत्ता पडिमंडं गेण्हइ गेण्हिता सुहंसुहेणं जेणेव चंपा नयरी तेणेव उवागच्छइ उवागच्छिता मित्त-नाइ-नियण-सयण-संबंधि-परियणेणं सद्धिं। अभिसमण्णागए विपुलाइं माणुस्सगाइं भोग भोगाइं पच्चणुभवमाणे विहाइ तेणं कालेणं तेणं समएणं थेरागमणं धणे सत्यवाहे धम्मं सौच्चा जेडुपुतं कुडुंबे ठावेत्ता पव्वइए सामाइ-यमाइयाइं एककारस अंगाइं अहिञ्जिता वट्ठूणि वासाणि सामण्णपरियाणं पाउणिता मासियाए संलेहणाए अताणं झूरेत्ता अण्णयरेसु देवलोएसु देवताए उववण्णे महाविदेहे वासे सिञ्जिहिइ [बुञ्जिहिइ मुट्ठिहिइ परिनिव्वाहिइ सव्वदुक्खाण] मंतं करेहिइ एवं खलु जंबू समणेणं भगवया महावीरेणं जाव संपतेणं पत्ररसमस्स नायज्झयणस्स अयमट्ठे पत्रत्ते त्ति वेमि 1999-105

● पढमे सुयक्ष्मधे पन्नरसमं अज्जयणं समत्तं ●

सोलसमं अज्जयणं—अवरकंका

(१५८) जइ णं भंते समणेणं भगवया महावीरेणं जाव संपतेणं पत्ररसमस्स नायज्झयणस्स अयमट्ठे पत्रत्ते सोलसमस्स णं भंते नायज्झयणस्स के अट्ठे पत्रत्ते एवं खलु जंबू तेणं कालेणं तेणं समएणं चंपा नामं नयरी होत्था तीसे णं चंपाए नयरीए बहिया उत्तरपुरत्थिमे दिसीभाए सुभूमि-भागहे नामं उज्जाणे होत्था तत्थ णं चंपाए नयरीए तओ माहणा भायरो परिवसंति तं जहा-सोमे सोमदत्ते सोमभूर्इ-अड्ढा जाव अपरिभूया रिउव्वेय-जउव्वेय-सामवेय-अधव्वणवेय जाव बंधण-एसु य तत्थेसु सुपरिनिट्ठिया तेसि णं माहणाणं तओ भारियाओ होत्था तं जहा-नागसिरी भूयसिरी जक्खसिरी-सुकुमालपाणियावाओ जाव तेसि णं माहणाणं इट्ठाओ तेहिं माहणेहिं सद्धिं विउले माणुस्सए कामभोए पच्चणुभवमाणीओ विहरंति तए णं तेसि माहणाणं अण्णया कयाइ एगयओ समुवागयाणं जाव इमेवास्सवे मिहोक्खा-समुल्लावे समुप्पज्जित्या-एवं खलु देवाणुप्पिया अहं इमे विउले धण- जाव सावएज्जे अलाहि जाव आसत्तमाओ कुलवंसाओ पकामं दाउं पकामं भोत्तुं पकामं परिभाएउं तं सेयं खलु अहं देवाणुप्पिया अण्णमण्णस्स गिहेसु कल्लाकल्लिं विपुलं असण-जाव-साइमं उवक्खडेउं परिभुंजेमाण्णं विहरित्तए अण्णमण्णस्स एयमट्ठं पडिसुणेति कल्लाकल्लिं अण्णमाण्णं विहरित्तए अण्णमण्णस्स एयमट्ठं पडिसुणेति कल्लाकल्लिं अण्णमण्णस्स गिहेसु विपुलं असण-पाण-खाइम-साइमं उवक्खडावेति परिभुंजेमाणा विहरति

तए णं तीसे नागसिरीए माहणीए अण्णया कयाइ भोयणवारए जाए यावि होत्था तए णं सा नागसिरी विपुलं असण-पाण-खाइम-साइमं उवक्खडेइ एगं महं सालइवं तित्तालाउवं बहुसंभारसंजुत्तं नेहावगाढं उवक्खडेइ एगं विदुयंकरयलंसि आपइ तं खारं कडुयं अखज्जं विसमूयं जाणित्ता एवं वयासी- धिरत्थु णं मम नागसिरीए अधज्जाए अपुज्जाए दूभगाए दूभगसत्ताए दूभगनिवो-लियाए जाए णं मए सालइए तित्तालाउए बहुसंभारसंभिए नेहावगाढे उवक्खडिए सुबहुदव्वक्खए नेहक्खए य कए तं जइ णं ममं जाउयाओ जाणिसंति तो णं ममं खिसिसंति तं जाव ममं जाउ-

याओ न जाणंति ताव मम सेयं एयं सालइयं तित्तालाउयं बहुसंभारसंभियं नेहावगाढं एगंते गोवि-
त्तए अन्नं सालाइयं महुरालाउयं [बहुसंभारसंभियं] नेहावगाढं एगंते नगोवित्तए अण्णं सालहेइ
संपेहेत्ता तं सालइयं जाव गोवेइ गोवेत्ता अण्णं सालइयं महुरालाउयं बहुसंभारसंभियं नेहावगाढं
उवक्खडेइ उवक्खडेत्ता तेसिं माहणाणं प्हायाणं [भोयणमंडवंसि] सुहासणवरगयाणं तं विपुलं
असण-पाण-खाइम-साइम-परिवेसेइ तए णं ते माहणा जिमियभुत्तुरागया समाणा आयंता
चोक्खा परमसुइभूया सकम्भसंपउत्ता जाया यावि होत्था तए णं ताओ माहणीओ प्हायाओ जाव
विभूसियाओ तं विपुलं असण-पाण खाइम-साइम आहारंति जेणेव सयाइं गिहाइं तेणेव उवा-
गच्छंति उवागच्छित्ता सकम्भसंपउत्ताओ जायाओ 199२1-106

(१५९) तेणं कालेणं तेणं समएणं धम्मघोसा नामं थेरा जाव बहुपरिवारा जेणेव चंपा नयरी
जेणेव सुभूमिभागे उज्जाणे तेणेव उवागच्छंति उवागच्छित्ता अहापडिसूवं [ओग्गहं ओगिण्हित्ता
संजमेणं तवसा अम्पाणं भावेमाणं विहरंति परिसा निग्गया धम्मो क्हिओ परिसा पडिगया तए णं
तेसिं धम्मघोसाणं थेराणं अंतेवासी धम्मरूई नामं अणगारे ओराले [घोरे घोरगुणे घोरतवस्सी घोर-
वंभयेरवासी उच्चूढसरीरे संखित्त-विउल] तेचलेस्से मासंमासेणं खममाणे विहरइ तए णं से धम्म-
रूई अणगारे मासखमणपारणगंसि पढमाए पोरिसीए सज्जायं करेइ बीयाइ पोरिसीए झाणं झियाइ
एवं जहा गोयमसामी तहेव भायणाइं ओगाहेइ तहेव धम्मघोसं थेरं आपुच्छइ जाव चंपाए नयरीए
उच्च-नीअमज्झिमाइं कुलाइं घरसमुदाणस्स भिक्खावरियाए अडभाणे जेणेव नागसिरी माहणीए
गिहे तेणेव अनुपविडे तए णं सा नागसिरी माहणी धम्मरूई एज्जमाणं पासइ पसित्ता तस्स सालइ-
यस्स तित्तालाउयस्स बहुसंभारसंभियस्स नेहावगाढस्स एडणइयाए हट्टुट्टा उट्टाए उट्टेइ उट्टेत्ता
जेणेव भत्तथेरे तेणेव उवागच्छइ उवागच्छित्ता तं सालाइयं तिरालाउयं बहुसंभार- संभियं नेहाव-
गाढा धम्मरूइस्स अणगारस्स पडिग्गहंसि सच्चमेव निसिरइ तए णं से धम्मरूई अणगारे अहापज्ज-
त्तमित्ति कट्टु नागसिरीए माहणीए गिहाओ पडिनिक्खमइ पडिनिक्खमित्ता चंपाए नयरीए मज्झं-
मज्झेणं पडिनिक्खमइ पडिनिक्खमित्ता जेणेव सुभूमिभागे उज्जाणे जेणेव धम्मघोसा थेरा तेणेव
उवागच्छइ धम्मघोसस्स अदूरसामंते अत्रपाणं पडिलेहेइ पडिलेहेत्ता अन्नपाणं करयलंसि पडिदंसेइ

तए णं धम्मघोसा थेरा तस्स सालइयस्स तित्तालाउयस्स बहुसंभारस्सभियस्स नेहाव-
गाढस्स गंधेणं अभिभूया समाणा तओ सालइयाओ तित्तालाउयाओ बहुसंभारसंभियाओ नेहाव-
गाढाओ एगं बिंदुयं गहाय करयलंसि आसादंति तित्तगं खारं कडुयं अखजं अभोजं विसभूयं
जाणित्ता धम्मरूई अणगारं एवं वयासी-जइ णं तुमं देवाणुप्पिया एयं सालइयं [तित्तालाउयं
बहुसंभारसंभियं] नेहावगाढं आहारेसि तो णं तुमं अकाले चेव जीवियाओ ववरोविज्जसि तं मा णं
तुमं देवाणुप्पिया इमं सालइयं [तित्तालाउयं बहुसंभारसंभियं नेहावगाढं] आहारेसि मा णं तुमं
अकाले चेव जीवियाओ ववरोविज्जसि तं गच्छह णं तुमं देवाणुप्पिया इमं सालइयं तित्तालाउयं
बहुसंभारसंभियं नेहावगाढं एगंतमणावाए अचित्ते थंडिले परिट्टवेहि अण्णं फासुयं एसणिज्जं
असण-पाण-खाइम-साइमं पडिगाहेत्ता आहारं आहारेहि तए णं से धम्मरूई अणगारे धम्मघोसेणं
थेराणं एवं वुत्ते समाणे धम्मघोसस्स थेरस्स अंतियाओ पडिनिक्खमइ पडिनिक्खमित्ता सुभूमि-
भागाओ उज्जाणाओ अदूरसामंते थंडिलं पडिलेहेइ पडिलेहेत्ता तओ सालइयाओ तित्तालाउयाओ
बहुसंभारसंभियाओ नेहावगाढाओ एगं बिंदुयं गहाय थंडिलंसि निसिरइ तए णं तस्स सालइयस्स

[तित्तालउयस्स बहुसंभारसंभियस्स] नेहावगाढस्स गंधेणं चरूणि पिपीलिगासहस्साणि पाउब्भूयाणि जा जहा व णं पिपीलिगा आहारेइ सा तथा अकाले चय जीवियाओ ववरोविज्जइ तए णं तस्स धम्मरुइस्स अणगारस्स इमेयारूवे अज्जत्थिए चित्तिए पत्थिए मणोगए संकप्पे समुप्पज्जित्था-जइ ताव इमस्स सालइयस्स जाव एगंमि विंदुगंमि पक्खित्तंमि अणेगाइ पिपीलिगासहस्साइ ववरोविज्जंति तं जइ णं अहं एयं सालइयं तित्तालउयं बहुसंभारसंभियं नेहावगाढं थंडिलंसि सव्वं निसिरामि ती णं वरूणं पाणाणं भूयाणं जीवाणं सत्ताणं वहकरणं भविस्सइ तं सेयं खलु ममेयं सालइयं जाव नेहावगाढं सयमेव आहारित्तए ममं चेव एएणं सरौरएणं निज्जाउ त्ति कट्टु एवं संपेहेइ संपेहेत्ता मुहपोत्तियं पडिलेहेइ सत्तीसोवरियं कायं पमज्जेइ तं सालइयं तित्तालाउयं बहुसंभारसंभियं नेहावगाढं विलमिव पन्नगभूएणं अप्पाणेणं सव्वं सरौरकोडुगंसि पक्खिवइ तए णं तस्स धम्मरुइस्स तं सालइयं जाव नेहावगाढं आहारिवस्स समाणस्स मुहुत्तंत्तरेणं परिणममाणंसि सरौरगंसि वेयणा पाउब्भूया-उज्जला [विउला क्वडा पगाढा चंडा दुक्खा दुरहिवासा

तए णं से धम्मरूइ अणगारे अयामे अबले अवीरिए अपुरिसक्कारपरक्कमे अचारणिज्जमिति कट्टु आचारभंडगं एगंते टवेइ थंडिलं पडिलेहेइ दब्भसंधारगं संधरेइ दब्भसंधारगं दुरूहइ पुरत्थाभिमुहे संपत्तियंक्रनिसण्णे करयलपरिग्गहियं सिरसावत्तं मत्थए अंजलिं कट्टु एवं वयासी-नमोत्थु णं अरहंताणं जाव सिद्धिगइनामधेज्जं ठाणं संपत्ताणं नमोत्थु णं धम्मघोसाणं थेराणं मम धम्माचरियाणं धम्मोवएसगाणं पुट्ठिं पि णं मए धम्मघोसाणं थेराणं अंतिए सव्वे पाणाइवाए पच्चक्खाए जावजीवाए जाव बहिद्धादाणे पच्चक्खाए जावजीवाए इयाणि पि णं अहं तेसिं चेव भगवंताणं अंतियं सव्वं पाणाइवायं पच्चक्खामि जाव बहिद्धादाणं पच्चक्खामि जावजीवाए जहा चंदओ जाव चरिमेहिं उस्सासेहिं बोसिरामि त्ति कट्टु आलोइय-पडिक्कंते समाहिपत्ते कालगए तए णं ते धम्मघोसा थेरा धम्मरूइ अणगारं चित्तयं जाणित्ता समणे निग्गंथे सद्दावेति सद्दावेत्ता एवं वयासी-एवं खलु देवाणुप्पिया धम्मरूइ अणगारे मासक्खमणापारणगंसि सालइयस्स जाव नेहावगाढस्स निसिरणद्वयाए बहिया निग्गए विरावेइ तं गच्छइ णं तुब्भे देवाणुप्पिया धम्मरूइस्स अणगारस्स सव्वओ समंता मग्गण-गवेसणं करेह तए णं ते समणा निग्गंथा [धम्मघोसाणं थेराणं जाव तहत्ति आणाए विणएणं वयणं] पडिसुणेति पडिसुणेत्ता धम्मघोसाणं थेराणं अंतियाओ पडिनिक्खमंति पडिनिक्खमिता धम्मरूइस्स अणगारस्स सव्वओ समंता मग्गण-गवेसणं करेमाणा जेणेव थंडिले तेणेव उवागच्छंति उवागच्छित्ता धम्मरूइस्स अणगारस्स सरौरं निष्वाणं निच्छेदुं जीवविषयज्जं पासंति पासित्ता हा हा अहो अकज्जमिति कट्टु धम्मरूइस्स अणगारस्स परिनिष्वाणवत्तियं काउस्साणं करंति धम्मरूइयस्स आचारभंडगं गेण्हंति गेण्हित्ता जेणेव धम्मघोसा थेरा तेणेव उवागच्छंति उवागच्छित्ता मग्गणामणं पडिक्कमंति पडिक्कमिता एवं वयासी-एवं खलु अहं तुब्भं अंतियाओ पडिनिक्खमामो सुभूमिमागस्स उज्जाणस्स परिपेरंतेणं धम्मरूइस्स अणगारस्स सव्वओ [समंता मग्गणगवेसणं] करेमाणा जेणेव थंडिले तेणेव उवागच्छामो जाव इहं हव्वमागया तं कालगए णं भंते धम्मरूइ अणगारे इमे से आचारभंडग

तए णं ते धम्मघोसा थेरा पुव्वगए उवओगं गच्छंति समणे निग्गंथे निग्गंथीओ य सद्दावेति सद्दावेत्ता एवं वयासी-एवं खलु अज्जो मम अंतेवासी धम्मरूइ नामं अणगारे पगइभइए [पगइउ-वसंते पगइपयणुकोहमाणमाशालोभे मिउमद्व-संपन्ने अज्जिणे भइए] विणीए मासंमासेणं अनि-

खिञ्चतेणं तवोकम्पेणं अप्पाणं मावेमाणे जाव नागसिरीए माहणीए गिहं अनुपविट्ठे तए णं सा नागसिरी माहणी जाव तं निसिरइ तए णं से धम्मरूई अणगारे अहापज्जत्तमिति कट्टु नागसिरीए माहणीए गीहाओ पडिनिक्खमइ जाव समाहिपत्ते कालगए से णं धम्मरूई अणगारे बहुण्णे वासाणि सामण्णपरियागं पाउणिता आलोइयपडिक्कंते समाहिपत्ते कालमासे कालं किच्चा उड्डं जाव सव्वट्ठसिद्धे महायिमाणे देवत्ताए उववण्णे तत्थ णं अजहन्नमणुक्कोसेणं तेतीसं सागरोवमाइं टिईं पत्रत्ता तत्थ णं धम्मरूईयस्स वि देवस्स तेतीसं सागरोवमाइं टिईं पत्रत्ता से णं धम्मरूईं देवे ताओ देवलोगाओ [आउक्खएणं टिइक्खएणं भवक्खएणं अणंतरं चयं चइत्ता] महाविदेहे वासे सिज्झिहिइ १९९१-१०७

(१६०) तं धिरत्थु णं अज्जो नागसिरीए माहणीए अधत्राए अपुण्णाए [दूभगाए दूभगसत्ताए दूभग] निबोलियाए जाए णं तहारूवे साहू साहुरूवे धम्मरूई अणगारे मासक्खमणपारणगंसि सालइएणं [तित्तालउएणं बहुसंभारसंभिएणं] नेहावगाढणं अकाले चेव जीवियाओ ववरोविए तए णं ते समणा निग्गंथा धम्मघोसाणं घेराणं अंतिए एयमइं सोच्चा निसम्म चंपाए सिंघाडग- तिय- [घउक्क-चच्चर-चउम्पुह-महापहपहेसु] बहुजणास्स एवमाइक्खंति एवं भासंति एवं पत्रवेति एवं परूवेति-धिरत्थु णं देवाणुप्पिया नागसिरीए जाव दूभगनिबोलियाए जाए णं तहारूवे साहू साहुरूवे धम्मरूई अणगारे सालइएणं जाव नेहावगाढेणं अकाले चेव जीवियाओ ववरोविए तए णं तेसिं समणाणं अंतिए एयमइं सोच्चा निसम्म बहुजणो अण्णमण्णस्स एवमाइक्खइ एवं भासइ एवं पत्रवेइ एवं परूवेइ-धिरत्थु णं नागसिरीए माहणीए जाव जीवियाओ ववरोविए तए णं ते माहणा चंपाए नयरीए बहुजणास्स अंतिए एयमइं सोच्चा निसम्म आसुरुत्ता [रुद्धा कुविया वंडिकिकया] मिसिमिसेमाणा जेणेव नागसिरी माहणी तेणेव उवागच्छंति उवगच्छिता नागसिरीं माहणिं एवं वयासी-हंभो नागसिरी अपत्थियपत्थिए दुरंतपंतलक्खणे हीणपुत्रचाउहसे सिरी-हिरि-धिइ-कित्ति-परिवज्जिए धिरत्थु णं तव अधत्राए अपुत्राए दूभगाए दूभगसत्ताए दूभगनिबोलियाए जाए णं तुमे तहारूवे साहू साहुरूवे धम्मरूई अणगारे मासक्खमणपारणगंसि सालइएणं तित्तालउएणं जाव जीवियाओ ववरोविए उच्चावयाहिं अक्कोसणाहिं अक्कोसंति उच्चावयाहिं उच्छंसणाहिं उच्छंसंति उच्चावयाहिं निब्भंच्छणाहिं निब्भंच्छंति उच्चावयाहिं निच्छोडणाहिं निच्छोडंति तज्जेति तालेति तत्रित्ता तालिता सयाओ गिहाओ निच्छुभंति

तए णं सा नागसिरी सयाओ गिहाओ निच्छूद्धा समाणो चंपाए नयरीए सिंघाडग- तिय- घउक्क-चच्चर-चउम्पुह-महापहपहेसु बहुजणेणं हीलिज्जमाणी खिसिज्जमाणी निदिज्जमाणी गरहि-ज्जमाणी तज्जिज्जमाणी पव्वहिज्जमाणी थिक्कारिज्जमाणी थुक्कारिज्जमाणी कत्थइ ठाणं वा निलयं वा अलभामाणी दंडीखंड-निवसणा खंडमल्लय-खंडघडग-हत्थगया फुट्ट- हडाहड- सीसामच्छिया- चडगरेणं अत्रिज्जमाणमग्गा गेहंगेहेणं देहंबलियाए वित्तिं कप्पेमाणी विहरइ तए णं तीसे नागसिरीए माहणीए तद्धमवंसि चेव सोलस रोगायंका पाउड्ढूया तं जहा- सासे कासे [जरे दाहे जोणिसूले भगंदरे अरिसा अजीरए दिट्ठी-मुद्धसूले अकारए अच्छिवेयणा कण्णवेयणा कंडू दउदो] कोढे तए णं सा नागसिरी माहणी सोलसेहिं रोगायंकेहिं अभिभूया समाणी अट्ट-दुहट्ट-वसट्टा कालमासे कालं किच्चा छट्टाए पुढवीए उक्कोसं बावीससागरोवमड्डिइएसु नराएसु नेरइयत्ताए उववण्णा सा णं तओ अणंतरं उव्वट्ठित्ता मच्छेसु उववण्णा तत्थ णं सत्थवज्झा दाहवक्कंतीए कालमासे कालं किच्चा

अहेसत्तमाए पुढवीए उक्कोसं तेत्तीसं सागरोवमद्धिइएसु नेरइएसु नेरइयत्ताए उववण्णा सा णं तओणंतइं उव्वट्ठिता दोच्चंपि मच्छेसु उववज्जइ तत्थ वि य णं सत्थवज्जा दाहवक्कंतीए कालमासे कालं किच्चा दोच्चंपि अहेसत्तमाए पुढवीए उक्कोसं तेत्तीससागरोवमद्धिइएसु नेरइएसु नेरइयत्ताए उववज्जइ सा णं तओहितो उववट्ठिता तच्चंपि मच्छेसु उववण्णा तत्थ वि य णं सत्थवज्जा दाहवक्कंतीए कालमासे कालं किच्चा दोच्चंपि छट्ठाए पुढवीए उक्कोसं बावीससागरोवमद्धिइएसु नेरइएसु नेरइयत्ताए उववण्णा तओणंतरं उव्वट्ठिता उरगेसु एवं जहा गोसाले तहा नेयव्वं जाव रयणप्पभाओ पुढवीओ उव्वट्ठिता सण्णीसु उववण्णा तओ उव्वट्ठिता असण्णीसु उववण्णा तत्थ वि य णं सत्थवज्जा दाहवक्कंतीए कालमासे कालं किच्चा दोच्चं पि रयणप्पभाए पुढवीए पलिओ-वमस्स अरंखेज्जइभागद्धिइएसु नेरइएसु नेरइयत्ताए उववण्णा तओ उव्वट्ठिता जाइ इमाइं खहयर-विहाणाइं जाव अदुत्तरं च खरबायरपुढविकाइयत्ताए तेसुं अणेगसयसहस्सखुतो । ११४।-108

(१६१) सा णं तओणंतरं उव्वट्ठिता इहेव जंबुद्वीवे भारहे वासे चंपाए नयरीए सागरदत्तस्स सत्थवाहस्स भद्दाए भारियाए कुच्छिसि दारियत्ताए पच्चायाया तए णं सा भद्दा सत्थवाही नवण्हं मासाणं चहुपडिपुण्णाणं दारियं पचाया-सुकुमालकोमलियं गयतालुयसमाणं तए णं तीसे णं दारियाए निव्वत्तवारसाहियाए अम्मापियरो इमं एयारूवं गोण्णं गुणिनिष्फण्णं नामधेज्जं करेति-जम्हा णं अन्हा णं अन्हं एसा दारिया सुकुमालकोमलिया गयतालुयसमाणा तं होउ णं अन्हं इमीसे दारियाए नामधेज्जं सुकुमालिया-सुकुमालिया तए णं तीसे दारियाए अम्मापियरो नामधेज्जं करेति सूमालियति तए णं सा सूमालिया दारिया पंचधाईपरिग्गहिया तं जहा-खीरधाईए [मज्जणधाईए मंडावण-धाईए खेत्तावणधाईए अंकथाईए अंकाओ अंकं साहरिज्जमाणी रम्मे मणिकोट्टिमत्तले] गिरकंद-मत्तीणा इव चंपगलया निवाय निव्वाधायंसि सुहंसुहेणं परिवइद्धइ तए णं सा सूमालिया दारिया उम्मुक्कवालभावा [धिण्णय-परिणवमेत्ता जोव्वणगमणुपत्ता] रूवेण य जोव्वणेण य लावण्णेण य उक्किक्का उक्किक्कसरीरा जाया यावि होत्था । ११५।-109

(१६२) तत्थ णं चंपाए नयरीए जिणदत्ते नामं सत्थवाहे-अइढे तस्स णं जिणदत्तस्स भद्दा भारिया-सूनाला इद्धा माणुस्सए कामभोगे पच्चणुत्भवमाणा विहरइ तस्स णं जिणदत्तस्स पुत्ते भद्दाए भारियाए अत्ताए सागरए नामं दारए-सुकुमालपाणिपाए जाव सुरूवे तए णं से जिणदत्ते सत्थवाहे अण्णया कचाइ सयाओ गिहओ पडिनिक्खमइ पडिनिक्खमिता सागरदत्तस्स सत्थवाहस्स अदूर-सांतेणं वीइवयइ इमं च णं सूमालिया दारिया पहाया चेडिया-चक्कवाल-संपरिवुडा उथिं आगा-सतलगंसि कणग-तिंदूसएणं कीलमाणी-कीलमाणी विहरइ तए णं से जिणदत्ते सत्थवाहे सूमालियं दारियं पासइ पासित्ता सूमालियाए दारियाए रूवे य जोव्वणे य लावण्णे य जायविहए कोडुंबिय-पुरिसे सद्दावेइ सद्दावेत्ता एवं वयासी-एस णं देवाणुप्पिया कस्स दारिया किं वा नामधेज्जं से तए णं ते कोडुंबियपुरिसा जिणदत्तेणं सत्थवाहेणं एवं वुत्ता समाणा हट्टुत्ता करयल [परिग्गहियं सिरसावत्तं मत्थए अंजलिं] कट्ठु एवं वयासी-एस णं देवाणुप्पिया सागरदत्तस्स सत्थवाहस्स धूया भद्दाए भारियाए अत्तया सूमालिया नामं दारिया-सुकुमालपाणिपाया जाव रूवेण य जोव्वणेणं य लावण्णेणं य उक्किक्का तए णं जिणदत्ते सत्थवाहे तैसिं कोडुंबियाणं अंतिए एयमट्ठं सोच्चा जेणेव सए गिहे तेणेव उवागच्छइ उवागच्छेत्ता ण्हाए मित-नाइ-परिवुडे चंपाए नयरीए मज्झंमज्जेणं जेणेव सागरदत्तस्स गिहे तेणेव उवागए तए णं से सागरदत्ते सत्थवाहे जिणदत्तं सत्थवाहं एज्जमाणं पासइ पासित्ता

आसणाओ अब्बुद्वेइ अब्बुद्वेत्ता आसणेणं उवनिमंतेइ उवनिपंतेत्ता आसत्थं वीसत्थं सुहासण-
वरगयं एवं वयासी-मण देवाणुप्पिया किमागमणपओयणं

तए णं से जिणदत्ते सागरदत्तं एवं वयासी-एवं खलु अहं देवाणुप्पिया तव धूयं भद्दाए
अत्तियं सूमालियं सागरस्स भारियत्ताए वरेमि जइ णं जाणह देवाणुप्पिया जुत्तं वा पत्तं वा
सलाहणिञ्जं वा सरिसो वा संजोगो ता दिज्जउ णं सूमालिया सागरदारगस्स तए णं देवाणुप्पिया भण
किं दलयामो सुकं सूमालियाए तए णं से सागरदत्ते सत्थवाहे जिणदत्तं सत्थवाहं एवं वयासी-एवं
खलु देवाणुप्पिया सूमालिया दारिया एगा एगजाया इट्ठा [कंता पिया मणुण्णा मणात्ता जाव उंवर-
पुष्कं व दुल्लहा सबणयाए किमंग पुण पासणयाए तं नो खलु अहं इच्छामि सूमालियाए दारियाए
खणमवि विष्पओगं] तं जइ णं देवाणुप्पिया सागरए दारए मम घरजामाउए भवइ तो णं अहं
सागरस्स सूमालियं दलयामि तए णं से जिणदत्ते सत्थवाहे सागरदत्तेणं सत्थवाहेणं एवं वुत्ते समाणे
जेणेव सए गिहे तेणेव उवागच्छइ उवागच्छित्ता सागरं दारगं सद्दावेइ सद्दावेत्ता एवं वयासी-एवं
खलु पुत्ता सागरदत्ते सत्थवाहे ममं एवं वयासी-एवं खलु देवाणुप्पिया सूमालिया दारिया-इट्ठा [कंता
पिया मणुण्णा मणात्ता जाव उंवरपुष्कं व दुल्लहा सबणयाए किमंग पुण पासणयाए तं नो खलु अहं
इच्छामि सूमालियाए दारियाए खणमवि विष्पओगं] तं जइ णं सागरए दारए मम घरजामाउए भवइ
तो णं दलयामि तए से सागरए दारए जिणदत्तेणं सत्थवाहेणं एवं वुत्ते समाणे तुसिणीए तए णं
जिणदत्ते सत्थवाहे अनन्या कयाइ सोहणंसि तिहि-करण-नक्खत्त-मुहुत्तसि विपुलं असण- पाण-
खाइम- साइमं उवक्खडावेइ उवक्खडावेत्ता मित्त-नाइ-[नियग-सयण-संबंधि-परियण] आमंतेइ
जाव सक्कारेत्ता सम्माणेत्ता सागरं दारगं ण्हायं जाव सच्चालंकारविभुसियं करेइ करेत्ता पुरिस-
सहस्सवाहिणीयं सीयं दुरूहावेइ मित्त-नाइ-जाव परिवुडे सच्चिइडीए सयाओ गिहाओ निगच्छइ
निगच्छित्ता चंपं नवरिं मज्झमज्जेणं जेणेव सागरदत्तस्स गिहे तेणेव उवागच्छइ उवागच्छित्ता
सीयाओ पच्चोरुहइ पच्चोरुहिता सागरं दारगं सागरदत्तस्स सत्थवाहस्स उवणेइ तए णं से सागर-
दत्ते सत्थवाहे विपुलं असण-पाण-साइम-खाइमं उवक्खडावेइ उवक्खडावेत्ता जाव सम्माणेत्ता
सागरं दारगं सूमालियाए दारियाए सद्धिं पट्टयं दुरूहावेइ दुरूहावेत्ता सेयापीएहिं कलसेहिं
मज्जावेइ मज्जावेत्ता अग्गिहोम करावेइ करावेत्ता सागरं दारयं सूमालियाए दारियाए पाणिं
गेण्हावेइ 199६-110

(१६३) तए णं सागरए सूमालियाए दारियाए इमं एयारूवं पाणिफासं पडिसंवेदेइं से
जहानामए-असिपत्ते इ वा [करपत्ते इ वा खुरपत्ते इ वा कलंबचीरिमा पत्ते इ वा सरिआगे इ वा
कोतंगे इ वा तोमरगे इ वा भिडिमालगे इ वा सूचिकलावए इ वा विच्छुयडंके इ वा कविकच्छू इ
वा इंगाले इ वा मुम्मुरे इ वा अच्ची इ वा जाले इ वा अलाए इ वा सुद्धागणी इ वा भवे एयारूवे नो
इण्ठे सम्ठे एतो अणिट्ठतराए चेव अकंततराए चेव अप्पियतराए चेव अमणुण्णतराए चेव
अमणामतराए चेव] पाणिफासं सेवंदेइ तए णं से सागरए अकामए अवसवसे मुहुत्तमेत्तं संचिइइ
तए णं सागरदत्ते सत्थवाहे सागरस्स अम्मापियरो मित्त-नाइ-[नियग-सयण-संबंधि-परियणं विपु-
लेणं असण-पाण-खाइम-साइमं पुष्कं-[वत्थ-गंधमल्लालंकारेणं य सक्कारेत्ता] सम्माणेत्ता पडिवि-
सज्जेइ तए णं सागरए सूमालियाए सद्धिं जेणेव वासथरे तेणेव उवागच्छइ उवागच्छित्ता
सूमालियाए दारियाए सद्धिं तल्लिमंसि निवज्जइ तए णं से सागरए दारए सूमालियाए दारियाए इमं

एयारूवं अंगफासं पडिसंवेदेइ से जहानामए-असिपत्ते इ वा जाव एत्तो अमणामतराणं चैव अंगफासं पच्चणुम्भवमाणे विहरइ तए णं से सागरए दारए सूमालियाए दारियाए अंगफासं-असहमाणे अवसवसे मुहुत्तमेत्तं संचिद्धइ तए णं से सागरदारए सूमालियं दारियं सुहपसुत्तं जाणित्ता सूमालियाए दारियाए पासाओ उट्टेइ उट्टेत्ता जेणेव सए सयणिञ्जे तेणेव उवागच्छइ उवागच्छित्ता सयणिञ्जसि निवज्जइ तए णं सा सूमालिया दारिया तओ मुहुत्तंतरस्स पडिबुद्धा समाणी पड्व्वया पइमणुरत्ता पइं पासे अपससमाणी तलिमाओ उट्टेइ उट्टेत्ता जेणेव से सयणिञ्जे तेणेव उवागच्छइ उवागच्छित्ता सागरस्स पासे अनुवज्जइ तए णं से सागरदारए सूमालियाए दारियाए दोच्चपि इमं एयारूवे अंगफासं पडिसंवेदेइ जाव अकामए अवसवसे मुहुत्तमेत्तं संचिद्धइ तए णं से सागरदारए सूमालियं दारियं सुहपसुत्तं जाणित्ता सयणिञ्जाओ उट्टेइ उट्टेत्ता वासधरस्स दारं विहाडेइ विहाडेत्ता मारामुकूके विव काए जामेव दिसिं पाउब्भूए तामेव दिसिं पडिगए १११७-१११८

(१६४) तए णं सा सूमालिया दारिया तओ मुहुत्तंतरस्स पडिबुद्धा पतिव्वया [पइमणुरत्ता पइं पासे] अपासमाणी सयणिञ्जाओ उट्टेइ सागरस्स दारगस्स सब्बओ समंता मग्गण-गवेसणं करेमाणी-करेमाणी वासधरस्स दारं विहाडियं पासइ पासित्ता एवं वयासी-गए णं से सागरए ति कट्ट ओहयमणसंकप्पा [करतल-पल्हत्थमुही अट्टज्जाणोवगया] झियायइ तए णं सा भद्दा सत्थवाही कळं पाउप्पभायाए रयणीए उट्टियमिं सूरे सहस्सरस्सिमिं दिणवरे तेयसा जलंते दासचेडिं सद्दावेइ सद्दावेत्ता एवं वयासी-गच्छह णं तुमं देवाणुप्पिए बहूवरस्स मुहधोवणियं उवणेहिं तए णं सा दासचेडी भद्दाए सत्थवाहीए एवं बुत्ता समाणी एयमट्ठं तहत्ति पडिसुणेइ पडिसुणेत्ता मुहधोवणियं गेण्हइ गेण्हित्ता जेणेव वासधरे तेणेव उवागच्छइ उवागच्छित्ता सूमालियं दारियं जाव झियायमाणिं पासइ पासित्ता एवं वयासी-किण्णं तुमं देवाणुप्पिए ओहयमणसंकप्पा [करतलपल्हत्थमुही अट्टज्जाणोवगया] झियाहि तए णं सा सूमालिया दारिया तं दास चेडिं एवं वयासी-एव खलु देवाणुप्पिए सागरए दारए ममं सुहपसुत्तं जाणित्ता मम पासाओ उट्टेइ उट्टेत्ता वासधरदुवारं अवंगुणेइ [अवंगुणेत्ता मारामुकूके विव काए जामेव दिसिं] पाउब्भूए तामेव दिसिं पडिगए तए णं तओ मुहुत्तंतरस्स पडिबुद्धा [पतिव्वया पइमणुरत्ता पइं पासे] अपासमाणी सयणिञ्जाओ उट्टेमि सागरस्स दारगस्स सब्बओ समंता मग्गण-गवेसणं करेमाणी-करेमाणी वासधरस्स दारं विहाडियं पासामि पासित्ता गए णं से सागरए ति कट्ट ओहयमणसंकप्पा जाव झियायामि तए णं सा दासचेडी सूमालियाए दारियाए एयमट्ठं सोच्चा जेणेव सागरदत्ते सत्थवाहे तेणेव उवागच्छइ उवागच्छित्ता सागरदत्तस्स एयमट्ठं निवेदेइ

तए णं से सागरदत्ते दासचेडीए अंतिए एयमट्ठं सोच्चा निसम्मं आसुरुत्ते रुट्टे कुविए चंडिकिए मिसिमिसेमाणे जेणेव जिणदत्तस्स सत्थवाहस्स गिहे तेणेव उवागच्छइ उवागच्छित्ता जिणदत्तं सत्थवाहं एवं वयासी-किण्णं देवाणुप्पिया एयं जुत्तं वा पत्तं वा कुलाणुरूवं वा कुलसरिसं वा जण्णं सागरए दारए सूमालियं दारियं अदिद्धोसवडियं पड्व्वयं विप्पजहाय इहमागए बहूहिं खिज्जणियाहि य रूंटणियाहि य उवालभइ तए णं जिणदत्ते सागरदत्तस्स सत्थवाहस्स एयमट्ठं सोच्चा जेणेव सागरए तेणेव उवागच्छइ उवागच्छित्ता सागरयं दारुयं एवं वयासी-दुद्धु णं पुत्ता तुमे कयं सागरदत्तस्स गिहाओ इहं हब्बमाच्छतेणं तं गच्छह णं तुमं पुत्ता एवमवि गए सागरदत्तस्स गिहे तए णं से सागरए दारए जिणदत्तं सत्थवाहं एवं वयासी-अवियाइ अहं ताओ गिरिपड्ढं वा

तरुपडणं वा मरुप्यवायं वा जलप्यवेसं वा जलणप्यवेसं वा विसभकूखणं वा सत्योवाडणं वा वेहाणसं वा गिद्धपडुं वा पव्यञ्जं वा विदेसगमणं वा अथ्युवगच्छेज्जा नो खलु अहं सागरदत्तस्स गिहं गच्छेज्जा तए णं से सागरदत्ते सत्यवाहे कुडुंतरियाए सागरस्स एयमडुं निसामेइ निसामेत्ता लज्जिए विलीए विहे जेणदत्तस्स सत्यवाहस्स गिहाओ पडिनिकखमइ पडिनिकखमिता जेणेव सए गिहे तेणेव उवागच्छइ उवागच्छिता सुकुमालियं दारियं सदावेइ सदावेत्ता अंके निवेसइ निवेसेत्ता एवं वयासी-किण्णं तव पुत्ता सागरएणं दारएणं अहं णं तुमं तस्स दाहामि जस्स णं तुमं इड्ढा [कंता पिया मणुण्णा मणामा भविस्ससि त्ति सूमालियं दारियं ताहि इड्ढाहिं कंताहिं पियाहिं मणुण्णाहिं मणामाहिं वगूहिं समासासेइ समासासेत्ता पडिविसज्जेइ

तए ण से सागरदत्ते सत्यवाहे अण्णया उयिं आगासतलगंसि सुहनिसण्णे रायमगं ओलोएमाणे-ओलोएमाणे विड्ढइ तए णं से सागरदत्ते एगं महं दमगपुरिसं पासइ-दंडिखंड-निधसणं खंडमल्लगंखंडधडग-हत्यगयं फुट्ट-हडाहड-सीसं मच्छियासहस्सेहिं अत्रिज्जमाणमगं तए णं से सागरदत्ते सत्यवाहे कोडुंबियपुरिसे सदावेइ सदावेत्ता एवं वयासी-तुय्मे णं देवाणुप्पिया एयं दमग-पुरिसं विपुत्तेणं असण-पाण-खाइम-साइमेणं पलोमेह गिहं अनुप्यवेसेह अनुप्यवेसेत्ता खंडमल्लगं खंडधडगं च से एगंते एडेह एडेत्ता अलंकारियकम्मं करेह ण्हायं कयवलिकम्मं [कय- कोउव-मंगल-पायच्छित्तं] सव्वालंकारविभूसियं करेह करेत्ता मणुण्णं असण-पाण-खाइम-साइमं भोयावेह मम अंतियं उवणेह तए णं ते कोडुंबियपुरिस्ता जाव पडिसुणेति पडिसुणेत्ता जेणेव से दमगपुरिसे तेणेव उवागच्छंति उवागच्छिता तं दमगं असण-पाण-खाइम-साइमेणं उवपलोभेति उवपलोभेत्ता सयं गिहं अनुप्यवेसेति अनुप्यवेसेत्ता तं खंडमल्लगं खंडधडगं च तस्स दमगपुरिस्स एगंते एडेति तए णं से दमगे तंसि खंडमल्लगंसि खंडधडगंसि य एडिज्जमाणंसि महया-महया सहेणं आरसइ तए णं से सागरदत्ते सत्यवाहे तस्स दमगपुरिसस्स तं महया-महया आरसिय-सदं सोच्चा निसम्मं कोडुंबिय-पुरिसे एवं वयासी-किञ्चं देवाणुप्पिया एस दमगपुरिसे महया-महया सहेणं आरसइ तए णं ते कोडुंबियपुरिस्ता एवं वयंति-एस णं सामी तंसि खंडमल्लगंसि खंडधडगंसि य एडिज्जमाणंसि महया-महया सहेणं आरसइ तए णं से सागरदत्ते सत्यवाहे ते कोडुंबियपुरिसे एवं वयासी-मा णं तुय्मे देवाणुप्पिया एयस्स दमगस्सा तं खंडं [मल्लगं खंडधडगं च एगंते] एडेह पासे से ठवेह जहा अपत्तियं न भवइ ते वि तहेव ठवेति ठवेत्ता तस्स दमगस्स अलंकारियकम्मं करंति करेत्ता सयपागसहस्सपागेहिं तेज्जेहिं अट्ठमंगेति अट्ठमंगिए समाणे सुरभिणा गंधट्टएणं गायं उव्वटंति उव्व-ट्टत्ता उंसिणोदग-गंधोदाएणं ण्हाणंति सीओदगेणं ण्हाणंति पफ्ल-सुकुमालाए गंधकासाईए गायइ नूहेति लुंत्ता हंसलकूखणं पडगसाडगं परिहेति सव्वालंकारविभूसियं करंति विपुलं असण- पाण-खाइम-साइमं भोयावेति भोयावेत्ता सागरदत्तस्स उवणेति

तए णं से सागरदत्ते सत्यवाहे सूमालियं दारियं ण्हायं जाव सव्वालंकारविभूसियं करेत्ता तं दमगपुरियं एवं वयासी-एस णं देवाणुप्पिया मम धूया इड्ढा कंता पिया मणुण्णा मणामा एयं णं अहं तव भारियत्ताए दलयामि भहियाए भहओ भवेज्जासि तए णं से दमगपुरिसे सागरदत्तस्स एयमडुं पडिसुणेइ पडिसुणेत्ता सूमालियाए दारियाए सद्धि वासघरं अनुपविसइ सूमालियाए दारियाए सद्धि तलिमंसि निवज्जइ तए णं से दमगपुरिसे सूमालियाए इमेयारूवं अंगफासं पडिसंवेदेइ से जहा-नामए-असिपत्ते इ वा जाव एत्तो अमणामतरागं चैव अंगफासं पच्चणुत्त्वममाणे विहरइ तए णं

से दमगपुरिसे सूमालियाए दारियाए पासाओ उट्टेइ उट्टेत्ता जेणेव सए सयणिजे तेणेव उवागच्छइ उवागच्छिता सयणिजंसि निवज्जइ तए णं सा सूमालिया दारिया तओ मुहुत्तंतरस्स पडिबुद्धा समाणी पइव्वया पइमणुरत्ता पइं पासे अपासमाणी तलिमाओ उट्टेइ उट्टेत्ता जेणेव से सयणिजे तेणेव उवागच्छइ उवागच्छिता दमगपुरिसस्स पासे नुवज्जइ तए णं से दमगपुरिसे सूमालियाए दारियाए दोहंपि इमं एयारूवं अंगफासं पडिसंवेदेइ जाव [अकामए अवसवसे मुहुत्तमेतं संचिद्धइ तए णं से दमगपुरिसे सूमालियं दारियं सुहपसुत्तं जाणिता] सयणिजाओ अब्भुडेइ अब्भुडेत्ता वासघराओ निग्गच्छइ निग्गच्छिता खंडमल्लं खंडघडं च गहाय मारामुक्के विव काए जामेव दिसिं पाउब्भूए तामेव दिसिं पडिगए तए णं सा सूमालिया [दारिया तओ मुहुत्तंतरस्स पडिबुद्धा पतिव्वया पइमणुरत्ता पइं पासे अपासमाणी सयणिजाओ उट्टेइ दमगपुरिसस्स सब्बओ समंता मग्गण-गवेसणं करे-माणी-करेमाणी वासघरस्स दारं विहाडियं पासइ पासित्ता एवं वयासी]-गए णं से दमगपुरिसे ति कट्ठ ओहयमणसंकप्पा [करतलपल्लत्थमुही अट्टज्जाणोवगया] झियायइ 199 21-112

(१६५) तए णं सा भद्दा कल्लं पाउप्पभावाए रयणीए उट्टियम्मि मूरे सहस्सरस्सिम्मि दिगघरे तेवसा जलंते दासचेडिं सद्दावेइ सद्दावेत्ता एवं [वयासी-गच्छह णं तुमं देवाणुप्पिया बहुधरस्स मुहधोवणियं उवणेहि तए णं सा दासचेडी भद्दाए सत्यवाहीए एवं वुत्ता समाणी एयमट्ठं तहत्ति पडिसुणेइ पडिसुणेत्ता मुहधोवणियं गेण्हइ गेण्हित्ता जेणेव वासघरे तेणेव उवागच्छइ उवागच्छिता सूमालियं दारियं ओहयमणसंकप्पं करतलपल्लत्थमुहिं अट्टज्जाणोवगयं झियायमाणिं पासइ पासित्ता एवं वयासी-किण्णं तुमं देवाणुप्पिए ओहयमणसंकप्पा करतलपल्लत्थमुही अट्टज्जाणोवगया झियाहि तए णं सा सूमालिया दारिया तं दासचेडिं एवं वयासी-एवं खलु देवाणुप्पियाए दमगपुरिसे ममं सुहपसुत्तं जाणिता मम पासाओ उट्टेइ उट्टेत्ता वासघरदुवारं अवंगुणेइ अवंगुणेत्ता मारामुक्के विव काए जामेव दिसिं पाउब्भूए तामेव दिसिं पडिगए तए णं तओ मुहुत्तंतरस्स पडिबुद्धा पतिव्वया पइमणुरत्ता पइं पासे अपासमाणी सयणिजाओ उट्टेइ दमगपुरिसस्स सब्बओ समंता मग्गण-गवेसणं करेमाणी-करेमाणी वासघरस्स दारं विहाडियं पासामि पासित्ता गए णं से दमगपुरिसे ति कट्ठ ओहयमणसंकप्पा करतलपल्लत्थमुही अट्टज्जाणोवगया झियायामि तए णं सा दासचेडी सूमालियाए दारियाए एयमट्ठं सोच्चा जेणेव सागरदत्ते सत्यवाहे तेणेव उवागच्छइ उवागच्छिता] सागरदत्तस्स एयमट्ठं निवेदेइ तए णं से सागरदत्ते तथेव संभंते समाणे जेणेव वासघरे तेणेव उवागच्छइ उवागच्छिता सूमालियं दारियं अंके निवेसेइ निवेसेत्ता एवं वयासी-अहो णं तुमं पुत्ता पुरापौराणाणं [दुच्चिण्णाणं दुप्परक्कंताणं कडाणं पावाणं कम्माणं पावणं फलवित्तिदिसेसं] पच्च-पुब्बयमाणी विहरसि तं मा णं तुमं पुत्ता ओहयमणसंकप्पा जाव झियाहि तुमं णं पुत्ता मम महाण-संसि विपुलं असण-पाण-खाइम-साइमं [उवक्खडावेहि उवक्खडावेत्ता बहूणं समण-माहण-अति-हिकिेवण-वणीमगाणं देयमाणी य द्वावेमाणी य] विहराहि

तए णं सा सूमालिया दारिया एयमट्ठं पडिसुणेइ पडिसुणेत्ता कल्लकल्लि महाणसंसि विपुलं असण-पाण-खाइम-साइमं जाव परिभाएमाणी विहरइ तेणं कालेणं तेणं समएणं गोवालियाओ अज्जाओ बहुसुयाओ [बहुपरिवाराओ पुब्बाणुपुच्चिं चरमाणीओ जेणेव चंपा नयरी तेणेव उवा-गच्छंति उवागच्छिता अहापडिरूवं ओगहं ओगिण्हंति ओगिण्हित्ता संजमेणं तवसा अप्पाणं भावेमाणीओ विहरंति तए णं तासिं गोवालियाणं अज्जाणं एगे संघइए जेणेव गोवालियाओ

अज्जाओ तेणेव उवागच्छइ उवागच्छिता गोवालियाओ अज्जाओ वंदइ नमंसइ वंदिता नमंसिता एवं वयासी-इच्छामो णं तुब्भेहिं अब्भणुण्णाए चंपाए नयरीए उच्चनीयमञ्जिमाई कुलाइ घरसमु-
दाणस्स भिक्खायरियाए अडित्तए अहामुहं देवाणुप्पिया मा पडिबंधं करेहि तए णं ताओ अज्जाओ
गोवालियाहिं अज्जाहिं अब्भणुण्णाया समाणीओ भिक्खायरियं अडमाणीओ सागरदत्तस्स गिहं
अनुप्पविट्ठाओ तए णं सूमालिया ताओ अज्जाओ एज्जमाणीओ पासइ पासिता हट्टुत्ता आसणाओ
अब्भुट्ठेइ वंदइ नमंसइ वंदिता नमंसिता विपुलेणं असण-पाण-खाइम-साइमेणं पडिलाभेइ
पडिलाभेत्ता एवं वयासी-एवं खलु अज्जाओ अहं सागरस्स अणिट्ठा [अकंता अप्पिया अमणुण्णा]
अमणामा नेच्छइ णं सागरए दारए मम नाम [गोयमवि सवणयाए किं पुण दंसणं वा] परिभोगं वा
जस्स-जस्स वि य णं देज्जामि तस्स-तस्स वि य णं अणिट्ठा जाव अमणामा भवामि तुब्भे य णं
अज्जाओ बहुनायाओ [बहुसिक्खियाओ बहुपडियाओ बहूणि गामागर- नगर- खेड- कव्वड-
दोणमुह- मडंब- पट्ठण- आसम- निगम- संवाह-सण्णि-वेसाई आहिंडह बहूणं राईसर जाव सत्य-
वाहपभिईणं गिहाइ अनुपविसह तं अत्थियाइं भे अज्जाओ केइ कहिचि चुण्णजोए वा मंतजोगे वा
कम्मणजोए वा कम्मजोए वा हियउट्ठावणे वा काउट्ठावणे वा आभिओगिए वा वसीकरणे वा
कोउयकम्मे वा भूइकम्मे वा मूले वा कंदे वा छली वल्ली सिलिया वा गुलिया वा ओसहे वा भेसजे वा]
उवलद्धपुव्वे जेणं अहं सागरस्स दारगस्स इट्ठा कंता [पिया मणुण्णा मणामा] भवेज्जामि

तए णं ताओ [अज्जाओ सूमालियाए एवं वुत्ताओ समाणीओ दोवि कण्णे ठएत्ति ठएत्ता
सूमालियं एवं वयासी-अन्हे णं देवाणुप्पिए समणीओ निगंथीओ जाव गुत्तवंमचारिणी नो खलु
कप्पइ अहं एयप्पगारं कण्णेहिं वि निसामित्तए किमंग पुण उवदंसित्तए वा आयरित्तए वा अन्हे णं
तव देवाणुप्पियए विचित्तं केवलपन्नत्तं धम्मं परिकहिज्जामो तए णं सा सूमालिया ताओ अज्जाओ
एवं वयासी-इच्छामि णं अज्जाओ तुब्भं अंतिए केवलपन्नत्तं धम्मं निसामित्तए तए णं ताओ
अज्जाओ सूमालियाए विचित्तं केवलपन्नत्तं धम्मं परिकहेत्ति तए णं सा सूमालिया धम्मं सोट्ठा
निसम्म हट्ठा एवं वयासी-सट्ठहामि णं अज्जाओ निगंथं पावयणं जाव से जहेयं तुब्भे वयह इच्छामि
णं अहं तुब्भं अंतिए पंचाणुव्वइयं सत्तसिक्खावइयं-दुवालसविहं गिहिधम्मं पडिवज्जित्तए अहामुहं
देवाणुप्पिए तए णं सा सूमालिया तासिं अज्जाणं अंतिए पंचाणुव्वइयं जाव गिहिधम्मं पडिवज्जइ
ताओ अज्जाओ वंदइ नमंसइ वंदिता नमंसिता पडिविसज्जेइ तए णं सा सूमालिया समणोवासिया
जाया समणे निगंथे फासुएणं एसणिज्जेणं असण-पाण-साइम-साइमेणं वत्थ- पडिग्गह- कंबल-
पायपुंछणेणं ओसहभेसजेणं पाडिहरिएण य पीढ-फलग-सेज्जा-संधारएणं पडिलाभेमाणी विहरइ
तए णं तीसे सूमालियाए अन्नया कयाइ पुव्वरत्तावरत्तकालसमयंसि कुडुंबजागरियं जागरमाणीए
अयमेयारूवे अज्जत्थिए संकपे समुप्पज्जित्था-एवं खलु अहं सागरस्स पुव्वि इट्ठा जाव मणामा
आसि इयाणि अणिट्ठा जाव अमणामा नेच्छइ णं सागरए मम नामगोयमवि सवणयाए किं पुण
दंसणं वा परिभोगं वा जस्स-जस्स वि य णं देवाज्जामि तस्स-तस्स वि य णं अणिट्ठा जाव अमणामा
भवामि तं सेयं खलु मम गोवालियाणं अज्जाणं अंतिए पव्वइत्तए-

एवं संपेहेइ संपेहेत्ता कल्लं पाउप्पभायाए रयणीए जाव उट्ठियमि सूरे सहस्सरस्सिमि
दिणथरे तेयसा जलंते जेणेव सागरदत्ते तेणेव उवागच्छइ उवागच्छिता जाव] एवं वयासी-एवं खलु
देवाणुप्पिया मए गोवालियाणं अज्जाणं अंतिए धम्मे निसंते से वि य मे धम्मे इच्छिए पडिच्छिए

अभिरुइए तं इच्छामिणं तुव्मेहिं अढ्मणुण्णाया पव्वइत्ताए जाव गोवालियाणं अज्जाणं अंतिए पव्व-
इया तए णं सा सूमालिया अज्जा जाया-इरियासमिया जाव गुत्तबंभयारिणी बहूहिं चउत्थ- छट्टइम-
[दसम दुवात्तसेहिं मासद्धमासखमणेहिं अप्पाणं भावेमाणी] विहरइ तए णं सा सूमालिया अज्ज
अनया कयाइं जेणेव गोवालियाओ अज्जाओ तेणेव उवागच्छइ उवागच्छिता वंदइ नमंसइ वंदित्ता
नमंसित्ता एवं वयासी-इच्छामि णं अज्जाओ तुव्मेहिं अढ्मणुण्णाया समाणी चंपाए नवरीए वाहिं
सुभूमिभागस्स उज्जाणस्स अदूरसामंते छट्टंछट्टेणं अनिक्खित्तेणं तवोकम्पेण सूराभिमुही आया-
वेमाणी विहरित्तए तए णं ताओ गोवालियाओ अज्जाओ सूपालियं अज्जं एवं वयासी-अम्हे णं अज्जो
समणीओ निग्गंथीओ इरियासमियाओ जाव गुत्तबंभयारिणीओ नो खलु अहं कप्पइ बहिया
गामस्स वा जाव सण्णिवेसस्स वा छट्टंछट्टेणं [अनिक्खित्तेणं तवोकम्पेणं सूराभिमुहीणं आया-
वेमाणीणं] विहरित्तए कप्पइ णं अहं अंतो उवस्सयस्स वइपरिक्खित्तस्स संघाडिबद्धियाए णं
समतलपइयाए आयावेत्तए तए णं सा सूमालिया गोवालियाए एयमइं नो सदहइ नो पत्तियइ नो
तेएइ एयमइं असदहमाणी अपत्तियमाणी अरोयमाणी सुभूमिभागस्स उज्जाणस्स अदूरसामंते
छट्टंछट्टेणं [अनिक्खित्तेणं तवोकम्पेणं सूराभिमुही आयावेमाणी] विहरइ १९९१-११३

(१६६) तत्थ णं चंपाए ललिया नाम गोड्डी परिवसइ-नरवइ-दिन्न-पयारा अप्पापिइ. नियण-
निष्पिवासा वेसविहार-कय-निकेया नाणाविह-अविणयप्पहाणा अइडा जाव बहुजणस्स अपरि-
भूया तत्थ णं चंपाए देवदत्ता नामं गणिया होत्था-सुमाला जहा अंड-नाए तए णं तीसे ललियाए
गोड्डीए अण्णया कयाइ पंच गोड्डिज्जगपुरिसा देवदत्ताए गणियाए सद्धि सुभूमिभागस्स उज्जाणस्स
उज्जाणसिंरि पच्चणुत्तभवमाणा विहरंति तत्थ णं एगे गोड्डिज्जगपुरसे देवदत्तं गणियं उच्छंगे धरेइ एगे
पिड्डओ आयवत्तं धरेइ एगे पुक्फूरणं रएइ एगे पाए रएइ एगे चामरूक्खेवं करेइ तए णं सा
सूमालिया अज्जा देवदत्तं गणियं तेहिं पंचहिं गोड्डिज्जगपुरसेहिं सद्धि उरालाई माणुस्सगाई भोगभोगाई
भुंजमाणिं पासइ पासित्ता इमेवारूवे संकम्पे समुप्पज्जित्था-अहो णं इमा इत्थिया पुरापोराणाणं
[सुविष्ण्णाणं सुपरक्कंताणं कडाणं कल्लाणाणं कम्माणं कल्लाणं फलवित्तिविसेसं पच्चणुत्तभवमाणी]
विहरइ तं जइ णं केइ इमस्स सुचरियस्स तव-नियम-बंधेरेवासस्स कल्लाणे फलवित्तिविसेसे
अत्थि तो णं अहमवि आगमिस्सेणं भवगहणेणं इमेवारूवाइं उरालाई [माणुस्सगाई भोगभोगाई
भुंजमाणी] विहरिज्जामि ति कट्टु नियानं करेइ करेत्ता आयावणभूमीओ पच्चोरुहइ १९२०-११४

(१६७) तए णं सा सूमालिया अज्जा सररीरबाउसिया जाया यावि होत्था- अभिक्खणं-
अभिक्खणं हत्थे धोवेइ पाए धोवेइ सीसं धोवेइ मुहं धोवेइ थणंतराई धोवेइ कक्खंतराई धोवेइ
गुज्जंतराई धोवेइ जत्थ णं ठाणं वा सेज्जं वा निसीहियं वा चेएइ तत्थ वि य णं पुव्वामेव उदएणं
अभुक्खेत्ता तओ पच्चा ठाणं वा सेज्जं वा निसीहियं वा चेएइ तए णं ताओ गोवालियाओ अज्जाओ
सूपालियं अज्जं एवं वयासी-एवं खलु अज्जे अम्हे समणीओ निग्गंथीओ इरियासमियाओ जाव
बंधेरेधारिणीओ नो खलु कप्पइ अहं सररीरबाउसियाए होत्ताए तुमं च णं अज्जे सररीरबाउसिया
अभिक्खणं-अभिक्खणं हत्थे धोवेसि [पाए धोवेसि सीसं धोवेसि मुहं धोवेसि थणंतराई धोवेसि
कक्खंतराई धोवेसि गुज्जंतराई धोवेसि जत्थ णं ठाणं वा सेज्जं वा निसीहियं वा चेएसि तत्थ वि य णं
पुव्वामेव उदएणं अभुक्खेत्ता तओ पच्चा ठाणं वा सेज्जं वा निसीहियं वा] चेएसि तं तुमं णं
देवाणुप्पियए एयस्स ठाणस्स आलोएहिं [निदाहि गरिहाहि पडिक्कमाहि विउट्टाहि विसोहेहि

अकरणया अब्भुद्धेहि अहारिहं तवोकम्मं पायच्छित्तं] पडिवज्जाहि तए णं सा सूमालिया गोवालियाणं अज्जाणं एयमद्धं नो आढाइ नो परियाणाइ अणाढायमाणी अपरियाणमाणी विहरइ

तए णं ताओ अज्जाओ सूमालियं अज्जं अभिक्खणं-अभिक्खणं हीलेति [निंदेति विंसेति गरिहंति] परिभवंति अभिक्खणं-अभिक्खणं एयमद्धं निवारंति तए णं तीसे सूमालियाए समणीहिं निगंथीहि हीलिज्जमाणीए जाव निवारिज्जमाणीए इमेयारूवे अज्जत्थिए [चित्तिए पत्थिए मणोगए संकप्पे] समुप्पज्जित्था-जया णं अहं अगारमज्जे वसाभि तया णं अहं अप्पवसा जया णं अहं मुंडा भविता पव्वइया तया णं अहं परवसा पुक्खि च णं ममं समणीओ आढंति परिजाणंति इयाणि नो आढंति नो परिजाणंति तं सेयं खलु मम कल्लं पाउप्पभायाए रयणीए उट्ठियमि सूरु सहस्सरस्सिमि दिणयरे तेवसा जलंते गोवालियाणं अज्जाणं अंतियाओ पडिनिक्खमिता पाडिएक्कं उवस्सयं उवसंपज्जिता णं विहरित्तए ति कट्ठ एवंपेहेइ संपेहेता कल्लं पाउप्पभायाए रयणीए उट्ठिमि सूरु सहस्सरस्सिमि दिणयरे तेवसा जलंते गोवालियाणं अज्जाणं अंतियाओ पडिनिक्खमइ पडिनिक्खमिता पाडिएक्कं उवस्सयं उवसंपज्जिता णं विहरइ तए णं सा सूमालिया अज्जा अणोहट्ठिया अनिवारिया सच्छंदमई अभिक्खणं-अभिक्खणं हत्थे धोवेइ [जाव गुज्जंतराई धोवेइ जत्थ णं ठाणं वा सेज्जं वा निसीहियं वा वेएइ तत्थ वि य णं पुव्वामेव उदएणं अब्भुक्खेत्ता तओ पच्छा ठाणं वा सेज्जं वा निसीहियं वा] वेएइ तत्थ वि य णं पासत्था पासत्थिविहारिणी ओसन्ना ओसन्नविहारिणी कुसीला कुसीलविहारिणी संसत्ता संसत्तविहारिणी बहूणि वासाणि सामण्णपरियाणं पाउणइ पाउणित्ता अट्ठमासियाए संलेहणाए अप्पाणं ज्ञोसेत्ता तीसं भत्ताई अणसणाए छेएत्ता तस्स टाणस्स अणालोइयपडिक्कंता कालमासे कालं किच्चा ईसाणे कप्पे अण्णयरंसि देवगणियत्ताए उववण्णा तत्थेगइयाणं देवीणं नवपलिओवमाई ठिई पत्रत्ता तत्थ णं सूमालियाए देवीए नवपलिओवमाई ठिई पत्रत्ता 19291-115

(१६८) तेणं कालेणं तेणं समएणं इहेव दीवे भारहे वासे पंचालेसु जणवएसु कंपिल्लपुरे नामं नयरे होत्था-वण्णओ तत्थ णं दुवए नामं राया होत्था-वण्णओ तस्स णं चुलणी देवी धट्ठज्जणे कुमारु जुवराया तए णं सा सूमालिया देवी ताओ देवलोगाओ आउक्खएणं [ठिइक्खएणं मवक्खएणं अणंतरं घयं] चइत्ता इहेव जबुदीवे दीवे भारहे वासे पंचालेसु जणवएसु कंपिल्लपुरे नयरे दुवयस्स रण्णो जुलणीए देवीए कुच्छिसि दारियत्ताए पच्चायाया तए णं सा चुलणी देवी नवण्हं मासाणं [बहुपडिपुण्णाणं अट्ठट्ठमाणं य राईदियाणं वीड्कंताणं सुकुमाल-पाणिपायं जाव] दारियं पयाया तए णं तीसे दारियाए निव्वत्तवारसाहियाए इमं एयारूवं नामं-जम्हा णं एसा दारिया दुपयस्स रण्णो चुलणीए देवीए अत्ताया तं होउ णं अहं इमीसे दारियाए नामधेजे दोवई तए णं तीसे अम्मापियरो इयं एयारूवं गोण्णं गुणनिष्फन्न नामधेज्जं करेति-दोवई-दोवई तए णं सा दोवई दारिया पंचधाईपरिग्गहिया जाव गिरिकंदरमल्लीणा इव चंपगलया निवाय-निव्याघायंसि सुहंसुहेणं परिव-इडइ तए णं सा दोवई रायवरकन्ना उम्मुक्कबालभावा [विण्णय-परिणयमेत्ता जोव्वणग-मणुपत्ता रूवेण य जोव्वणेण य लावण्णेण य उक्किट्ठा] उक्किट्ठसरिरी जाया यावि होत्था तए णं तं दोवई रायवरकन्नं अण्णया कयाइ अंतेउरियाओ ण्हायं जाव सब्वालंकारविभूसियं करेति करेत्ता दुवयस्स रण्णो पायवंदियं पेसेति तए णं सा दोवई रायवरकण्णा जेणेव दुवए राया तेणेव उवागच्छइ उवागच्छित्ता दुवयस्स रण्णे पायग्गहणं करेइ तए णं से दुवए राया दोवई दारियं अंके

निवेसेइ निवेसेता दोवईए रायवरकन्नाए रूवे य दोवण्णे य लावण्णे य जावविन्हए दोवई रायवरकन्नं एवं वयासी-जस्स णं अहं तुमं पुत्ता रायस्स वा जुवरावस्स वा पारियत्ताए सयमेव दलइस्सामि तत्थ णं तुमं सुहिया वा दुहिया वा भवेज्जासि ताए णं मप जावज्जीवाए हिययदाहे भविस्सइ तं णं अहं तव पुत्ता अज्जायाए सयंवरवं विवरामि अज्जायाए णं तुमं दिनसयंवरा जं णं तुमं सयमेव रायं वा जुवरायं वा वरेहिसि कसे णं तव भत्तारे भविस्सइ रि कट्टु ताहिं इट्ठाहिं [कत्ताहिं पियाहि मणुष्णाहिं मणामाहिं वग्गूहिं] आसासेइ आसासेता पडिविसज्जेइ ।१२२।-116

(१६९) ताए णं से दुवए राया दूयं सदावेइ सदावेत्ता एवं वयासी-गच्छह णं तुमं देवाणुप्पिया वारवई नयरिं तत्थ णं तुमं कण्हं वासुदेवं समुद्दविजयपामोक्खे दस दसारे वलदेवपामोक्खे पंच महावीरे उग्गसेणपामोक्खे सोलस रायसहस्से पञ्चुत्रपामोक्खाओ अद्धुओ कुमारकौंडीओ संब-पामोक्खाओ सट्ठि दुदंतसाहस्सीओ वीरसेणपामोक्खाओ एककवीरं वीरपुरिससाहस्सीओ महा-सेण पामोक्खाओ छप्पन्नं बलवगसाहस्सीओ अण्णे य बहवे राईसर-तलवर- माडंविच- कोडुंविच- इत्थ-सेट्ठि-सेणावइ-सत्थवाहपभिइओ करयलपरिग्गहियं दसनहं सिरसावत्तं मत्थए अंजलिं कट्टु जएणं विजएणं वद्धावेहि वद्धावेत्ता एवं वचाहि-एवं खलु देवाणुप्पिया कंपिल्लपुरे नयरे दुवयस्स रण्णो धूयाए चूलणीए अत्तायाए धडुज्जुणकुमारस्स भइणीए दोवईए रायवरकणाए सयंवरे भविस्सइ तं णं तुम्हे दुवयं रायं अनुग्गिण्हेमाणा अकालपरिहीणं चेव कंपिल्लपुरे नयरे समोसरह ताए णं दूए करयल [परिग्गहियं दसनहं सिरसावत्तं मत्थए अंजलिं] कट्टु दुवयस्स रण्णो एयमट्ठं पडि-सुणेइ पडिसुणेता जेणेव सए गिहे तेणेव उवागच्छइ उवागच्छिता कोडुंविचपुरिसे सदावेइ सदा-वेत्ता एवं वयासी-खिप्पामेव भो देवाणुप्पिया चाउग्घंटं आसरहं जुत्तामेव उवडुवेह ते वि तहेव उवडुवेति ताए णं से दूए ण्हाए जाव अप्पमहग्गधाभरणालंकिवसरीरे चाउग्घंटं आसरहं दुरूहइ दुरू-हिता वडूहिं पुरिसेहिं-सण्णद्ध-वद्ध-वम्मिच-कवएहिं उप्पीलिय सरसण-पट्टिएहिं पिणद्ध-गेविज्जेहिं आविद्ध-विमल-वरदिंध-पट्टेहिं] गहियाउह- पहरजेहिं-सट्ठि संपरिवुडे कंपिल्लपुरं नयरं मज्झं-मज्झेणं निग्गच्छइ पंचालजणवयस्स मज्झंमज्झेणं जेणेव दैसपत्ते तेणेव उवागच्छइ उवागच्छिता सुरड्डाजणवयस्स मज्झंमज्झेणं जेणेव बारवई नयरी तेणेव उवागच्छइ उवागच्छिता बारवई नयरिं मज्झंमज्झेणं अनुप्पविसइ अनुप्पविसत्ता जेणेव कण्हस्स वासुदेवस्स बाहिरिया उवट्ठाणसाला तेणेव उवागच्छइ उवागच्छिता चाउग्घंटं आसरहं ठावेइ ठावेत्ता र्हाओ पछोरुहइ पछोरुहिता मणुस्सवपुरापरिक्खिते पाचचारविहारेणं जेणेव कण्हे वासुदेवे तेणेव उवागच्छइ उवागच्छिता कण्हं वासुदेवं समुद्दविजयपामोक्खे य दस दसारे जाव छप्पन्नं बहलवगसाहस्सीओ करयल तं चेव जाव समोसरह

ताए णं से कण्हे वासुदेवे तस्स दूयस्स अंतिए एयमडुं सोच्चा निसम्पं हडुत्तुद्ध-[चित्तभाणंदिए पीइमणे परमसोमणस्सिए हरिसवसविसम्पमाण] -हियए तं दूयं सक्कारेइ सम्माणेइ सक्कारेत्ता सम्माणेत्ता पडिविसज्जेइ ताए णं से कण्हे वासुदेवे कोडुंविचपुरिसे सदावेइ सदावेत्ता एवं वयासी-गच्छह णं तुमं देवाणुप्पिया सभाए सुहम्माए सामुदाइयं भेरिं तालेहि ताए णं से कोडुंविचपुरिसे करयल [परिग्गहियं दसनहं सिरसावत्तं मत्थए अंजलिं कट्टु कण्हस्स वासुदेवस्स एयमट्ठं पडिसुणेइ पडिसुणेत्ता जेणेव सभाए सुहम्माए सामुदाइया भेरी तेणेव उवागच्छइ उवागच्छिता सामुदाइयं भेरिं महया-महया सट्ठेणं तालेइ ताए णं ताए सामुदाइयाए भेरीए तालियाए समाणीए

समुद्रविजयपामोकखा दस दसारा जाव महासेणपामोकखाओ छप्पत्र बलवगसाहस्सीओ ण्हाया जाव सच्चालंकारविभूसिया जहाविभ- वड्डिंसक्कारसमुदएणं अप्पेगइया हयगया [एवं गयगया रह-सीया-संदमाणीगया] अप्पेगइया पायविहारचारेणं जेणेव कण्हे वासुदेवे तेणेव उवागच्छंति उवागच्छिता करयल-[परिग्गहियं दसनहं सिरसावत्तं मत्थए अंजलिं कट्टु] कण्हं वासुदेवं जएणं विजएणं वद्धावेति तए णं से कण्हे वासुदेवे कोडुंबियपुरिसे सद्दावेइ सद्दावेत्ता एवं वयासी- खिप्पा- मेव मो देवाणुप्पिया आभिसेक्कं हत्थिरयणं पडिकप्पेह हय-गय-[रह-मवरजोहकलियं चाउरं गिणि सेणं सण्णाहेह सण्णाहेत्ता एयमाणतियं पच्चप्पिणह ते वि तहेव] पच्चप्पिणंति तए णं से कण्हे वासुदेवे जेणेव मज्जणधरे तेणेव उवागच्छइ उवागच्छिता समतजालाकुलाभिरामे [वित्तमणि- रयणकुट्टिमतले रमणिञ्जे ण्हाणमंडवंसि नाणामणि-रयण-भत्ति-वित्तंसि ण्हाणपीढंसि सुहणिसण्णे सुहोदएहिं गंधोदएहिं पुष्पोदएहिं सुद्धोदएहिं पुणो-पुणो कल्लाणग-पवर मज्जणविहीए मज्जिए जाव] अंजणगिरिकूडसत्तिभं गयवइं नरवईं दुरुढे तए णं से कण्हे वासुदेवे समुद्रविजयपामोकखेहिं दसहिं दसारेहिं जाव अणंगसेणापामोकखाहिं अनेगाहिं गणियासाहस्सीहिं सद्धिं संपरिवुडे सच्चिइडीए जाव दुंदुहि-निग्गोसनाइयवेणं बारवईं नयरिं मज्झंमज्जेणं निग्गच्छइ निग्गच्छिता सुरद्धाजण- वयस्स मज्झंमज्जेणं जेणेव देसण्णंते तेणेव उवागच्छइ उवागच्छिता पंचालजणवयस्स मज्झं- मज्जेणं जेणेव कंपिल्लपुरे नयरे तेणेव पहारेत्थ गमणाए 19२३-117

(१७०) तए णं से दुवए राया दोच्चं पि दूयं सद्दावेइ सद्दावेत्ता एवं वयासी गच्छह णं तुमं देवाणुप्पिया हत्थिणाउरं नयरं तत्थ णं तुमं पंडुरायं सपुत्तयं जुहिद्धिलं भीमसेणं अज्जुणं नउलं सहदेवं दुज्जोहणं भाइसय-समगं गंगेयं विदुरं दोणं जयहहं सउणिं कीवं आसत्थामं करयल [परिग्गहियं दसनहं सिरसावत्तं मत्थए अंजलिं कट्टु जएणं विजएणं वद्धावेहिं वद्धावेत्ता एवं वयाहि-एवं खलु देवाणुप्पिया कंपिल्लपुरे नयरे दुवयस्स रण्णो धूयाए चुलणीए अत्तयाए धट्टजुण- कुमारस्स भइणीए दोवईए रायवरकण्णा सयंवेरे भविस्सइ तं णं तुब्भे दुवयं रायं अनुगिण्हेमाणा अकालपरिहीणं चैव कंपिल्लपुरे नयरे] समोसरह तए णं से दूए [जेणेव हत्थिणाउरे नयरे जेणेव पंडु- राया तेणेव उवागच्छइ उवागच्छिता पंडुरायं सपुत्तयं-जुहिद्धिलं भीमसेणं अज्जुणं नउलं सहदेवं दुज्जोहणं भाइसय-समगं गंगेयं विदुरं दोणं जयहहं सउणिं कीवं आसत्थामं एवं वयइ-एवं खलु देवाणुप्पिया कंपिल्लपुरे नयरे दुवयस्स रण्णो धूयाए चुलणीए अत्तयाए धट्टजुणकुमारस्स भइणी दोवईए रायवरकण्णाए कंपिल्लपुरे नयरे समोसरह तए णं से पंडुराया जहा वासुदेवे नवरं -भेरी नत्थि जाव] जेणेव कंपिल्लपुरे नयरे तेणेव पहारेत्थ गमणाए

एएणं कमेणं - तच्चं दूयं [एवं वयासी-गच्छह णं तुमं देवाणुप्पिया चंयं नयरिं तत्थ णं तुमं कण्णं अंगरायं सल्लं नदिरायं एवं वयाहि-कंपिल्लपुरे नयरे समोसरह चउत्तयं दूयं एवं वयासी-गच्छह णं तुमं देवाणुप्पिया सोत्तिमईं नयरिं तत्थ णं तुमं सिमुपालं दमघोससुयं पंचभाइसय-संपरिवुडं एवं वयाहि-कंपिल्लपुरे नयरे समोसरह पंचमं दूयं एवं वयासी-गच्छह णं तुमं देवाणुप्पिया हत्थिसीसं नयरिं तत्थ णं तुमं दमदंतं रायं एवं वयाहि-कंपिल्लपुरे नयरे समोसरह छट्ठं दूयं एवं वयासी-गच्छह णं तुमं देवाणुप्पिया महुरं नयरिं तत्थ णं तुमं धरं रायं एवं वयाहि-कंपिल्लपुरे नयरे समोसरह सत्तमं दूयं एवं वयासी-गच्छह णं तुमं देवाणुप्पिया रायगिहं नयरिं तत्थ णं तुमं सहदेवं जरासंधसुयं एवं वयाहि कंपिल्लपुरे नयरे समोसरह अट्ठमं दूयं एवं वयासी गच्छह णं तुमं देवाणुप्पिया कोडिण्णं नयरं

तत्थ णं तुमं रूपिं भेसगसुयं एवं वयाहि-कंपिल्लपुरे नवरे समोसरह नवमं दूयं एवं वयासी-गच्छह णं तुमं देवाणुप्पिया विराटं नयरं तत्थ णं कीयगं भाउसय-समागं एव वयाहि-कंपिल्लपुरे नवरे समो-सरह दसमं दूयं एवं वयासी गच्छह णं तुमं देवाणुप्पिया अवसेसेणु गामागरनगरेसु तत्थ णं तुमं अणेगाइं रायसहस्साइं एवं वयाहि-कंपिल्लपुरे नवरे समोसरह तए णं ते बहवे रायसहस्सा पत्तेयं-पत्तेयं ण्हाया सण्णद्ध-दद्ध-वम्मिय-कवया हत्थिखंधवरगया हच-गय-रह। पवरजोहकलियाए चा-उरंगिणीए सेणाए सद्धिं संपरिवुडा महयाभड-वडगर-रह-पडकर-विदपरिक्खिता। सएहिं-सएहिं नगरोहिंते अभिनिग्गच्छंति अभिनिग्गच्छिता जेणेव पंचाले जणवए तेणेव पहारेत्थ गमणाए तए णं से दुवए राया कोडुबियपुरिसे सद्दावेइ सद्दावेत्ता एवं वयासी-गच्छह णं तुमं देवाणुप्पिया कंपिल्ल-पुरे नवरे बहिया गंगाए महानइए अदूरसामंते एगं महं सयंवरमंडवं करेह-अणेगखंभ-सयसत्रिविडुं लीलड्डिय-सालिभंजियागं जाव पासाइयं दरिसणिजं अभिरुवं पडिरुवं-करेत्ता एयमाणत्तियं पच्चप्पिणह ते वि तहेव पच्चप्पणंति

तए णं से दुवए राया दोब्धि कोडुबियपुरिसे सद्दावेइ सद्दावेत्ता एवं वयासी-खिण्यामेव भो देवाणुप्पिया वासुदेवपामोक्खाणं बहूणं रायसहस्साणं आवासे करह करेत्ता एयमाणत्तियं पच्चप्पिणह ते वि तहेव पच्चप्पिणंति तए णं से दुवए राया वासुदेवपामोक्खाणं बहूणं रायसहस्साणं आगमणं जाणेत्ता पत्तेयं-पत्तेयं हत्थिखंध [वरगए सकोरंटेमल्लदामेणं छत्तेणं धरिज्जमाणेणं सेयवर-चामराहिं वीड्जमाणे हच- गय-रह-पवरजोहकलियाए चाउरंगिणीए सेणाए सद्धिं संपरिवुडे महायभड- वडगर- रह- पहकर-विदपरिक्खिते। अग्धं च पज्जं च गहाय सव्विड्डीए कंपिल्लपुराओ निग्गच्छइ निग्गच्छिता जेणेव ते वासुदेवपामोक्खा बहवे रायसहस्सा तेणेव उवागच्छइ उवाग-च्छिता ताइं वासुदेवपामोक्खाइं अग्घेण य पज्जेण य सक्कारेइ सम्माणेइ सक्कारेत्ता सम्माणेत्ता तेसिं वासुदेवपामोक्खाणं पत्तेयं-पत्तेयं आवासे वियरइ तए णं ते वासुदेवपामोक्खा जेणेव सवा-सवा आवासा तेणेव उवागच्छंति उवागच्छिता हत्थिखंधेहिंते पच्चोरुहंति पच्चोरुहित्ता पत्तेयं-पत्तेयं खंधावारनिवेसं करंति करेत्ता सएसु-सएसु आवासेसु अनुप्पविसंति अनुप्पविसित्ता सएसु-सएसु आवासेसु आसणेसु य सयणेसु य सत्रिसण्णा य संतुयद्दा य बहूहिं गंधव्वेहिं य नाडएहिं य उवगिज्जमाणा य उवनच्चिज्जमाणा य विहरंति तए णं से दुवए राया कंपिल्लपुरं नयरं अनुप्पविसइ अनुप्पविसित्ता विपुलं असण-पाण-खाइम-साइमं उवक्खडावेइ उवक्खडावेत्ता कोडु-वियपुरिसे सद्दावेइ सद्दावेत्ता एव वयासी-गच्छह णं तुम्भे देवाणुप्पिया विपुलं असण- पाण-खाइम-साइमं सुरं च मज्जं व मंसं च सीधुं च पसन्नं व सुबहुं पुप्फ-वत्थ-गंधमल्लालंकारं च वासुदेव-पामोक्खाणं रायसहस्साणं आवासेसु साहरह तेवि साहरंति तए णं से वासुदेवपामोक्खा तं विपुलं असण-[पाण-खाइम-साइमं सुरं च मज्जं व मंसं च सीधुं च पसन्नं व आसाएमाणा विसादेमाणा परिभाएमाणा परिभुंजेमाणा विहरंति जिभियभुत्तुरागया वि य णं समाणा आधंता चोक्खा परमसुइधूया सुहासणवरगया बहूहिं गंधव्वेहिं य नाडएहिं य उवगिज्जमाणा य उवनच्चिज्जमाणा य विहरंति

तए णं से दुवए राया पच्चावरणह-कालसमयंसि कोडुवियपुरिसे सद्दावेइ सद्दावेत्ता एवं वयासी-गच्छह णं तुम्भे देवाणुप्पिया कंपिल्लपुरे सिंधाडग- जाव पहेसु वासुदेवपामोक्खाणं रायस-हस्साणं आवासेसु हत्थिखंधवरगया महया-महया सद्देणं उग्घोसेमाणा एवं वयह एवं खलु

देवाणुष्पिया कल्लं पाउप्पमायाए रयणीए उद्धियम्मि सूरु सहस्सरस्सिम्मि दिणयरे तेयसा जलंते दुवयस्स रण्णो धूयाए चुलणीए देवीए अतियाए घट्टञ्जणस्स भगिणीए दोवईए रायवरकण्णाए सयंवरु पविस्सइ तं तुब्भे णं देवाणुष्पिया दुवयं रावाणं अनुगिण्हेमाणा ण्हाया जाव सव्वालं-कारविभूसिया हत्थिखंधवरगया सकोरेंट [मल्लदामेणं छत्तेणं धरिज्जमाणेणं सेयवरचामराहिं वीइज्जमाणा हय-गय-रह-पवरजोह-कलियाए चाउरंगिणीए सेणाए सद्धिं संपरिवुडा महयाभड-चडगर-रह-पहकर-विंद]-परिक्खिता जेणेव सयंवरामंडवे तेणेव उवागच्छह उवागच्छिता पत्तेयं-पत्तेयं नामंकिएसु आसणेसु निसीयह निसीइत्ता दोवइं रायवरकण्णं पडिवालेमाणा-पडिवालेमाणा चिद्धह त्ति घोराणं घोसेह घोसेत्ता मम एयमाणत्तियं पच्चप्पिणह तए णं कोडुंबियपुरिसा तहेव जाव पच्च-प्पिणंति तए णं से दुवए राया कोडुंबियपुरिसे सद्दावेइ सद्दावेत्ता एवं वयासी-गच्छह णं तुब्भे देवाणुष्पिया सयंवरमंडं आसिय-संमज्जिओवलित्तं पंचवण्णपुप्फोवयारकलियं कालागर-पवर-कुंदुरुककतुरुकक- [धूवडञ्जंत-सुरभि-मघमपेत-गंधुद्धयाभिरामं सुगंधवरगंधगंधियं] गंधवट्ठि-भूयं पंचाडमंचकलियं करेह कारवेह करेत्ता कारवेत्ता वासुदेवपामोक्खाणं बहूणं रायसहस्साणं पत्तेयं-पत्तेयं नागंक्रियाइं आसणाइं अत्थुयपच्चत्थुयाइं एहए एत्ता एयमाणत्तियं पच्चप्पिणह तैवि जाव पच्चप्पिणंति

तए णं ते वासुदेवपामोक्खा बहवे रायसहस्सा कल्लं पाउप्पमायाए रयणीए उद्धियम्मि सूरु सहस्सरस्सिम्मि दिणयरे तेयसा जलंते ण्हाया जाव सव्वालंकारविभूसिया हत्थिखंधवरगया सकोरेंट-मल्लदामेणं छत्तेणं धरिज्जमाणेणं सेयवरचामराहिं वीइज्जमाणा हय-गय-रह-पवरजोहकलियाए चाउरंगिणीए सेणाए सद्धिं संपरिवुडा महयाभड-चडगर-रह-पहकर-विंदपरिक्खिता] सव्विड्डीए जाव कुंदुहि-निग्घोस-नाइयरवेणं जेणेव सयंवरामंडवे तेणेव उवागच्छंति उवागच्छिता अनुप्पवि-संति अनुप्पविसित्ता पत्तेयं-पत्तेयं नामंकिएसु आसणेसु निसीयंति दोवइ रायवरकण्णं पडिवाले-माणा-पडिवालेमाणा विट्ठंति तए णं से दुवए राया कल्लं पाउप्पमायाए रयणीए उद्धियम्मि सूरु सहस्सरस्सिम्मि दिणयरे तेयसा जलंते ण्हाए जाव सव्वालंकारविभूसिए हत्थिखंधवरगए सकोरेंट [मल्लदामेणं छत्तेणं धरिज्जमाणेणं सेयवरचामराहिं वीइज्जमाणे हय-गय-रह-परजोहकलियाए चाउरंगिणीए सेणाए सद्धिं संपरिवुडे महयाभड चडगररहपहकर-विंदपरिक्खिते] कंपिल्लपुरं नगरं मज्झमज्झेणं निगच्छइ जेणेव सयंवरामंडवे जेणेव वासुदेवपामोक्खा बहवे रायसहस्सा तेणेव उवागच्छइ उवागच्छिता तेसिं वासुदेवपामोक्खाणं करयल [परिग्गहिंयं दसनहं सिरसावत्तं मत्थए अंजलिं कट्टु जएणं विजएणं वद्धावेइ] वद्धावेत्ता कण्हस्स वासुदेवस्स सेयवरचामरं महाव उववी-यमाणे चिद्धई 19281-118

(१७१) तए णं मा दोवई रायवरकण्णा कल्लं पाउप्पमायाए रयणीए उद्धियम्मि सूरु सहस्सरस्सिम्मि दिणयरे तेयसा जलंते जेणेव मज्जणयरे तेणेव उव छइ उवागच्छिता मज्जणयरे अनुपविसइ अनुपविसित्ता ण्हाया कयबलिकम्पा कय-कोउय-मंगल-पायच्छिता सुद्धप्पावेसाइं मंगलाइं वत्थाइं पवर परिहिया मज्जणघराओ पडिनिक्खमइ पडिनिक्खिमित्ता जेणेव जिणघरे तेणेव उवागच्छइ उवागच्छिता जिणघरे अनुपविसइ अनुपविसित्ता जिणपडिमाणं अच्चणं करेइ करेत्ता वामं जाणुं अंचेइ दाहिणं जाणुं धरणितलंसि निहट्टु तिकवुत्तो मुद्धाणं धरणितलंसि निवेसइ इंसि पच्चुण्णमइ पच्चुण्णमित्ता करयलपरिग्गहिंयं अंजलि मत्थए कट्टु एवं वयासी-नमोत्थु णं

अरहंताणं जाव संपत्ताणं वंदइ नमंसइ वंदिता नमंसिता जिणधराओ पडिनिक्खमइ पडिनिक्ख-
मिता जेणेव अंतेउरे तेणेव उवागच्छइ । १२५।-११९

(१७२) तए णं तं दोवई रायवरकन्नं अंतेउरियाओ सव्वालंकारविभूसियं करंति किं ते
वरपायपत्तनेउरा जाव चेडिया चक्कयाल-महयरग-वेद-परिक्खिता अंतेउराओ पडिनिक्खमइ
पडिनिक्खमिता जेणेव वाहिरिया उवद्वाणसाला जेणेव चाउघंटं आसरहं तेणेव उवागच्छइ
उवागच्छिता किड्ढावियाए लेहियाए सद्धिं चाउघंटं आसरहं दुरूहइ तए णं से धड्डुणे कुमारे
दोवईए रायवरकन्नाए सारत्थं करेइ तए णं सा दोवई रायवरकन्ना कंपिलपुरं नयरं मज्झंमज्झेणं
जेणव सयंवरामंडवे तेणेव उवागच्छइ उवागच्छिता रहं ठवेइं रहाओ पच्चोरुहइ पच्चोरुहिता
किड्ढावियाए लेहियाए सद्धिं सयंवरामंडवं अनुपविसइ अनुपविसिता करयल । परिग्गहियं दरानहं
सिरसावतं मत्थए अंजलिं कट्टुं तेसिं वासुदेवपामोक्खाणं वहुणं रायवरसहस्साणं पणामं करेइ तए
णं सा दोवई रायवरणा एणं महं सिरिदामगंडं-किं ते पाडल मडिय-चंपव जाव सत्तच्छयाईहिं
गंधदुग्गि मुयंतं परमसुहफासं दरिसण्णिज्जं-गेणइ तए णं सा किड्ढाविया सुरूवा । साभावियघंसं
वोद्दहजगस्स उस्सुवकरं विचित्त-मणि-रयण-वद्धच्छरूहं । वामहत्थेणं चिद्धं दप्पणं गहेऊण सल-
त्तिचं दप्पणसंकंतविच-सदंसिए य से दाहिणेणं हत्थेणं दरिए पवररायसीहे फुडविसय- विमुद्ध-
रिभिवगंभीर - महुरमणिया सा तेसिं सव्वेसि पत्थियाणं अम्मापिउवंस - सत्त - सामत्थ - गोत्त-
विककंति-कंति-वहुविहआगम-माहप्य-रूवं-कुलसीलजाणिया कित्तणं करेइ पढमं ताव वण्हिपुंग-
वागं दसारवर-वीरपुरिस-तेलोककवलवगाणं सत्तुसयसहस्स-माणावमहाणं भवसिद्धिय- वरपुं-
डरीयाणं चिद्धागाणं वल- वीरिय- रूव- जोवण्ण- गुण- लावण्णकित्तिया कित्तणं करेइ तओ पुणो
उग्गसेणमाईणं जायवाणं भणइ--सोहग्गरूवकलिए वरंहे वरपुरिसगंधहत्थीणं जो हु ते होइ
हियव-दइओ

तए णं सा दोवई रायावरकण्णगा वहुणं रायवरसहस्साणं मज्झंमज्झेणं समइच्छमाणी-
समइच्छमाणी पुव्वकयनियाणेणं चोइज्जमाणी- चोइज्जमाणी जेणेव पंच पंडवा तेणेव उवागच्छइ
उवागच्छिता ते पंच पंडवे तेणं दसद्ध-वण्णेणं कुसुमदामेणं आवेदियपरिवेदिए करेइ करेता एवं
वयासी-एए णं मए पंच पंडवा वरिया तए णं ताई वासुदेवपामोक्खाइं वहुणि रायसहस्साणि
महया-महया सद्देणं उग्गोसेमाणाइं- उग्गोसेमाणाइं एवं वयंति-सुवरियं खलु भो दोवईए रायवर-
कन्नाए ति कट्टु सयंवरामंडवाओ पडिनिक्खमंति पडिनिक्खमिता जेणेव सया-सया आवासा
तेणेव उवागच्छिता तए णं धड्डुणे कुमारे पंच पंडवे दोवई च रायवरकण्णं चाउघंटं आसरहं
दुरुहावेइ दुरुहावेत्ता कंपिलपुरं नयरं मज्झंमज्झेणं [उवागच्छइ उवागच्छिता] सयं भवणं अनुपवि-
सइ तए णं से दुवए राया पंच पंडवे दोवई च रायवरकण्णं पइयं दुरुहावेइ दुरुहावेत्ता सेयापीयाएहिं
कलसेहिं मज्जावेइ मज्जावेत्ता अग्गिहोमं करावेइ पंचण्हं पंडवाणं दोवईए य पाणिग्गहणं कारावेइ
तए णं से दुवए राया दोवईए रायवरकन्नाए इमं एवारूवं पीइदाणं दलयइ तं जहा-अट्ट
हिरण्णकोडीओ जाव पेसणकारीओ दासचेडीओ अण्णं च विपुलं धण-कण्ण[रयण-मणि-मोत्तिय-
संख-सिलप्पवाल- रत्तरयण- संत- सार-सावएज्जं अलाहिं जाव आसत्तमाएओ कुलवंसाओ पकामं
दाउं पकामं भोत्तुं पकामं परिभाएउ] दलयइ तए णं से दुवए राया ताई वासुदेवपामोक्खाइं वहुइं
रायसहस्साइं विपुलेणं असण-पाण-खाइम-साइमेणं पुप्फ-वत्थ-गंध-मज्जालंकारेणं सक्कारेइ

सम्माणेइ सकृकारेत्ता सम्माणेत्ता पडिविसज्जेइ ।१२६।-१२०

(१७३) तए णं से पंडू राया तेसिं वासुदेवपामोक्खाणं बहूणं रायसहस्साणं करयल-
[परिग्गहियं दसनहं सिरसावत्तं मत्यए अंजलिं कट्टु एवं वयासी एवं खलु देवाणुप्पिया हत्थिणाउरे
नयरे पंचण्हं पंडवाणं दोवईए य देवीए कल्लाणकारे भविस्सइ तं तुब्भे णं देवाणुप्पिया ममं
अनुगिण्हमाणा अकालपरिहीणं चेव समोसरह तए णं ते वासुदेवपामोक्खा बहवे रायसहस्सा
पतेयं-पतेयं [ण्हाया सण्णद्धवद्ध-वम्मिय-कवया हत्थिखंधवरगया जाव जेणेव हत्थिणाउरे नयरे
तेणेव] पहारेत्थ गमणाए तए णं से पंडू राया कोडुंबियपुरिसे सद्दावेइ सद्दावेत्ता एवं वयासी-गच्छइ
णं तुब्भे देवाणुप्पिया हत्थिणाउरे नयरे पंचण्हं पंडवाणं पंच पासायवडिसए कारेहअब्भुगयमूसिय
जाव पडिरूवे तए णं ते कोडुंबियपुरिसा पडिसुणेति जाव कारवेति तए णं से पंडू राया पंचहिं
पंडवेहिं दोवईए देवीए सद्धिं ह्य-गय-[रह-पवर-जोहकलियाए चाउरंगिणीए सेणाए सद्धिं
संपरिवुडे महया भडचडगर-रह-पहकर-विंदपरिबिखत्ते कंपिल्लपुराओ पडिनिक्खमइ पडिनिक्ख-
मिन्ना जेणेव हत्थिणाउरे तेणेव उवागए तए णं से पंडू राया तेसिं वासुदेवपामोक्खाणं आगमणं
जाणिता कोडुंबियपुरिसे सद्दावेइ सद्दावेत्ता एवं वयासी-गच्छइ णं तुब्भे देवाणुप्पिया हत्थिणाउरस्स
नयरस्स बहिया वासुदेवपामोक्खाणं बहूणं रायसहस्साणं आवासे-अणेगखंभसयसण्णिविट्ठे कारहे
कारेत्ता एयमाणत्तियं पच्चप्पिणह तेवि तहेव पच्चप्पिणंति तए णं ते वासुदेवपामोक्खा बहवे
रायसहस्सा जेणेव हत्थिणाउरे तेणेव उवागए तए णं से पंडू राया ते वासुदेवपामोक्खे बहवे
रायसहस्से उवागए जाणिता हट्टुट्ठे ण्हाए कयबलिकम्मे जहा दुवाए जाव जहारिहं आयासे दलवइ

तए णं ते वासुदेवपामोक्खा बहवे रायसहस्सा जेणेव सया-सया आवासा तेणेव उवा-
गच्छति तहेव जाव विहरंति तए णं से पंडू राया हत्थिणाउरं नयरं अनुपविसइ अनुपविसित्ता
कोडुंबियपुरिसे सद्दावेइ सद्दावेत्ता एवं वयासी-तुब्भे णं देवाणुप्पिया विपुलं असणपाण- खाइम-
साइमं आवासेसु उवणेह तेवि तहेव उवणेति तए णं ते वासुदेवपामोक्खा बहवे रायसहस्सा ण्हाया
कयबलिकम्मा कयकोउय-मंगल-पायाच्छित्ता तं विपुलं असण-पाण-खाइम-साइमं आसाएमाणा
तहेव जाव विहरंति तए णं से पंडू राया ते पंच पंडवे दोवईं व देविं पट्टयं दुरुहावेइ दुरुहावेत्ता
सेयापीएहिं कलसेहिं ण्हावेइ ण्हावेत्ता कल्लाणकारं करेइ करेत्ता ते वासुदेवपामोक्खे बहवे रायस-
हस्से विपुलेणं असण-पाण-खाइम-साइमेणं पुप्फ-वत्थ-गंध-मल्लालंकारेणं य सकृकारेइ सम्माणेइ
सकृकारेत्ता सम्माणेत्ता पडिविसज्जेइ तए णं ताइं वासुदेवपामोक्खाइं बहूइं [रायसहस्साइं पंडूएणं
रणा विसज्जिया समाणा जेणेव साइं-साइं रजाइं जाव नगराइं तेणेव] पडिगयाइं ।१२७।-१२१

(१७४) तए णं ते पंच पंडवा दोवईए देवीए सद्धिं कल्लाकल्लि वारंवारोणं उरालाइं भोग-
भोगाइं भुंजमाणा विहरंति तए णं से पंडू राया अण्णया कयाइं पंचहिं पंडवेहिं कोतीए देवीए
दोवईए य सद्धिं अंतोअंतोउरपरियालसद्धिं संपरिवुडे सीहासणवरगए यावि विहरइ इमं च णं
कच्छुल्लनारए-दंसणेणं अइमइए विणीए अंतो-अतो य कलुस हियए मज्झत्य-उवत्थिए य अक्षीण-
सोमपियदंसणे सुरूवे अमइल-सगल-परिहिए कालमियचम्म-उत्तरासंग-रइयवच्छे दंड- कम्मंडु-
हत्थे जडामउडदित्तसिए जत्रोवइय-गणेत्तिय-मुंजमेहला-वागलघरे हत्थकय-कच्छभीए पियगं-
धत्थे धरणिगोयरप्पहाणे संवरणावरणि-ओवयणुप्पयणि-लेसणीसु य संकाणि-आभिओगि- पत्रति-
गमणि-थंभिमणीसु य बहसु विज्जाहसुरी विज्जासु विस्सुयजसे इट्ठे रामस्स य केसवस्स य पञ्चुव-

पईव-संब-अनिरुद्ध-निसद-उम्भुय-सारण-गय-सुमुह-दुम्भुहार्डं जायवाणं अद्धद्वानं य कुमारको-
डीणं हियय-दइए संथवए कलह-जुद्ध-कोलाहलपिण्णं भंडणाभिलासी बहूसु य समरसय-संपराएसु
दंसणए समंतओ कलहं सदक्खिणं अनुगवेसमाणे असमाहिकरे दसारवर- वीरपुरिस- तेलोकक-
बलवमाणं आमंतेऊण तं भगवइं पक्कमणिं गगणगपणदच्छं उप्पइओ गगणमभिलंघयंतो गामा-
गर-नगर-खेड-कच्चड-मडंब-दोणमुह-पट्टण-संबाह-सहस्सपंडिय थिमियमेइणीयं निम्बर जणपदं
वसुहं ओतेइंते रम्मं हत्थिणाउरं उवागए पंडुरायभवणांसि झत्ति-वेणेण समोवइए तए णं से पंडू राया
कच्चुल्लनारयं सत्तद्वपयाइं पच्चुग्गच्छइ पच्चुग्गच्छिता तिवसुतो आयहिण-पयाहिणं करेइ करेत्ता
वंदइ नमंसइ वंदित्ता नमंसित्ता महरिहेण अग्घेणं पज्जेणं आसणेणं य उवनिमंतंइ तए णं से
कच्चुल्लनारए उदगपरिफोसियाए दब्भोवरिपच्चत्युयाए भिसियाए निसीयइ निसीइत्ता पंडुराय- रजे
य [रद्धे य कोसे य कोट्टागारे य बले य वाहणे य पुरे य] अंतोउरे य कुसलोदंतं पुच्छइ तए णं से पंडू
राया कौंती देवी पंच य पंडवा कच्चुल्लनारयं आदंति [परियाणंति अब्भुद्धेति] पज्जुवासंति तए णं सा
दोवई देवी कच्चुल्लनारयं अस्संजयं अवरियं अप्पडिहयपच्चक्खवायपावकम्मंति कट्टु नो आढाइ नो
परियाणइ नो अब्भुद्धेइ नो पज्जुवासइ 192८1-122

(१७५) तए णं तस्स कच्चुल्लनारयस्स इमेयारूवे अज्झत्थिए चितिए पत्थिए पणोगए
संकप्पे समुप्पज्जित्था-अहो णं दोवई देवी रूवेण य [जोवणणेण य] तावणणेण य पंचहिं पंडवेहिं
अवत्थ-द्धा समाणी ममं नो आढाइ [नो परियाणइ नो अब्भुद्धेइ] नो पज्जुवासइ तं सेयं खलु मम दोव-
ईए देवीए विप्पियं करेत्तए ति कट्टु एवं संपेहेइ संपेहेत्ता पंडुरायं आपुच्छइ आपुच्छिता उप्पयणिं
विज्जं आवाहेइ आवाहेत्ता ताए उक्किट्ठिए [तुरियाए चवत्ताए चंडाए सिन्धाए उद्दुयाए जइण्णाए
छेयाए] विज्जाहरगईए लवणसमुद्धं मज्जंमज्जेणं पुरत्थाभिमुहे वीईवइउं पयते यावि होत्था तेणं
कालेणं तेणं समएणं धावइसंडे दीवे पुरत्थिमत्त-दाहिणइ-भरहवासे अवरकंका नामं रायहाणी
होत्था तत्थं णं अवरकंकाए रायहाणीए पउमनाभे नामं राया होत्था--महयाहिमवंतं महंत- मलव-
मंदर-महिंदसारे वण्णओ तस्स णं पउमनाभस्स रण्णो सत्त देवीसयाइं ओरोहे होत्था तस्स णं
पउमनाभस्स रण्णो सुनाभे नामं पुत्ते जुवरायावि होत्था तए णं से पउमनाभे राया अंतोअंतोउरंसि
ओरोह-संपरिवुडे सीहासणवरगए विहरइ तए णं से कच्चुल्लनारए जेणेव अवरकंका रायहाणी
जेणेव पउमनाभस्स भवणे तेणेव उवागच्छइ उवागच्छिता पउमनाभस्स रण्णो भवणांसि झत्ति-
वेणेण समोवइए तए णं से पउमनाभे राया कच्चुल्लनारयं एज्जमाणं पासइ पासित्ता आसणाओ
अब्भुद्धेइ अब्भुद्धेत्ता अग्घेणं [पज्जेणं] आसणेणं उवनिमंतंइ तए णं से कच्चुल्लनारए उदगपरि-
फोसियाए दब्भोवरिपच्चत्युयाए भिसियाए निसीयइ [निसीइत्ता पउमनाभं रायं रजे य रद्धे य कोसे य
कोट्टागारे य बले य वाहणे य पुरे य] अंतोउरे य] कुसलोदंतं आपुच्छइ तए णं से पउमनाभे राया
निवगओरेहे जावविहए कच्चुल्लनारयं एवं वयासी-तुमं देवाणुप्पिया बहूणि [गामागर- नगर-
खेड-कच्चड-दोणमुह-मडंब-पट्टण-आसम निगम-संबाह-सण्णिवेसाइं आहिंडसि बहूणं य राईसर-
तलवर- माडंबिय- कोडुंबिय- इक्क- सेट्ठि-सेणावइ-सत्थवाहपभिईणं] गिहाइं अनुपविससि तं
अत्थियाइं ते कहिंथि देवाणुप्पिया एरिसए ओरोहे दिट्ठपुब्बे जारिसए णं मम ओरोहे तए णं से
कच्चुल्लनारए पउमनाभेणं एवं वुत्ते समाणे ईंसि विहसियं करेइ करेत्ता एवं वयासी-सरिसे णं तुमं
पउमनाभा तस्स अगडदहुरस्स

के णं देवाणुप्पिया से अगडदहुरे [पउमनाभा से जहानामए अगडदहुरे सिधा सेणं तत्थ जाए तत्थेव बुद्धे अण्णं अगडं वा तलामं वा दहं वा सरं वा सागरं वा अपासमाणे मण्णइ-अयं चेव अगडे वा तलागे वा दहे वा सरे वा सागरे वा तए णं तं कूवं अण्णे सामुद्दए दहुरे हव्वमाणए तए णं से कूवदहुरे तं सामुद्दयं दहुरं एवं वयासी-से के तुमं देवाणुप्पिया कत्तो वा इह हव्वमाणए तए णं से सामुद्दए दहुरे तं कूवदहुरं एवं वयासी-एवं खलु देवाणुप्पिया अहं सामुद्दए दहुरे तए णं से कूवदहुरे तं सामुद्दयं दहुरं एवं वयासी-कमहालए णं देवाणुप्पिया से समुद्दे तए णं से सामुद्दए दहुरे तं कूवदहुरं एवं वयासी-महालए णं देवाणुप्पिया समुद्दे तए णं से कूवदहुरे पाएणं लीहं कइद्देइ कइद्देता एवं वयासी-एमहालए णं देवाणुप्पिया से समुद्दे नो इण्णडे समडे महालए णं से समुद्दे तए णं से कूवदहुरे पुरत्थिमिद्धाओ तीराओ उप्पिडित्ता णं पच्चत्थिमिद्ध तीरं गच्छइ गच्छित्ता एवं वयासी-एनहालए णं देवाणुप्पिया से समुद्दे नो इण्णडे समडे एवामेव तुमं पि पउमनाभा अण्णेसिं वहूणं राईसर जाव सत्थवाहप्यभिईणं भज्जं वा भगिणिं वा धूयं वा सुण्हं वा अपासमाणे जाणसिं जारिसए मम चेव णं ओरोहे तारिसए नो अण्णेसिं] एवं खलु देवाणुप्पिया जंबुद्वीवे दीवे भारहे वासे हत्थिणाउरे नयरे दुपयस्स रण्णो धूया चुलणीए देवीए अत्तया पंडुस्स सुण्हा पंचण्हं पंडवाणं भारिया दोवई नामं देवी रूवेण य [जोवण्णेण य लावण्णेण य उक्किट्ठा] उक्किट्ठसरीरा दोवईए णं देवीए छिन्नस्सवि पायंगुट्ठस्स अयं तय ओरोहए सयंपि कलं न अग्घइ त्ति कट्ठु पउमनाभं आपुच्छइ] आपुच्छित्ता जामेव दिसिं पाउव्भूए तामेव दिसिं पडिगए तए णं से पउमनाभे राया कच्चुल्लनारयस्स अंतए एयमडुं सोद्धा निसम्म दोवईए देवीए रूवे य जोवण्णे य लावण्णे य मुच्छिए गट्ठिए गिद्धे अज्जो-ववण्णे जेजेव पोसहसाला तेणेव उवागच्छइ उवागच्छित्ता पोसहसालं [अनुप्पविसइ अनुप्पवि-सित्ता पुव्वसंगइयं देव मणसीकरेभागे-मणसीकरेभाणे चिद्धइ तए णं पउमनाभस्स रण्णो अट्टम-भत्तंसि परिणममाणंसि पुव्वसंगइओ देवो जाव आगओ भणतुं णं देवाणुप्पिया जं मए कायव्वं तए णं से पउमनाभं] पुव्वसंगइयं देवं एवं वयासी-एवं खलु देवाणुप्पिया जंबुद्वीवे दीवे भारहे वासे हत्थिणाउरे [नयरे दुपयस्स रण्णो धूया चुलणीए देवीए अत्तया पंडुस्स सुण्हा पंचण्हं पंडवाणं भारिया दोवई नामं देवी रूवेण य जोवण्णेण य लावण्णेण य उक्किट्ठा उक्किट्ठ] सरीरा तं इच्छामि णं देवाणुप्पिया दोवई देविं इह हव्वमाणीयं

तए णं से पुव्वसंगइए देवे पउमनाभं एवं वयासी-नो खलु देवाणुप्पिया एवं भूयं वा भव्वं वा भविसं वा जण्णं दोवई देवी पंच पंडवे मोत्तूणं अण्णेणं पुरिसेणं सद्धिं उरालाई [माणुस्सगाई भोगभोगाई भुंजमाणं] विहरिस्सइ तथावि य णं अहं तव पियड्डयाए दोवई देविं इहं हव्वमाणेमि त्ति कट्ठु पउमनाभं आपुच्छइ आपुच्छित्ता ताए उक्किट्ठाए [तुरियाए दवलाए चंडाए जवणाए सिंधाए उद्धूराए दिव्वाए] देवगईए लवणसमुद्दं मज्झंमज्जेणं जेजेव हत्थिणाउरे नयरे तेणेव पहारेत्थ गमणाए तेणं कालेणं तेणं समएणं हत्थिणाउरे नयरे जुहिद्धिल्ले राया दोवईए देवीए सद्धिं उप्पि आगासतलगंसि सुहप्यसुत्ते यावि होत्था तए णं से पुव्वसंगइए देवे जेजेव जुहिद्धिल्ले राया जेजेव दोवई देवी तेणेव उवागच्छइ उवागच्छित्ता दोवईए देवीए ओसोवणिं दलयइ दलइत्ता दोवई देविं गिण्हइ गिण्हित्ता ताए उक्किट्ठाए जाव देवगईए जेजेव अवरकंका जेजेव पउमनाभस्स भवणे तेणेव उवागच्छइ उवागच्छित्ता पउमनाभस्स भवणांसि असोवणियाए दोवई देविं ठावेइ ठावेत्ता ओसोवणिं अचहरइ अवहरित्ता जेजेव पउमनाभे तेणेव उवागच्छइ उवागच्छित्ता एवं वयासी-एस

णं देवाणुप्पिया मए हत्थिणाउराओ दोवई देवी इहं हव्वमाणीया तव असोगवणियाए चिद्धइ अओ परं तुमं जाणिस ति कट्टु जामेव दिसिं पाउव्यूए तामेव दिसिं पडिगए तए णं सा दोवइ देवी तओ मुहुत्तरस्स पडिवुद्धा समाणी तं भवणं असोगवणियं च अपच्चभिजाणमाणी एवं ययासी-नो खलु अहं एसे सए भवणे नो खलु एसा अहं सगा असोगवणिया तं न नज्जइ णं अहं केणइ देवेण वा दाणवेण वा किन्नरेण वा किंपुरिसेणं वा महोरणेण वा गंधव्वेण वा अण्णस्स रण्णो असोगवणियं साहरियं ति कट्टु ओहयमणसंकप्पा [करतलपल्लहत्थमुही अट्टज्जाणोवगया] झियावइ तए णं से पउमनाभे ण्हाए जाव सव्वालंकारविभूसिए अंतेउर-परियालसंपरिवुडे जेणेव असोगवणिया जेणेव दोवई देवी तेणेव उवागच्छइ उवागच्छिता दोवइं देविं ओहयमणसंकप्यं [करतलपल्लहत्थमुहि अट्टज्जाणोवगयं] झियायमाणि पासइ पासित्ता एवं ययासी-कित्रं तुमं देवाणुप्पिए ओहवमण-संकप्पा जाव झियाहि एवं खलु तुमं देवाणुप्पियाए मम पुव्वसंगइएणं देवेणं जंबुद्दीवाओ दीवाओ भारहाओ वासाओ हत्थिणाउराओ नयराओ जुहिद्विलस्स रण्णो भवणाओ साहरिया तं मा णं तुमं देवाणुप्पिया ओहयमणसंकप्पा [करतलपल्लहत्थमुही अट्टज्जाणोवगया] झियाहि तुमं णं मए सद्धिं विपुलाई भोगभोगाइं [भुंजमाणी] विहराहि तए णं सा दोवई देवी पउमनाभं एवं ववारी एवं खलु देवाणुप्पिया जंबुद्दीवे दीवे भारहे वासे वारवईए नयरीए कण्हे नामं वासुदेवे मम पियमाउए परिवसइ तं जइ णं से छण्हं मासाणं मम कूवं नो हव्वमागच्छइ तए णं अहं देवाणुप्पिया जं तुमं वदंसि तस्स आणा ओवाय वयण निहेसे चिट्ठिस्सामि तए णं से पउमनामे दोवईए देवीए एयमहं पडिसुणेइ पडिसुणेत्ता दोवइं देविं कण्णंतेउरे ठवेइ तए णं सा दोवई देवी छट्ठंउट्टेणं अणिक्खित्तेणं आर्वविल परिण्हिएणं तवोकम्भेणं अप्पाणं भावेमाणी विहरइ 19२९1-123

(१७६) तए णं से जुहिद्विं राया तओ मुहुत्तरस्स पडिवुद्धे समाणे दोवइं देविं पासे अपासमाणे सचभिजाओ उट्टेइ उट्टेत्ता दोवईए देवीए सव्वओ समंता मग्गणगवेसणं करेइ करेत्ता दोवईए कत्थइ सुइं वा खुइं वा पवत्तिं वा अलभमाणे जेणेव पंडू राया तेणेव उवागच्छइ उवागच्छित्ता पंडु राया एवं ययासी-एवं खलु ताओ मनं आगासतलंगिस सुहपसुत्तस्स पासाओ दोवई देवी न नज्जइ केणइ देवेण वा दाणवेण वा किन्नरेण वा किंपुरिसेणं वा महोरणेण वा गंधव्वेणं वा हिया वा निया वा अवक्खित्ता वा तं इच्छामि णं ताओ दोवईए देवीए सव्वओ समंता मग्गण-गवेसणं करित्तए तए णं से पंडू राया कोडुंविपुुरिसे सहावेइ सहावेत्ता एवं ययासी-गच्छह णं तुम्भे देवाणुप्पिया हत्थिणाउरे नयरे सिंघाडग-तिग-चउकक-चद्यर-चउम्पुह-महापहपहेसु महया-महया सट्ठेणं उग्घोसेमामा-उग्घोसाणा एवं वयह-एवं खलु देवाणुप्पिया जुहिद्विलस्स रण्णो आगासतल-गंसि सुहपसुत्तस्स पासाओ दोवई देवी न नज्जइ केणइ देवेण वा दाणवेण वा किन्नरेण वा किंपुरिसेणं वा महोरणेण वा गंधव्वेण वा हिया वा निया वा अवक्खित्ता वा तं जो णं देवाणुप्पिया दोवइए देवीए सुइं वा खुइं वा पवत्तिं वा परिकहेइ तस्स णं पंडू राया विउलं अत्थसंपयाणं दलयइ ति कट्टु घोसणं घोसावेह घोसावेत्ता एयमाणत्तियं पच्चप्पिण्ह तए णं ते कोडुंविपुुरिसा जाव पच्चप्पिणंति

तए णं से पंडू राया दोवईए देवीए कत्थइ सुइं वा [खुइं वा पवत्तिं वा] अलभमाणे कींतिं देविं सहावेइ सहावेत्ता एवं ययासी-गच्छह णं तुमं देवाणुप्पिए वारवईं नयरीं कण्हस्स वासुदेवस्स एयमहं निवेदेहि-कण्हे णं वासुदेवे दोवईए मग्गण-गवेसणं करेत्ता अण्णहा न नज्जइ दोवईए देवीए सुइं वा

खुई वा पवती वा तए णं सा कौंती देवा पंडुणा एवं वुत्ता समाणी जाव पडिसुणेइ पडिसुणेत्ता पहाया कयबलिकम्मा हत्थिखंधवरगया हत्थिणाउरं नयरं मज्झमज्जेणं निगच्छइ निगच्छित्ता कुरुजणव-यस्स मज्झमज्जेणं जेणेव सुरट्टाजणवए जेणेव बारवई नयरी जेणेव अगुज्राणे तेणेव उवागच्छइ उवागच्छित्ता हत्थिखंधाओ पच्चोरूहइ पच्चोरूहत्ता कोडुंबियपुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया बारवई नयरिं [जेणेव कण्हस्स वासुदेवस्स गिहे तेणेव] अनुपविसह अनुपविसित्ता कण्हं वासुदेवं करयल [परिग्गहियं दसनहं सिरसावतं मत्थए अंजलिं कट्टु एवं वयह-एवं खलु सामी तुब्भं पिउच्छा कौंती देवी हत्थिणाउराओ नयराओ इहं हव्यमागया तुब्भं दंसणं कंखइ तए णं ते कोडुंबियपुरिसा जाव कहेंति तए णं कण्हे वासुदेवे कोडुंबियपुरिसाणं अंतिए एयमट्ठं सोच्चा निसम्म हट्टुट्ठे हत्थिखंधवरगए बारवईए नयरीए मज्झमज्जेणं जेणेव कौंती देवी तेणेव उवागच्छइ उवागच्छित्ता हत्थिखंधाओ पच्चोरूहइ पच्चोरूहत्ता कौंतीए देवीए पायगहणं करेइ करेत्ता कौंतीए देवीए सद्धि हत्थिखंधं दुरूहइ दुरिहिता बारवईए नयरीए मज्झमज्जेणं जेणेव सए गिहे तेणेव उवागच्छइ उवागच्छित्ता सयं गिहं अनुप्पविसइ तए णं से कण्हे वासुदेवे कौंतिं देविं पहायं कयबलिकम्मं जिमियधुत्तुरागयं [वि य णं समाणि आवंतं चोक्खं परमसुइभूयं] सुहास-णवरगयं एवं वयासी-संसिदसउ णं पिउच्छ किमागमणपओयणं तए णं सा कौंती देवी कण्हं वासुदेवं एवं वयासी-एवं खलु पुत्ता हत्थिणाउरे नयरे जुहिड्डिलस्स रण्णो आगासतलए सुहप्पसुत्तस्स पासाओ दोवई देवी न नज्जइ केणइ अवहिया निया अविक्खित्ता या तं इच्छामि णं पुत्ता दोवईए देवीए सब्बओ समंता मगण-गवेसणं कयं

तए णं से कण्हे वासुदेवे कौंति पिउच्छं एवं वयासी-जं नवरं-पिउच्छा दोवईए देवीए कत्थइ सुई वा [खुई वा पवत्तिं वा] लभामि तो णं अहं पायलाओ वा भवणाओ वा अद्धभरहाओ वा समंतओ दोवइ देविं साहत्थि उवणेमि ति कट्टु कौंतिं पिउच्छं सक्कारेइ सम्माणेइ सक्कारेत्ता सम्माणेत्ता पडिविसज्जेइ तए णं सा कौंती देवी कण्हेणं वासुदेवेणं पडिविसज्जिया समाणी जामेव दिसिं पाउव्भूया ताभेव दिसिं पडिगया तए णं से कण्हे वासुदेवे कोडुंबियपुरिसे सद्दावेइ सद्दावेत्ता एवं वयासी-गच्छह णं तुब्भे देवाणुप्पिया बारवईए [नयरीए सिंघाडग- जाव पहेसु पहया-पहया सद्देणं उग्घोसेमाणा-उग्घोसेमाणा एवं वयह-एवं खलु देवाणुप्पिया जुहिड्डिलस्स रण्णो आगास-तलगांसि सुहपसुत्तस्स पासाओ दोवई देवी न नज्जइ केणइ देवेण वा जाव गंधव्वेण वा हिया वा निया वा अवक्खित्ता वा तं जो णं देवाणुप्पिया दोवईए देवीए सुईवा खुई वा पवत्तिं वा परिकहेइ तस्स णं कण्हे वासुदेवे विउलं अत्थसंपयाणं दलयइ ति कट्टु घोसणं धोसावेह धोसावेत्ता एयमाणत्तियं पच्चप्पिणह तए णं ते कोडुंबियपुरिसा जाव] पच्चप्पिणांति तए णं से कण्हे वासुदेवे अण्णया अंतोअंते उरगए ओरोह-संपरिवुडे सीहासण वरगए विहरइ इमं च णं कच्छुल्लनारए जाव इति-वेगेण समोवइए [तए णं से कण्हे वासुदेवे कच्छुल्लनारयं एज्जमाणं पासइ पासित्ता आसणाओ अब्भुट्ठेइ अब्भुट्ठेत्ता अग्घेणं पज्जेणं आसणेणं उवनिमंतेइ तए णं कच्छुल्लनारए उदगपरिफोसियाए दब्भोवरिपच्चत्थुयाए भिसियाए निसीयइ] निसीइत्ता कण्हं वासुदेवं कुसलोदंतं पुच्छइ तए णं से कण्हे वासुदेवे कच्छुल्लनारयं एवं वयासी-तुमं णं देवाणुप्पिया बहूणि गामागर- [नगर- खेड-कव्वइ-दोणमुह-मडंब-पट्टण-आसम-निगम-संबाह सण्णिवेसाइं आहिडडिसि बहूण य राईसर- जाव सत्थवाहपभिईणं गिहाइं] अनुपविससि तं अत्थियाइं ते कहिंयि दोवईए देवीए सुई वा [खुई वा

पविती वा। उवलत्ता तए णं से कच्छुल्लनारए कण्हं वासुदेवं एवं वयासी-एवं खलु देवाणुप्पिया अण्णया धायइसंडदीवे पुरत्थिमद्धं दाहिणइद्धं-भरहवासे अवरकंका-रायहाणिं गए तत्थ णं मए पउमनाभस्स रण्णो भवणंसि दोवई-देवी-जारिसिया दिट्ठुव्वा यावि होत्था तए णं कण्हे वासुदेवे कच्छुल्लनारयं एवं वयासी-तुब्भं चेव णं देवाणुप्पिया एवं पुव्वकम्मं तए णं से कच्छुल्लनारए कण्हेणं वासुदेवेणं एवं वुत्ते सभाणे उप्पयणिं विज्जं आवाहेइ आवाहेत्ता जामेव दिसिं पाउव्भूए तामेव दिसिं पडिगए

तए णं से कण्हे वासुदेवे दूयं सद्दावेइ सद्दावेत्ता एवं वयासी-गच्छह णं तुमं देवाणुप्पिया हत्थिणाउरं नयरं पडुस्स रण्णो एवमद्धं निवेएहि-एवं खलु देवाणुप्पिया धायसंडदीवे पुरत्थिमद्धं दाहिणइद्धं-भरहवासे अवरकंकाए रायहाणीए पउमनाभभावणंसि दोवईए देवीए पउती उवलत्ता तं गच्छंतु पंच पंडवा चाउरंगिणीए सेणाए सद्धिं संपरिवुडा पुरत्थिम-वेवालीए ममं पडिवालमाणा चिट्ठंतु तए णं से दूए भणइ जाव पडिवालमाणा चिट्ठह तेवि जाव चिट्ठंति तए णं से कण्हे वासुदेवे कोडुविमपुरिसे सद्दावेइ सद्दावेत्ता एवं वयासी-गच्छह णं तुम्भे देवाणुप्पिया सत्ताहिवं भेरिं तालेह तेवि तालेति तए णं तीए सत्ताहियाए भेरीए सद्दं सोद्या समुद्धविजयपामोक्खा दस दसारा जाव छप्पंत्तं बलवगसाहस्सीओ सण्णद्ध-वद्ध [वम्मिय-कवया उप्पीलियसरासण-पट्टिया पिणद्ध-गेविज्जा आविद्ध-विमल-वरविंघ-पट्टा] गहियाउह पहरणा अप्पेगइया हयगया अप्पेगइया गयगया जाव पुरिसवगुरापारिक्खित्ता जेणेव सभा सुहम्मा जेणेव कण्हे वासुदेवे तेणेव उवागच्छंति उवा-गच्छित्ता करयल [परिगहिवं सिरसावत्तं मत्थए अंजलि कट्टु जएणं विजएणं वद्धावेंति तए णं से कण्हे वासुदेवे हत्थिखंधवरगए सकोरेंटमल्लदामेणं छत्तेणं धरिज्जमाणेणं सेचवर [चामराहिं वीइज्ज-माणे हय-गय-रह-पवरजोहकलियाए चाउरंगिणीए सेणाए सद्धिं संपरिवुडे महयाभड-चडगर-रह-पहकर-विंदपरिक्खित्ते] बारवईए नयरीए मज्झमज्जेणं निगच्छइ निगच्छित्ता जेणेव पुरत्थिम-वेवाली तेणेव उवागच्छइ उवागच्छित्ता पंचहिं पंडवेहिं सद्धिं एगयओ मिलइ मिलित्ता खंधा-वारनिवेसं करेइ करेत्ता पोसहसालं अनुप्पविसइ अनुप्पविसित्ता सुद्धियं देवं मणसीकरेमाणे-मणीसकरेमाणे चिट्ठइ तए णं कण्हस्स वासुदेवस्स अट्टमभत्तंसि परिणममाणंसि सुद्धिओ जाव आगाओ भणंतु णं देवाणुप्पिया जं मए कायव्वं तए णं से कण्हे वासुदेवे सुद्धियं देवं एवं वयासी-एवं खलु देवाणुप्पिया दोवई देवी [धायइसंडदीवे पुरत्थिमद्धं दाहिणइद्धं-भरहवासे अवरकंकाए रायहाणीए] पउमनाभभावणंसि साहिया तण्णं तुमं देवाणुप्पिया मम पंचहिं पंडवेहिं सद्धिं अप्पछ-ट्टस्स छण्हं र्हाणं लवणसमुद्धे मग्गं वियराहिं जेणाहं अवरकंकां रायहाणिं दोवईए कूवं गच्छामि

तए णं से सुद्धिए देवे कण्हं वासुदेवं एवं वयासी-किण्णं देवाणुप्पिया जहा चेव पउमनाभस्स रण्णो पुव्वसंगइएणं देवेणं दोवई देवी [जंबुद्दीवाओ दीवाओ भारहाओ वासाओ हत्थिणाउराओ नयराओ जुहिट्टिलस्स रण्णो भवणाओ] साहिया तथा चेव दोवइं देविं धायइसंडाओ दीवाओ भारहाओ [वासाओ अवरकंकाओ रायहाणीओ पउमनाभस्स रण्णो भवणाओ] हत्थिणाउरं साह-रामि उदाह--पउमनाभं रायं सपुरवलवाहणं लवणसमुद्धे पक्खिवामि तए णं से कण्हे वासुदेवे सुद्धियं देवं एवं वयासी-मा णं तुमं देवाणुप्पिया [जहा चेव पउमनाभस्स रण्णो पुव्वसंगइएणं देवेणं दोवई देवी जंबुद्दीवाओ दीवाओ भारहाओ वासाओ हत्थिणाउराओ नयराओ जुहिट्टिलस्स रण्णो भवणाओ साहिया तथा चेव दोवइं देविं धायइसंडाओ दीवाओ भारहाओ वासाओ अवरकंकाओ

रायहाणीओ पउमनामस्स रण्णो भवणाओ हत्थिणाउरं] साहराहि तुमं णं देवाणुप्पिया मम लवण-
समुदे पंचहिं पंडवेहिं सद्धिं अप्पच्छस्स छण्हं रहाणं मग्गं वियराहि सयमेव णं अहं दोवईए कूवं
गच्छामि तए णं से सुद्धिं देवे कण्हं वासुदेवं एवं वयासी-एवं होउ पंचहिं पंडवेहिं सद्धिं अप्पच्छस्स
छण्हं रहाणं लवणसमुदे मग्गं वियरइ तए णं से कण्हे वासुदेवे चाउरंगिणिं सेणं पडिविसज्जेइ
पडिविसज्जेत्ता पंचहिं पंडवेहिं सद्धिं अप्पच्छे छहिं रहेहिं लवणसमुदं मज्झमज्जेणं वीईवयइ
वीईवइत्ता जेयेव अवरकंकारायहाणी जेणेव अवरकंकाए रायहाणीए आगुज्जाणे तेणेव उवा-
गच्छइ उवागच्छित्ता रहं ठवेइ ठवेत्ता दारुवं सारहिं सद्दावेइ सद्दावेत्ता एवं वयासी-गच्छहं णं तुमं
देवाणुप्पिया अवरकंकरायहाणिं अनुप्पविसाहि अनुप्पविसित्ता पउमनाभस्स रण्णो वामेणं पाएणं
पायपीढं अककमिन्ता कंतगोणं लेहं पणामेहि पणामेत्ता तिवलियं भिउडिं निडाले साहट्टु आसुरुत्ते
रुद्धे कुविए चंडिकिकए मिसिमिसेमाणे एवं वयाहि-हंभो पउमनाभा अपत्थियपत्थिया दुरंतपंत-
लक्खणा हीणपुण्णचाउद्दसा सिरि-हिरि-धिइ-कित्ति-परिवाञ्जिया अज्ज न भवसि किण्णं तुमं न
याणासि कण्हस्स वासुदेवस्स भगिणिं दोवइं देविं इहं हव्वमाणेमाणे तं एवमावि गए पच्चप्पिणाहि णं
तुमं दोवइं देविं कण्हस्स वासुदेवरस अहव णं जुद्धसज्जे निग्गच्छाहि एस णं कण्हे वासुदेवे पंचहिं
पंडवेहिं सद्धिं अप्पच्छे दोवईए देवीए कूवं हव्वमागए

तए णं से दारुए सारही कण्हेणं वासुदेवेणं एवं वुत्ते समाणे हट्टुत्ते पडिसुणेइ पडिसुणेत्ता
अवरकंकरायहाणिं अनुपविसइ अनुपविसित्ता जेणेव पउमनाभे तेणेव उवागच्छइ उवागच्छित्ता
करयल [परिगहियं सिरसावतं मत्थए अंजलिं कट्टु जएणं विजणं बद्धावेइ] बद्धावेत्ता एवं थयासो-
एस णं सामी मम विणयपडिवती इना अन्न मम सामिस्स समुहाणत्ति ति कट्टु आसुरुत्ते वामपाएणं
पायपीढं अककमइ अककमिन्ता कुंतगोणं लेहं पणामेइ पणामेत्ता [तिवलियं भिउडिं निडाले साहट्टु
आसुरुत्ते रुद्धे कुविए चंडिकिकए मिसिमिसेमाणे एवं वयासी-हंभो पउमनाभा अणत्थियपत्थिया
दुरंतपंतलक्खणा हीणपुत्र-चाउद्दसा सिरि-हिरि-धिइ-कित्ति-परिवाञ्जिया अज्ज न भवसि किण्णं तुमं
न याणासि कण्हस्स वासुदेवस्स भगिणिं दोवइं देविं इहं हव्वमाणेमाणे तं एवमावि गए पच्चप्पिणाहि
णं तुमं दोवइं देविं कण्हस्स वासुदेवस्स अहव णं जुद्धसज्जे निग्गच्छाहि एस णं कण्हे वासुदेवे पंचहिं
पंडवेहिं सद्धिं अप्पच्छे दोवईए देवीए कूवं हव्वमागए तए णं से पउमनाभे दारुएणं सारहिणा एवं
वुत्ते समाणे आसुरुत्ते रुद्धे कुविए] चंडिकिकए मिसिमिसेमाणे तिवलिं भिउडिं निडाले साहट्टु एवं
वयासी-नप्पिणाभि णं अहं देवाणुप्पिया कण्हस्स वासुदेवस्स दोवइं एस णं अहं सयमेव जुज्झसज्जे
निग्गच्छामि ति कट्टु दारुवं सारहिं एवं वयासी-केवलं भो रायसत्थ्येसु दूए अवज्जे ति कट्टु
असक्कारिय असम्माणिय अवदारेणं निच्छुभावेइ तए णं से दारुए सारही पउमनाभेणं रण्णा
असक्कारिय [असम्माणिय अवदारेणं] निच्छूढे समाणे जेणेव कण्हे वासुदेवे तेणेव उवागच्छइ
उवागच्छित्ता करयल जाव बद्धावेत्ता कण्हं वासुदेवे एवं वयासी-एवं खलु अहं सामी तुब्भं वयणेणं
अवरकंकरायहाणिं गए जाव अवदारेणं निच्छुभावेइ तए णं से पउमनाभे बलवाउवं सद्दावेइ
सद्दावेत्ता एवं वयासी-खिप्पामेव भो देवाणुप्पिया आभिसेक्कं हत्थिरयणं पडिकपेह तयाणंतरं च
णं छेवावरिय-उवदेस-मइ-कण्ण-विकपेहिं मुणिउणेहिं उज्जल-नेवत्थि-हत्थ-परिवत्थियं सुसज्जं
जाव आभिसेक्कं हत्थिरयणं पडिकपेइ पडिकपेत्ता] उवणेत्ति तए णं से पउमनाहे सण्णद्ध-
[बद्ध-यम्भिय-कवए उप्पीलियतरासण-पट्टिं पिणद्ध-गेविञ्जे आविद्ध-विमल-वराधिंध-पट्टे गहि-

याउह-पहरणे। आभिसेक्कं हत्थिरयणं दुरुहइ दुरुहिता हय-गय-जाव विदपरिक्खित्ते जेणेव कण्हे वासुदेवे तेणेव पहारेत्थ गमणाए तए णं से कण्हे वासुदेवे पउमनाभं रायं एज्जमाणं पासइ पासिता ते पंच पंडवे एवं वयासी-हंभो दारगा किण्णं तुब्भे पउमनाभेणं सद्धिं जुञ्झिहिह उदाहु पेच्छिहिह तए णं ते पंच पंडवा कण्हे वासुदेवे एवं वयासी-अहं णं सामी जुञ्झामो तुब्भे पेच्छह तए णं ते पंच पंडवा सण्णद्ध-जाव पहरणा रहे दुरुहंति दुरुहिता जेणेव पउमनाभे राया तेणेव उवागच्छंति उवागच्छंता एवं वयासी-अहं वा पउमनाभे वा राय ति कट्टु पउमनाभेणं सद्धिं संपलगा यावि होत्था

तए णं से पउमनाभे राया ते पंच पंडवे खिप्पामेव हय- महिय- पवरवीर- धाडयविवडि- यच्चिध-धय-पडागे [किच्छोवगयपाणे] दिसोदिसिं पडिसेहेइ तए णं ते पंच पंडवा पउमनाभेणं रण्णा हय-महिय-पवर जाव पडिसेहिया समाणा अत्यामा [अवला अवीरिया अपुरिसक्कारपर-क्कमा] अधारणिज्जमिति कट्टु जेणेव कण्हे वासुदेवे तेणेव उवागच्छंति तए णं से कण्हे वासुदेवे ते पंच-पंडवे एवं वयासी-कहण्णं तुब्भे देवाणुप्पिया पउमनाभेणं रण्णा सद्धिं संपलगा तए णं ते पंच पंडवा कण्हे वासुदेवं एवं वयासी-एवं खलु देवाणुप्पिया अहं तुब्भेहिं अन्नभणुण्णाचा समाणा सण्णद्ध-वद्ध-वम्मिय-कवया रहे दुरुहामो दुरुहेता जेणेव पउमनाभे तेणेव उवागच्छामो उवागच्छिता एवं वयामो-अहं वा पउमनाभे वा रायति कट्टु जाव पडिसेहेइ तए णं से कण्हे वासुदेवे ते पंच पंडवे एवं वयासी-जइ णं तुब्भे देवाणुप्पिया एवं वयंता-अहं नो पउमनाभे रायति कट्टु पउमनाभेणं सद्धिं संपलगंता तो णं तुब्भे नो पउमनाभे हय-महिय-पवर-जाव पडिसेहिया तं पेच्छह णं तुब्भे देवाणु-प्पिया अहं नो पउमनाभे रायति कट्टु पउमनाभेणं रण्णा सद्धिं जुञ्झामि ति रहं दुरुहइ दुरुहिता जेणेव पउमनाभे राया तेणेव उवागच्छइ उवागच्छिता सेयं गोखीरहार-धवलं तण्णतोत्थिय-सिंदु-वार-कुंदेसु-सण्णिगासं निववस्स वलस्स हरिस-जणणं रिउसेण्ण-विणासगाकरं पंचजण्णं संखं परामुसइ परामुसिता मुहवायपूरियं करेइ तए णं तस्स पउमनाभस्स तेणं संखसद्देणं बल-तिभाए हय-जाव पडिसेहिए तए णं से कण्हे वासुदेवे [अइरुग्गवालचंद-इंदधणु-सण्णिगासं वरमहिस-दरिय-दप्पिय दद्धणसिग्गारइयसारं उरगबर-पवरगवल-पवरपरहुय-भमरकुल- नीलि- निद्ध-धंत- धोच-पट्टं निउणोविय-मिसिमिसित-मणिरयण-धटियाजालपरिक्खित्तं तडितरुणकिरण-तवणिज्जवद्धविधं दहरमलयगिरिसिहर-केसरचामरवाल-अद्धचंदविधं काल-हरिय-रत्त- पीयसु-क्किल- बहुण्णहारुणि-संपिण्णद्धजीवं जीवियंतकर] धणुं परामुसइ परामुसिता धणुं पूरेइ पूरेता धणुसदं करेइ

तए णं तस्स पउमनाभस्स दोहो बल-तिभाए तेणं धणुसद्देणं हय-महिय जाव पडिसेहिए ए णं से पउमनाभे राया तिभागवलावसेसे अत्यामे अबले अवीरिए अपुरिसक्कारपरक्कमे अधार-णिज्जमिति कट्टु सिग्गं तुरियं चवलं चंडं जइण वेइयं जेणेव अवरकंका तेणेव उवागच्छइ उवाग-च्छिता अवरकंका रायहाणि अनुपविसइ अनुपविसिता बाराइं पिहेइ पिहेता रोहासत्ते चिइइ ते णं से कण्हे वासुदेवे जेणेव अवरकंका तेणेव उवागच्छइ उवागच्छिता रहं ठवेइ ठवेता रहाओ पद्योरुहइ पद्योरुहिता वेउत्थियसनुधाएणं समोहण्णइ एगं महं नरसीह-रुवं विउब्बइ विउब्बिता महया-महया सद्देणं पायददरियं करेइ तए णं कण्हेणं वासुदेवेणं महया-महया सद्देणं पायददरएणं कएणं समाणेणं अवरकंका रायहाणी संभग-पाणार-गोउराट्टलय-चरिय-तोरण-पल्लत्थिय-पवर-भवण-सिरिधरा सरसरस्स धरणियले सण्णिवइया तए णं से पउमनाभे राया अवरकंका रायहाणि

संभागा- [पागर-गोउराट्टलय-वरिय-त्तोरण-पल्हत्थियपवरभवण-सिरिधरं सरसास्स धरणियत्ते सण्णिवइयं] पासित्ता भीए दोवई देविं सरणं उवेइ ताए णं सा दोवई देवी पउमनाभं रायं एवं वयासी-किण्णं तुमं देवाणुप्पिया न जाणसि कण्हस्स वासुदेवस्स उत्तमपुरिस्स विप्पियं करेमाणे ममं इहं हव्वमाणेमाणे तं एवमवि गए गच्छ णं तुमं देवाणुप्पिया ण्हाए उल्लपडसाडए ओचूलगवत्थनियत्थे अंतेउर-परियलासंपरिवुडे अग्गाइ बराइ रयणाइ गहाय ममं पुरओकाउं कण्हं वासुदेवं करयल जाव पायवडिए सरणं उवेहि पणिवइय-वच्छला णं देवाणुप्पिया उत्तमपुरिसा ताए णं से पउमनाभे दोवईए देवीए एवं वुत्ते समाणे ण्हाए जाव सरणं उवेइ उवेत्ता करयल जाव एवं वयासी- दिट्ठा णं देवाणुप्पियाणं इड्ढी [जुई जसो बलं वीरियं पुरिसक्कारां] -परक्कमे तं खामेमि णं देवाणुप्पिया खमंतु णं देवाणुप्पिया [खंतुमरहंति णं देवाणुप्पिया] नाइ भुओ एवकरणयाए ति कट्ट पंजलिउडे पायवडिए कण्हस्स वासुदेस्स दोवई देविं साहत्थि उवणेइ ताए णं से कण्हे वासलुदेवे पउमनाभं एवं वयासी-हंभो पउमनाभा अपत्थिय पत्थिया दुरंतपंतलक्खणा हीणपुत्रचाउहसा सिरि- हिरिधिइ-कित्ति-परिवज्जिया किण्णं तुमं न जाणासि मम भगिणिं दोवई देविं इहं हव्वमाणेमाणे तं एवमवि गए नत्थि ते ममाहिंतो इवाणिं भयमत्थि ति कट्ट पउमनाभं पडिविसज्जेइ दोवई देविं गेण्हइ गेण्हित्ता रहं दुरुहेइ दुरुहत्ता जेणेव पंच पंडवा तेणेव उवागच्छइ उवागच्छित्ता पंचण्हं पंडवाणं दोवई देविं साहत्थि उवणेइ ताए णं से कण्हे वासुदेवे पंचहिं पंडवेहिं सद्धिं अप्पच्छे छहिं रहेहिं लवणसमुद्धं मण्डमज्जेणं जेणेव जंबुदीवे दीवे जेणेव भारहे वासे तेणेव पहारेत्थ गमणाए 1१३०1-124

(१७७) तेणं कालेणं तेणं समएणं घायइसंडे दीवे पुरत्थिमद्धे भारहे वासे चंपा नामं नवरी होत्था पुत्रभदे चेइए तत्थ णं चंपाए नवरीए कविले नामं वासुदेवे राया होत्था-महताहिमयंत महंत-मलय-मंदर-महिंदसारे वण्णओ तेणं कालेणं तेणं समएणं मुणिसुव्वए अरहा चंपाए पुत्रभदे समोसडे कविले वासुदेवे धम्मं सुणेइ ताए णं से कविले वासुदेवे मुणिसुव्वयस्स अरहओ अंतिए धम्मं सुणेमाणे कण्हस्स वासुदेवस्स संखसद्धं सुणेइ ताए णं तस्स कविलस्स वासुदेवस्स इमेयारूवे अज्झत्थिए चित्तिए पत्थिए मणोगए संकप्पे समुप्पज्जित्था-किमण्णे घायइसंडे दीवे भारहे वासे दोच्चे वासुदेवे समुप्पण्णे जस्स णं अयं संखसद्धे ममं पिव मुहवायपूरए वियंभइ कविला वासुदेवा भद्दाइ मुणिसुव्वए अरहा कविलं वासुदेवं एवं वयासी-से नूणं कविला वासुदेवा ममं अंतिए धम्मं निसामेमाणस्स ते संखसद्धं आकण्णिता इमेयारूवे अज्झत्थिए [चित्तिए पत्थिए मणोगए संकप्पे समुप्पज्जित्था-किमण्णे घायइसंडे दीवे भारहे वासे दोच्चे वासुदेवे समुप्पण्णे जस्स णं अयं संखसद्धे ममं पिव मुहवायपूरए] वियंभइ से नूणं कविला वासुदेवा अट्टे समट्टे हंता अत्थि तं नो खलु कविला एवं भूयं वा भव्यं वा भविस्सं वा जण्णं एगखेत्ते एगजुगे एगसमए णं दुवे अरहंता वा चक्कवट्टी वा बलदेवा वा वासुदेवा वा उप्पज्जिसु वा उप्पज्जित्ति वा उप्पज्जिस्संति वा एवं खलु वासुदेवा जंबुदीवाओ दीवाओ भारहाओ वासाओ हत्थिणाउराओ नयराओ पंडुस्स रण्णो सुण्हा पंचण्हं पंडवाणं भारिया दोवई देवी तव पउमनाभस्स रण्णो पुव्वसंगइएणं देवेणं अवरककं नपरिं साहरिया ताए णं से कण्हे वासुदेवे पंचहिं पंडवेहिं सद्धिं अप्पच्छे छहिं रहेहिं अवरककं रायणाणिं दोवईए देवीए क्वं हव्वमाणे ताए णं तस्स कण्हस्स वासुदेवस्स पउमनाभेणं रण्णा सद्धिं संगामं संगामेमाणस्स अयं संखसद्धे तव मुहवायपरिए इव वियंभइ ताए णं से कविले वासुदेवे मुणिसुव्वयं अरहं वंदइ नमंसइ वंदित्ता नमंसित्ता एवं वयासी-गच्छामि णं अहं भंते कण्हं वासुदेवं उत्तमपुरिसं सरिसपुरिसं पासामि

तए णं मुणिसुव्वए अरहा कविलं वासुदेवं एवं वयासी-नो खलु देवाणुप्पिया एवं भूयं वा भव्वं वा भविस्स वा जण्णं अरहंता वा अरहंतं पासंति चक्कवट्ठी वा चक्कवट्ठीं पासंति बलदेवा वा बलदेवं पासंति वासुदेवा वा वासुदेवं पासंति तहवि य णं तुमं कण्हस्स वासुदेवस्स लवणसमुद्धं मज्झंमज्जेणं वीईवयमाणस्स सेयापीयाइं धयग्गाइं पासिहिसि तए णं से कविले वासुदेवे मुणि-सुव्वयं अरहं वंदइ नमंसइ वंदित्ता नमंसित्ता हत्थिखंधं दुरुहइ दुरुहिता सिग्धं तुरियं चवलं चंडं जइणं वेइयं जेणेव वेलाउले तेणेव उवागच्छइ उवागच्छित्ता कण्हस्स वासुदेवस्स लवणसमुद्धं मज्झंमज्जेणं वीईवयमाणस्स सेयापीयाइं धयग्गाइं पासइ पासित्ता एवं वयइ एस णं मम सरिस-पुरिसे उत्तमपुरिसे कण्हे वासुदेवे लवणसमुद्धं मज्झंमज्जेणं वीईवयइ ति कट्टु पंचयण्णं संखं परामु-सइ परामुसित्ता मुहवावपूरियं करेइ तए णं से कण्हे वासुदेवे कविलस्स वासुदेवस्स संखसइ आयण्णेइ आयण्णेता पंचयण्णं [संखं परामुसइ परामुसित्ता मुहवाव] पूरियं करेइ तए णं इवे वि वासुदेवा संखसइ-सामावारिं करेति तए णं से कविले वासुदेवे जेणेव अवरकंका रायहाणी तेणेव उवागच्छइ उवागच्छित्ता अवरकंका रायहाणि संभग्ग- तोरण जाव पासइ पासित्ता पउमनाभं एवं वयासी-किण्णं देवाणुप्पिया एत्ता अवरकंका रायहाणी संभग्ग- [पागर-गोउराट्टलव-चरिय- तोरण-पल्हत्थिवपवरभवण-सिरिधरा सरसरस्स धरणिचले] सण्णिवइया तए णं से पउमनाभे कविलं वासुदेवं एवं वयासी-एवं खलु सामी जंबुद्वीवाओ दीवाओ भारहाओ वासाओ इहं हव्वमागम्म कण्हेणं वासुदेवेणं तुव्वे परिभूयं अवरकंका जाव सन्निवाडिया तए णं से कविले वासुदेवे पउमनाभस्स अतिए एयमइ सोच्चा पउमनाभं एवं वयाणी-हंभो पउमनाभा अपत्थियपत्थिया दुरंतपंतलक्खणा हीणपुत्रचाउद्दसा सिरि-हिरि-धिइ-कित्ति-परिवज्जिया किण्णं तुमं न जाणसि मम सरिसपुरिसस्स कण्हस्स वासुदेवस्स विप्पियं करेमाणे-आसुरुते [रुट्ठे कुविए चंडिकिए मिसिमि-सेमाणे तिवलियं मिउडिं निलाडे साहइ] पउमनाभं निव्विसयं आणवेइ पउमनाभस्स पुत्तं अवर-कंकाए रायहाणीए महया-महया रायाभिसेएणं अभिसंचइ [अभिसिंचित्ता जामेव दिसि पाउभूए तामेव दिसिं] पडिगए 19३91-125

(१७८) तए णं से कण्हे वासुदेवे लवणसमुद्धं मज्झंमज्जेणं वीईवयमाणे-वीईवयमाणे गंगं उवागए उवागम्म ते पंच पंडवे एवं वयासी-गच्छह णं तुव्वे देवाणुप्पिया गंगं महानइ उत्तरइ जाव ताव अहं सुद्धियं लवणाहिवइं पासामि तए णं ते पंच पंडवा कण्हेणं वासुदेवेणं एवं वुत्ता समाणा जेणेव गंगा महानदी तेणेव उवागच्छंति उवागच्छित्ता एगद्धियाए मग्गण-गवेसणं करेति करेत्ता एगद्धियाए गंगं महानइ उत्तरंति उत्तरित्ता अण्णमण्णं एवं वयंति-पहू णं देवाणुप्पिया कण्हे वासुदेवे गंगं महानइ बाहाहिं उत्तरित्ते उदाहू नो पहू उत्तरित्ते ति कट्टु एगद्धियं नूमेति नूमेत्ता कण्हं वासुदेवं पडिवालेमाणा-पडिवालेमाणा चिद्धंति तए णं से कण्हे वासुदेवे सुद्धियं लवणाहिवइं पासइ पासित्ता जेणेव गंगा महानइ तेणेव उवागच्छइ उवागच्छित्ता एगद्धियाए सब्बओ समंता मग्गण-गवेसणं करेइ करेत्ता एगद्धियं अपासमाणे एगाए बाहाए रहं सतुरगं ससारहिं गेण्हइ एगाए वाहाए गंगं महानइ बासद्धिं जोयणाइं अद्धजोयणं च वित्थिण्णं उत्तरिउं पयत्ते यावि होत्था तए णं से कण्हे वासुदेवे गंगाए महानइए बहुमज्जेदेसभाए संपत्ते समाणे संते तंते परितंते बद्धसेए जाए यावि होत्था तए णं तस्स कण्हस्स वासुदेवस्स इमेयारूवे अज्झत्थिए [चित्तिए पत्थिए मणोगए संकप्पे] समुप्पत्तिस्था-अहो णं पंच पंडवा महाबलवगा जेहिं गंगा महानइ वासद्धिं जोयणाइं अद्धजोयणं च

वित्थिण्णा बाहाहिं उत्तिण्णा इच्छंतएहिं ण पंचहिं पंडवेहिं पउमनाभे हय-महिय-[पवरवीर-घाड्य-विबडिय-चिंघ-घय-पडागे किच्छोवगयपाणे दिसोदिसिं नो पडिसेहिण्ण

तए णं गंगादेवी कण्हस्स वासुदेवस्स इमं एयारूवं अञ्जत्थियं [चिंतियं पत्थियं मणोगयं संकयं] जाणित्ता थाहं वियरइ तए णं से कण्हे वासुदेवे मुहुत्तंतरं समासासेइ समासासेत्ता गंगं महानदिवासट्ठिं [जोयणाइं अद्धजोयणं च वित्थिण्णं बाहाए] उत्तरइ उत्तरित्ता जेणेव पंच पंडवा तेणेव उवागच्छइ उवागच्छित्ता पंच पंडवे एवं वयासी अहो णं तुब्भे देवाणुप्पिया महाबलवगा जेहिं णं तुब्भेहिं गंगा महानईं वासट्ठिं [जोयणाइं अद्धजोयणं च वित्थिण्णा बाहाहिं] उत्तिण्णा इच्छंतएहिं णं तुब्भेहिं पउमनाहे [हय-महिय-पवरवीर-घाड्य-विबडियचिंधधय-पडागे किच्छोवगयपाणे दिसोदिसिं] नो पडिसेहि तए णं ते पंच पंडवा कण्हेणं वासुदेवेणं एवं वुत्ता समाणा कण्हं वासुदेवं एवं वयासी-एवं खलु देवाणुप्पिया अण्हे तुब्भेहिं विसज्जिया समाणा जेणेव गंगा महानईं तेणेव उवागच्छामो उवागच्छित्ता एण्डियाए मग्गण-गवेसणं करेमो [करेत्ता एण्डियाए गंगं महानईं उत्तरेमो उत्तरेत्ता अण्णमण्ण एवं वयामो-पहू णं देवाणुप्पिया कण्हे वासुदेवे गंगं महानईं बाहाहिं उत्तरितए उदाहु नो पहू उत्तरितए त्ति कट्टु एण्डियं] नूमेमो तुब्भे पडिवालेमाणा चिद्दामो तए णं से कण्हे वासुदेवे तेसिं पंचपंडवाणं एयमट्टं सोद्या निसम्म आसुरुत्ते [रुद्धे कुविए चंडिकिए मिसि-मिसेमाणे तिवलियं भिउडिं निडाले साहट्टु] एवं वयासी-अहो णं जया मए लवणसमुदं दुवे जोयणसयसहस्सवित्थिण्णं वीईवइत्ता पउमनाभं हय-महिय-जाव पडिसेहित्ता अवरकंका संभग्गा दोलवई साहत्थि उवणीया तया णं तुब्भेहिं मम माहय्यं न विण्णायं इयाणि जाणिस्सह त्ति कट्टु लोहदंडं परामुसइ पंचणं पंडवाणं रहे सुसुरेइ सुसुरेत्ता पंच पंडवे निव्विसए आणवेइ तत्य णं रहमट्टेणं नामं कोट्टे निविट्टे तए णं से कण्हे वासुदेवे जेणेव सए खंधावारे तेणेव उवागच्छइ उवागच्छित्ता सएणं खंधावारेणं सद्धिं अभिसमण्णागए यावि होत्था तए णं से कण्हे वासुदेवे जेणेव बारवई नयरी तेणेव उवागच्छइ उवागच्छित्ता सयं भवणं अनुप्पविसइ 19३२1-126

(१७९) तए णं ते पंच पंडवा जेणेव हत्थिपाउरे नयरे तेणेव उवागच्छंति उवागच्छित्ता जेणेव पंडू राया तेणेव उवागच्छंति उवागच्छित्ता करयल [परिग्गहियं जाव मत्थए अंजलि कट्टु एवं वयासी-एवं खलु ताओ अण्हे कण्हेणं निव्विसया आणत्ता तए णं पंडू राया ते पंच पंडवे एवं वयासी-कहण्णं पुत्ता तुब्भे कण्हेणं वासुदेवेणं निव्विसया आणत्ता तए णं ते पंच पंडवा पंडुं रायं एवं वयासी-एवं खलु ताओ अण्हे अवरकंकाओ पडिनियत्ता लवणसमुदं दोण्णि जोयणसयसहस्साइं वीईवइत्था तए णं से कण्हे वासुदेवे अण्हे एवं वयइ-गच्छह णं तुब्भे देवाणुप्पिया गंगं महानईं उत्तरह जाव ताव अहं सुद्धियं लवणाहिवईं पासामि एवं तहेव जाय चिद्दामो तए णं से कण्हे वासुदेवे सुद्धियं लवणाहिवईं दह्णं जेणेव गंगा महानईं तेणेव उवागच्छइ तं चेव सत्वं नवरं कण्हस्स चित्ता न बुज्झइ जाव निव्विसए आणवेइ तए णं से पंडू राया ते पंच पंडवे एवं वयासी-दुद्ध णं पुत्ता कयं कण्हस्स वासुदेवस्स विप्पियं करेमाणेहिं तए णं से पंडू राया कौत्ति देविं सद्दावेइ सद्दावेत्ता एवं वयासी-गच्छह णं तुमं देवाणुप्पिए बारवईं नयरीं कण्हस्स वासुदेवस्स एवं निवेएहि-एवं खलु देवाणुप्पिया तुमे पंच पंडवा निव्विसया आणत्ता तुमं च णं देवाणुप्पिया दाहिणइत्तभरहस्स सामी तं संदिसंतु णं देवाणुप्पिया ते पंच पंडवा कयरं देसं वा दिसं वा विदिसं वा गच्छंतु

तए णं सा कौत्ती पंडुणा एवं वुत्ता समाणी हत्थिखंधं दुरुहइ जहा हेट्ठा जाव संदिसंतु णं

पिउच्छा किमागमणपओयणं ते णं सा कीर्ती देवी कण्हं वासुदेवं एवं वयासी-एवं खलु तुमे पुत्ता पंचपंडया निव्विसया आणत्ता तुमं च णं दाहिणइडभरहस्स [सामी तं संदिसंतु णं देवाणुप्पिया ते पंच पंडवा कयरं देसं वा] दिसं वा विदिसिं वा गच्छंतु तए णं से कण्हे वासुदेवे कीर्तिं देविं एवं वयासी-अपूडवयणा णं पिउच्छा उत्तमपुरिसा-वासुदेवा बलदेवा चक्कवट्टी तं गच्छंतु णं पंच पंडवा दाहिणिणं वेयालिं तत्थ पंडुमहुरं निवेसंतु ममं अदिद्वसेवगा भवंतु त्ति कट्टु कीर्तिं देविं सक्कारेइ सम्माणेइ [सक्कारेत्ता सम्माणेत्ता] पडिविसज्जेइ तए णं सा कीर्ती देवी [जेणेव हत्थिणाउडरे नयरं तेणेव उवागच्छइ उवागच्छित्ता] पंडुस्स एयमट्टं निवएइ तए णं पंडूर राया पंच पंडवे सद्दावेइ सद्दावेत्ता एवं वयासी-गच्छह णं तुब्भे पुत्ता दाहिणिणं वेयालिं तत्थ णं तुब्भे पंडुमहुरं निवेसेह तए णं ते पंच पंडवा पंडुस्स रण्णे [एयमट्टं] तहत्ति पडिसुणेत्ति पडिसुणेत्ता सबलवाहणा हवगय- [रह-पवरजोहकलियाए चाउरंगिणीए सेणाए सद्धिं संपरिवुडामहयाभड-घडगर- रह-पहकर- विदपरि-क्खित्ता] हत्थिणाउराओ पडिनिक्खमंत्ति पडिनिक्खमिन्ता जेणेव दक्खिणिणं वेयाली तेणेव उवागच्छंति उवागच्छित्ता पंडुमहुरं नगरिं निवेसंति तत्थवि णं ते विपुलभोग समिति-समण्णागया यावि होत्था 19३३-127

(१८०) तए णं सा दोवई देवी अण्णया कयाइ आयणसत्ता जाया यावि होत्था तए णं सा दोवई देवी नवण्हं मासामं बहुपडिपुत्राणं जाव सुखुवं दारगं पयाया-सूमाल [कोमलयं गयतालुयसमाणं तए णं तस्स णं दारगस्स निव्वत्तवारसाहस्स अम्मापियरो इमं एयारुवं गोण्णं गुणनिष्फण्णं नागधेज्जं करंति] जम्हा णं अहं एस दारए पंचण्हं पंडवाणं पुते दोवईए देवीए अत्तए तं होउ णं इमस्स दारगस्स नामधेज्जं पंडुसेणे-पंडुसेणे तए णं तस्स दारगस्स अम्मापियरो नामधेज्जं करंति पंडुसेणत्ति [तए णं तं पंडुसेणं दारयं अम्मापियरो साइरंगव्वासाजयायं वेव सोहणंसि तिहि-करण-मुहुत्तंसि कलायरियस्स उवणंति तए णं से कलायरिए पंडुसेणं कुमारं लेहाइयाओ गणियप्प-हाणाओ सउणुयपञ्चवसाणाओ वावरांरिं कलाओ सुत्तओ य अत्थओ य करणाओ य सेहावेइ सिक्खावेइ] जाव अलंभोगसमत्थे जाए जुवराया जाव विहरइ धेरा समोसद्दा परिसा निग्गवा पंडवा निग्गया धम्मं सोद्धा एवं वयासी-जं नवरं-देवाणुप्पिया दोवई देविं आपुच्छामो पंडुसेणं च कुमारं रज्जे ठावेमो तओ पच्छा देवाणुप्पियाणं अंतिए मुंडे भवित्ता [णं अगाराओ अण्णारिवं] पच्चयाओ अहासुहं देवाणुप्पिया

तए णं ते पंच पंडवा जेणेवा सए गिहे तेणेव उवागच्छंति उवागच्छित्ता दोवई देविं सद्दावेत्ति सद्दावेत्ता एवं वयासी-एवं खलु देवाणुप्पिया अन्हेहिं धेराणं अंतिए धम्मं निसंते जाव पच्चयामो तुमं णं देवाणुप्पिए किं करेसि तए णं सा दोवई ते पंच पंडवे एवं वयासी-जइ णं तुब्भे देवाणुप्पिया संसार-भउव्विग्गा जाव पच्चयह मम के अण्णे आलंवे वा [आहारे वा पडिबंघे वा] भविस्सइ अहं पि य णं संसारभउव्विग्गा देवाणुप्पिएहिं सद्धिं पच्चइस्सामि तए णं ते पंच पंडया [कोडुंवियापुरिसे सद्दावेइ सद्दावेत्ता एवं वयासी-खिप्पमेवा भो देवाणुप्पिया पंडुसेणस्स कुमारस्स महत्थं पहाधं महरिहं विउलं रावाभिसेहं उवट्टवेह] पंडुसेणस्स अभिसेओ जाव राया जाए जाव रज्जं पसाहेभाणे विहरइ तए णं ते पंच पंडवा दोवई य देवी अण्णया कयाइ पंडुसेणं रायाणं आपुच्छंति तए णं से पंडुसेणं राया कोडुंवियपुरिसे सद्दावेइ सद्दावेत्ता एवं वयासी-खिप्पामेव भो देवाणुप्पिया निक्ख-मणाभिसेयं करेह जाव पुरिससहस्सवाहिणीओ सिवियाओ उवट्टवेह जाव सिवियाओ पच्चोरुहंति

जेणेव थेरा भगवंतो तेणेव उवागच्छंति उवागच्छिता थेरं भगवंतं तिकखुत्तो आयाहिण जाव नमंसिता एवं वयासी-आलिते णं भंते लोए जाव समणा जाया चोह्मस्स पुव्वाइं अहिज्जंति अहिज्जिता बहूणि वासाणि छट्ठम-दसम-दुवालसेहिं मासद्धमासखमणेहिं अप्पाणं भावेमाणा विहरंति 19३४1-128

(१८१) तए णं सा दोवई देवी सीयाओ पन्नोरुहइ जाव पव्वइया सुव्वयाए अज्जा सिस्सिणियताए दलयंति एक्कारस अंगाई अहिज्जइ बहूणि वासाणि छट्ठम-दसम-दुवालसेहिं मासद्धमासखमणेहिं अप्पाणं भावेमाणी विहरइ 19३५1-129

(१८२) तए णं ते थेरा भगवंतो अण्णया कयाइ पंडुमहुराओ नयरीओ सहस्संबवणाओ उज्जाणाओ पडिनिक्खमंति पडिनिक्खमिता बहिया जणवयविहारं विहरंति तेणं कालेणं तेणं समएणं अरहा अरिद्वनेमी जेणेव सुरद्धाजणवए तेणेव उवागच्छइ उवागच्छिता सुरद्धाजणवयंसि संजमेणं तवसा अप्पाणं भावेमाणे विहरइ तए णं बहुजणो अण्णमण्णस्स एवमाइक्खइ भासइ पन्नवेइ परुवेइ-एवं खलु देवाणुप्पिया अरहा अरिद्वनेमी सुरद्धाजणवए [संजमेणं तवसा अप्पाणं भावेमाणे] विहरइ तए णं ते जुहिद्विलपामोक्खा पंच अणगारा बहुजणस्स अंतिए एयमद्वं सोच्चा अण्णमण्णं सद्दावेंति सद्दावेत्ता एवं वयासी-एवं खलु देवाणुप्पिया अरहा अरिद्वनेमी पुव्वाणुपुक्खि चरमाणे गामाणुगामं दूइजमाणे [सुहंसुहेणं विहरमाणे सुरद्धाजणवए संजमेणं तवसा अप्पाणं भावेमाणे] विहरइ तं सेयं खलु अहं थेरे भगवंते आपुच्छिता अरहं अरिद्वनेमि वंदणाए गमित्तए अण्णमण्णस्स एयमद्वं पडिसुणेति पडिसुणेत्ता जेणेव थेरा भगवंतो तेणेव उवागच्छंति उवागच्छिता थेरे भगवंते वंदंति नमंसंति वंदित्ता नमंसित्ता एवं वयासी-इच्छामो णं तुब्भेहिं अब्भणुण्णाया समाणा अरहं अरिद्वनेमि [वंदणाए] गमित्तए अहासुहं देवाणुप्पिया तए णं ते जुहिद्विलपामोक्खा पंच अणगारा थेरेहिं अब्भणुण्णाया समाणा थेरे भगवंते वंदंति नमंसंति वंदित्ता नमंसित्ता थेराणं अंतियाओ पडिनिक्खमंति पडिनिक्खमिता मासंमासेणं अणिक्खित्तेणं तवोकम्पेणं गामाणुगामं दूइजमाणे [सुहंसुहेणं विहरमाणे] जेणेव हत्थकम्पे नयरे तेणेव उवागच्छंति उवागच्छिता हत्थकम्पस्स बहिया सहस्संबवणे उज्जाणे [संजमेणं तवसा अप्पाणं भावेमाणा] विहरंति

तए णं ते जुहिद्विलवज्जा चत्तारि अणगारा मासक्खमणपारणए पढमाए पोरिसीए सज्जायं करेति वीयाए ज्ञाणं ज्ञायंति एवं जहा गोयमसामी नवरं जुहिद्विलं आपुच्छंति जाव अडमाणे बहुजणसद्द निसामेति-एवं खलु देवाणुप्पिया अरहा अरिद्वनेमी उज्जंतसेलसिहरे मासिएणं भत्तेणं अपाणएणं पंचहिं छत्तीसेहिं अणगारसएहिं सद्धिं कालगए [सिद्धे बुद्धे मुत्ते अंतगडे परिनिब्बुडे सव्वदुक्ख] प्पहीणे तए णं ते जुहिद्विलवज्जा चत्तारि अणगारा बहुजणस्स अंतिए एयमद्वं सोच्चा निसम्मं हत्थकम्पाओ नयराओ पडिनिक्खमंति पडिनिक्खमिता जेणेव सहस्संबवणे उज्जाणे जेणेव जुहिद्विले अणगारे तेणेव उवागच्छंति उवागच्छिता भत्तापाणं पच्चुवेक्खंति पच्चुवेक्खित्ता गमणाग-मणस्स पडिक्कमंति पडिक्कमिता एसमणेसणं आलोएंति आलोएत्ता भत्तापाणं पडिदंसेति पडिदंसेत्ता एवं वयासी-एवं खलु देवाणुप्पिया [अरहा अरिद्वनेमी उज्जंतसेलसिहरे मासिएणं भत्तेणं अप्पाणएणं पंचहिं छत्तीसेहिं अणगारसएहिं सद्धिं] कालगए तं सेयं खलु अहं देवाणुप्पिया इमं पुव्वगहियं भत्तापाणं परिद्वेत्ता सेत्तुअं पच्चयं सणियं-सणियं दुरुहित्तए संलेहणा- झूसणा- झोसि-याणं कालं अणवेक्खमाणेणं विहरित्तए ति कट्ट अण्णमण्णस्स एयमद्वं पडिसुणेति पडिसुणेत्ता तं

पुव्वगच्छित्तं मत्तपाणं एगंते परिवट्ठवेति परिवट्ठेत्ता जेणेव सेतुज्जे पव्वए तेणेव उवागच्छित्ति उवागच्छित्ता सेतुज्जं पव्वयं सणियं-सणियं दुरुहंति जाव कालं अणवकंखमाणा विहरंति तए णं ते जुह्मिद्विलपामोक्खा पंच अणगारा सामाइयमाइयाइं चोदसपुव्वाइं अहिज्जित्ता बहूणि वासाणि सामण्णपरियमं पाउणित्ता दोमासियाए संलेहणाए अत्ताणं झोसेत्ता जस्सट्ठाए कीरइ नग्गभावे जाव तमट्ठभाराहेति आराहेत्ता अनंतं [केवलवरनाणदंसणं समुप्पाडेत्ता तओ पच्छा सिद्धा बुद्धा मुत्ता अंतगडा परिनिव्वुडा सव्वदुक्खप्पहीणा] ।१३६।-१३०

(१८३) तए णं सा दोवई अज्जा सुव्वयाणं अज्जियाणं अंतिए सामाइयमाइयाइं एककारस अंगाइं अहिज्जित्ता बहूणि वासाणि सामण्णपरियमं पाउणित्ता मासियाए संलेहणाए अत्ताणं झोसेत्ता आलोइय-पडिक्कंता कालमासे कालं किच्चा बंधलोए उदवण्णा तत्थ णं अत्थेगइयाणं देवाणं दस सागरोवमाइं ठिई पत्रत्ता तत्थ णं दुवयस्स वि देवस्स दससागरोवमाइं ठिई से णं भंते दुवए देवे ताओ [देवलोगाओ आउक्खएणं ठिइक्खएणं भवक्खएणं अणंतरं चयं चइत्ता जाव महाविदेहे वासे सिज्जिहिइ बुज्जिहिइ मुच्चिहिइ परिनिव्वहिइ सव्वदुक्खाण] मंतं काहिइ एवं खलु जंबू समणेणं भगवया महावीरेणं आइगरेणं तित्यगरेणं जाव सिद्धिगइनामधेज्जं ठाणं संपत्तेणं सोलसमस्स नायज्जयणस्स अयमट्ठे पत्रत्ते त्ति वेमि ।१३७।-१३१

● पदमे सुयक्खंधे सोलसयं अञ्जयणं समंतं ●

सत्तरसमं अञ्जयणं—आइण्णे

(१८४) जइ णं भंते समणेणं भगवया महावीरेणं जाव संपत्तेणं सोलसमस्स नायज्जयणस्स अयमट्ठे पत्रत्ते सत्तरसमस्स णं भंते नायज्जयणस्स के अट्ठे पत्रत्ते वण्णओ तत्थ णं कणगकेऊ नामं राया होत्था-वण्णओ तत्थ णं हत्थिसीसे नयरे बहवे संजत्ता-नावावाणियगा परिवसंति-अइडा जाव बहुजणस्स अपरिभूया यावि होत्था तए णं तेसिं संजत्ता-नावावाणियगाणं अन्नया कयाइ एगयओ [सहियाणं इपेयारूवे मिहोक्का-समुल्लवे समुप्पज्जित्था-सेयं खलु अहं गणिमं च धरिमं च मेज्जं च परिच्छज्जं च भंडगं गहाय लवणसमुदं पोयवहणेणं ओगाहेत्ताए त्ति कट्ठु] जहा अरहत्तए जाव लवणसमुदं अणेगाइं जोयणसयाइं ओगाढा यावि होत्था तए णं तेसिं [संजत्ता-नावावाणियगाणं लवणसमुदं अणेगाइं जोयणसयाइं ओगाढाणं समाणाणं] बहूणि उप्पाइयसयाइं [पाउव्व्याइं तं जहा-अकाले गज्जिए अकाले विज्जुए अकाले थणियसइे कालियवाए य समुत्थिए तए णं सा नावा तेणं कालियवाएणं आहुणित्तमाणी-आहुणित्तमाणी संचालित्तमाणी-संचालित्तमाणी संखोहिज्ज-माणी-संखोहिज्जमाणी तत्थेव परिभवइ तए णं से निज्जामए नट्टमईए नट्टसुईए नट्टसण्णे मूढदि-साभाए जाए यावि होत्था-न जाणइ कवरं देसं वा दिसं वा विदिसं वा पोय अवहिए त्ति कट्ठु ओहयमणसंकपे [करतलपल्लत्थमुहे अइज्जाणीवगाए] झियायइ तए णं ते बहवे कुच्छिधारा य कण्णधारा य गम्बेल्लगा य संजत्ता-नावावाणियगा य जेणेव से निज्जामए तेणेव उवागच्छंति उवागच्छित्ता एवं वयासी-किण्णं तुमं देवाणुप्पिया ओहयमणसंकपे जाव झियायसि तए णं से निज्जामए ते बहवे कुच्छिधारा य कण्णधारा य गम्बेल्लगा य संजत्ता-नावावाणियगा य एवं वयासी-एवं खलु अहं देवाणुप्पिया नट्टमईए [नट्टसुईए नट्टसण्णे मूढदिसाभाए जाए यावि होत्था-न जाणइ कवरं देसं वा दिसं वा विदिसं वा पोयवहणं] अवहिए त्ति कट्ठु तओ ओहयमणसंकपे जाव झियायसि

तए णं से कुच्छिधारा य कण्णधारा य गम्भेज्जगा य संजत्ता- नावावाणियगा य तस्स निज्जामयसंतिए एयमहुं सोच्चा निसम्भं भीया तत्था उच्चिग्गा उच्चिग्गमणा पहाया कयबलिकम्मा करयल [परिग्गहियं दसनहं सिरसावत्तं मत्थए अंजलिं कड्डु] बहूणं इंदारणं य खंघाणं य [रूहाणं य सिदाणं य वेसमणाणं य नागाणं य भूयाणं य जक्खणाणं य अज्ज-कोट्टिकिरियाणं य बहूणि उवाइय-सयाणि] उवायमाणा-उवायमाणा चिद्धंति तए णं से निज्जामए तओ मुहुत्तंतरस्स लद्धमईए लद्धसुईए लद्धसण्णे अमूढदिसाभाए जाए यावि होत्था तए णं से निज्जामए ते बहवे कुच्छिधारा य कण्णधारा य गम्भेज्जगा य संजत्ता-नावावाणियगा य एवं वयासी-एवं खलु अहं देवाणुप्पिया लद्धमईए लद्धसुईए लद्धसण्णे अमूढदिसाभाए जाए अम्हे णं देवाणुप्पिया कालियदीवतेणं संघूढा एस णं कालियदीवे आलोककइ तए णं से कुच्छिधारा य कण्णधारा य गम्भेज्जगा य संजत्ता-नावावाणियगा य तस्स निज्जामगस्स अंतिए एयमहुं सोच्चा हड्डुत्ता पयक्खिण्णाणुकूलेणं वाएणं जेणेव कालियदीवे तेणेव उवगच्छंति उवागच्छिता पोयवहणं लंबेति लंबेत्ता एगड्डियाहिं कालिय-दीवं उत्तरंति तत्थ णं बहवे हिरण्णागरे य सुवण्णागरे य रयणागरे य वइरागरे य बहवे तत्थ आसे पासंति किं ते - हरिरेणु-सोणिउत्तग[सकविलमज्जारपायकुक्कुड-वोंडसमुग्गयसामवण्णा गोहूम-गोरांग-गोरपाडल-गोरा पवालवण्णा य धूमवण्णा य केइ तलपत्त-रिद्धवण्णा य सालिवण्णा य भासवण्णा य केइ जंपिय-तिल-कीडगा य सोलोय-रिद्धगा य पुंड-पइया य कणग पिड्डा य केइ चक्कागपिद्धवण्णा सारसवण्णा य हंसवण्णा य केइ केइत्थ अम्भवण्णा पक्कतल - मेघवण्णा य बाहुवण्णा केइ संज्ञाणुरागसरिसा सुयमुह- गुंज- द्दाराग-सरिसत्थ केइ एत्तापाडलस - गोरा सामलया-गवलसामला पुणो केइ बहवे अण्णे अणिदेसा सामा कासीसरत्तपीया अच्चंतविसुद्धा वि य णं आइण्णगजाइ-कुल-विणीय-गयमच्छरा हयवरा जहोवएस-कम्मवाहिणो वि य णं सिक्खा विणीयविणया लंघण-वग्गण-धावण-धोरण-तिवई जईण-सिक्खिन्नय-गई किं ते मणसा वि उच्चिहंताइ अणेगाइ आससयाइ पासंति] तए णं ते आसा वाणियए पासंति तेसि गंधं आघायंति आघाइत्ता भीया तत्थ उच्चिग्गा उच्चिग्गमणा तओ अणेगाइ जोयणाइ उब्भंति ते णं तत्थ पउर-गोयरा पउर-तणपाणिया निब्बया निरुच्चिग्गा सुहंसुहेणं विहरंति

तए णं ते संजात्ता- नावा- वाणियगा अण्णमण्णं एवं वयासी-किण्णं अम्हं देवाणुप्पिया आसेहिं इमे णं बहवे हिरण्णगरा य सुवण्णगरा य रयणागरा य वइरागरा य तं सेयं खलु अम्हं हिरण्णस्स सुवण्णस्स य रयणस्स य वइरस्स य पोयवहणं भरिंताए ति कड्डु अण्णमण्णस्स एयमहुं पडिसुणेंति पडिसुणेत्ता हिरण्णस्स य सुवण्णस्स य रयणस्स य वइरस्स य तणस्स य कट्टस्स य अन्नस्स य पाणियस्स य पोयवहणं भरंति भरंता पक्खिण्णाणुकूलेणं वाएणं जेणेव गंभीरए पोयपट्टणे तेणेव उवागच्छंति उवागच्छिता पोयवहणं लंबेति लंबेत्ता सगडी-सागडं सज्जेति सज्जेत्ता तं हिरण्णं [य सुवण्णं च रयणं च] वइरं च एगड्डियाहिं पोयवहणाओ संचारंति संचारंता सगडी-सागडं संजो-एंति जेणेव हत्थिसीसए नयरं तेणेव उवागच्छंति उवागच्छिता हत्थिसीसयस्स नयरस्स बहिया अणु- ज्ञाणे सत्थनिवेसं करंति करंता सगडी-सागडं मोएंति मोएत्ता महत्थं [महत्थं महरिहं विउलं रायारिहं] पाहुडं गेण्हंति गेण्हिन्ता हत्थिसीसयं नयरं अनुप्पविसंति अनुप्पविसित्ता जेणेवे से कण-गकेऊ राया तेणेव उवागच्छंति उवागच्छिता तं महत्थं [महत्थं महरिहं विउलं रायारिहं] पाहुडं उवणेति तए णं से कणगकेऊ राया तेसि संजत्ता-नावावाणियगणं तं महत्थं जाव पडिच्छइ

पडिच्छिता।१३८।-१३८

(१८५) ते संजत्ता-नावावाणियगे एवं वयासी-तुम्हे णं देवाणुप्पिया गामागर- [नगर-
खेड-कब्बड-दोणमुह-मडंब-पट्टण-आसम-निगम-संवाह-सण्णिवेसाइं] आहिंडह लवणसमुद्धं च
अपिक्खणं-अभिक्खणं पोयवहणेणं ओगाहेह तं अत्थियाइं च केइ मे कहिंचि अच्छेरए दिट्ठपुव्वे
तए णं ते संजत्ता-नावावाणियगा कणगकेउं एवं वयासी-एवं खलु अन्हे देवाणुप्पिया इहेव
हत्थिसीसे नवरे परियसामो तं चेव जाव कालियदीवतेणं संसूद्धा तत्थ णं दहवे हिरण्णागरे य
[सुदण्णागरे य रयणागरे य वइरागरे च] बहवे तत्थ आसे पासामो किं ते हरिरेणु जाव अन्धं गंधं
आघावंति आघाइत्ता भीवा तत्था उव्विणा उव्विग्गमणा तओ अणेगाइं जोयणाइं उव्वमंति तए णं
सामो अन्हेहिं कालियदीवे ते आसा अच्छेरए दिट्ठपुव्वे तए णं से कणगकेऊ तेसिं संजत्ता-
नावावाणियगाणं अंतिए एयमद्धं सोच्चा निसम्मं ते संजत्ता-नावावाणियए एवं वयासी-गच्छह णं
तुम्हे देवाणुप्पिया मम कोडुंबियपुरिसेहिं सद्धिं कालियदीवाओ ते आसे आणेह तए णं ते संजत्ता-
नावावाणियगा एवं सामि ति आणाए विणएणं वयणं पडिसुणेति तए णं से कणगकेऊ
कोडुंबियपुरिसे सद्दावेइ सद्दावेत्ता एवं वयासी-गच्छह णं तुम्हे देवाणुप्पिया संजत्ता- नावावाणि-
यएहिं सद्धिं कालियदीवाओ मम आसे आणेह तेवि पडिसुणेति तए णं ते कोडुंबियपुरिसा सगडी-
सागडं सज्जेति सज्जेत्ता तत्थ णं बहूणं वीणाण च वड्ढकीणं य भामरीणं य कच्छपीण य भंभाण च
छत्थामरीण य चित्तवीणाण य अण्णेसिं च बहूणं सोइंदिय-पाउग्गाणं दव्वाणं सगडी-सागडं भरेति
बहूणं किण्हाण य जाव सुक्किलाण य कड्ढकम्माण य चित्तकम्माण य पोत्थकम्माण य लेप्पकम्माण
य गंथिमाण य वेड्ढिमाण य पूरिमाण य संघाइमाण य अण्णेसिं च बहूणं चक्खिदियपाउग्गाणं
दव्वाणं सगडी-सागडं भरेति बहूणं कोट्टपुडाण य [पत्तपुडाण य चोयपुडाण य तगरपुडाण य एला-
पुडाण य हिरिवेरपुडाण य उरीरपुडाण य चंपगपुडाण य मरुगपुडाण य दमगपुडाण य जाति-
पुडाण य जुहियापुडाण य मल्लियापुडाण य वासंति- चापुडाण य केयइपुडाण य कप्पूरपुडाण य
पाडलपुडाणय।अण्णेसिं च बहूणं घाणिंदिय-पाउग्गाणं दव्वाणं सगडी-सागडं भरेति बहुस्सखंडस्स य
गुलस्स य सक्कराए य मच्छंडिवाए य पुप्फुत्तर-पउमुत्तरआए अण्णेसिं च जिक्खिंदिय-पाउग्गाणं
दव्वाणं सगडी-सागडं भरेति बहूणं कोयवाणं य कंबलाणं य पावाराण य नवतवाणं य मलयाण य
मसूराण य सिलावट्टाण य जाव हंसगभमाण य अण्णेसिं च फासिंदिय-पाउग्गाणं दव्वाणं सगडी-
सागडं भरेति भरेत्ता सगडी-सागडं जोयंति जोइत्ता जेणेव गंभीरए पोयट्टाणे तेणेव उवागच्छंति
सगडी-सागडं पोएंति मोएत्ता पोयवहणं सज्जेति सज्जेत्ता तेसिं उक्किट्ठाणं सह- फरिस- रस- रूव-
गंधाणं कड्ढस्स य तणस्स य पाणियस्स य तंदुलाण य समियस्स य गोरसस्स य जाव अण्णेसिं च
बहूणं पोयवहणपाउग्गाणं पोयवहणं भरेति भरेत्ता दक्खिणाणुकूलेणं दाएणं जेणेव कालियदीवे
तेणेव उवागच्छंति उवागच्छिता पोयवहण लंबेति लंबेत्ता ताइ उक्किट्ठाइं सह- फरिस- रस-
रूव-गंधाइं एगट्ठियाहिं कालियदीवं उत्तरेति जहिं-जहिं च णं ते आसा आसयंति वा सयंति वा
चिद्धंति वा तुयद्धंति वा तहिं तहिं च णं ते कोडुंबियपुरिसा ताओ वीणाओ य जाव चित्तवीणाओ य
अण्णाणि य बहूणि सोइंदिय पाउग्गाणि य दव्वाणि समुदीरेमाणा-समुदीरेमाणा ठवेति तेसिं च
परिपेरंतेणं पाए ठवेति ठवेत्ता निच्चला निष्फंदा तुसिणीया चिद्धंति

जत्थ-जत्थ ते आसा आसयंति वा सयंति वा चिद्धंति वा तुयद्धंति वा तत्थ तत्थ णं ते

कोडुंवियपुरिसा बहूणि किण्हाणि य नीलाणि य लोहियाणि य हलिद्वाणि या मुक्किलाणि य कट्टकम्पाणि य जाव संधाड्माणि य अण्णाणि य बहूणि चक्खिदिय-पाउग्गाणि य दव्वाणि ठवेति तेसिं परिपेरंतेणं पासए ठवेति ठवेत्ता निच्चला निष्फंदा तुसिणीया चिद्धंति जत्थ-जत्थ ते आसा आसयंति वा सयंति वा चिद्धंति वा तुयद्धंति वा तत्थ-तत्थ णं ते कोडुंवियपुरिसा तेसिं बहूणं कोडुपुडाण य जाव पाडलपुडाण य अण्णेसिं च बहूणं धाणिदिय-पउग्गा णं दव्वाण पुंजे य नियरे य करंति करेत्ता तेसिं परिपेरंतेणं [पासए ठवेति ठवेत्ता निच्चला निष्फंदा तुसिणीया] चिद्धंति जत्थ-जत्थ ते आसा आसयंति वा सयंति वा चिद्धंति वा तुयद्धंति वा तत्थ-तत्थ णं ते कोडुंवियपुरिसा जाव पुप्फुतर-पउमुत्तराए अण्णेसिं च बहूणं जिब्भिदिय-पाउग्गाणं दव्वाणपुंजे य नियरे य करंति करेत्ता वियरए खणंति खणित्ता गुलपाणगस्स खंडपाणगस्स बोरपाणगस्स अण्णेसिं च बहूणं पाणाणं वियरए भरेति भरेत्ता तेसिं परिपेरंतेणं पासए ठवेति जाव चिद्धंति जहिं-जहिं च णं ते आसा आसयंति वा सयंति वा चिद्धंति वा तुयद्धंति वा तहिं-तहिं च णं ते कोडुंवियपुरिसा बहवे कोयवथा जाव सिलावट्टया अण्णाणि य फासिंदिय-पाउग्गाइ अत्युय-पच्चत्युयाइं ठवेति ठवेत्ता तेसिं परिपेरं-तेणं पासए ठवेति जाव चिद्धंति तए णं ते आसा जेणेव ते उक्किक्कहा सद्-फरिस-रस-रूव-गंधा तेणेव उवागच्छंति तत्थ णं अत्येगइया आसा अपुब्बा णं इमे सद्-फरिस-रस-रूव-गंधंति कट्ट तेसु उक्किक्कट्टेसु सद्- फरिस-रस-रूव-गंधेसु अमुच्छिंथा अगद्धिया अगिद्धा अणज्जोववण्णा तेसिं उक्किक्कट्टाणं सद्-जाव-गंधाणं दूरंदूरेणं अवक्कमंति ते णं तत्थ पउर-गोयरा पउर-तणपाणिया निब्बमया निरुव्विग्गा सुहंसुहेणं विहरंति एवामेव समणाउसो जो अहं [निग्गंथो वा निग्गंथी वा आयरियउवज्जायाणं अंतिए मुंडे भविता अगाराओ अणगारियं पव्वइए समाणे] सद्- फरिस-रस-रूव-गंधेसु नो सज्जइ नो रज्जइ नो गिज्जइ नो मुज्जइ नो अज्जोववज्जइ से णं इहलोए चेव बहूणं समणाणं बहुणं समणीणं बहूणं सावयाणं बहूणं सावियाण य अच्चाणिजे जाव चाउरंते संसारकंतरं वीईवइस्सइ । १३१।-१३३

(१८६) तत्थ णं अत्येगइया आसा जेणेव उक्किक्कहा सद्-फरिस-रस-रूव-गंधा तेणेव उवागच्छंति तेसु उक्किक्कट्टेसु सद्-फरिस-रस-रूव-गंधेसु मुच्छिंथा गद्धिया गिद्धा अज्जोववण्णा आसेविउं पयत्ता यावि होत्था तए णं ते आसा ते उक्किक्कट्टे सद्-फरिस-रस-रूव-गंधे आसेवमाणा तेहिं बहूहिं कूडेहि य पासेहि य गलएसु य पाएसु य बज्जंति तए णं ते कोडुंवियपुरिसा ते आसे गिण्हंति गिण्हित्ता एगद्धियाहिं पोयवहणे संचारंति कट्टस्स य [तणस्स य पाणियस्स य तंदुलाण य समियस्स य गोरसस्स च जाव अण्णेसिं च बहूणं पोयवहणपाउग्गामं पोयवहणं] भरेति तए णं ते संजत्ता-नावावाणियगा दक्खिणाणुकूलेणं वाएणं जेणेव गंधीरए पोयपट्टणे तेणेव उवागच्छंति उवागच्छित्ता पोयवहणं लंवेति लंवेत्ता ते आसे उत्तारंति उत्तारेत्ता जेणेव हत्थिसीसे नयरे जेणेव कणगकेऊ राया तेणेव उवागच्छंति उवागच्छित्ता करयल [परिग्गहियं दसनहं सिरसावत्तं मत्थए अजलं कट्ट जएणं विजएणं] वद्धावेति ते आसे उवणंति तए णं से कणगकेऊ राया तेसिं संजत्ता-नावावाणियगाणं उस्सुंके वियरइ सक्कारेइ सम्माणेइ सक्कारेत्ता सम्माणेत्ता पडिविसज्जेइ तए णं से कणगकेऊ राया कोडुंवियपुरिसे सद्दावेइ सद्दावेत्ता सक्कारेइ जाव पडिविसज्जेइ तए णं से कणगकेऊ राया आसमद्दए सद्दावेइ सद्दावेत्ता एवं वयासी-तुत्थे णं देवाणुप्पिया मम आसे विणाएह तए णं ते आसमद्दगा तहत्ति पडिसुणंति पडिसुणेत्ता ते आसे बहूहिं मुहबंधेहि य कण्णबंधेहि य

नासाबंधेहि य वालबंधेहिं य खुरबंधेहि य कडगबंधेहि य खलिणबंधेहि य ओवीलणाहि य पडयाणेहि य अंकणाहि य वेत्तप्पहारेहि य लयप्पहारेहि य कसप्पहारेहि य छिवप्पहारेहि य विणयंति विणइत्ता कणगकेउत्स रण्णो उवणोति तए णं से कणगकऊ राया ते आसमहए सक्का- रेइ जाव पडिविसंजेइ तए णं ते आसा बहूहिं मुहबंधिहि य जाव छिवप्पहारेहि य बहूणि सारीर- माणसाइ दुक्खाइ पावेति एवामेव समणाउसो जो अहं निगंथो वा [निगंथी वा आयरिय- उवज्जायणं अंतिए मुंडे भविता अगाराओ अणगारियं] पव्वइए समाणे इहेसु सद्द- फरिस- रस- रूव-गंधेसु सज्जइ रज्जइ गज्जइ मुज्जइ अज्जोववज्जइ से णं इहलोए चेव बहूणं समणाणं बहूणं समणीणं बहूणं सावगाणं बहूणं साविचाण य हीलणिजे जाव चाउरंतं संसारकंतरं भुज्जो-भुज्जो अनुपरियट्टिस्सइ ११४०१-१३४

- (१८७) कल-रिभिय-महुर-तंती-ताल-वंस-कउहाभिरामेसु
सहेसु रज्जामाणा रमंति सोईदिय-वसइ ॥३३॥-१
- (१८८) सोईदिय-दुद्धंतत्तणस्स अह एत्तिओ हवइ दोसो
दिविग-रूयमसहंतो वरुबंधं तित्तिरो पत्तो ॥३४॥-२
- (१८९) थण-जहण-वयण-कर-चरण-नयण-गव्विय-विलासयगईसु
रूवेसु रज्जामाणा रमंति चक्खिदिय-वसइ ॥३५॥-३
- (१९०) चक्खिदिय-दुद्धंतत्तणस्स अह एत्तिओ हवइ दोसो
जं जलणंमि जलंते पडइ पयंगो अबुद्धीओ ॥३६॥-४
- (१९१) अगरुवर-पवरधूवण-उउयमच्छाणुलेवणविहीसु
गंधेसु रज्जामाणा रमंति धाणिदिय-वसइ ॥३७॥-५
- (१९२) धाणिदिय-दुद्धंतत्तणस्स अह एत्तिओ हवइ दोसो
जं ओसहिगंधेणं विलाओ निद्धावई उरगो ॥३८॥-६
- (१९३) तित्त-कडुपं कसायं महुरं बहुखज्ज-पेज्ज-त्तेज्जेसु
आसावमि उ गिद्धा रमंति जिठ्ठिमदिय-वसइ ॥३९॥-७
- (१९४) जिठ्ठिमदिय-दुद्धंतत्तणस्स अह एत्तिओ हवइ दोसो
जं गललग्गुक्खितो फुरइ एवविरेद्धिओ मच्छो ॥४०॥-८
- (१९५) उउ-भयमाणसुहेसु य सविभव-हिययमण-निव्वुइकरेसु
फासेसु रज्जामाणा रमंति फासिदिय-वसइ ॥४१॥-९
- (१९६) फासिदिय-दुद्धंतत्तणस्स अह एत्तिओ हवइ दोसो
जं खणइ मत्थयं कुंजरस्स लोहंकुसो तिक्खो ॥४२॥-१०
- (१९७) कल-रिभिय-महुर-तंती-तलताल-वंस-कउहाभिरामेसु
सहेसु जे न गिद्धा वसइमरणं न ते मरए ॥४३॥-११
- (१९८) थण-जहण-वयण-कर-चरण-नयण-गव्विय-विलासियगईसु
रूवेसु जे न रत्ता वसइमरणं न ते मरए ॥४४॥-१२
- (१९९) अगरुवर-पवर-धूवण-उउयमच्छाणुलेवणविहीसु
गंधेसु जे न गिद्धा वसइमरणं न ते मरए ॥४५॥-१३

- (२००) तित्त-कडुयं कसायं महुरं बहुखज्र-पेज्र-लेज्जेसु
आसायंमि न गिद्धा वसट्टमरणं न ते मारए ॥४६॥-१४
- (२०१) उउ-भयमाणसुहेसु य सविभय-हिययमण-निव्वुइकरेसु
फासेसु जे न गिद्धा वसट्टमरणं न ते मारए ॥४७॥-१५
- (२०२) सहेसु य भदय-पावएसु सोयविसयमुवगएसु
तुडेण व रुडेण व समणेणं सया न होयव्वं ॥४८॥-१६
- (२०३) रूवेसु य भदय-पावएसु चक्खुविसयमुवगएसु
तुडेण व रुडेण व समणेण सया न होयव्वं ॥४९॥-१७
- (२०४) गंधेसु य भदय-पावएसु घाणविसयमुवगएसु
तुडेण व रुडेण व समणेण सया न होयव्वं ॥५०॥-१८
- (२०५) रसेसु य भदय-पावएसु जिब्भविसयमुवगएसु
तुडेण व रुडेण व समणेण सया न होयव्वं ॥५१॥-१९
- (२०६) फासेसु य भदय-पावएसु कायविसयमुवगएसु
तुडेण व रुडेण व समणेणं सया न होयव्वं ॥५२॥-२०
- (२०७) एवं खलुं जंदू समणेणं भगवया महावीरेणं जाव संपत्तेणं सत्तरमस्स
नायज्जयणस्स अयमट्ठे पन्नत्ते । ति वेमि । १४१-१३५

● पदमे सुयबखंधे सत्तरसपं अज्जयणं सपत्तं ●

अट्टारसमं अज्जयणं—सुंसुमा

(२०८) जइ णं भंते समणेणं भगवया महावीरेणं जाव संपत्तेणं सत्तरसमस्स नायज्जयणस्स अयमट्ठे पन्नत्ते अट्टारसमस्स णं भंते नायज्जयणस्स के अट्ठे पन्नत्ते एवं खलु जंदू तेणं कालेणं तेणं समएणं रायगिहे नामं नयरे होत्था-वण्णओ तत्थ णं धणे नामं सत्थवाहे भद्दा भारिया तस्स णं धणस्स सत्थवाहस्स पुत्ता भद्दाए अत्तया पंच सत्थवाहदारणा होत्था तं जहा-धणे धणपाले धणदेवे धणगोवे धणरत्थिए तस्स णं धणस्स सत्थवाहस्स धूया भद्दाए अत्तया पंचणं पुत्ताणं अनुमग्ग-जाइया सुंसुमा नामं दारिया होत्था-सूमालपाणिपाया तस्स णं धणस्स सत्थवाहस्स चिलाए नामं दासचेडे होत्था-अहीणपंचिदियसरीरे मंसोवचिए बालकीलावणकुसले यावि होत्था तए णं से दासचेडे सुंसुमाए दारियाए बालग्गाहे जाए यावि होत्था सुंसुमं दारियं कडीए गिण्हइ गिण्हित्ता वहूहिं दारएहिं य दारियाहिं य डिंभएहिं य डिंभियाहिं य कुमारएहिं य कुमारियाहिं य सद्धिं अभिरममाणे-अभिरममाणे विहरइ तए णं से चिलाए दासचेडे तेसिं बहूणं दारयाण य दारियाण य डिंभयाण य डिंभियाण य कुमारयाण य कुमारियाण य अप्पेगइयाणं खुल्लए अवहरइ [अप्पेगइयाणं वट्टए अवहरइ अप्पेगइयाणं आडोलियाओ अवहरइ अप्पेगइयाणं तिंदूसए अवहरइ अप्पेगइयाणं पोतुल्लए अवहरइ अप्पेगइयाणं साडोल्लए अवहरइ] अप्पेगइयाणं आभरणमल्लालंकारं अवहरइ अप्पेगइए आउसइ अवहसइ निच्छोडेइ निब्भच्छेइ तज्जेइ तालेइ तए णं ते बहवे दारगा य दारिया य डिंभया य डिंभिया य कुमारया य कुमारिया य रोयमाणा य कंदमाणा य सोयमाणा य तिप्पमाणा य विलवमाणा य साणं-साणं अम्मापिऊणं निवेदेति

तए णं तेसिं बहूणं दारयाण य दारियाण य डिंभयाण य डिंभियाण य कुमारयाण य

कुमारियाण य अम्मापियरो जेणेव धणे सत्थवाहे तेणेव उवागच्छति उवागच्छिता धणं सत्थवाहं बहूहिं खिज्जणिचाहि य रुंडणाहि य उवलंभणाहि य खिज्जमाणा य रुंटमाणा य उवलंभमाणा य धणस्स सत्थवाहस्स एयमट्ठं निवेदेति तए णं से धणे सत्थवाहे चिलायं दासचेडं एयमट्ठं भुज्जो-भुज्जो निवारेइ नो चेव णं चिलाए दासचेडे उवरमइ तए णं से चिलाए दासचेडं तेसिं बहूणं दारयाण य दारियाण य डिंभयाण य डिंभियाण य कुमारियाण य कुमारियाण य अप्पेगइयाणं खुल्लए अवहरइ जाव अप्पेगइयाणं साडोन्नए अवहरइ अप्पेगइयाणं आभरणमल्लालंकारं अवहरइ अप्पेगइए आउ-सइ अवहसइ निच्छोडेइ निब्बच्छेइ तजेइ तालेइ तए णं ते बहवे दारगा य दारिया य डिंभया य डिंभिया य कुमारया य कुमारिया य रोयमाणा य |कंदमाणा य सोयमाणा य तिप्पमाणा य विलवमाणा य साणं-साणं| अम्मापिऊणं निवेदेति तए णं ते आपुरुता रुद्धा कुविया चंडिकिकया मिसिमिसेमाणा जेणेव धणे सत्थवाहे तेणेव उवागच्छति उवागच्छिता बहूहिं खिज्जणाहि य [रुंटणाहि य उवलंभणाहि य खिज्जमाणा य रुंटमाणा य उवलंभमाणा य धणस्स सत्थवाहस्स] एयमट्ठं निवेदेति तए णं से धणे सत्थवाहे बहूणं दारगाणं दारियाणं डिंभयाणं डिंभियाणं डिंभियाणं कुमारियाणं कुमारियाणं अम्मापिऊणं अंतिए एयमट्ठं सोच्चा आपुरुते रुद्धे कुविए चंडिकिकए मिसिमिसेमाणे चिलाइं दासवेडं उच्चावयाहिं आउसणाहिं आउसइं उद्धसइ निब्बच्छेइ निच्छोडेइ तजेइ उच्चावयाहिं तालणाहिं तालेइ साओ गिहाओ निच्छुभइ 19४२1-136

(२०९) तए णं से चिलाए दासचेडे साओ गिहाओ निच्छूडे समाणे रायगिहे नयरे सिंघाडग-[तिग-चउक्क-चच्चर-चउम्पुह-महापह] पहेसु देवकुलेसु य सभासु य पवासु य जूयखल-एसु य वेसापरएसु य पाणपरएसु य सुहंसुहेणं परिवट्ठइ तए णं से चिलाए दासचेडे अणोहट्टिए अणिवारिए सच्छंदमइं सइरप्पचारी मज्जप्पसंगी चोउप्पसंगी जूयप्पसंगी वेसप्पसंगी परदारप्पसंगी जाए यावी होत्था तए णं रायगिहस्स नयरस्स अदूरसामंते दाहिणपुरत्थिमे दिसीभाए सीहगुहा नामं चोरपल्ली होत्या-विसम-गिरिकडगं-कोलंब-सण्णिविद्धा वंसीकलंक-पागार-परिक्खिता छिण्णसेल-विसमप्पवाव-फरिहोवगूळा एगदुवारा अणेगखंडी विदित्तजण- निग्गमप्पवेसा अद्धिंतरपाणिया सुदुल्लभजल-पेरंता सुवहुस्सवि कूवियबलस्स आगयस्स दुप्पहंसा यावि होत्था तत्थ णं सीहगुहाए चोरपल्लीए विजए नामं चोरसेणावई परिवसई-अहम्मिए [अहम्मिद्धे अहम्मक्खाई अहम्माणुए अहम्मपलोई अहम्मपलज्जणे अहम्मसीलसमुदायारे अहम्मणेण चेव वित्ति कप्पेमाणे विहरइ हण-उिद-भिद-वियतए लोहियपाणी चंडे रुद्धे खुद्धे साहसिए उक्कंचण-वंचण-माया-नियडि-कवड-कूड-साइ-संपओग-बहुले निस्सीले निव्वए निग्गणे निष्पच्चक्राणपोसलोबवासे बहूणं दुप्पय- चउप्पय-भिय-पसु-पक्खि-सरिसिवाणं धायाए वहाए उच्छायणयाए| अहम्मकेऊ समुद्धिए बहुनगरनिग्गय-जसे सूरु दढप्पहारी साहसिए सद्धवेही से णं तत्थ सीहगुहाए चोरपल्लीए पंचहं चोरसयाणं आहेबद्धं [पोरेबद्धं सापितं भट्टितं महत्तरगतं आणा-ईसर-सेणावच्चं कारेमाणे पालेमाणे] विहरइ तए णं से विजए तक्कर-सेणावई बहूणं चौराण य पारदारियाण य गंदिभेयगाण य संधिच्छेयगाण य खत्त-खणगाण य रायावगारीण य अणघारगाण य बालघायगाण य वीसंभघावगाण य जूयकाराण य छंडरक्खाण य अण्णेसिं च बहूणं छिण्ण-भिण्ण-ब्राहिराहयाणं कुडंणे यावि होत्था तए णं से विजए चोरसेणावई रायगिहस्स दाहिणपुरत्थिमं जणवयं बहूहिं गापघाएहि य नगरघाएहि य गोगहणेहि य वंदिगहणेहि य पंथकुट्टणेहि य खत्तखणणेहि य उवीलेमाणे-उवीलेमाणे विद्धसेमाणे-विद्धसेमाणे

नित्याणं निद्धणं करेमाणे विहरइ

तए णं से चिलाए दासचेडेए रायगिहे बहूहि अत्याभिसंकीहि य चोत्राभिसंकीहि य दासभिसंकीहि य धणिएहि य जूयकरेहि य परम्भवमाणे-परम्भवमाणे रायगिहाओ नगराओ निग्गच्छइ निग्गच्छिता जेणेव सीहगुहा चोरपल्ली तेणेव उवागच्छइ उवागच्छिता विजयं चोरसेणावइ उवसंपज्जिता णं विहरइ तए णं से चिलाए दासचेडे विजयस्स चोरसेणावइस्स अण-असिलद्धिगाहे जाए यावि होत्था जाहे वि य णं से विजए चोरसेणावई गामघायं वा [नगरघायं वा गोगहणं वा बंदिग्गहणं वा] पंथकोट्टिं वा काउं वड्डइ ताहे वि य णं से चिलाए दासचेडे सुवहुंभि कूवियवलं हव-महिय-पवर वीर आइय-विवडियचिंध-धय-पडागं किच्छोवगयपाणं दिसोदिसिं पडिसेहेइ पडिसेहेत्ता पुणरवि लद्धेइ कयकज्जे अणहसमग्गे सीहगुहं चोरपल्लिं हव्वमागच्छइ तए णं से विजए चोर सेणावई चिलायं तक्करं बहूओ चोरविज्जाओ य चोरमंते य चोरमायाओ य चोरनिगडीओ य सिक्खावेइ तए णं से विजए चोरसेणावई अण्णया कयाइ कालधम्मणा संजुते यावि होत्था तए णं ताइं पंचचोरसयाइं विजयस्स चोरसेणावइस्स महया-महया इड्डी-सक्कार-समुदाएणं नीहरणं करेति करेत्ता बहूइ लोइयाइं मयकिच्चाइं करेति करेत्ता [कालेणं] विगयसोया जाया यावि होत्था

तए णं ताइं पंचचोरसयाइं अण्णमण्णं सद्दवेत्ति सद्दवेत्ता एवं वयासी-एवं खलु अहं देवाणुप्पिया विजए चोरसेणावई कालधम्मणा संजुते अयं चणं चिलाए तक्करे विजएणं चोरसेणावइणा बहूओ चोरविज्जाओ य [चोरमंते य तोपमायाओ य चोरनिगडीओ य] सिक्खाविए तं सेयं खलु अहं देवाणुप्पिया चिलायं तक्करं सीहगुहाए चोरपल्लीए चोरसेणा-वइत्ताए अभिसिंचित्तए ति कट्ट अण्णमण्णस्स एयमड्डं पडिसुणेति पडिसुणेत्ता चिलायं सीलगुहाए चोरपल्लीए चोरसेणावइत्ताए अभिसिंचित्ति तए णं से चिलाए चोरसेणावई जाए-अहम्मिए [अहम्मिहे अहम्म्यखाइ अहम्मामुए अहम्मपलोइ अहम्मपलज्जणे अहम्मसीलसमुदावरे अहम्मणे चेव वित्ति कथेमाणे] विहरइ तए णं से चिलाए चोरसेणावई चोरनायणे [बहूणं चोराण य पारदारियाण य गंठिभेयगाण य संधिच्छेयगाण य खत्तखणगाण य रायावगारीण य अणधारगाण य बालधायगाण य वीसंभघायगाण य जूयकाराण य खंडरक्काण य अण्णेसिं च बहूणं छिण्ण-भिण्ण-बाहिराह-याणं] कुडंगे यावि होत्था से णं तत्थ सीहगुहाए चोरपल्लीए पंचणहं चोरसयाणं [आहेवच्चं पोरेवच्चं सामित्तं षट्ठित्तं महत्तरगतं आणाईसरसेणावच्चं कारेमाणे पालेमाणे विहरइ तए णं से चिलाए चोरसेणावइ] रायगिहस्स नयरस्स दाहिणपुरत्थिभिच्चं जणवयं [बहूहिं गामघाएहि य नगरघाएहि य गोगहणेहि य बंदिग्गहणेहि य पंथकुट्टणेहि य खत्तखणणेहि य उदीलेमाणे-उदीलेमाणे विद्धसे-माणे-विद्धसेमाणे नित्याणं निद्धणं करेमाणे विहरइ १५४३-१३७

(२१०) तए णं से चिलाए चोरसेणावई अण्णया कयाइ विपुलं असण-पाण-खाइम-साइमं उवक्खडावेत्ता ते पंच चोरसए आमंतेइ तओ पच्छ ण्हाए कयबलिकम्मे भोयणमंडवंसि तेहिं पंचहिं चोरसएहिं सद्धिं विपुलं असण-पाणखाइम-साइमं सुरं च [मज्जं चं मंसं च सीधुं च] परत्तं च आसाएमाणे विसाएमाणे परिभाएमाणे परिभुंजेमाणे विहरइ जिमियभुत्ताराए ते पंच चोरसए विपुलेणं धूव-पुष्फ-गंध-मल्लालंकारेणं सक्कारेइ सम्माणेइ सक्कारेत्ता सम्माणेत्ता एवं वयासी-एवं खलु देवाणुप्पिया रायगिहे नयरे धणे नामं सत्थवाहे अड्ढे तस्स णं धूया भद्दाए अत्था पंचणहं

पुताणं अनुमग्गजाइया सुंसुमा नामं दारिय-अहीणा जाव सुरूवा तं गच्छामो णं देवाणुप्पिया घणस्स सत्यवाहस्स गिहं विलुपामो तुयं विपुले धण-कणग-रयण- मणि- मोत्तिय- संख- सिल- प्वाल्ले मं सुंसुमा दारिया तए णं ते पंच चोरसया चिलायस्स एवमडुं पडिसुणेति तए णं ते चिलाए चोरसेणावई तेहिं पंचहिं चोरसएहिं सद्धि अल्लं चम्मं दुरुहइ दुरुहिता पच्चाव- रण्ह-कालमयंसि पंचहिं चोरसएहिं सद्धि सण्णद्ध- [बद्ध-वम्मिय-कवएउप्पीलिय-सरसणपट्टिए पिणद्ध-गेविञ्जे आविद्ध-विमल-वरचिंधपट्टे] गहियाउह-पहरणे माइय-गोमुहिएहिं फलएहिं निक्किट्टाहिं असिल-ट्टीहिं तोणेहिं सञ्जीवेहिं धणुहिं छिप्पतूरेहिं वज्जमाणेहिं महया-महया उक्किट्ट- सीहनाय- [बोल-कलकलरवेणं पक्खुभिय-महा] समुद्धरवभूयं पिव करेमाणा सीहगुहाओ चोरपल्लीओ पडिनिक्ख-रंति पडिनिक्खमिता जेणेव रायगिहे नयेरे तेणेव उवागच्छंति उवागच्छिता रायगिहस्स अदूर-सामंते एणं महं गहणं अनुप्पविसंति अनुप्पविसिता दिवसं खवेमामा चिट्ठंति

तए णं से चिलाए चोरसेणावई अद्धारत्त-कालसमयंसि निसंत-पडिनिसंतंसि पंचहिं चोरसएहिं सद्धि माइय-गोमुहिएहिं फलएहिं जाव मूइयाहिं ऊरुघंटियाहिं जेणेव रायगिहे नयेरे पुरत्थिमिल्ले दुवारे तेणेव उवागच्छइ उदगवत्थि परामुसइ आयंते चोक्खे परमसुइभूए तालुग्घाडणि विञ्जं आवाहेइ आवाहेत्ता रायगिहस्स दुवारकवडडे उदएणं अछोडेइ अछोडेत्ता कवाडं विहाडेइ विहाडेत्ता रायगहं अनुप्पविसइ अनुप्पविसिता महया-महया सद्देणं उग्घो-सेमाणे-उग्घोसेमाणे एवं वयासी-एवं खलु अहं देवाणुप्पिया चिलाए नामं चोरसेणावई पंचहिं चोरसएहिं सद्धि सीहगुहाओ चोरपल्लीओ इह हव्वमागए धणास्स सत्यवाहस्स गिहं घाउकामे तं जे णं नवियाए माउयाए दुद्धं पाउकामे से णं निगच्छउ त्ति कट्टु जेणेव घणस्स सत्यवाहस्स गिहे तेणेव उवागच्छइ उवागच्छिता घणस्सगिहं विहाडेइ तए णं से घणे चिलाएणं चोरसेणावइणा पंचहिं चोरसएहिं सद्धि गिहं घाइज्जमाणं पासइ पासिता भीए तत्ये तसिए उव्विगे संजावभए पंचहिं पुत्तेहिं सद्धि एगंतं अवक्कमइ तए णं से चिलाए चोरसेणावई धणस्स सत्यवाहस्स गिहं घाएइ धाएत्ता सुबहुं धण- कणग-[रयण- मणि- मोत्तिय-संख-सिल-प्वाल-रत्तरयण-संत-सार]-सावएज्जं सुंसुमं च दारियं गेण्हइ गेण्हित्ता रायगि-हाओ पडिनिक्खमई पडिनिक्खमिता जेणेव सीहगुहा तेणेव पहारेत्य गमणाए। १४४।-१३८

(२११) तए णं से घणे सत्यवाहे जेणेव सए गिहे तेणेव उवागच्छइ उवागच्छिता सुबहुं घण-कणगं सुंसुमं च दारियं अवहरिं जाणित्ता महत्थं महग्घं महरिहं पाहुडं गहाय जेणेव नगर-पुत्तिया तेणेव उवागच्छइ उवागच्छिता तं महत्थं महग्घं महरिहं पाहुडं उवणेइ उवणेत्ता एवं वयासी-एवं खलु देवाणुप्पिया चिलाए चोरसेणावई सीहगुहाओ चोरपल्लीओ इह हव्वमागम्म पंचहिं चोरसएहिं सद्धि मम गिहं घाएत्ता सुबहुं धण-कणगं सुंसुमं च दारियं गहाय रायगिहाओ पडिनिक्खमिता जेणेव सीहगुहा तेणेव पडिगए तं इच्छामो णं देवाणुप्पिया सुंसुमाए दारियाए कूवं गभित्तए तुयं णं देवाणुप्पिया से विपुले धणकण्णे ममं सुंसुमा दारिया तए णं ते नगरगुत्तिया धणस्स एवमडुं पडिसुणेति पडिसुणेत्ता सण्णद्ध-वद्ध-वम्मिय-कवया जाव गहियाउहपहरणा महया-महया उक्किट्ट- [सीहनायबोल-कलकलरवेणं पक्खुभिय-महा] समुद्ध-रवभूयं पिव करेमाणा रायगिहाओ निग्गच्छंति निग्गच्छिता जेणेव चिलाए चोरसेणावई तेणेव उवागच्छंति उवागच्छिता चिलाएणं चोरसेणावइणा सद्धि संपलग्गा यावि होत्था तए णं ते नगरगुत्तिया चिलायं चोरसेणावइं हव-महिय-[पवरवीर-घाइयविवडियचिंधय-पडागं किच्छोवगयपाणं दिसोदिसिं] पडिसेहेति

तए णं ते पंच चोरसया नगरगुतिएहिं हय-महिय-[पवरवीर-धाइय-विवडिय चिघ- धय-पडागा किच्छोवगयपाणा दिसोदिसिं] पडिसेहिया समाणा तं विपुलं धण-कणगं विच्छुमाणा य विम्पकिरमाणा य सव्वो समंता विष्पलाइत्या तए णं ते नगरगुत्तिया तं विपुलं धण-कणगं गेण्हति गेण्हित्ता जेणेव रागगिहे नगरे तेणेव उवागच्छंति तए णं से चिलाए तं चोरसेत्रं तेहिं नगरगुत्तिएहिं हय-महिय-पवर-[वीर-धाइय-विवडियचिघ-धय-पडागं किच्छोवगयपाणं दिसोदिसिं पडिसेहियं पासित्ता भीए तत्थे सुंसुमं दारियं गहाय एणं महं अगामियं दीहमद्धं अडविं अनुष्पविट्ठे तए णं से धणे सत्थवाहे सुंसुमं दारियं चिलएणं अडवीनुहिं अवहीरमाणिं पासित्ता णं पंचहिं पुत्तेहिं सद्धिं अप्पछट्ठे सण्णद्ध-बद्ध-वम्मिय-कवए चिलायस्स पवपणविहि अनुगच्छमाणे अभिगज्जंते हक्कारेमाणे पुक्कारेमाणे अभितज्जेमाणे अभितासेमाणे पिट्ठओ अनुगच्छइ तए णं से चिलाए तं धणं सत्थवाहं पंचहिं पुत्तेहिं सद्धिं अप्पछट्ठे सण्णद्ध-बद्ध-वम्मिय-कवयं समणुगच्छमाणं पासइ पासित्ता अत्थामे अबले अवीरिए अपुरिसक्कारपरक्कमे जाहे नो संचाएइ सुंसुमं दारियं निव्वा-हित्ता ताहे संते तंते परितंते नीलुप्पल[गवलगुलियअवसिकुसुमप्पगासं खुरधारं] असिं परामुसइ परामुसित्ता सुंसुमाए दारियाए उत्तमंगं छिंदइ छिदिता तं गहाय तं अगामियं अडविं अनुष्पविट्ठे तए णं से चिलाए तीसे अगामियाए अडवीए तण्हाए छुहाए अभिभूए समाणे पम्हइ-दिसामाए सीहगुहं चोरपल्लिं असंपत्ते अंतरा चेव कालगए एवामेव समाणाउसो [जो अन्हं निग्गंधो वा निग्गंधो वा आयरिच-उवज्जायाणं अंतिए मुंडे भवित्ता अगाराओ अणगारियं] पव्वइए समाणे इमस्स ओरा-ल्लिचसरीरस्स वंतासवस्स पितासवस्स खेलासवस्स सुक्कासवस्स सोणियासवस्स दुरुय-उत्सास-निस्सास्स [दुरुय-मुत्त-पुरीस-पूय-बहुपडिपुत्तस्स उच्चारपासवण-खेल-सिंधाणग-चंत-पित्त-सुकक-सोणियसंपवस्स अधुवस्स अनितियस्स असासवस्स सडण-पडण विट्ठंसणधम्मस्स पच्छा पुरं च णं अवस्सविष्पजहणिज्जस्स] वण्णहेउं वा [रूवहेउं वा बलहेउं वा विसवहेउं वा आहारो आहारेइ से णं इहलोए चेव बहूणं समाणां बहूणं समणीणं बहूणं सावयाणं बहूणं सावियाणं य हीलणिज्जे जाव चाउरंतं संसारकंतरं अनुपरियट्ठिस्सइ-जहा व से चिलाए तक्करे तए णं से धणे सत्थवाहे पंचहिं पुत्तेहिं सद्धिं अप्पछट्ठे चिलायं तीसे अगामियाए अडवीए सव्वओ समंता परिधाडेमाणे- परिधाडे-माणे संते तंते परितंते नो संचाएइ चिलायं चोरसेणावइ साहत्थि गिण्हित्ताए से णं तओ पडिनियत्तइ पडिनियत्तित्ता जाणेव सा सुंसुमा चिलाएणं जीवियाओ ववरोविया तेणेव उवागच्छइ उवागच्छित्ता सुंसुमं दारियं चालिएणं जिवियाओ ववरोवियं पासइ पासित्ता परसुनियत्ते व्व चंपगपायव्वे [निव्वत्तमहे व्व इंदलट्ठी विमुक्कसंधिबंधणे धरणितलंसि सव्वगेहिं धसत्ति पडिए] तए णं से धणे सत्थवाहे पंचहिं पुत्तेहिं सद्धिं अप्पछट्ठे आसत्थे कूवमाणे कंदमाणे विलवमाणे महया-महया सहेण कुहुकुहुस्स परुत्रे सुचिरकालं बाहप्पमोक्खं करेइ

तए णं से धणे सत्थवाहे पंचहिं पुत्तेहिं सद्धिं अप्पछट्ठे चिलायं तीसे अगामियाए अडवीए सव्वओ समंता परिधाडेमाणे तण्हाए छुहाए य परब्भाहते समाणे तीसे अगामियाए अडवीए सव्वओ समंता उदगस्स मण्ण-गवेषणं करेमाणे संते तंते परितंते निव्विण्णे तीसे अगामियाए अडवीए उदगं अणासाएमाणे जेणेव सुंसुमा जीवियाओ ववरोविएइत्या तेणेव उवागच्छइ उवाग-च्छित्ता जेइं पुत्तं धणं सदावेइ सदावेत्ता एवं वयासी-एवं खलु पुत्ता सुंसुमाए दारियाए अट्टाए चिलायं तक्करं सव्वओ समंता परिधाडेमाणा तण्हाए छुहाए य अभिभूया समाणा इमीसे

अगामियाए अडवीए उदगस्स मगण-गवेसणं करेमाणा नो चेव णं उदगं आसादेमो ते णं उदगं अणासाएमाणा नो संचाएमो रायगिहं संपावित्तए तण्णं तुब्भे ममं देवाणुप्पिया जीवियाओ ववरोवेह ममं मंसं च सोणियं च आहारेह तेणं आहारेणं अवधद्धा समाणा तओ पच्छा इमं अगामियं अडविं नित्थरिहिह रायगिहं च संपावेहिह मित्त-नाइ-[नियग-सयण-संबंधि-परियणं] अभिसमागच्छिहिह अत्थस्स य धम्मस्स य पुत्रस्स च आभागी भविस्सह तए णं से जेड्ढे पुत्ते धणेणं सत्थवाहेणं एवं वुत्ते समाणे धणं सत्थवाहं एवं वयासी-तुब्भे णं ताओ अहं पिया गुरुजणया देवयभूया ठवक्का पड्डवक्का संरक्खगा संगोवगा तं कहण्णं अह्णे ताओ तुब्भे जीवियाओ ववरोवेमो तुब्भं णं मंसं च सोणियं च आहारेमो तं तुब्भे णं ताओ ममं जीवियाओ ववरोवेह मंसं च सोणियं च आहारेह अगामियं अडविं नित्थरिहिह [रायगिहं च संपावेहिह मित्त- नाइ- नियग-सयण-संबंधि-परियणं अभिसमा-गच्छिहिह] अत्थस्स य धम्मस्स य पुत्रस्स च आभागी भविस्सह

तए णं धणं सत्थवाहं दोद्धे पुत्ते एवं वयासी-मा णं ताओ अह्णे जेड्ढं भायरं गुरुदेवयं जीवियाओ ववरोवेमो तस्स णं मंसं च सोणियं च आहारेमो तं तुब्भे णं ताओ ममं जीवियाओ ववरोवेह [मंसं च सोणियं च आहारेह अगामियं अडविं नित्थरिहिह रायगिहं च संपावेहिह मित्त-नाइ-नियग-सयण-संबंधि-परियणं अभिसमागच्छिहिह अत्थस्स च धम्मस्स य पुत्रस्स च] आभागी भविस्सइ एवं जाव पंचमे पुत्ते, तए णं से धणे सत्थवाहे पंचपुत्ताणं हियइच्छियं जाणित्ता ते पंचपुत्ते एवं वयासी-मा णं अह्णे पुत्ता एगमवि जीवियाओ ववरोवेमो एस णं सुंसुमाए दारियाए सरारे निष्पाणे निच्छेड्ढे जीवविष्णजडे त सेयं खलु पुत्ता अहं सुंसुमाए दारियाए मंसं च सोणियं च आहारेत्ताए तए णं अह्णे तेणं आहारेणं अवधद्धा समाणा रायगिहं संपाउणित्तामो तए णं ते पंचपुत्ता धणेणं सत्थवाहेणं एवं वुत्ता समाणा एवमट्ठं पडिसुणोत्ति तए णं धणे सत्थवाहे पंचहिं पुत्तेहिं सद्धिं अरणिं करेइ करेत्ता सरग करेइ करेत्ता सरएणं अरणिं महेइ महेत्ता अग्गि पाडेइ पाडेत्ता अग्गि संपुक्केइ संघुक्केत्ता दारुयाइ पक्खिवइ पक्खिवित्ता अग्गि पज्जालेइ सुंसुमाए दारियाए मंसं च सोणियं च आहारेइ तेणं आहारेणं अवधद्धा समाणा रायगिहं नयरं संपत्ता मित्त-नाइ-[नियग-सयण-संबंधि-परियणं] अभिसमण्णया तस्स य विउलस्स धण- कणग- रयण- [मणि-मोत्तिय-संख-सिल-म्ववाल-रत्तरवण-संत-सार-सावएज्जस्स] आभागी जाया तए णं से धणे सत्थवाहे सुंसुमाए दारियाए लोइयाइ [मयकिच्चाइ करेइ करेत्ता कालेणं] विगयसोए जाए यावि होत्था 1984-139

(२१२) तेणं कालेणं तेणं समएणं समणे भगवं महावीरे रायगिहे नयरे गुणसिलए चेइए समोसडे तए णं धणे सत्थवाहे सुपुत्ते धम्मं सोच्चा पच्चइए एक्कारसंगवी मासियाए संलेहणाए सोहम्मे कप्पे उववण्णे महाविदेहे वासे सिञ्जिहिइ जहा वि व णं जंबू धणेणं सत्थवाहेणं नो वण्णहेउं वा नो रूवहेउं वा नो बलहेउं वा नो विसवहेउं वा सुंसुमाए दारियाए मंससोणिए आहारिए नन्नय एगाए रायगिह-संपावणइयाए एवामेव समणाउसो जो अहं निगंधो वा निगंधी वा [आयरिय-उवज्झायणं अंतिए मुंडे भविता अगारायो अणगारियं पच्चइए समाणे] इमस्स ओरालि-यसरीस्स वंतासवस्स पित्तासवस्स खेलासवस्स सुक्कासवस्स सोणियासवस्स [दुरुय- उस्सास- निस्सासस्स दुरुय-मुत्त-पुरिस-पूय-बहुपडिपुण्णस्स उच्चार- पासवण- खेल- सिंघाणग- वंत- पित्त- सुक्क-सोणियसंभवस्स अधुवस्स अणितियस्स असायस्स सडण- पडण- विद्धंसण- धम्मस्स पच्छा

पुरं च] णं अवस्सविष्णुजहियव्यस्स नो वण्णहेउं वा नो रूवहेउं वा नो बलहेउं वा नो वियसहेउं वा आहारं आहारेइ नन्नत्थ एगाए सिद्धिगमण-संपावणइयाए से णं इहभवे चेव बहूणं समणाणं बहूणं समणीणं बहूणं सावयाणं बहूणं सावियाण य अच्चणिजे जाव चाउरंतं संसारकंतरं वीईवइस्सइ-जहा व से सपुत्ते धणे सत्थवाहे एवं खलु जंबू समणेणं भगवया महावीरेणं जाव संपत्तेणं अट्टारसमस्स नायज्जायणस्स अयमट्टे पत्रत्ते । ति बेमि । १४६।-१४०

● पट्टमे सुयक्खंये अट्टारसमं अज्जयणं सपत्तं ●

एगूणवीसइमं अज्जयणं—पुंडरीए

(२१३) जइ णं भंते समणेणं भगवया महावीरेणं जाव संपत्तेणं अट्टारसमस्स नायज्ज-यणस्स अयमट्टे पत्रत्ते एगूणवीसइमस्स णं भंते नायज्जायणस्स के अट्टे पत्रत्ते एवं खलु जंबू तेणं कालेणं तेणं समएणं इहेव जंबुद्वीवे दीवे पुच्चिविदेहे सीयाए महानईए उत्तरिखे कूले नीलवंतस्स वासहरपच्चयस्स दाहिणेणं उत्तरिखस्स सीयामुहवणसंडस्स पच्चत्थिमेणं एगसेलगस्स वक्खा-एपच्चयस्स पुरत्थिमेणं एत्थ णं पुक्खलावई नामं विजए पत्रत्ते तत्थ णं पुंडरीगिणी नामं रायहाणी पत्रत्ता-नवजोयणवित्थिण्णा दुवालस जोयणायामा जाव पच्चक्खं देवलोगभूया पासाईया दरिसणीया अभिरूवा पडिरूवा तीसे णं पुंडरीगिणीए नयरीए उत्तरपुरत्थिमे दिसीभाए नलिनिवने नामं उज्जाणे तत्थ णं पुंडरीगिणीए रायहाणीए महापउमे नामं राया होत्था तस्स णं पउमावई नामं देवी होत्था तस्स णं महापउमस्स रण्णे पुता पउमावईए देवीए अतया दुवे कुमारा होत्था तं जहा-पुंडरीए य कंडरीए य-सुकुमालपाणिपाया पुंडरीए जुवराया तेणं कालेणं तेणं समएणं थेरागमणं महापउमे राया निग्गए धम्मं सोच्चा पुंडरीयं रजे ठवेत्ता पच्चइए पुंडरीए राया जाए कंडरीए जुवराया महापउमे अणगरे चोइसपुच्चाइं अहिज्जइ तए णं थेरा वहिया जणवयविहारं विहरंति तए णं से महापउमे बहूणि वासाणि सामण्णपरियाणं पाउणित्ता जाव सिद्धे । १४७।-१४१

(२१४) तए णं थेरा अण्णया कयाइ पुणरवि पुंडरीगिणीए रायहाणीए नलिन नि वने उज्जाणे समोसद्धा पुंडरीए राया निग्गए कंडरीए महाजणसइं सोच्चा जहा महाबलो जाव पजुवासइ थेरा धम्मं परिकहेति पुंडरीए समणोवासए जाए जाव पडिगए तए णं कंडरीए [थेराणं अंतिए धम्मं सोच्चा निसम्मं हट्टतुट्टे उड्डाए उड्डे उड्डेता थेरे तिक्खुत्ते आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता एवं वयासी-सहहामि णं भंते निग्गंथं पावयणं जाव] से जहेयं तुट्ठे वयह जं नयरं-पुंडरीयं रायं आपुच्छामि [तओ पच्छा मुंडे भवित्ता णं अगाराओ अणगारियं] पच्चयाणि अहासुहं देवाणुप्पिया तए णं से कंडरीए थेरे वंदइ नमंसइ वंदित्ता नमंसित्ता थेराणं अंतियाओ पडिनिक्खमइ तमेव चाउग्घंटा आसरहं दुहइ [महयामड-चडगर-पहकरेण पुंडरीगिणीए नयरीए मज्झमज्जेणं जेणामेव सए भवणे तेणामेव उवागच्छइ उवागच्छित्ता चाउग्घंटाओ आसरहाओ] पच्चोरूहइ पच्चोरूहिता जेणेव पुंडरीए राया तेणेव उवागच्छइ उवागच्छित्ता करयल [परिग्गहियं दसनहं सिरसावत्तं मत्थए अंजलिं कइ एवं वयासी-एवं खलु देवाणुप्पिया मए थेराणं अंतिए धम्मं निसंते से [वि य मे धम्मं इच्छिए पडिच्छिए अभिरूइए तं इच्छामि णं देवाणुप्पिया तुट्ठेहिं अब्बणुण्णाए समाणे थेराणं अंतिए मुंडे भवित्ता णं अगाराओ अणगारियं] पच्चइत्तए तए णं से पुंडरीए राया कंडरीयं एवं वयासी-मा णं तुमं भाउया इयाणि मुंडे [भवित्ता णं अगाराओ अणगारियं] पच्चायाहि अहं णं तुमं महारायाभिसेएणं अभिसिंचामि तए णं से कंडरीए पुंडरीयस्स

रण्णो एयमद्धं नो आदाइ नो परिदाणाइ तुसिणीए संचिद्धइ तए णं से पुंडरीए राया कंडरीयं दोद्धं पि तद्धं पि एवं वयासी-मा णं तुमं भाउया इयाणि मुंडे भवित्ता णं अगाराओ अणगारियं पव्वयाहि अहं णं तुमं महारायाभिसेएणं अभिसिचामि तए णं से कंडरीए पुंडरीयस्स रण्णो एयमद्धं नो आदाइ नो परिदाणाइ तुसिणीए संचिद्धइ तए णं पुंडरीए कंडरीयंकुमारं जाहे नो संचाएइ वहुहिं आघवणाहिं य पन्नवणाहिं य सण्णवणाहिं य विण्णवणाहिं य आघवित्तए वा पन्नवित्तए वा सण्णवित्तए वा विण्णवित्तए वा ताहे अकामए चेव एयमद्धं अनुमत्तित्था जाव निक्खमणाभिसेएणं अभिसिचइ जाव [थेराणं सीसभिव्खं दलयइ पव्वइए अणगारे जाए] एककारसंगवी, तए णं थेरा भगवंतो अण्णया कयाइ पुंडरीगिणीओ नचरीओ नलिनियणाओ उज्जाणाओ पडिनिक्खमंति बहिया जणवयविहारं विहरंति 1१४८1-142

(२१५) तए णं तस्स कंडरीयस्स अणगारस्स तेहिं अंतेहिं य पंतेहिं य [तुच्छेहिं च लूहेहिं य आसेहिं य विरसेहिं य सीएहिं य उणेहिं य कालाइककंतेहिं य पमाणाइककंतेहिं य निच्चं पाण-भोयणेहिं य पयइसुकुमालस्स सुहोचियस्स सरीरंगसि वेयणा पाउब्भूया-उज्जला विउला ककखडा पगाढा चंडा दुक्खा दुरहियासा पित्तज्जर-परिगयसरीरे] दाहवक्कंतीए यावि विहरइ तए णं थेरा अण्णया कयाइ जेणेव पोंडरीगिणी नचरी तेणेव उवागच्छंति उवाग्गच्छित्ता नलिणीवणे समोसडा पुंडरीए निग्गए धम्मं सुणेइ तए णं पुंडरीए राया धम्मं सोद्धा जेणेव कंडरीए अणगारे तेणेव उवागच्छइ उवागच्छित्ता कंडरीयं वंदइ नमंसइ वंदित्ता नमंसित्ता कंडरीयस्स अणगारस्स सरीरंगं सव्वाबाहं सरोगं पासइ पासित्ता जेणेव थेरा भगवंतो तेणेव उवागच्छइ उवागच्छित्ता थेरे भगवंते वंदइ नमंसइ वंदित्ता नमंसित्ता एवं वयासी-अहण्णं भंते कंडरीयस्स अणगास्स अहापवत्तेहिं ओसह-भेसज्ज-[भत्त-पाणेहिं] तेगिच्छं आउंटामि तं तुब्भे णं भंते मम जाणसालासु समोसरह तए णं थेरा भगवंतो पुंडरीयस्स एयमद्धं पडिसुणेति [पडिसुणेत्ता जेणेव पुंडरीयस्स रण्णो जाणसाला तेणेव उवागच्छंति उवाग्गच्छित्ता फासु-एसणिज्जं पीढ-फलग-सेज्जा-संथारंगं] उवसंपज्जित्ता णं विहरंति

तए णं पुंडरीए राया [तेगिच्छिए सदावेइ सदावेत्ता एवं वयासी-तुब्भेणं देवाणुप्पिया कंडरी-यस्स फासु-एसणिज्जेणं ओसह भेसज्ज-भत्त-पाणेणं तेगिच्छं आउट्टेह तए णं ते तेगिच्छिया पुंडरीएणं रण्णा एवं वुत्ता समाणा हट्टतुट्टा कंडरीयस्स अहापवत्तेहिं ओसह-भेसज्ज-भत्त-पाणेहिं तेगिच्छं आउट्टेति मज्जपाणगं च से उवदिसंति तए णं तस्स कंडरीयस्स अहापवत्तेहिं ओसह-भेसज्ज-भत्त-पाणेहिं मज्जपाणएण य से रोगायंके उवसंते यावि होत्था-हट्टे बलियसरीरे जाए ववगय-रोगायंके] तए णं थेरा भगवंतो पुंडरीयं रायं आपुच्छंति आपुच्छित्ता बहिया जणवयविहारं विहरंति तए णं से कंडरीए ताओ रोयायंकाओ विप्पमुक्के समाणे तंसि मणुण्णंसि असण- पाण- खाइम-साइमंसि मुच्छिए गिद्धे गडिए अज्जोववण्णे नो संचाएइ पुंडरीयं आपुच्छित्ता बहिया अब्भुज्जएणं [जणवयविहारेणं] विहरित्तए तथेव ओसज्जे जाए तए णं से पुंडरीए इमीसे कहाए लच्छडे समाणे ण्हाए अंतेउरपरियाल-संपरिवुडे जेणेव कंडरीए अणगारे तेणेव उवागच्छइ उवागच्छित्ता कंडरीयं तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता एवं वयासी-धत्तेसि णं तुमं देवाणुप्पिया कयत्थे कयपुत्ते कयलक्खणे सुलद्धे णं देवाणुप्पिया तव माणुस्सए जम्म- जीविय-कफले जे णं तुमं रज्जं च [रद्धं च कोसं च कोड्डागारं च बलं च वाहणं च पुरं च] अंतेउरं च विच्छेत्ता विगोवइत्ता [दाणं च दाइयाणं परिभायइत्ता मुंडे भवित्ता अगाराओ अणगारियं] पव्वइए अहण्णं

अधन्ने अकयत्ये अकयपुन्ने अकयलक्खणे रज्जे य [रुद्धे य कोसे य कोद्वागारे य बले य वाहणे य पुरे य] अंतेउरे य माणुस्सएसु क्कामभोगेसु मुच्छिए [गिद्धे गदिए] अज्जोदवण्णे नो संचाएमि जाव पव्वइत्ताए तं धन्नेसि णं तुमं देवाणुप्पिया [कयत्ये कयपुन्ने कयलक्खणे] सुलद्धे णं देवाणुप्पिया तव माणुस्सए जम्मजीवियफले तए णं से कंडरीए अणगारे पुंडरीयस्स एयमट्ठं नो आढाइ नो परियाणाइं तुसिणीए संचिद्धइ

तए णं से कंडरीए अणगारे पोंडरीएणं दोच्चंपि तच्चंपि एवं वुत्ते समाणे अकामए अवसवसे लज्जाए गारवण य पुंडरीयं आपुच्छइ आपुच्छित्ता धेरेहिं सद्धि बहिया जणवयविहारं विहरइ तए णं से कंडरीए धेरेहिं सद्धि कंचि कालं उगंगउणेणं विहरित्ता तओ पच्छा समणत्तण-परितंते समणत्तण-निब्बिण्णे समणत्तण-निब्बिच्छए समणगुणमुक्कजोगी धेराणं अतियाओ सणियं-सणियं पच्चोसक्कइ पच्चोसक्किक्ता जेणेव पुंडरीगिणी नयरी जेणेव पुंडरीयस्स भवणे तेणेव उवागच्छइ उवागच्छित्ता असोगवणियाए असोगवरपाय- वस्स अहे पुढविसिलापट्टगंसि निसीयइ नीसिइत्ता ओहयमणसंकम्पे [करतलपल्लत्थमुहे अट्टज्झाणोवगए] झियायमाणे संचिद्धइ तए णं तस्स पोंडरीयस्स अम्मधाई जेणेव असोगवणिया तेणेव उवागच्छइ उवागच्छित्ता कंडरीयं अणगारं असोगवरपायवस्स अहे पुढविसिलापट्टगंसि ओहयमणसंकम्पं जाव झियायमाणे पासइ पासित्ता जेणेव पुंडरीए राया तेणेव उवागच्छइ उवागच्छित्ता पुंडरीय रायं एवं वयासी-एवं खलु देवाणुप्पिया तव पिचभाइए कंडरीए अणगारे असोगवणियाए असोगवरपायवस्स अहे पुढविसिलापट्टे ओहयमणसंकम्पे जाव झियायइ

तए णं से पुंडरीए अम्मधाईए एयमट्ठं सोच्चा निसम्म तहेव संभंते समाणे उट्टाए उट्टेइ उट्टेत्ता अंतेउर-परियालसंपरिवुडे जेणेव असोगवणिया तेणेव उवागच्छइ उवागच्छित्था) कंडरीयं अणगारं तिक्कवुत्तो [आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता] एवं वयासी-धन्नेसि णं तुमं देवाणुप्पिया [कयत्ये कयपुन्ने कयलक्खणे सुलद्धे णं देवाणुप्पिया तव माणुस्सए जम्मजीवियफले जाव अगाराओ अणगारियं] पव्वइए अहं णं अधन्ने अकयत्ये अकयपुन्ने अकयलक्खणे जाव नो संचाएमि पव्वइत्ताए तं धन्नेसि णं तुमं देवाणुप्पिया जाव सुलद्धे णं देवाणुप्पिया तव माणुस्सए जम्म-जिवियफले तए णं कंडरीए पुंडरीएणं एवं वुत्ते समाणे तुसिणीए संचिद्धइ दोच्चंपि तच्चंपि [पुंडरीएणं एवं वुत्ते समाणं तुसिणीए] संचिद्धइ तए णं पुंडरीए कंडरीयं एवं वयासी-अट्टो भंते भोगेहिं हंता अट्टो तए णं से पुंडरीए राया कौडुबियपुरिसे सदावेइ सदावेत्ता एवं वयासी-खिप्पामेव भो देवाणुप्पिया कंडरीयस्स महत्थं [महत्थं महरिहं विउलं] रायाभिसेयं उवड्डवेह जाव रायाभिसेएणं अभिसिचति 19४९1143

(२१६) तए णं से पुंडरीए सयमेव पंचमुद्धियं लोयं करेइ सयमेव चाउज्जामं धम्मं पडिवज्जइ पडिवज्जित्ता कंडरीयस्स संतियं आयारभंडगं गेण्हइ गेण्हित्ता इमं एयारूवं अभिग्गहं अभिगिण्हइ-कप्पइ मे धेरे वंदित्ता नमंसित्ता धेराणं अंतिए चाउज्जामं धम्मं उवसंपजित्ता णं तओ पच्छा आहारं आहारित्ताए ति कइ इमं एयारूवं अभिग्गहं अभिगिण्हित्ता णं पुंडरीगिणीए पडिनिक्खमइ पडिनिक्खमित्ता पुव्वाणुपुव्वि चरमाणे गामाणुगामं दूइज्जमाणे जेणेव थेरा भगवंतो तेणेव पहारेत्थ गमणाए 19५०1-144

(२१७) तए णं तस्स कंडरीयस्स रण्णो तं पणीयं पाणभोयणं आहारियस्स समाणस्स

अइजागरएणं य अइभोयप्पसंगेण य से आहारे नो सम्मं परिणमइ तएणं तस्स कंडरीयस्स रण्णे तंसि आहारंसि अपरिणम्माणंसि पुव्वरत्तावरत्तकालयमंचसि सरीरगंसि वेयणा पाउत्थूया- उज्जला विउला [कक्खडा पगाढा चंडा दुक्खा] दुरहियासा पित्तज्जर-परिगय-सरीरे दाहवक्कंतीए यावि विहरइ तए णं से कंडरीए राया रज्जे य रट्ठे य अंतोउरे य [माणुस्सएसु य कामभोगेसु मुच्छिए गिद्धे गट्टिए] अज्झोववण्णे अट्टदुहट्टवसट्ठे अकामए अवसवसे कालमासे कालं किच्चा अहेसत्तमाए पुढ-वीए उक्ककोसकालट्टिइयंसि नरयंसि नेरइयताए उववण्णे एवामेव समणाउसो [जो अहं निग्गंधो वा निग्गंधी वा आयरिय-उवज्जायाणं अंतिए मुंडे भविता] पव्वइए समाणे पुणरवि माणुस्सए कामभोए आसाएइ [पत्थयइ पीहेइ अभिलसइ से णं इह भवे चेव बहूणं समणाणं बहूणं समणीणं बहूणं सावयाणं बहूणं सावियाणं य हीलणिज्जे निंदणिज्जे खिसणिज्जे गरहणिज्जे परिभवणिज्जे परलोए वि य णं आगच्छइ बहूणि दंडणाणि य मुंडणाणि य तज्जणाणि य तालणाणिय जाव चाउरंतं संसार-कंतारं मुज्जो-मुज्जो] अनुपरियट्टिस्सइ-जहा व से कंडरीए राया 19491-145

(२१८) तए णं से पुंडरीए अणगारे जेणेव थेरा भगवंतो तेणेव उवागच्छइ उवागच्छिता थेरे भगवंतं वंदइ नमंसइ वंदिता नमंसिता थेराणं अंतिए दोच्चंपि चाउज्जामं धम्मं पडिवज्जइ छट्टक्ख-मणपारणगंसि पढमाए पोरिसीए सज्जायं करेइ वीयाए पोरिसीए ज्ञाण झियाइ तइयाए पोरिसीए जाव उच्च-नीयमज्झिमाइ कुलाइं घरसमुदाणस्स भिक्खावरियं अडमाणे सीयलुक्खं पाणभोयणं पडिगाहेइ पडिगाहेत्ता अहापज्जतमिति कट्टु पडिनियत्तेइ जेणेव थेरा भगवंतो तेणेव उवागच्छइ उवागच्छिता भत्तपाणं पडिदंसेइ पडिदंसेत्ता थेरेहिं भगवंतेहिं अत्थणुण्णाए समाणे अनुच्छिए अगिद्धे अगट्टिए अणज्झोववण्णे बिलमिव पन्नगभूएणं अप्पाणेणं तं फासु-एसणिज्जं असण- पाण-खाइम-साइमं सरीरकोट्टगंसि पक्खिवइ तए णं तस्स पुंडरीयस्स अणगारस्स तं कालाइक्कंतं अरसं विरसं सीयलुक्खं पाणभोयणं आहारिवस्स समाणस्स पुव्वरत्तावरत्त- कालसयंसि धम्म-जागरियं जागरमाणस्स से आहारे नो सम्मं परिणमइ तए णं तस्स पुंडरीयस्स अणगारस्स सरीरगंसि वेयणा पाउत्थूया उज्जला [विउला कक्खडा पगाढा चंडा दुक्खा] दुरहियासा पित्तज्जर-परिगय-सरीरे दाहवक्कंतीए विहरइ तए णं से पुंडरीए अणगारे अत्यामे अबले अवीरिए अपुरिसक्कारपर-क्कमे करयल [परिग्गहियं दसनहं सिरसावत्तं मत्थए अंजलिं कट्टु एवं वयासी-

नमोत्तु णं अरहंताणं भगवंताणं जाव सिद्धिगइनामधेज्जं ठाणं संपत्ताणं नमोत्तु णं थेराणं भगवंताणं मम धम्मायरिचाणं धम्मोवएसयाणं पुव्विं पि य णं मए थेराणं अंतिए सब्बे पाणाइवाए पच्चक्खाए जाव बहिद्धादाणे पच्चक्खाए [इयाणि पि णं अहं तेसिं वेव अंतिए सब्बं पाणाइवायं पच्चक्खामि जाव बहिद्धादाणं पच्चक्खामि सब्बं असण-पाण-खाइम-साइमं पच्चक्खामि चउच्चिहं पि आहारं पच्चक्खामि जावज्जीवाए जंपि य इमं सरीरं इद्धं कंतं तं पि य णं चरिमेहिं उस्सास-नीत्तासेहिं चोसिरामि ति कट्टु] आलोइयपडिक्कंते कालमासे कालं किच्चा सब्बइसिद्धे उववण्णे तओ अणंतरं उच्चट्टिता महाविदेहे वासे सिज्झिहइ [बुज्झिहिइ मुच्चिहिइ परिनव्वाहिइ] सब्बदुक्खा-णमतं काहिइ एवामेव समणाउसो [जो अहं निग्गंधो वा निग्गंधी वा आयरिय-उवज्जायाणं अंतिए मुंडे भविता अगाराओ अणगारियं] पव्वइए समाणे माणुस्सएहिं कामभोगेहिं नो सज्जइ [नो रज्जइ नो गिज्जइ नो मुज्जइ नो अज्झोवज्जइ] नो विप्पडिघायमावज्जइ से णं इहभवे चेव बहूणं समणाणं बहूणं समणीणं बहूणं सावयाणं बहूणं सावियाणं य अच्चणिज्जे वंदणिज्जे नमंसणिज्जे

पूयणिञ्जे सक्कारणिञ्जे सम्माणणिञ्जे कल्लणं मंगलं देवयं चेइयं विणएणं पज्जुवासणिञ्जे भवइ परलोए वि य णं नो आगच्छइ बहूणि दंडणाणि य मुंडणाणि य तज्जणाणि य तालणाणि य जाव चाउरंतं संसारकंतारं वीईवइस्सइ-जहा व से पुंडरीए अणगारे एवं खलु जंबू समणेणं भगवया महावीरेणं आइगरेणं तित्थगरेणं सयंसंबुद्धेणं जाव सिद्धिगइनामधेज्जं ठाणं संपतेणं एगुणवीसइ-मस्स नायज्जयणस्स अयमट्ठे पत्रते वाससहस्संप्पि जइ काऊणं संजमं सुविउलंप्पि अंते किलिइ-भावो न विमुज्झइ कंडरीउ व्व अप्पेण वि कालेणं केइ जहा गहिय-सील-सामण्णा साहंति नियय-कज्जं पुंडरीय-महारिसि व्व जहा एवं खलु जंबू समणेणं भगवया महावीरेणं जाव संपतेणं छट्ठस्स अंगस्स पढमस्स सुयखंधस्स अयमट्ठे पत्रते ति बेप्पि १९५२-१४६

● पढमे सुयखंधे एगुणवीसइमं अज्जयणं समत्तं ●

(२१९) तस्सणं सुयखंधस्स एगुणवीसं अज्जयणाणि एककासरगाणि एगुणवीसाए दिवसेसु समप्पेति १९५३-१४७

● पढमो सुयखंधे समत्तो ●

वी ओ सु य ख्वं धो

卐 पढमो वग्गो 卐

-: प ढ मं--अ ज्ज य णं :-

(२२०) तेणं कालेणं तेणं समएणं रायगिहे नामं नयरे होत्या-वण्णओ तस्स णं रायगिहस्स नयरस्स बहिया उत्तरपुरत्थिमे दिसीभाए एत्थ णं गुणसिलए नामं चेइए होत्या-वण्णओ तेणं कालेणं तेणं समएणं समणस्स भगवओ महावीरस्स अंतेवासी अज्जसुहम्मा नामं थेरा भगवंतो जाइसंपत्रा कुलसंपत्रा जाव चोहसपुव्वी चउनाणोवगया पंचहिं अणगारसएहिं सद्धिं संपरिवुडा पुव्वाणुपुव्विं चरमाणा गामाणुगामं दूइज्जमाणा सुहंसुहेणं विहरमाणा जेणेव रायगिहे नयरे जेणेव गुणसिलए चेइए [तेणेव उवागच्छंति उवागच्छिता अहापडिरूवं ओग्गहं ओगिण्हित्ता] संजमेण तवसा अप्पाणं भावेमाणा विहरंति परिसा निग्गया धम्मो कहिओ परिसा जामेव दिंसि पाउब्भूया तामेव दिंसि पडिगया तेणं कालेणं तेणं समएणं अज्जसुहम्मस्स अणगारस्स जेट्ठे अंतेवासी अज्जजंबू नामं अणगारे जाव [अज्जसुहमस्स थेरस्स नट्ठासण्णे नाइदूरे सुस्सूसमाणे नमंसमाणे अभिमुहे पंचलिउडे विणएणं] पज्जुवासमाणे एवं वयासी-जइ णं भंते समणेणं भगवया महावीरेणं जाव संपतेणं छट्ठस्स अंगस्स पढमस्स सुयखंधस्स नायाणं अयमट्ठे पत्रते दोच्चस्स णं भंते सुयखंधस्स धम्मकहाणं समणेणं भगवया महावीरेणं जाव संपतेणं के अट्ठे पत्रते एवं खलु जंबू समणेणं भगवया महावीरेणं जाव संपतेणं धम्मकहाणं दस वग्गा पत्रत्ता तं जहा- चमरस्स अग्गमहिंसीणं पढमेवग्गे बलिस्स अग्गमहिंसीणं पढमेवग्गे बलिस्स वइरोयणिंदस्स वइरोयणरण्णो अग्गमहिंसीणं वीएवग्गे असुरिंदवज्जियाणं दाहिणिल्लाणं इंदाणं अग्गमहिंसीणं तईएवग्गे उत्तरिल्लाणं असुरिंद-वज्जियाणं भवणवासि-इंदाणं अग्गमहिंसीणं चउत्थेवग्गे दाहिणिल्लाणं वाणमंतराणं इंदाणं अग्गम-हिंसीणं पंचमेवग्गे उत्तरिल्लाणं वाणमंतराणं इंदाणं अग्गमहिंसीणं छट्ठेवग्गे चंदस्स अग्गमहिंसीणं सत्तमेवग्गे सूरस्स अग्गमहिंसीणं अट्ठमेवग्गे सक्कस्स अग्गमहिंसीणं नवमेवग्गे ईसाणास्स य अग्गमहिंसीणं दसमेवग्गे

जइ णं भंते समणेणं भगवया महावीरेणं जाव संपत्तेणं धम्मकहाणं दस वग्गा पन्नता पढमस्स णं भंते वग्गस्स समणेणं भगवया महावीरेणं जाव संपत्तेणं के अट्ठे पन्नते एवं खलु जंबू समणेणं भगवया महावीरेणं जाव संपत्तेणं पढमस्स वग्गस्स पंच अज्झयणा पन्नता तंजहा-काली राई रयणी विञ्जू मेहा जइ णं भंते समणेणं भगवया महावीरेणं जाव संपत्तेणं पढमस्स वग्गस्स पंच अज्झयणा पन्नता पढमस्स णं भंते अज्झयणस्स समणेणं भगवया महावीरेणं जाव संपत्तेणं के अट्ठे पन्नते एवं खलु जंबू तेणं कालेणं तेणं समएणं रायगिहे नयरे गुणसिलए चेइए सेणिए राया चेळणा देवी सामी समोसंढे परिसा निग्गया जाव परिसा पञ्जुवासइ तेणं कालेणं तेणं समएणं काली देवी चमरचंचाए रायहाणीए कालिवडेंसभगवणे कालंसि सीहासणंसि चउहिं सामाणियसाहस्सीहिं चउहिं महयरियाहिं सपरिवाराहिं तिहिं परिसाहिं सत्तहिं अणिएहिं सत्तहिं अणियाहिवईहिं सोलसहिं आयरक्खदेवसाहस्सीहिं अण्णेहिं य बहूहिं कालिवडेंसय-भयणवासीहिं असुरकुमारेहिं देवेहिं देविहिं य सत्तिं संपरिवुडा महयाहय- [नट्ट- गीय- वाइयतंती- तल- ताल-तुडिय- धण- मुङ्ग- पडुप्पवादियरवेणं दिव्वाइं भोगभोगाइं भुंजमाणी विहरइ इमं च णं केवलकपं जंबुद्दीवं दीवं विउ- लेणं ओहिणा आभोएमाणी-आभोएमाणी पासइ

एत्थ समणं भगवं महावीरं जंबुद्दीवे दीवे भारहे वासा रायगिहे नयरे गुणसिलए चेइए अहापडिक्खं ओग्गहं ओगिण्हिता संजमेणं तवसा अप्पाणं भावेमाणं पासइ पासिता हट्टुट्ट- चित- पाणंदिया पीइमणा [परमसोमणस्सिया हरिसवस-विराप्पमाणं]- हियया सीहासणाओ अट्टमुट्टेइ अट्टमुट्टेता पावपीढाओ पच्चोरुहइ पच्चोरुहिता पाउयाओ ओमुचइ ओमुइता तित्थगराभिमुही सत्तट्टपयाइं अनुगच्छइ अनुगच्छिता वाम जाणुं अंचेइ अंचेता दाहिणं जाणुं धरणियलंसि निहट्टु तिक्वुत्तो मुद्धाणं धरणियलंसि निवेसेइ ईसिं पच्चुन्नमइ पच्चुन्नमित्ता कडग-तुडिय-धंभियाओ भुवाओ साहरइ साहरिता करयल [परिग्गहियं दसण्हं सिरसावत्तं मत्थए अंजलिं कट्टु एवं वयासी-

नमोत्थु णं अरहताणं भगवंताणं जाव सिद्धिगइनामधेज्जं ठाणं संपत्ताणं नमोत्थु णं सम- णस्स भगवओ महावीरस्स जाव सिद्धिगइनामधेज्जं ठाणं संपाविउकामस्स वंदामि णं भगवंतं तत्थ- गयं इहगया पासउ मे समणे भगवं महावीरे तत्थगए इहगयं ति कट्टु वंदइ नमंसइ वंदिता नमंसित्ता सीहासणवरंसि पुरत्याभिमुहा निसण्णा तए णं तीसे कालोए देवीए इमेयारूवे [अज्झत्थिए चितिए पत्थिए मणोए संकप्ये] समुप्पत्त्रिया-सेयं खलु मे समणं भगवं महावीरे वंदितए [नमंसित्ता सककारित्तए सम्भाणित्तए कल्लाणं मंगलं देवयं चेइयं] पञ्जुवासितए ति कट्टु एवं संपेहेइ संपेहेत्ता आभिओगिए देवे सद्दावेइ सद्दावेत्ता एवं वयासी एवं खलु देवाणुप्पिया समणे भगवं महावीरे विहरइ एवं जहा सूरियाभो तहेव आणत्तियं देइ जाव दिव्वं सुरवराभिगमणजोग्गं करेह [य कारवेह य करेत्ता य कारवेत्ता य खिप्पापेव एवमाणत्तियं] पच्चप्पिणह ते वि तहेव करेत्ता जाव पच्चप्पिणंति नवरं-जोयणसहस्सवित्थिणं जाणं सेसं तेव तहेव नामगोयं साहेइ तहेव नट्टविहिं उवदंसइ जाव पडिगया भंतेति भगवं गोवमे समणं भगवं महावीरं वंदइ नमंसइ वंदिता नमंसित्ता एवं वयासी- कालीए णं भंते देवीए सा दिव्वा देविइदी दिव्वा देवज्जुई दिव्वे देवाणुभाए कहिं गए कहिं अनुप्पविट्ठे गोवमा सरीरं गए सरीरं अनुप्पविट्ठे कूडागारसाला दिट्ठतो अहो णं भंते काली देवी महिइिद्वया महज्जुइया महब्बला महायसा महासोक्खा महाणुभागा कालीए णं भंते देवीए सा दिव्वा देविइदी दिव्वा देवज्जुई दिव्वे देवाणुभागे किण्णा लद्धे किण्णा पत्ते किण्णा अभिसमण्णागए

गोयमाति समणे भगवं महावीरे भगवं गोयमं आमंतेत्ता एवं वयासी-एवं] खलु गोयमा तेणे कालेणं तेणं समएणं इहेव जंबदीवे दीवे भारहे वासे आमलकप्पा नामं नयरी होत्या-वण्णओ अंबसालवणे चेइए जियसत्तू राया तत्थ णं आमलकप्पाए नयरीए काले नामं गाहावई होत्या-अइडे जाव अपरिभूए तस्स णं कालस्स गाहावइयस्स कालसिरी नामं भारिया होत्या-सुकुमालपाणिपाया जाव सुरुवा तस्स णं कालस्स गाहावइस्स धूया कालसिरीए भारियाए अत्तया काली नामं दारिया होत्या-वइहा वइकुमारी जुण्णा जुण्णकुमारी पडियपुयत्थणी निव्विण्णवरा बरगपरिवज्रिया वि होत्या तेणं कालेणं तेणं समएणं पासे अरहा पुरिसादाणीए आइगरे [तित्थगरे सहसवुंद्धे पुरिसोत्तमे पुरिससीए पुरिसवरपुंडरीए पुरिसवरगंधहत्थी अभयदए चक्कुदए मग्गदए सरणदए जीवदए दीवो ताणं सरणं गई पइहा धम्मवरचाउरंत-चक्कवट्टी अप्पडिहय-बरनाणदंसणधरे वियट्टच्छउमे अरहा जिणे कंबली जिणे जाणए तिण्णे ताए मुत्ते मोयए बुद्धे बोहए सव्वणू सव्वदारीसी नवहत्थुस्सेहे समचउरंसंठाणसंठिए वज्जरिसहनारायसंधयणे जल्लमल्लकलंकसेय- रहियसरीरे सिधमयलमरुयमणंतमक्खयमव्वावाहमपुणरावत्तं सिद्धिगइनामधेअं ठाणं संपावि- उक्कामे सोलसाहिं समणसाहस्सीहिं अट्टतीसाए अज्जियासाहस्सीहिं सद्धिं संपरिवुडे पुव्वाणुपुव्विं चरमाणे गामाणुगामं दूइज्जमाणे सुहंसुहेणं विहरमाणे आमलकप्पाए नयरीए बहिया] अंबसालवणे समोसडे परिसा निग्गया जाव पञ्जुवासइ ताए णं सा काली दारिया इमीसे कहाए लद्धइहा समाणी हइ- [तुइ चित्तमाणंदिया पीइमणा परमसोमणस्सिया हरिसवस-विसप्पमाण हियया जेणेव अम्मा- पियरो तेणेव उवागच्छइ उवागच्छिता करयल परिग्गहिंयं दसनहं सिरसावत्तं मत्थए अंजलिं कट्टु] एवं वया एवं खलु अम्मयाओ पासे अरहा पुरिसादाणीए आइगरे [तित्थगरे इहमागए इह संपत्ते इह समोसडे इह चेव आमलकप्पाए नयरीए अंबसालवणे अहापडिरूवं ओग्गहं ओहिण्हिता संजमेणं तवसा अप्पाणं भावेमाणे] विहरइ तं इच्छामि णं अम्मयाओ तुब्भेहिं अत्थणुण्णाया समाणी पासस्स णं अरहओ पुरिसादाणीयस्स पायवंदिया गमित्तए अहासुहं देवाणुप्पिए मा पडिबंधं करेहि ताए णं सा काली दारिया अम्मापिईहिं अत्थणुण्णाया समाणी हइ [तुइ-चित्तमाणंदिया पीइमणा परमसो-मणस्सिया हरिसवस-विसप्पमाण] हियया ण्हाया कयबलिकम्पा कयकोउय- मंगल- पायच्छिता सुद्धप्पावेसाइं मंगलाइं वत्थाइ पवर परिहियया अप्पमहग्धाभरणालंकियसरीरा चंडिया- चक्क-वाल-परिकिण्णा साओ गिहाओ पडिनिक्खमइ पडिनिक्खमिता जेणेव बाहिरिया उवट्टाणसाला जेणेव धम्मिए जाणप्पवरे तेणेव उवागच्छइ उवागच्छिता धम्मियं जाणपवरं दुरुद्ध

ताए णं सा काली दारिया धम्मियं जाणप्पवरं दुरुद्धा समाणे एवं जहा देवई तथा पञ्जुवासइ ताए णं पासे अरहा पुरिसादाणीए कालीए दारियाए तीसे थ महइमहालियाए परिसाए धम्मं कहेइ ताए णं सा काली दारिया पासस्स अरहओ पुरिसादाणीयस्स अतिए धम्मं सोद्धा निसम्मं हइ- [तुइ-चित्तमाणंदिया पीइमणा परमसोमणस्सिया हरिसवस-विसप्पमाण] हियया पासं अरहं पुरिसा-दाणीयं तिक्खुत्तो आयाहिण-पयाहिणं करेइ करेत्ता वंदइ नमंसइ वंदिता नमंसित्ता एवं वयासी-सइहामि णं भंते निग्गंथं पावयणं जाव से जहेयं तुब्भे वयह जं नवरं-देवाणुप्पिया अम्मापियरो आपुच्छामि ताए णं अहं देवाणुप्पियाणं अंतिए [मुंडे भविता णं अगाराओ अणगारियं] पव्वयामि अहासुहं देवाणुप्पिया ते णं सा काली दारिया पासेणं अरहया पुरिसादाणीएणं एवं वुत्ता समाणी हइ- [तुइ-चित्तमाणंदिया पीइमणा परमसोमणस्सिया हरिसवस-विसप्पमाणहियया] पासं अरहं वंदइ

नमंसइ वंदिता नमंसिता तमेव धम्मियं जाणप्पवरं दुरुहइ दुरुहिता पासस्स अरहओ पुरिसादाणी-
यस्स अंतियाओ अंबसालवणाओ चेइयाओ पडिनिक्खमइ पडिनिक्खमिता जेणेव आमलकप्पा
नयरी तेणेव उवागच्छइ उवागच्छिता आमलकप्पं नयरिं मज्झमज्झेणं जेणेव बाहिरिया उवट्ठाण-
साला तेणेव उवागच्छइ उवागच्छिता धम्मियं जाणप्पवरं ठवेइ ठवेता धम्मि-याओ जाणप्पवराओ
पच्चोरुहइ पच्चोरुहिता जेणेव अम्मापियरो तेणेव उवागच्छइ उवागच्छिता करयलपरिग्गहियं
दसनहं सिरसावत्तं मत्थए अंजलिं कट्टु एवं वयासी एवं खलु अम्मयाओ मए पायस्स अरहओ अंतिए
धम्मे निसंते से वि य धम्मे इच्छिए पडिच्छिए अभिरुइए तए णं अहं अम्मयाओ संसारभउच्चिग्गा
भीया जम्पण-मरणणं इच्छामि णं तुव्येहिं अत्थगुण्णाया समाणी पासस्स अरहओ अंतिए मुंडा
भवित्ता अगाराओ अणगारियं पव्वइत्तए अहासुहं देवाणुप्पिए मा पडिवंधं करेहि

तए णं से काले गाहावई विउलं असण-पाण-खाइम-साइमं उवक्खडावेइ उवक्खडावेता
मित्त-नाइ-नियग-सयण-संबंधि-परियणं आमत्तेइ आमत्तेता तओ पच्छा ण्हाए जाव विपुलेणं
पुष्फवत्थ-गंध-मल्लालंकारिणं सकृकारेइ सम्माणेइ सकृकारेता सम्माणेता तस्सेव मित्त-नाइ-नियग-
सयण-संबंधि-परियणस्स पुरओ कालिं दारियं सेयाणपीएहिं कलसेहिं ण्हावइ ण्हावेता सच्चालं-
कार-विभूसियं करेइ करेता पुरिससहस्सवाहिणिं सीयं दुरुहेइ दुरुहेता मित्त-नाइ-नियग-सयण-
संबंधि-परियणेणं सद्धिं संपरिवुडे सच्चिइडीए जाव दुंदुहि-निग्घोस-नाइयरवेणं आमलकप्पं
नयरिं मज्झमज्झेणं निग्गच्छइ निग्गच्छिता जेणेव अंबसालवणे चेइए तेणेव उवागच्छइ
उवागच्छिता छत्ताईए तित्थगराइसए पासइ पासिता सीयं ठवेइ ठवेता कालिं दारियं सीयाओ
पच्चोरुहेइ तए णं तं कालियं दारियं अम्मापियरो पुरओ काउं जेणेव पासे अरहा पुरिसादाणीए
तेणेव उवागच्छंति उवागच्छिता वंदंति नमंसंति वंदिता नमंसिता एवं वयासी-एवं खलु देवाणु-
प्पिया काली दारिया अहं धूया इद्धा कंता जाव उंबरपुष्फं पिव दुल्लाहा सवणयाए किंमंग पुण
पासणयाए एस णं देवाणुप्पिया संसारभउच्चिग्गा इच्छइ देवाणुप्पियाणं अंतिए मुंडा भवित्ता [णं
अगाराओ अणगारियं] पव्वइत्तए तं एयं णं देवाणुप्पियाणं सिस्सिणिभिक्खं दलयामो पडिच्छंतु णं
देवाणुप्पिया सिस्सिणिभिक्खं अहासुहं देवाणुप्पिया मा पडिवंधं करेहि तए णं सा काली कुमारी
पासं अरहं वंदइ नमंसइ वंदिता नमंसिता उत्तरपुरत्थिमं दिसीभागं अवक्कमइ अवक्कमिता
सयमेव आभरणमल्लालंकारं ओमुयइ ओमुइत्ता सयमेव लोयं करेइ करेता जेणेव पासे अरहा
पुरिसादाणीए तेणेव उवागच्छइ उवागच्छिता पासं अरहं तिक्खुतो आयाहिण-पयाहिणं करेइ
करेता वंदइ नमंसइ वंदिता नमंसिता एवं वयासी-आलित्ते णं भंते लोए जाव तं इच्छामि णं
देवाणुप्पिएहिं सयमेव पव्वादिचं जाव धम्ममाइक्खियं तए णं पासे अरहा पुरिसादाणीए कालिं
सयमेव पुष्फचूलाए अज्जाए सिस्सिणियताए दलयइ तए णं सा पुष्फचूला अज्जा कालिं कुमारिं
सयमेव पव्वावेइ जाव [धम्ममाइक्खइ

तए णं सा काली पुष्फचूलाए अज्जा कालिं कुमारिं सयमेव पव्वावेइ जाव धम्ममाइक्खइ
तए णं सा काली पुष्फचूलाए अज्जाए अंतिए इमं एयारूवं धम्मियं उवएसं सम्मो उवसंपत्तिता णं
विहरइ तए णं सा काली अज्जा जाया-इरियासमिया जाव गुत्तवंभयारिणी तए णं सा काली अज्जा
पुष्फचूलाए अज्जाए अंतिए सामाइयमाइयाइं एककारस अंगाइं अहिज्जइ बहूहिं चउत्थ- [छिड्डुम-
दसम-दुवालसेहिं मासद्धपासखमणेहिं अप्पाणं भावेमाणी! विहरइ तए णं सा काली अज्जा अण्णया

कयाइ सरौरबाउसिया जाया यावि होत्या अभिक्खणं-अभिक्खणं हत्ये धोवेइ पाए धोवेइ सीसं धोवेइ मुहं धोवेइ यणंतराणि धोवेइ कक्खंतराणि धोवेइ गुजंतराणि धोवेइ जत्य-जत्य वि य णं ठाणं वा सेज्जं वा निसीहियं वा चेएइ तं पुब्बामेव अब्भुक्खित्ता तओ पच्छा आसयइ वा सयइ वा तए णं सा पुप्फचूला अज्जा कालिं अज्जं एवं वयासी-नो खलु कप्पइ देवाणुप्पिए सभणीणं निगंथीणं सरौरबाउसियाणं होत्तए तुमं च णं देवाणुप्पिए सरौरबाउसिया जाया अभिक्खणं-अभिक्खणं हत्ये धोवसि [पाए धोवसि सीसं धोवसि मुहं धोवसि यणंतराणि धोवसि कक्खंतराणि धोवसि गुजंतराणि धोवसि जत्य-जत्य वि य णं ठाणं वा सेज्जं वा निसीहियं वा चेएसि तं पुब्बामेव अब्भुक्खित्ता तओ पच्छा] आसवसि वा सयसि वा तं तुमं देवाणुप्पिए एयस्स ठाणस्स आलोएहि जाव पापक्खित्ता पडिवज्जाहि तए णं सा काली अज्जाए पुप्फचूलाए अजाजे एयद्धं नो आढाइ नो परियाणाइ तुसिणीया संचिइइ तए णं ताओ पुप्फचूलाओ अज्जाओ कालिं अज्जं अभिक्खणं-अभिक्खणं हीलेंति निंदंति खिसंति गरहंति अवमन्नंति अभिक्कणं-अभिक्कणं एयमद्धं निवारेंति तए णं तीसे कालीए अज्जाए समणीहिं निगंथीहिं अभिक्खणं-अभिक्खणं हीलिज्जभाणीए जाव निवारिज्जभाणीए इमेयारूवे अज्जस्थिए [चितिए पत्थिए मणोगए संकप्पे] समुप्पज्जित्था-जया णं अहं अगारमज्जे वसित्था तया णं अहं सयंवसा जप्पभिइ छ णं अहं मुंडा भवित्ता अगाराओ अणगारियं पव्वइया तप्पभिइ च णं अहं परवासा जाया तं सेयं खलु ममं कल्लं पाउप्पभायाए रयणीए उट्ठियम्मि सूरं सहस्सरस्सिम्मि दिणयरे तेयसा जलंते पाडिक्कयं उवस्सयं उवसंपज्जित्ता णं विहरित्ताए ति कट्ठु एवं संपेहेइ संपेहेत्ता कल्लं पाउप्पभायाए रयणीए उट्ठियम्मि सूरं सहस्सरस्सिम्मि दिणयरे तेयसा जलंते पाडिक्कं उवस्सयं गेण्हइ तत्य णं अणिवारिया अणोहट्ठिया सच्छंदमई अभिक्खणं-अभिक्खणं हत्ये धोवेइ [पाए-धोवेइ सीसं धोवेइ मुहं धोवेइ यणंतराणि धोवेइ कक्कंतराणि धोवेइ गुजंतराणि धोवेइ जत्य-जत्य वि य णं ठाणं वा सेज्जं वा निसीहियं वा चेएइ तं पुब्बामेव अब्भुक्खित्ता तओ पच्छा] आसयइ वा सयइ वा

तए णं सा काली अज्जा पासत्था पासत्थिविहारी ओसन्ना ओसन्नविहारी कुसीला कुसील-विहारी अहाछंदा आहाछंदविहारी संसत्ता संसत्तविहारी बहूवणि वासाणि सामण्णपरियाणं पाउ-णइ पाउणित्ता अद्धमासियाए संलेहणाए अप्पाणं झूसेइ झूसेत्ता तीसं भत्ताइ अणसणाए छेएइ छेएत्ता तस्स ठाणस्स अणालोइय पडिक्कंता कालमासे कालं किच्चा चमरचंचाए रावहाणीए कालिवडिसए भवणे उवयायसभाए देवसयणिज्जसि देवदूसंतरिया अंगुलस्स अंसेखेज्जाए भागमे-त्ताए ओगाहणाए कालीदेवित्ताए उववण्णा तए णं सा काली देवी अहुणोववण्णा समाणी पंचविहाए पज्जतीए [पज्जत्तभावं गच्छति तं जहा-आहारपज्जतीए सरौरपज्जतीए इंदिय-पज्जतीए आणपाण-पज्जतीए] भासमणपज्जतीए तए णं सा काली देवी चउपहं सामाणिय-साहस्सीणं जाव सोलसण्हं आधारक्ख देवसाहस्सीणं अण्णेसिं च बहूणं कालिवडेंसगभवणवासीणं असुरकुभाराणं देवाणं य देवीणं य आहेवच्चं कारेमाणी जाव विहरइ एवं खलु गोयमा कालीए देवीए सा दिव्वा देविइठी दिव्वा देवज्जुई दिव्वे देवाणुभावे लद्धे पत्ते अभिसमण्णागए कालोए णं भंते देवीए केवइयं कालं ठिई पत्रता गोयमा अइढाइज्जाइ पलिओवमाइं ठिई पत्रता काली णं भंते देवी ताओ देवलोगाओ अणंतरं उव्वट्ठित्ता कहिं गच्छेहिइ कहिं उववज्जिहिइ गोयमा महाविदेहे वासे सिज्जि-हिइ बुज्जिहिइ मुच्चिहिइ परिनिव्वाहिइ सव्वदुक्खाणं अंतं काहिइ एवं खलु जंवू समणेणं भगवया

महावीरेणं जाव संपत्तेणं पढमस्स वग्गस्स पढमञ्जयणस्स अयमट्ठे पत्रत्ते त्ति वेमि 19५४1-148

● बीए सुप्रखंडे पढमे वग्गे पढमं अञ्जयणं सप्तं ●

—: बी अं अ ञ्ज य णं—रा ई :-

(२२१) जइ णं भंते समणेणं भगवया महावीरेणं जाव संपत्तेणं धम्मकहाणं पढमस्स वग्गस्स पढमञ्जयणस्स अयमट्ठे पत्रत्ते विइयस्स णं भंते अञ्जयणस्स समणेणं भगवया महावीरेणं जाव संपत्तेणं के अट्ठे पत्रत्ते एवं खलु जंबू तेणं कालेणं तेणं समएणं रायगिहे नयरे गुणसिलए चेइए सामी समोसढे परिस्सा निग्गवा जाव पञ्जुवासइ तेणं कालेणं तेणं समएणं राई देवी चमरचंचाए रायहाणीए एवं जहा काली तहेव आगया नट्टविहि उवदंसित्ता पडिगया भंतेति भगवं गोयमे समणं भगवं महावीरं वंदइ नमंसइ वंदित्ता नमंसित्ता पुव्वभवपुच्छ [गोयमात्ति समणे भगवं महावीरे भगवं गोयमं आमंतेत्ता एवं वयासी-]एवं खलु गोयमा तेणं कालेणं तेणं समएणं आमलकप्पा नयरी अंवसालवणे चेइए जियसत्तू राया राई गाहावई रायसिरी भारिया राई दारिया पासस्स समोसरणं राई दारिया जहेव काली तहेव निक्खंता तए णं सा राई अञ्जा जाया तए णं सा राई अञ्जा पुप्फचूलाए अञ्जाए अंतिए सामाइयमाइयाई एक्कारस अंगाई अहिजइ तए णं सा राइ अञ्जा अण्णया कयाइ सरारबाउसिया जाया था वि होत्वा [तए णं सा राई अञ्जा पासत्वा तस्स ठाणस्स अणालोइयपडिक्कंता कालमासे कालं किट्ठा चमचंचाए रायहाणीए राववंडिसए भवणे उववायसभाए देवसयणिजंसि देवदूसंतरिया अंगुलस्स असंखेज्जाए भागमेत्ताए ओगाहणाए राईदेवित्ताए उववण्णा जाव] अंतं काहिइ एवं खलु जंबू [समणेणं भगवया महावीरेणं दजव संपत्तेणं पढमस्स वग्गस्स विइयञ्जयणस्स] अयमट्ठे पत्रत्ते त्ति वेमि 19५५-१1-149-1

● बीए सुप्रखंडे पढमे वग्गे बीअं अञ्जयणं सप्तं ●

—: त इ यं अ ञ्ज य णं—र य णी :-

(२२२) जइ णं भंते [समणेणं भगवया महावीरेणं धम्मकहाणं पढमस्स वग्गस्स विइयञ्जयणस्स अयमट्ठे पत्रत्ते तइयस्स णं भंते अञ्जयणस्स समणेणं भगवया महावीरेणं के अट्ठे पत्रत्ते] एवं खलु जंबू रायगिहे नयरे गुणसिलए चेइए [सामी समोसढे तेणं कालेणं तेणं समएणं रयणी देवी चमरचंचाए रायहाणीए आगया भंतेति भगवं गोयमे समणं भगवं महावीरं वंदइ नमंसइ वंदित्ता नमंसित्ता पुव्वभवपुच्छ गोयमात्ति समणे भगवं महावीरे भगवं गोयमं आमंतेत्ता एवं वयासी-एवं खलु गोयमा तेणं कालेणं तेणं समएणं] आमलकप्पा नयरी अंवसालवणे चेइए जियसत्तू राया रयणे गाहावई रयणसिरी भारिया रयणी दारिया सेसं तहेव जाव अंतं काहिइ

19५५-२1-149-2

● बीए सुप्रखंडे पढमे वग्गे तइयं अञ्जयणं सप्तं ●

—: च उ त्यं अ ञ्ज य णं—वि जू :-

(२२३) एवं विजू वि-आमलकप्पा नयरी विजू गाहावई विजूसिरी भारिया विजू दारिया सेसं तहेव 19५५-३1-149-3

● बीए सुप्रखंडे पढमे वग्गे चउत्यं अञ्जयणं सप्तं ●

—: पं च षं अ ञ्ज य णं—मे हा :-

(२२४) एवं मेहा वि-आमलकप्पाए नयरीए मेहे गाहावई मेहसिरी भारिया मेहा दारिया

सेसं तहेव एवं खलु जंबू समणेणं भगवया महावीरेणं जाव संपत्तेणं धम्मकहाणं पढमस्स वग्गस्स अयमट्ठे पत्रत्ते 19५५-४1 - 19५५1-149-4 - 149

● बीए सुयक्खंभे पढमे वग्गे पंचमं अज्झयणं समत्तं ● बीए सुयक्खंभे पढमो वग्गो समत्तो ●

५ बीओ वग्गो ५

—: अ ज्झ य णा णि—१-५ :-

(२२५) जइ णं भंते समणेणं [भगवया महावीरेणं धम्मकहाणं पढमस्स वग्गस्स अयमट्ठे पत्रत्ते दोहस्स णं भंते वग्गस्स समणेणं भगवया महावीरेणं के अट्ठे पत्रत्ते] एवं खलु जंबू समणेणं भगवया महावीरेणं दोहस्स वग्गस्स पंच अज्झयणा पत्रत्ता तंजहा-सुंभा निसुंभा रंभा निरंभा मदणा जइ णं भंते समणेणं भगवया महावीरेणं धम्मकहाणं दोहस्स वग्गस्स पंच अज्झयणा पन्नत्ता दोहस्स णं भंते वग्गस्स पढमज्झयणस्स के अट्ठे पन्नत्ते एवं खलु जंबू तेणं कालेणं तेणं समएणं रायगिहे नयरे गुणसिलए वेइए सामी समोसट्ठे परिसा निग्गया जाव पञ्जुवासइ तेणं कालेणं तेणं समएणं सुंभा देवी बलि चंचाए रायहाणीए सुंभवडेंसए भवणे सुंभसि सीहासणंसि विहरइ काली गमएणं जाव नट्टविहिं उवदंसेत्ता पडिगया पुव्वभवपुच्छा सायत्थी नयरीए कोट्टए वेइए जियसत्तू राया सुंभे गायावाई सुंभसिरी भारिया सुंभा दारिया सेसं जहा कालीए नवरं अट्टडाइं पलिओवमाइं ठिई एवं खलु जंबू [समणेणं भगवया महावीरेणं दोहस्स वग्गस्स पढमज्झयणस्स अयमट्ठे पत्रत्ते] एवं-सेसा वि चत्तारि अज्झयणा सावत्थीए नवरं-भाया पिया धूया सरिनामया एवं खलु जंबू समणेणं भगवया महावीरेणं धम्मकहाणं विइयस्स वग्गस्स अयमट्ठे पत्रत्ते 19५६1-150

● बीए सुयक्खंभे बीओ वग्गो समत्तो ●

तइओ वग्गो

—: अ ज्झ य णा णि—१-५४ :-

(२२६) [जइ णं भंते समणेणं भगवया महावीरेणं धम्मकहाणं विइयस्स वग्गस्स अयमट्ठे पत्रत्ते तइयस्स णं भंते वग्गस्स समणेणं भगवया महावीरेणं के अट्ठे पत्रत्ते] एवं खलु जंबू समणेणं भगवया महावीरेणं तइयस्स वग्गस्स चउपणं अज्झयणा पत्रत्ता तं जहा-पढमे अज्झयणे जाव चउपत्रइमे अज्झयणे जइ णं भंते समणेणं भगवया महावीरेणं धम्मकहाणं तइयस्स वग्गस्स चउपत्रं अज्झयणा पत्रत्ता पढमस्स णं भंते अज्झयणस्स समणेणं भगवया महावीरेणं के अट्ठे पत्रत्ते एवं खलु जंबू तेणं कालेणं तेणं समएणं रायगिहे नयरे गुणसिलए वेइए सामी समोसट्ठे परिसा निग्गया जाव पञ्जुवासइ तेणं कालेणं तेणे समएणं अला देवी धरणाए रायहाणीए अलावडेंसए भवणे अलसि सीहासणंसि एवं कालीगमएणं जाव नट्टविहिं उवदंसेत्ता पडिगया पुव्वभवपुच्छा वाणारसीए नयरीए काममहावणे वेइए अले गाहावाई अलसिरी भारिया अला दारिया सेसं जहा कालीए नवरं-धरणअगमहिसिताए उववाओ साइरं अट्टपलिओवमं ठिई सेसं तहेव, एवं खलु जंबू [समणेणं भगवया महावीरेणं तइयस्स वग्गस्स पढमज्झयणस्स अयमट्ठे पत्रत्ते एवं-कमा सतेरा सोयामणी इंदा धणविज्जुया वि सव्वाओ एयाओ धरणस्स अगमहिंसीओ, एए छ अज्झयणा वेणु-देवस्स वि अविसेसिया प्राणिवच्चा, एवं-] हरिस्स अगिसिहस्स पुत्रस्स जलकंतस्स अमियगतिस्स वेलंदस्स घोसस्स वि एए चव छ-छ अज्झयणा एवमेते दाहिणिल्लाणं चउपत्रं अज्झयणा भवति

सव्वाओ वि वाणारसीए काममहावणे चेइए एवं खलु जंबू समणेणं भगवया महावीरेणं धम्मकहाणं तइयस्स वग्गस्स अयमट्ठे पत्रत्ते 19५01-151

● नीए सुयक्खंधे तइओ वग्गो समत्तो ●

चउत्थो वग्गो

—: अ ज्झ य णा णि—१-५४

(२२७) [जइ णं भंते समणेणं भगवया महावीरेणं धम्मकहाणं तइयस्स वग्गस्स अयमट्ठे पत्रत्ते चउत्थस्स णं भंते वग्गस्स समणेणं भगवया महावीरेणं के अट्ठे पत्रत्ते] एवं खलु जंबू समणेणं भगवया महावीरेणं धम्मकहाणं चउत्थस्स वग्गस्स चउत्थं अज्झयणा पत्रत्ता तंजहा-पढमे अज्झयणे जाव चउत्थइमे अज्झयणे, जइ णं भंते समणेणं भगवया महावीरेणं धम्मकहाणं चउत्थस्स वग्गस्स चउत्थं अज्झयणा पत्रत्ता पढमस्स णं भंते अज्झयणस्स समणेणं भगवया महावीरेणं के अट्ठे पत्रत्ते एवं खलु जंबू तेणं कालेणं तेणं समएणं रायगिहे समोसरणं जाव परिसा पञ्चुवासइ तेणं कालेणं तेणं समएणं रूया देवी भूयाणंदा रायहाणी रूयगवडेंसए भवणे रूयगंसि सीहासणंसि जहा कालीए तथा नवरं-पुव्वभवे चंपाए पुत्रभट्ठे चेइए रूयगगाहावई रूयगसिरी भारिया रूया दारिया सेसं तहेव नवरं-भूयाणंदा अग्गमहिसित्ताए उववाओ देसूणं पत्तिओवमं ठिई [एवं खलु जंबू सम-णेणं भगवया महावीरेणं चउत्थस्स वग्गस्स पढमज्झयणस्स अयमट्ठे पत्रत्ते ति वेमि] एवं-सुरूयावि रूयंसावि रूयगावईवि रूयकंतावि रूयप्पभावि एयाओ चेव उत्तरिख्खणं इंदाणं-[वेणुदालिस्स हरि-स्सहस्स अग्गिमाणवस्स विसिट्ठस्स जलप्पभस्स अमितवाहणस्स पभंजणस्स महाघोसस्स भाणियव्वाओ एवं खलु जंबू समणेणं भगवया महावीरेण धम्मकहाणं चउत्थस्स वग्गस्स अयमट्ठे पत्रत्ते] 19५८1-152

● नीए सुयक्खंधे चउत्थो वग्गो समत्तो ●

पंचमो वग्गो

—: अ ज्झ य णा णि—१-३२

(२२८) [जइ णं भंते समणेणं भगवया महावीरेणं धम्मकहाणं चउत्थस्स वग्गस्स अयमट्ठे पत्रत्ते पंचमस्स णं भंते वग्गस्स समणेणं भगवया महावीरेणं के अट्ठे पत्रत्ते] एवं खलु जंबू बत्तीसं अज्झयणा पत्रत्ता तं जहा- 19५९-१1-153-1

- (२२९) कमला कमलप्पभा चेव उप्पला य सुदंसणा
रूववई वहुरुवा सुरूया सुभगावि य 11५३11-1
- (२३०) पुण्णा बहुपुत्तिया चेव उत्तमा तारयावि य
पउमा यसुमई चेव कणगा कणगप्पभा 11५४11-2
- (२३१) वडेंसा केउमई चेव वइरसेणा रइप्पिया
रोहिणी नवमिया चेव हिरी पुप्फवईवि य 11५५11-3
- (२३२) भुयगा भुयगावई चेव महाकठ्ठा फुडा इय
सुघोसा विमला चेव सुस्सराय सरस्सई 11५६11-4

(२३३) एवं खलु जंबू तेणं कालेणं तेणं समएणं रायगिहे समोसरणं जाव परिसा पञ्चुवासइ तेणं कालेणं तेमं समएणं कमला देवी कमलाए रायहाणीए कमलवडेंसए भवणे कमलंसि सीहासणंसि सेसं जहा कालीए तहेव नवरं-पुव्वभवे नागपुरे नथरे सहसंबवणे उज्जाणे कमलस्स गाहावइस्स कमलसिरीए भारियाए कमला दारिया पासस्स अंतिए निक्खंता कालस्स पिसाय-

कुमारिदस्स अग्गमहिंसी अद्धपलिओवमं ठिई एवं सेसा वि. दाहिणिम्ल्लाणं ईदाणं भाणियव्वाओ नागपुरे सहसंबवणे उज्जाणे मायापियरो धूया-सरिनामया ठिई अद्धपलिओवमं 19५९1-153

● वीए सुयक्खंधे-पंचमो वग्गो समत्तो ●

छट्टो वग्गो

—: अ ज्झ य णा णि-१-३२ :-

(२३४) छट्टो वि वग्गो पंचमवग्ग-सरिसो नवरं-महाकालईणं उत्तरिज्जाणं ईदाणं अग्गमहि-
सीओ पुव्वमवे सागेए नगरे उत्तरकुठ-उज्जाणे मायापियरो धूया-सरिनामया सेसं तं चेव
19६०1-154

● वीए सुयक्खंधे छट्टो वग्गो समत्तो ●

सत्तमो वग्गो

—: अ ज्झ य णा णि-१-४ :-

(२३५) [जइ णं भंते समणेणं भगवया महावीरेणं धम्मकहाणं छट्टस्स वग्गस्स अयमट्ठे
पन्तते सत्तमस्स णं भंते वग्गस्स समणेणं भगवया महावीरेणं के अट्ठे पत्रत्ते एवं खलु जंबू समणेणं
भगवया महावीरेणं सत्तमस्स वग्गस्स] चत्तारि अज्झयणा पत्रत्ता तं जहा-सूरप्पभा आयवा अच्चि-
माली पभंकरा एवं खलु जंबू तेणं कालेणं तेणं समएणं रायगिहे समोसरणं जाव परिसा पज्जुवासइ
तेणं कालेणं तेणं समएणं सूरप्पमादेवी सूरंसि विमाणंसि सूरप्पमंसि सीहासणंसि सेसं जहा कालीए
तहा नवरं-पुव्वभवो अरक्खुरीए नयरीए सूरप्पभस्स गाहावइस्स सूरसिरीए भारियाए सूरप्पभा
दारिया सूरस्स अग्गमहिंसी ठिई अद्धपलिओवमं पंचहिं वाससएहिं अब्बहियं सेसं जहा कालीए
एवं-[आयवा अच्चिमाली पभंकरा] सव्वाओ अरक्खुरीए नयरीए 19६१1-155

● वीए सुयक्खंधे सत्तमो वग्गो समत्तो ●

अट्ठमो वग्गो

—: अ ज्झ य णा णि-१-४ :-

(२३६) [जइ णं भंते समणेणं भगवया महावीरेणं धम्मकहाणं सत्तमस्स वग्गस्स अयमट्ठे
पत्रत्ते अट्ठमस्स णं भंते वग्गस्स समणेणं भगवया महावीरेणं के अट्ठे पत्रत्ते एवं खलु जंबू समणेणं
भगवया महावीरेणं अट्ठमस्स वग्गस्स] चत्तारि अज्झयणा पत्रत्ता तं जहा-चंदप्पभा दोसिणाभा
अच्चिमाली पभंकरा एवं खलु जंबू तेणं कालेणं तेणं समएणं रायगिहे समोसरणं जाव परिसा पज्जु-
वासइ तेणं कालेणं तेणं समएणं चंदप्पभा देवी चंदप्पभंसी विमाणंसि चंदप्पमंसि सीहासणंसि सेसं
जहा कालीए नवरं-पुव्वभवो महुराए नयरीए भंडिवडेंसए उज्जाणे चंदप्पभे गाहावई चंदसिरी
भारिया चंदप्पभा दारिया चंदस्स अग्गमहिंसी ठिई अद्धपलिओवमं पत्रासवाससहस्सेहिं अब्बहियं
एवं दोसिणाभा अच्चिमाली पभंकरा महुराए नयरीए मायापियरो धूया-सरिसनामा 19६२1-156

● वीए सुयक्खंधे अट्ठमो वग्गो समत्तो ●

नवमो वग्गो

—: अ ज्झ य णा णि-१-८ :-

(२३७) [जइ णं भंते समणेणं भगवया महावीरेणं धम्मकहाणं अट्ठमस्स वग्गस्स अयमट्ठे

सुयक्खंधो-२, वग्गो-९, अज्झयणं-१-८

१७१

पत्रते नवमस्स णं भंते वग्गस्स समणेणं भगवया महावीरेणं के अट्ठे पन्नते एवं खलु जंबू समणेणं भगवया महावीरेणं नवमस्स वग्गस्स] अट्ठ अज्झयणा पत्रता तं जहा- पउमा सिवा सई अंजू रो-हिणी नवमिया इ य अयला अउठरा [जइ णं भंते समणेमं भगवया महावीरेणं धम्मकहाणं नवमस्स वग्गस्स अट्ठ अज्झयणा पत्रता नवमस्स णं भंते वग्गस्स पट्टमज्झयणस्स के अट्ठे पत्रते] एवं खलु जंबू तेणं कालेणं तेणं समाएणं रायगिहे समोसरणं जाव परिसा पज्जुवासइ तेणं कालेणं तेणं समएणं पउमावई देवी सोहम्मे कप्पे पउमवडैसए विमाणे सभाए सुहम्माए पउमसि सीहासणंसि जहा कालीए एवं अट्ठ वि अज्झयणा काली-गमएणं नायव्वा नवरं-सावत्थीए दोजणीओ हत्थिणाउरे दोजणीओ कं पिळ्पुरे दोजणीओ साएए दोजणीओ पउमे पियरो विजया मायराओ सव्वाओ वि पासस्स अंतियं पव्वइयाओ सक्कस्स अग्गमहिसीओ ठिई सत्त पलिओवमाइ महाविदेहे वासे अंतं काहिति 19६३1-157

● वीए सुयक्खंधे नवमो वग्गो समत्तो ●

दसमो वग्गो

—: अ ज्झ य णा णि—१-८

(२३७) [जइ णं भंते समणेणं भगवया महावीरेणं धम्मकहाणं नवमस्स वग्गस्स अयमट्ठे पत्रते दसमस्स णं भंते वग्गस्स समणेणं भगवया महावीरेणं के अट्ठे पत्रते] एवं खलु जंबू [समणेणं भगवया महावीरेणं दसमस्स वग्गस्स] अट्ठ अज्झयणा पत्रता तं जहा 19६४-१4158-1

(२३९) कण्हाय कण्हराई रामा तह रामरक्खिया

वसू या वसुगुत्ता वसुमिक्का वसुंदरा चेव ईसाणे

11५७11-1

(२४०) एवं खलु जंबू तेणं कालेणं तेमं समएणं रायगिहे समोसरणं जाव परिसा पज्जुवासइ तेणं कालेणं तेणं समएणं कण्हा देवी ईसाणे कप्पे कण्हवडैसए विमाणे सभाए सुहम्माए कण्हंसि सीहासणंसि सेसं जहा कालीए एवं अट्ठ वि अज्झयणा काली-गमएणं नायव्वा नवरं-पुव्वभवो वाणारसीए नयरीए दोजणीओ रायगिहे नयरे दोजणीओ सावत्थीए दोजणीओ कोसंबीए नयरीए दोजणीओ रामे पिया धम्मा माया सव्वाओ वि पासस्स अरहओ अंतिए पव्वइयाओ पुप्फचूलाए अज्जाए सिस्सिणियत्ताए ईसाणस्स अग्गमहिसी ठिई नवपलिओवमाइ महाविदेहे वासे सिज्झिहिति बुज्झिहिति मुच्चिहिति सव्वदुक्खाणं अंतं काहिति एवं खलु जंबू [समणेणं भगवया महावीरेणं धम्मकहाणं दसमस्स वग्गस्स अयमट्ठे पत्रते] 19६४1-158

(२४१) एवं खलु जंबू समणेणं भगवया महावीरेणं आइगरेणं पित्तगरेणं सयंसंदुद्धेणं पुरिसोत्तमेणं पुरिससीहेणं जाव सिद्धिगइ नामधेज्जं ठाणं संपत्तेणं धम्मकहाणं अयमट्ठे पत्रते धम्मकहा-सुयक्खंधो समत्तो दसहिं दग्गेहिं नायाधम्मकहाओ समत्ताओ 19६५1-159

● वीए सुयक्खंधे दसमो वग्गो समत्तो ● नीअं सुयक्खंधं समत्तं ●

६ नायाधम्मकहाओ समत्ताओ

छट्ठं अंगसुत्तं समत्तं

સુચના પત્ર

૧. આગમ સૂત્રોમાં ડાબી બાજુએ છપાયેલ પ્રથમ-અંક, સૂત્ર તથા ગાથાનો સંયુક્ત સર્ળગ ક્રમાંક સૂચવે છે. [અણુક્રમ]
૨. છેડે જમણી બાજુએ દર્શાવેલ હિન્દી ક્રમાંકન આગમમંજુષામાં છપાયેલ સૂત્રાંક અને ગાથાંક સૂચવે છે. [ક્રમ]
૩. સૂત્રને જણાવવા માટે અહીં ઉભા લીટા । । ની વચ્ચે આગમમંજુષા નો સૂત્રાંક મૂકેલો છે. [સુત્તંકો]
૪. ગાથાને જણાવવા માટે અહીં બે ઉભા લીટા ॥ ॥ ની વચ્ચે આગમમંજુષા નો ગાથાંક મૂકેલો છે. [ગાઠંકો]
૫. છેડે જમણી બાજુએ દર્શાવેલ અંગ્રેજી ક્રમાંક - વૃત્તિનો અંક જણાવવા માટે છે. અહીં આપેલ કોઈ પણ સૂત્ર કે ગાથાની વૃત્તિ જેવી હોય તો જે-તે અધ્યયનાદિ નો વૃત્તિમાં જે અંક હોય તે જ અંક અહીં અંગ્રેજી ક્રમાંકન કરી નોંધેલો છે.
૬. અંગ્રેજી ક્રમાંકન માં જ્યાં અંક પછી R આવે ત્યાં આ સૂત્રાંક કે ગાથાંક વૃત્તિમાં બીજી વખત આવેલો જાણવો. - શોધવો.
૭. જ્યાં સૂત્રોમાં [] આ રીતે ચોરસ કોંસ મુકેલા છે તે બે ચોરસ કોંસ વચ્ચેનું લખાણ જાવ વાળા પાઠોની કરેલ પૂર્તિ દર્શાવે છે.

૪૫-આગમના પ્રધાન આર્થિક અનુદાતા

સ.મ્ય.ફ શુ.તા.નુ.રા.ગી શ્ર.મ.ણો.પા.સિ.કા

શ્રીમતી નયનાબહેન રમેશચંદ્ર શાહ - પરિવાર, વડોદરા

પ્રસ્તુત આગમમાં મુખ્ય દ્રવ્ય સહાયક

૬ પૂ.સાધ્વીશ્રી રત્નત્રયાશ્રીજી મ.ની દ્વિતીયપુત્ર્યતિથિ નિમિત્તે સા.મોક્ષરત્નાશ્રીજીની પ્રેરણાથી શાહ ખીમચંદ છગનલાલ પરિવાર, હ. મંજુલાબેન ખેરવાવાળા [હાલ-મુંબઈ]